

R 43



R43

NIC. JOSEPHI JACQUIN

SELECTARUM

S T I R P I U M

A M E R I C A N A R U M

H I S T O R I A

I N Q U A

A D L I N N A E A N U M S Y S T E M A D E T E R M I N A T A E
D E S C R I P T A E Q U E S I S T U N T U R P L A N T A E I L L A E , Q U A S
E N I N S U L I S M A R T I N I C A , I A M A I C A , D O M I N G O , A L I I S-
Q U E , E T I N V I C I N A C O N T I N E N T I S P A R T E
O B S E R V A V I T R A R I O R E S .

C U M

A P P R O B A T I O N E A U C T O R I S

A D E X E M P L A R M A I O R I S O P E R I S ,

V I N D O B O N A E E D I T I ,

R E C U S U M .



M A N H E M I I

I N B I B L I O P O L I O N O V O A U L . & A C A D .

M D C C L X X X V I I I .

MANIOC.org

NUMÉRO D'ENTRÉE: 4559

Archives départementales de la Guadeloupe





AD LECTOREM.

Opера botanica viri illustris, cuius *Floram Americanam* hic vulgamus, observationum copia atque praestantia adeo sese commendant, ut nullus facile rei herbariæ cultor iis carere aut velit aut possit.

Obstat autem pretium eorum nimium, ex tabularum pulcherrime pictarum multitudine prognatum, quo minus istius doctrinæ vel avidissimus quisque, nisi pecuniosus sit, illa sibi compararet. Ipsæ tamen observationes ita comparatae sunt, ut absque tabulis istis atque figuris pictis intelligenti cuivis lectori utilissimæ esse possint,

summa quippe cura in ipso plantarum loco natali factæ, adeoque tam veræ quam perspicuæ.

Haud vanam itaque nos operam suscepisse credimus, Floram Americanam hac, qua nunc prodit, forma edentes; quam in rem, intercedente *V. C. Friderico Casimiro Medico*, celeberimus auctor exemplum manu sua correctum humanissime nobis suppeditavit.

Majoris operis, paucissimis adhuc visi vel cogniti, notitiam aliquam Lectoribus præbituri, in singularum plantarum descriptione tabulam pictam, eo respicientem, ubique indicavimus, ut quærere & consulere eam possit, cui bibliotheca publica aut privata, cimelio isto, quod optamus, instructa, patuerit. Manhemii ex Bibliopolio novo aulico & academ. pridie Kal. Aprilis

M D C C L X X X V I I .



PRAEFATIO AUCTORIS.

Quas per quadriennium in America torrida peregrinanti contigit mihi observare stirpes rariores, has ad rei herbariæ augmentum, eorumque, qui scientiæ huic amoenissimæ studium navant, oblationem, enumerare in hoc opere, & qua potero perspicuitate, tradere institui. Quia in re si gratam eruditis operam me posuisse, intellexero, nunquam erit, quod pœnitentia aut laborum, quos improbos superavi, aut vitæ discriminum, in quæ plurima veni: sed horum tunc jucunda semper accidet recordatio. Sicubi vero Botanicorum exspectationi minus fecero satis, confido fore, ut cum materiæ amplitudo & diversitas, tum peregrinantis conditio, habeant aliquid legitimæ excusationis. Si quid autem præter voluntatem erraverim, lubens feram errati animadversionem.

Numerosa profecto in Historia Naturali remotæ ab Europa regiones istæ offerunt perito indagatori, eaque singularia sæpe, pulcherrima, omnique dignissima attentione: at cuncta hæc unius uti non affequitur hominis industria, ita nec ingenium capit. Quis enim (ut in sola Botanice maneamus,) credidisset, post inventas in triplici suo ad insulas Caribæas itinere, editasque a magno Plumiero plantas, ibidem adhuc tot latuisse alias, quæ ante paucos annos per clarissimum Browneum, meoque haud ita pridem ex opusculo innotuerunt orbi? Et quin sic quoque confecta res sit, tantum abest, ut afferere audeam, solam stirpium feracissimam Martinicam posse adhuc diu sufficere indefessi excursionibus Botanici, priusquam exhauriatur. Nam ipse ego examinavi non paucas, conspexi plures, quas adumbrare vetuit vel præceps occasio vel aliarum occupationum multitudo, omnino mihi visas incognitas. Adde, quod Gramina & Cryptogamas de industria neglexerim in universum: præterquam enim quod eram tunc temporis in hisce discernendis difficilioribus minus versatus, & quod definiri istiusmodi plantæ ægre possunt absque instituta comparatione congenerum & collata auctorum lectione, quo adminiculo destituebar utroque; inde etiam aliarum obvia quærenti copia facile superabat vacui temporis momenta; ita quidem, ut in lucris ponerem, istis omissis, in has incumbere examinandas, quæ diuturnam operam

haud postularent; adferendo scilicet hoc pacto
stirpibus observatis accessionem multo uberiorem.

Plumierus, qui ad littora Caribearum appulit Botanicorum primus, omnia ibi nova, incognita Europaeis, suaque annotatione digna offendebat. Poterat igitur brevi ditare Botanicam stirpium rarissimarum indice locupletissimo; quem & confecisse illum summo cum molimine, grata erga magnum virum & perpetua apud omnes extabit memoria. Eodem fere tempore in insula Jamaicensi idem præststit celeberrimus Sloaneus. His successimus post dimidii saeculi intercapedinem ego & clarissimus Browneus. Ad omnem vero passum nos salutabant plantæ a viris modo laudatis jam citatæ, quas inter minus recte ampleve descriptas suscepimus nobis præ cæteris illustrandas, atque his alias necdum observatas adjecimus plurimas. Venient fortasse post nos alii, qui sunt reliquias investigaturi; ut sic aliquando Flora perfici Caribea, atque in lucem prodire Europæam venustissima valeat.

In ordinandis stirpibus meis, viri celeberrimi, Caroli Linnæi, Systema sexuale adoptavi, atque aliis sponte prætuli omnibus: non quod hoc omni parte absolutum haberem, nec probe intelligerem expertus, Naturæ non raro illud vim inferre, & multis iisque saepe inevitabilibus vitiis laborare, quibus tamen nec aliorum carent systemata alia: sed quia major & diuturnior in hoc perficiendo opera fuit posita a pluribus; tum plan-

tas complectitur in hunc usque diem bene perspectas plerasque; & quia hodie generalius est receptum. Nam quod ad illos spectat, quibus Naturale systema solum jactatur atque in pretio est; ego certe, cogitationibus ipsos & deliciis delectari suis, uti facile patior, sic illos rogatos velim, opinionem meam ne ferant moleste; dum systema vegetabilium quocunque nihil esse aliud judico, quam merum stirpium pro lubitu definitarum vocabularium methodicum. Nec idcirco inficias eo, in Cruciformibus puta paucisque aliis, naturam videri terminos classibus statuere fixos, qui vel ad ipsas usque in Medicina vires se extendunt: unde omnino sequitur, affinitates in habitu structuraque plantarum ad earundem cognitionem summæ esse considerationis oportere, & magnam saepe, si caute procedatur, adferre in materiem Medicam utilitatem. At vero nullas Natura leges a nobis assumit, quas ipsa prior non posuit, deditque. Quapropter affinitates, quia has in rebus productis servari a Natura videmus, investigare sedulo nos decebit, quando nata inde doctrina amplior sine dubio pensatura est adhibitos labores. Sed quis nostrum affinitatibus singulis suos constituet fines? Donec in nostram notitiam perveniant creatae omnia, id nullus animo confidet prudenti: da, pervenerint; idem Naturæ, implicitissimo & supra captum nostrum multiplici tramite gradientis, adversari instituto, forte tunc tandem intelligemus. Optimo igitur sum-

moque jure Varietates & Individua ad Species reducimus certas, & Naturam ducem habemus. Has autem Species si velimus ad Genera naturalia cogere, ubique Naturam desiderabimus; quæ præscriptos limites transiliens, & nostris nullatenus se accomodans saltibus, more pergit suo illudere humanis ingeniis. Erunt itaque arte facta Genera omnia, quæ ob hoc ipsum nullum unquam condere poterunt systema Naturale. At opus est tamen illis: opus est Clasibus, & Methodo; quibus nostram inscitiam sublevemus atque memoriam, ne multitudine obruamur: quare juvat factitiis e systematibus aliquod, consilio nostro convenientius, in auxilium vocare; quorum ne optio deesset quærenti, omni industria caverunt hujus ævi Botanici.

Magnum sane in Speciebus discriminem passim obtinet quoad ipsum factitii Generis characterem. Nos igitur oportet, omnes & singulas bene perspectas habere, si hunc talem cupiamus, qui cunctas fideliter species suas reddat. Id quidem huc usque deficit in generibus plurimis, & deficiet diu; donec cœperimus attente adnotare prodereque scriptis omnia illa, in quibus novæ imprimis minusque obviæ species a communi charactere deflectant; idque in Individuis pluribus, ne casu, naturæ lufum, characteris partem dicamus. Hinc ego in descriptionibus meis, ad vivam semper stirpem concinnatis, & ad incudem sæpius revocatis, momenta vel minima adduxi; in va-

riantes partes, qua potui diligentia, inquisivi; atque hæc proposui sermone, non eleganti illo quidem comptoque, sed compendioso & perspicuo, quali principes hodie in arte viri uti consueverunt. Prospexero sic etiam Botanicis, post me fortasse olim easdem regiones invisuris, tædioque ipsos, quod multum ego devorare debui, levavero certe; sine ulla enim hæsitatione plantas determinabunt jam vulgatas illico, omisasque rite distinguent.

Fore autem nonnullos, existimo, quibus diligentia mea videbitur nimia, quoties advertent, tantam me curam impertivisse geometricæ partium dimensioni. Lubens profiteor, me hic ultra vulgus non sapuisse; & fruticem fruticem, arborem semper me vocasse arborem, nulla habita gemmarum ratione. Uti enim pro legitima & stabili obtinenda stirpium definiendarum distinctione, minus apte & rarissime recurritur ad magnitudinis statum, nisi quando proportionem servet illa certam; sic contra in plantæ alicujus descriptione, antea mihi incognitæ, si cuncta docear, sola magnitudine qualicunque excepta, videor mihi rei summam desiderare, nec, qualem optarem, posse istiusmodi plantæ speciem mihi fingere. At, inquieras, quam hæc ipsa magnitudo nihil variat magis. Sed propterea communiorum illam ubique elegi; indicavique, si cui esset subjecta inconstantia.

Descripsi porro plantas, quales has ipsa Ame-

rica dedit mihi spectandas. Hoc ideo monitos Botanicos volo, si quando ex meis aliquam obviam in caldariis stirpem habeant, ab exposita descriptione in una alterave parte discrepantem, ne scilicet suspicentur, aut diversam a mea ignorantque stirpem se esse adeptos, aut falsa & erronea me tradidisse. Vidi enim saepenumero in solo natali plantas, five Americanas, five Europaeas, elegantissimas & aspectu jucundas; easdemque, dum colebantur in hortis, nativi oblitas decoris, squalere totas: alias iterum istio habitus sui negligentia praetereuntium fugientes attentionem, hic pulcritudinem consecutas novam, omnium ad se allicere oculos, nec implere posse.

Virent etiam perpetua fronde in loco natali perennes stirpes illae, quibus folia decidere non indicavi; et si in caldaria Europaea translatae non semper in hoc morem patrium sequantur. Antheras autem examinavi, exploso necdum polline turgentes; quando figuram exhibent stabilem magisque propriam; quum effiectae mutationem subire soleant ingentem, & induere habitum generaliorem.

Cum autem agebatur de imponendo stirpi incognitae novo nomine, (quae profecto res, modo ne barbari simus, nec confusionem pariamus, arbitraria magis mihi videtur quam severissimis legibus esse obnoxia,) jure quodam meo frui inventor volui; & vel a Græca lingua, utpote aptio-

re, nomina derivavi; vel illustris Plumieri vestigia premens, illa deduxi a viris, qui, quod bene de scientia nostra meriti essent, digni videbantur, quos Flora compensaret Botanica immortalitate. Nec veritus hic sum illorum, inter omnes pauci qui solos se melius sapere sibi gratis fingunt, iudicia. Donec enim pro me, quos sequar, habeo Tournefortium, Boerhavium, Dillenium, Jussieos, Linnæum, Hallerum, Burmannum, ipsumque etiam (reliquos ut taceam eruditissimos viros) Linnæanæ industriæ hostem acerrimum, Heisterum; donec, inquam, in re mere arbitraria similiūm virorum sententia exemploque ero suffultus, parvi pendam istorum futilis cachinnos. Non equidem istiusmodi nomina aliis præpono; imo qualemque significans præ omnibus reliquis esse felicendum, persuasissimum habeo: sed quam raro sincerum tale occurrat, & quam difficulter in magno novorum generum numero istiusmodi nomina componi & omnibus tribui possint, fatebitur expertus. Expeditum quidem hic fuisset confugium, si, quæ apud Pedacium Dioscoridem occurrunt stirpium hodie incognitarum antiqua & exoleta nomina, hæc plantis illico meis indidissem. Sed sacra ista semper habui; putavique, sicuti non temere illa stirpibus Græcis aut in civitatibus apud veteres regionibus crescentibus, ita nunquam Americanis similibusve exoticis imponi aut attribui oportere. Qua in re ultra modum excedentes Botanici, Materiei Medicæ historiam

inenodabili multarunt confusione. Nec etiam, quas nunc ignoramus celebratas priscis temporibus plantas, ignorare semper fato quodam tene-
mur. Evenire potest, quæ nobis negatur, ea
uti gaudeant felicitate posteri; ut his illarum plu-
rimæ innotescant, cognitæque usurpata non juste
ab aliis nomina sibi sua vindicent.

Si quis est, qui miretur meam, maleque
taxet in recensendis plantarum viribus medicis
inopiam, illi respondeo: solere has barbaros, si
quas noverint efficaciores, ceu solas sibi relictas
a novis hospitibus suis opes, alto perpetuoque
abscondere silentio, nullo vel pretio vel promissis
emendas. Aliarum autem plerarumque stirpium
vires minus quidem spectatæ sunt; & hæ prædi-
dicantur tam vagæ, & ipsæ tam numerosæ in
usum vocantur, ut medico opus esset annos in
eodem loco confidente, qui per repetita experi-
menta veras detegeret, distingueretque a dubiis
& falsis: id quod a peregrinatore cæterum occu-
patissimo neutquam est postulandum.

In citandis auctoribus cavi sedulo, ne de-
ciperer similitudine; quem haud infreenter er-
rorem summos etiam Botanicos errasse, nem-
inem vel mediocriter in horum lectione versatum
fugere potest: unde obscuritas & dissensio, ne-
cessæ est, oriantur. Id contingere tunc solet præ-
cipue, quando de non visis nec satis fuse ab aliis
descriptis judicium ferre, nimium properamus.


Quum observabam, nomina plantarum ver-

nacula crebro differre vel ipsis in pagis villisque vicinis, generaliora, si qua erant, notavi; omisi cætera, quæ farraginem dumtaxat attulissent inanem.


Icones, quibus hoc opus illustravi, a me fuerunt in ipsa America ad vivas plantas magnitudine naturali delineatæ. In his perficiendis omnem adhibui curam, ut essent exactissimæ; atque ita illas ornavi, ut ne oculis placerent magis, quam litarent veritati.

In hac altera editione Systema Linnæi citavi, a clarissimo Joanne Andrea Murray anno 1774 editum; ut omissa hæc citatio plantam ibidem desiderari indicet. Ex aliis etiam operibus meis plures plantas huc reduxi, qui huc pertinebant.

Atque hæc sunt, quæ præfari debui; ut aliquam darem operis institutique rationem.



STIRPIUM
AMERICANARUM
HISTORIA.





MONANDRIA.

MONOGYNIA.

I. ALPINIA (*spicata*) floribus spicatis.

(Pl. americ. pict. Tab. I. *Caulis florifer.*)

CAL. Spadix simplex. Spathæ subrotundæ, acuminatæ, imbricatæ, coloratæ.

Perianthium monophyllum, tubulosum, trifidum, germini insidens, persistens: laciniis acutis, erectis, parvis.

COR. monopetala, incurva. Tubus oblongus, calyce paulo longior. Limbus trifidus, tubo longior: laciniis lanceolatis, concavis, acutis, erectis, intermedia incumbente lateralibus.

Nectarium monophyllum, corollam leviter superans, erectum. Tubus ventricosus, superne per totam longitudinem fissus, insertus tubo corollæ. Limbi labium inferius unicum, undulatum, subtrifidum, obtusum, antrorsum inter lacinas laterales corollæ leviter pendens.

STAM. Filamentum unicum, e dorso tubi corollæ ortum, canaliculatum, apice fimbriatum, nectario oppositum, cum eodemque corollam internam bilabiata mentiens. Antheræ geminæ, lineares, filamenti internæ parti longitudinaliter juxta invicem adnatæ.

PIST. Germen subrotundum, inferum. Stylus filiformis, fere longitudine filamenti, eidemque inter antheras accumbens. Stigma capitatum, compressum, inferne corpusculo biglanduloso instructum.

PER Capsula obsolete trigona, coronata calyce, trilocularis, trivalvis.

SEM. Plura, oblonga, inæqualia, obtusa, nidulantia in pulpa molli.

Radicis perennis, carnosa, inæqualis, candida; cul-

mos producit plures, subgeniculatos, suberectos, teretes, glabros, pedem unum alterumve altos. Hos ornant folia oblonga, acuminata, basi attenuata, nitida, integerrima, alterna, donata petiolo brevissimo teretique; floralia sub spica plerumque quaterna. Quemlibet terminat culmum spica conica, solitaria, & densissime compacta e spathis coccineis, crassis, coriaceis, imbricatis, & unifloris. Ab inferioribus successive prodeunt flores inodori, flavi, pollicares, cito marcescentes. Martinenses, a quibus *Canne de riviere* sive *Arundo fluvialis* appellatur, radicum culmorumque decocta passim adhibent in Gonorrhœa aliisque morbis pro potu refrigerante, admistis non raro aliis etiam herbis. Negant floris color foliique glabrities summa, esse hanc plantam Pisonis Jacuacangam Marcgraviique Paco Caatingam; nisi haec varient in variis regionibus. Perperam Linnæus conjicit, a Costo arabico hanc non differre, longe alia planta, uti ex Costi datis descriptionibus iconibusque nimiopere elucet. Transmissa radix in horto Cæsareo per paucos annos læte vegetavit, floruitque; dein periit.

Crescit in Martinica ad ripas herbaceas torrentum, & in montibus umbrosis humidis. Vidi florentem Septembri & Octobri.

DIAANDRIA. MONOGYNIA.

- I. JUSTICIA (*spicosa*) fruticosa; spinis axillaribus; pendunculis lateralibus. *Linn. syst. 59.*
(*Pl. americ. piæt. Tab. 2. Ramus cum flore & fructu*)
- CAL. Perianthium quinquepartitum, persistens: foliolis lanceolato-linearibus, acuminatis, erectis, tubo corollæ duplo brevioribus.
- COR. monopetala. Tubus subcylindricus, erectus, Limbus ringens, tubo duplo brevior: labio superiori bifido, suberecto: labio inferiori trifido, reflexo: utriusque laciniis ovatis, obtusis, subæqualibus.
- STAM. Filamenta duo, filiformia, petalo breviora, ejusdemque tubo per totam longitudinem adnata. Anthæra oblongæ, didymæ.

PIST. Germen oblongum. Stylus filiformis, erectus, statim minibus brevior. Stigma simplex, obtusum.

PER. Capsula oblonga, basi attenuata, superne crassior, obtusa cum acumine, compressiuscula. magna, superne bilocularis, bivalvis: valvulis navicularibus, ungue elasticō.

SEM. in quolibet loculamento bina, suborbicularia, compresso-plana, emarginata.

Frutex quinquepedalis in ramos dividitur paucos, teretes, infirmos, lentos, foliosos, & longissimos. Folia sunt ovata vel ex lanceolato ovata, integerrima, obtusa, nitida, opposita, petiolata, circiter semipollicaria. Spinis armatur subulatis, acuminatis, fortibus, oppositis, patentissimis, duplo brevioribus quam sunt folia, in quorum axillis locantur. Hæc vero inter spinasque pedunculi excent terni vel quarterni, uniflori, breves, oppositique; qui flores sustinent inodoros, pollice breviores, corolla purpurea.

Non video, cur sejungendæ a Justiciis Diantheræ sint; quum & habitu & charactere nimium quantum congruant, & solum discrimen in anthera unica vel duplice, eidem filamento inhærente, consistat.

Crescit in fruticetis & arbustis maritimis circa Portum Principis in Domingo. Januario flores & fructus maturos collegi.

2. JUSTICIA (*sessilis*) fruticosa; floribus axillaribus, sessilibus. Linn syst. 59.

(Pl. americ. Pict. Tab. 3 Ramus cum flore & fructu.)

CAL. corollæ tubo triplo brevior.

COR. Labium superius integerrimum, acutumque.

STAM.] ut in *Dianthera Linnaei*.

PIST. RELIQUA, ut in *Justicia spinosa*.

Planta fruticosa, erecta. Rami graciles, teretes. Folia ovata, acuta, obsolete crenata, breviter petiolata, opposita. Bractæ florales acutæ, exiguae, plerumque binæ. Flores solitarii, axillares, sessiles, inodori, corolla purpurea. De altitudine hujus fruticis, a pecude perpetuo demessū, vix ferre judicium potui; unde bipedalem raro offendit.

4 PLANTAE

Crescit frequens in insulæ sancti Eustachii sepibus, & fruticetis. Florentem vidi Julio & Augusto.

3. JUSTICIA (*pectoralis*) annua; panicula dichotoma.
(Pl. americ. pict. Tab. 4. *Caulis florens.*)

CAL. Foliolum superius duplo brevius reliquis.

COR. Tubus rugosus, limboque brevior. Labium superius integerrimum, concavum.

STAM. ut in *Dianthera Linnaei.*

PIST. Stigma acutum.

RELIQUA, ut in *Justicia spinosa.*

Planta erecta, duos tresve pedes alta, herbacea, radice forte annua. Folia habet lanceolato-acuminata, bipollucaria. Paniculae terminales, dichotomæ, tenues. Flores numerosi, rubelli, sessiles, bracteis suffulti setaceis. Tota planta odorem spirat foeni recens collecti cum aromate levi atque reficiente conjunctum. Syrupum indecum faccharo conficiunt incolæ adversus pectoris morbos laudatissimum. Cum sale marino tusa folia prodesse in vulneribus feruntur; unde nomen apud Gallos obtinuit *Herbe à charpentier seu Herbæ lignarii*, quod ille præceteris, opera sua vulneribus expositus, eadem indigeat, utique soleat.

Crescit in Domingo & Martinica. Florentem utробique Januario vidi.

4. JUSTICIA (*eustachiana*) foliis lanceolato-oblongis; pedunculis multifloris; bracteis linearibus, apice latiusculis, acuminatis.

(Pl. americ. pict. Tab. 5. *Caulis superior cum flore & fructu.*)

COR. Limbus rugosus, longitudine tabi. Labium superius bidentatum, acutum.

STAM.] ut in *Dianthera Linnaei.*

PIST. ut in *Justicia spinosa.*

Frutex inelegans, erectus, tripedalis. Caules lignei, teretes, fragiles. Folia lanceolato-oblonga, acuminata, integerrima, glabra, breviter petiolata, opposita, tripollucaria. Pedunculi communes racemosi, parum divisæ, terminales multiflori; axillares plus minus triflori. Bracteæ plerumque ternæ, calyce breviores. Flores inodori, sesquipollucares, corolla purpurea. Capsulae cuneiformes.

AMERICANAÆ.

,

Passim crescit in collibus apricis aridis insulæ sancti Eustachii. Vidi florentem Septembri.

5. JUSTICIA (*martinicensis*) foliis ovato-acuminatis; pedunculis trifloris; bracteis ovatis, calyce longioribus.

(Pl. americ. pict. Tab. 6. *Caulis florens.*)

CAL. brevissimus.

COR. monopetala, ringens. Tubus tenuis, longissimus, intortus. Limbi hinc inversi labium superius oblongo-ovatum, concavum, obtusum, saepius integerrimum, longitudine tubi, situ inferius. Labium inferius oblongum, obtusum, levissime tridentatum, revolutum, ejusdem longitudinis, situ superiorius.

STAM. ut in *Dianthera Linnæi*.

PIST. Stigma interdum bifidum.

RELIQUA, ut in *Justicia spinosa*.

Planta geniculata, suberecta, ramosa, bipedalis, mihi visa annua. Caules glabri, obsolete sexangulares. Folia integerrima, ovata, acuminata, glabra, opposita, basi in petiolum tenuem attenuata, infima quinquepollicaria, sequentia sensim minora, summa vix semipollicaria. Pedunculi axillares, trifidi, triflori, oppositi, breves. Bracteæ ovatæ, concavæ, acuminatæ, integerrimæ, glabræ, sessiles, oppositæ, superiore minore. Flores inodori, fere sesquipollicares, corolla rubente.

Crescit in sepibus arboreis Martinicæ; & ad margines sylvarum.

6. JUSTICIA (*carthagenenis*) foliis lanceolato-ovalibus, utrinque acuminatis; floribus spicatis; bracteis oblongo-cuneiformibus. Linn. syst. 59.

(Pl. americ. Pict. Tab 7. *Caulis summus florens*)

Planta ercta, elegans in fruticetis sepibusque densis sexpedalis, ad margines vero eorundum tripodalis, mihi visa annua. Caules teretes, glabri. Folia integerrima, dorso nitida, facie scabriuscula, breviter petiolata, opposita, semipedalia. Spicæ axillares & terminales. Bracteæ sub singulo flore ternæ, ex oblongo cuneiformes, obtusæ cum exiguo acumine, dorso pilosuscule, ercta, calyce multo longiores. Flores inodori, sesquipollicares, corolla purpurea, filamentis candidis, charaktere omnino Justiciæ eustachianæ.

Crescit Carthaginæ indicæ; præcipue in sylvula, quæ prædio La Quinta dicto adjacet. Floret Octobri.

7. JUSTICIA (*pulcherrima*) floribus tetrands.

(Pl. americ. piæt. Tab. 249, fig. 1. *Flos dempto calyce.*

Capculæ valvula utrinque conspecta. Duo semina. Folium)
Justicia spicis terminalibus, pluribus; flore rubro. Loef.
his p. 244.

CAL. Perianthium pentaphyllum, persistens: foliolis lanceolato-acuminatis, concavis, erectis, parvis, superiori reliquis latiori.

COR. monopetala, ringens. Tubus compressus, longissimus, erectus, basi leviter subrotundus, mox attenuatus, dein sensim superiora versus in faucem ampliatus. Limbus bilabiatus. Labium superius erectum, tubo duplo brevius, semibifidum: lacinia lanceolato-acuminatis, concavis. Labium inferius trifidum: lacinia media lanceolata, acuminata, plana, deflexa, maxima, labii superioris longitudine: lateralibus acutis, planis, minimis, incisuris exterioribus multo minus profundis.

STAM. Filamenta quatuor, filiformia, erecta, longitudine eadem, inserta inferiori parti corollæ, eandemque ferme æquantia. Antheræ oblongæ, apice obtusæ, basi acutæ, dorso villosæ, maximæ, longitudinaliter filamentis affixæ.

PIST. Germen ovato-oblongum. Stylus filiformis, erectus, longitudine staminum. Stigma simplex, acutum.

PER. } SEM. } ut in *Justicia spinosa*.

Planta fruticosa, perennis, erecta, sexpedalis. Caules teretes, vix ramosi, ex eadem radice sæpe plures. Folia ovata, utrinque acuminata, margine obsolete denticulata, facie glabrescula, dorso obsita tomento tenuissimo & ad tactum mollia, venis adscendentibus & parallelis notata, opposita, breviter petiolata, octo pollices longa. Spicæ erectæ, dense, tetragonæ, triplicares, axillares oppositæ & terminales plerumque binæ vel quaternæ. Bractæ subrotundo-cordatae. Flores inodori, fere biplicares, serie quadruplici longitudinaliter in spica ordinati, pulcherrimo conspicui rubore, quo omnibus palmam concoloribus facile præripiunt, ab ipsis Hibisci Malvavisci, quocum mixtum crescere solet, floribus solo ful-

gore suo jam eminus distinguendi. Ad Justicias hanc plantam retuli, etiamsi ab his deflectant corollæ structura statim unumque numerus: neque Ruelliis Barleriisve magis convenit; quum petalis ab illis valde discrepet. sintque staminæ semper longitudine æqualia. Forte proprium genus exigit.

Crescit frequens Carthagenaæ in sylvaticis montis de la Popa. Floret Octobri & Novembri.

I. GRATIOLA (*Monnieria*) foliis ovali-oblongis; pedunculis unifloris; caule repente. *Linn. syst. 60. Jacq. obs. part. I, pag. 4, t. I.*

(*Pl. americ. pict. Tab. 261, fig. 64. Cauliculus florens.*) *Moniera minima repens, foliis subrotundis; floribus singularibus alaribus.* *Brown. jam. I, p. 296, f. 1.*

Moniera repens, foliis linearibus oppositis. *Ehret. pict. t. 14, f. 2.*

Anagallis cærulea, portulacæ aquaticæ caule & foliis. *Sloan. hist. jam. I, p. 203, t. 129, f. 1.*

CAL. Perianthium pentaphyllum, persistens: foliolis acutis, erectis. Horum tria ovalia, plana, apice patula; quorum unum duplo latius opponitur binis reliquis. Alia duo lanceolato-linearia, concava, cum priorum foliolo latiori binisque aliis cruciatim locantur; quorum singulorum ad dorsum adstat bractea similis, at duplo fere brevior latiorque, tandem decidua.

COR. monopetala. Tubus infundibuliformis, erectus, calycem vix superans. Limbus quinquefidus: laciñiis oblongis, obtusis, planis, tubum fere æquantibus, patentissimis; quarum duæ, quæ folioli calycini latioris latus claudunt, pauxillo sunt angustiores.

STAM. Filamenta quatuor, subulata, orta in tubo corollæ; quorum duo, inflexa utrinque ad latus laciñiæ superioris petali, tubum superant. Reliquis duobus erectis, brevibus, ante laciñias corollæ angustiores positis. Antheræ oblongæ, incumbentes.

PIST. Germen ovatum, calyce duplo brevius. Stylus filiformis, petalo paulo brevior, inclinatus versus filamenta breviora. Stigma capitatum, obtusum.

PER. Capsula ex oblongo ovata, bilocularis, bivalvis.

SEM. numerosa, oblonga, minuta.

Caules ramique teretes & repentes in decursu r. dieu-

PLANTAE

las fibrosas ex axillis terræ immittunt. Hi etiam sex septemve pollicibus longius haud procedant a radice principe, densa tamen ramificatione & plantularum aggerie ita operiunt solum, ut totum inde virescat. Folia sunt ovali-oblonga, obtusa, glaberrima, integra, glabra, crassula, plana, brevissime petiolata, & opposita. Ex quorum alternis alis pedunculi oriuntur solitarii & foliorum plus minus longitudine, qui florem gerunt singularem, inodorum; & a me solum visum album. Tota planta est sapore amariuscum.

Mense Decembri vidi crescentem non procul ab oppido Cap François in Domingo in locis limosis & uidis.

I. URICULARIA (*montana*) nectario subulato, foliis ovatis, integerrimis. *Linn. syst. 61.*

(*Pl. americ. piæ Tab. 8. Tota planta florens.*)

Radicis fibrosæ, cinereæ, solani esculenti modo tuberculis rotundis parvisque distinctæ. Scapus simplex, aphyllus, uniflorus vel biflorus, glaber, erectus, semipedalis. Folia radicalia, duo, obverse ovata, basi attenuata in petiolum, acuta, nitida, integerrima, crassula, avenia, convexa, opposita, sesquipollucaria. Flos elegans, maximus, albus, calyce & nectario tinctis levigatus.

Crescit in Martinicæ altissimis montibus; loco prætensi udo & aprico. Florentem vidi Februario.

I. VERBENA (*lappulacea*) tetrandra; calycibus fructigeris subrotundis, erectiusculis; seminibus echinatis. *Linn. syst. p. 62.*

(*Pl. A. P. Tab. 9. Caulis pars cum flore & fructu.*) Verbena foliis cordato-ovatis, spicatis; calycibus inflatis; seminibus echinatis. *Brown. jam. 5, p 116.*

Scorodonia floribus spicatis purpurascensibus pentapetaloides, semine unico majori echinato. *Sloan. hisp. jam. I, p 174, t. 110, f. I.*

Blairia. Houst. amm. herb. 277.

Bursara. Loefl hisp. p. 194.

Descriptionem & characterem genericum hujus plantæ optime tradidit Læflingius, qui consuli potest. His pauca addo. Stigma obtusum reflectitur. Semina singula sunt bilocularia nucleos duos continent. Sloanei figura fructus nimios exhibet.

Crescit in plerisque Caribæis.

TRIANDRIA.

MONOGYNIA.

I. **I**RIS (*martinicensis*) corollis imberibus; germinibus trigonis; foveis ad basin petalorum glandulosis. *Linn.*
syst. 79.

(*Pl. americ. pict. Tab. 10. Tota planta florens; dein semen, fructus, & genitalia.*)

CAL. Spatha universalis diphylla, bivalvis; valvulis, acuminatis, compressis, carinatis, erectis, marcescentibus.

COR. Petala sex, germini insidentia. Quorum tria alterna obovata, obtusa, emarginata cum acumine, concava, erectiuscula. Reliqua tria oblonga, prioribus fere duplo minora, ad medietatem usque erectiuscula, dein introrsum deorsumque plicata, apice iterum extrorsum reflexo.

Fovea nectarea in quolibet petalo ad basin.

STAM. Filamenta tria, capillaria, tenella, incurva, petalis minoribus fere duplo breviora. Antheræ oblongæ, erectæ, maximæ, post pollinis explosionem sulco longitudinali angulos stigmatis firmiter amplectantes, antea libere iisdem suppositæ.

PIST. Germen oblongum, trigonum, inferum. Styles filiformis, erectus, fere longitudine filamentorum. Stigma omnium maximum, semitrifidum, patens: lacinias oblongis, subtus angulatis, crassis, ad apicem levi fimbria coronatis, longitudine petalorum minorum, nec petaliformibus.

PER. Capsula oblonga, obtusa, obtuse trigona, ad semina torosa, trilocularis, trivalvis.

SEM. plurima, subglobosa, disposita in quolibet loculo serie duplice longitudinali.

E radice solida, subbulbosa, circumdata radiculis teretibus albidis, & sobelifera, caulis exsurgit erectus, teretiusculus, bipedalis, simplex vel bifarium divisus; quem ornant basi, Ixiæ chinensis more, folia ensiformia, acuminata, integerrima, rigidiuscula, disticha, plana, basi carinata, superne simplicia, erectopatentia, pauca.

Ex eadem spatha successive pauci prodeunt flores inodori, flavi, pedunculati, structura sua a congeneribus in multis diversi: quorum habent petala impressam foveam glandulosam nigratn nitidamque, qualis conspicitur in pluribus Ranunculis. Semina sunt fusca. Ex his Vindobonæ enata planta, admodum jam radicibus suis se propagaverat, at flores non produxit, ac dein periit.

Crescit in Martinicæ pratis montosis sylvaticis humentibus. Floret Novembri & Decembri.

I. HIRTELLA (*americana*) Linn. *syst. 201.*

(*Pl. americ. pict. Tab. 11. Ramus florens.*)

CAL. Perianthium quinquepartitum, persistens: laciniis ovato-subrotundis, concavis, æqualibus, reflexis.

COR. Petala quinque, subrotunda, concava, patentia, æqualia, decidua.

STAM. Filamenta tria, filiformia, basi plano-compressa, erecta, longissima, persistentia, tandem spiraliter involuta. Antheræ subrotundæ.

PIST. Germen subrotundum, villosum, compressum in latere, cui stamen nullum adponitur; sed e quo ipso erigitur Stylus filiformis, inferne hirsutus, longitudine fere staminum. Stigma simplex.

PER. Bacca - - - -

SEM. unicum - - -

Arbor ramosa, vigintipedalis vel sæpe minus alta. Folia oblonga, acuta, integerrima, nitida, breviter petiolata, alterna, quinquepollicaria. Racemi terminales, villosi, laxi, semipedales. Flores inodori, petalis albis, staminibus styloque cruciatim positis. Fructum non vidi maturum.

Crescit in Martinicæ sylvis ad ripas torrentum, aliquique, Floret Aprili & Majo.

I. HIPPOCRATEA (*scandens*). Linn. *syst. 75.*

(*Pl. americ. pict. Tab. 12. Ramus florifer.* Tum fructus tricapsularis, in quo una capsula adhucdum integra, altera in valvulas suas secedens, in tertia delapsis jam valvulis semina nuda. Semen separatum. Germen in flore adolescens.)

Coa scandens, fructu trigemino. *Plum. gen. 8, ic. 88.* Bejuco pendulus; floribus paniculatis. *Loefl. hisp. 314.*

CAL. Perianthium quinquepartitum, minimum, corollæ

concolor, deciduum: foliolis subrotundis, obtusis, patentissimis.

COR. Petala quinque, ovata, obtusa, patentissima, inferne plana lateribusque revolutis, superne concava apicibusque subbilocularibus.

STAM. Filamenta tria, subulata, erecta, longitudine corollæ, basibus latissimis superimposita receptaculo germinis. Antheræ latæ, utrinque emarginatæ, sulco transversali notatae, erectæ.

PIST. Germen triquetro-subrotundum, a corolla remotum per receptaculum proprium disciforme, cui pro parte immersum. Stylus simplex, erectus, longitudine statinum. Stigma simplex, obtusum.

PER. Capsulæ tres, obverse oblongo-cordatae, compressæ, magnæ, uniloculares, bivalves: valvulis carinatis, caducis; remanentibus suspensis seminibus.

SEM. in quavis capsula quinque, oblonga, ab invicem valde compressa; aucta ala membranacea oblonga, magna.

Arbor hæc, quam in memoriam summi Hippocratis nominavit primus ejusdem detector Plumierus, tempestate sicca, quæ quotannis Carthagena obtinet, quoque omnes solent arbores folii omnimode orbari, cum Capparidibus paucisque aliis lète virere pergit. Cæterum inelegans est; & vicinis arboribus, quibus scandendo se sustentet, indiget; volubilis nunquam a me deprehensa; quare nomen Linnæi triviale mutavi. In ramos dispescitur longissimos, teretes, lentos, per totam sæpe longitudinem ad intervalla ornatos ramusculis oppositis, brachiatis, foliosis, & florigeris. Folia habet ovata aut lanceolata, nitida, leviter serrata, idque obtuse vel acute, petiolata, opposita, tres polices longa, in ramusculis dumtaxat novellis viridibus: locis umbrosis interdum semipedalia; in apri- cis aridissimis quandoque crassiuscula, ad tactum pinguia, & cum denticulis levissimis integerrima. Corymbi ramosi, interdum amplissimi, axillares, oppositi, rarius etiam terminales. Flores inodori, exigui, e luteo virentes. Capsulæ glabrae, fuscae. Semina fusca. Nullus dubito, quin beati Læflingii Bejuco (quo nomine Hispani plantam scandentem in genere appellant,) sit Hippocratea. In flore minimo receptaculum solidum germinis pronectario ille habuit; & germen descripsit jam adolescens; non quale existit in prima floris explicatione.

Crescit in Martinica, Domingo, frequentior Carthagena: in montibus; vallibus; inundatis maritimis. Vidi florentem Aprili & Decembri. Fructus Julio collegi; quorum multi corrumpuntur brevi, ut ex semine transmissio propagatio in Europa vix sperari possit.

I. TAMARINDUS (*indica*). Linn. *syst.* 74, Rumpf. *amb.* 2, p. 90, t. 23.

(Pl. *americ.* pict. Tab. 13. *Ramulus florens. Fructus trispermus dimidia corticis parte spoliatus, ut pulpa filamentis adhaerens pateat. Dein fructus integer dispermus, idemque monospermus.*)

Siliqua arabica, quæ Tamarindus. Bauh. *pin.* 403.

Balam-puli. Rheed. *mal.* I, p. 39, t. 23.

CAL. *Spatha diphylla*, caduca: foliolis ovatis, concavis, obtusis, coloratis, petaliformibus.

Perianthium tetraphyllum, deciduum: foliolis ovatis, acutis, planiusculis, reflexis, coloratis, superiori & inferiori paulo latioribus.

COR. Petala tria, ovata, concava, acuta, crenata, undulata, longitudine calycis, omnia basim fursum adscendentia & dein reflexa, duobus lateralibus paulo majoribus,

STAM. Filamenta tria, subulata, ad medietatem usque in unum corpus coalita, arcuata versus corollam, basi locata in sinu calycis vacuo. Antheræ ovatæ, incumbentes.

PIST. Germen oblongum, compressum, incurvum, insidens pedicello adnato internæ convavæ parti receptaculi floris per totam longitudinem. Stylus subulatus, ascendens, staminibus paulo longior. Stigma simplex, obtusum.

PER. Legumen oblongum, compressum, obtusum cum acumine, ad semina torosiusculum; cortice vestitum duplice, exteriori sicco & fragili; interiori membranaceo; inter utrumque pulpa molli; uniloculare, non dehiscens.

SEM. pauca, angulato-subrotunda, plano-compressa, nitida, dura.

Elegantissima & vasta hæc arbor comam format densam amplissimamque; trunko stat crasso & erecto; in ramos dispescitur numerosos, præsertim juniores. Lignum grave

& durum est. Folia sunt pinnata, alterna, quinquepollicaria: foliolis sine impari utrinque numero incerto circiter quatuordecim, oblongis, cum exiguo acumine obtusis, integerrimis, glabris, parvis, oppositis. Racemi simplices, laxi, penduli, circiter duodecimflori, longitudine circiter foliorum. Flores suaveolentia magna praediti, plurimi abortantes; spatha rosea; calyce flavescente; corolla lutea variegataque venis rubris. Fructus figura & magnitudine valde variant: nunc recti, nunc incurvi; si semen continent unicum, magis subrotundi; si duo, tria, vel quatuor, inter haec mage minusve contracti: unde exempli gratia monospermum dispermumque in iconе adjunxi, trispermumque alium, longitudinaliter dimidio cortice nudatum, ut pulpa interior prodeat in conspectum. Cortex exterior in maturo rufus est, nec quidquam ruboris habet; in immaturo qui viret: unde falsus color in opere Blackwelliano adpingitur. Pulpa matura libera est a cortice exteriori, spatiumque hunc inter & interiores, veluti condensata, nunc amplius haud replet; si iste diffringitur, pedunculo appensa haeret per pauca ligamenta valida, quæ illam amplectuntur, videnturque antea fuisse vasa succum nutritium advehentia: ab iisdem tamen levi vi solubilis. Solent incolæ in duas distinguere hanc arborem species, videlicet in dulcem & in acerbam. Revera dantur istiusmodi Tamarindi, quarum omnes quotannis fructus multo aliis sunt dulciores; & vice versa: sed quum alias non discrepent, aut soli, in quo crescunt, diversitati, aut alii ignotæ mihi causæ attribuendum hoc esse saporis discrimen, existimo. Americanis, præ cæteris autem Curaçaviensibus, in summa aestimatione sunt hi fructus, maturique magna copia comeduntur crudi, absque incommodo alio, nisi quod ventrem moveant interdum levius. Mihi sic dicti dulces satis arrisere; semper tamen admisi quiddam deprehendi acerbi, quod linguam vellicabat ingratissimis. Martinicenses comedere hos potuisse immaturos, adeoque austerrissimos, admiratus fui. Ex immaturis & decorticatis condimenta cum saccharo Cubenses faciunt omnium sapidissima. Filamentorum corpus ubi in tres partes separatur, emittit etiam quatuor stipulas setaceas breves cum iisdem alternantes. Stipulae aliae duas, prioribus duplo longiores, enascuntur e receptaculo fere

fere ad dorsum corporis filamentosi. Possunt autem spe-
ctari hæ stipulæ, ac si essent aliorum staminum rudimen-
ta; ita ut tria dicerentur fertilia, sterilia reliqua, quo
certe Cassiis evaderet affinis. Nunquam mihi in America
fructus tam longos, quam Indici ex horto Malabarico &
herbario Amboinensi sunt, videre contigit. Pulpa, quam
in officinis Europæis habemus, faccharo condita in Indiis
fuit.

Crescit in pratis, hortis, cultis Caribæarum & Con-
tinentis; fortasse hic nullibi vere sylvestris. Floret Octo-
bri & Novembri. In horto Vindobonensi semel floren-
tem vidi.

I. CALLISIA (*repens*). Linn. syst. 80.

(Pl. americ. pft. Tab. 14. *Caulis integer. Stamen mi-
croscopio auctum.*)

CAL. Perianthium triphyllum, persistens: foliolis linear-
lanceolatis, concavis, acuminatis, erectis.

COR. Petala tria, lanceolata, acuminata, planiuscula, ere-
cta, tenella, calyce paulo breviora.

STAM. Filamenta tria, capillaria, erecta, desinentia in
bracteam subrotundam, calyce duplo longiora. Anthe-
ræ globosæ in quolibet filamento geminæ, adfixæ parieti
interno bractæ.

PIST. Germen oblongum, compressum. Stylus capilla-
ris, erectus, longitudine staminum. Stigma penicilli-
forme.

PER. Capsula ovata, acuta, compressa, bilocularis, bi-
valvis.

SEM. in quolibet loculo bina, subrotunda.

Planta herbacea, tenella, repens, viridis, e geni-
culis radices terræ immittens, superne erectiuscula, basi
ramosiuscula, glabra. Folia ovata, acuminata, basi sub-
cordata, integerrima, crassiuscula, nitida, pinguis, va-
ginantia, margine purpureo, alterna in caulinulo tereti,
quem terminant alia aggregata atque imbricata in rosulam
patentem. Flores parvi, tenelli, sessiles, virentes, tres
plerumque simul e cujuslibet vagina folii inferioris.

Crescit in Martinicæ humidis herbaceis & umbrosis;
frequens inter Commelinas.

I. COMOCLADIA (*integrifolia*) foliolis integrerrimis.
Linn. syst. p. 74.

Comocladia caudice simplici, quandoque brachiato, fronde comosa, pinnata; floribus confertis sessilibus; racemis alaribus. *Brown. jam. I, p. 124.*

Prunus racemosa, caudice non ramoso, alato fraxini folio non crenato, fructu rubro subdulci. *Sloan. hist. jam. 2, p. 131, t. 222, f. I.*

CAL. Perianthium monophyllum, coloratum, tripartitum: laciniis subrotundis, concavis, obtusis, patentibus.

COR. Petala tria, ovata, plana, acuta, patentissima, calyce duplo longiora.

STAM. Filamenta tria, subulata, erecta, petalis breviora. Antheræ quadrisulcatæ, incumbentes.

PIST. Germen subrotundum, parvum, in fundo calycis. Stylus vix ullus. Stigma simplex, obtusum.

PER. Drupa oblonga, obtusa, levissime incurva, superne notata tribus punctis nigris.

SEM. Nux membranacea, ejusdem figuræ. Nucleus similis.

Hæc arbor altitudinem viginti pedum raro superat. Truncus erectus & crassitiei mediocris in ramos dividitur paucos crassos & frondosos; quos confertim ad extremitates ornant folia pinnata glabraque; constantia costa tereti & bipedali; foliolisque cum impari utrinque ut plurimum octo, ovato-lanceolatis, acuminatis, integerrimis, per venas transversas leviter rugosis, lateribus parum revolutis, petiolatis, quadripollicaribus. In horum plurium axillis racemi pendent paniculati, debiles, laxi, graciles, sesquipedales, divisi in racemos partiales laterales alternos circiter vinginti quatuor; quorum infimi sunt quadripollicares, supremi vix lineares, longitudine intermediorum proportionali: atque hi etiam magis minusve sunt compositi, unde ampla panicula exsurgit. Flores in qualibet panicula sunt numerosissimi, exigui, sessiles, inodori, saturate rubentes. Horum semper in eodem racemo plures sunt corolla calyceque quadripartitis cum staminibus quatuor; quorum tamen, respectu triandrorum, parvus est numerus. Drupæ sunt rubræ, nitidæque. Tota porro arbor scatet succo aqueo leviterque glutinoso, qui ad liberi aëris attactum nigrescit, manumque attractantis colore imbuit atramento nigriore, vix tandem lotioni cedente.

Crescit in Domingo & Jamaica. Floret Decembri, Januario, & Februario.

2. GOMOCLADIA (*dentata*) foliolis spinoso-dentatis.

Linn. syst. p. 74.

(Pl. A. P. Tab. 259, fig. 2. *Folium. Fololi postica facies.*)

Hanc arborem habitu adeo similem præcedenti inveni, ut, etiamsi nec flores videre nec fructus mihi conzierit, ad idem referre genus non hæsitarerim, donec illi innotescant. Caudice etiam est erecto, & in paucissimos ramos diviso. Folia habet pinnata, superne nitida, & frondosa: costa tereti, sesquipedali: foliolis utrinque a sex ad decem cum impari, oblongis, acuminatis, aculeato-dentatis, dorso venosis & subtomentosis. Succus hujus arboris est lacteus, glutinosus, ad aëris attactum evadens omnia aterrimus, pannos manumque inficiens nigredine, in cute cum ipsis demum detritis squamulis abscedente, in pannis nulla vulgari ne vel per annos repetita lotione delebili. Odor vero succi stercoreus est, & perfecte talis, qualis oriri solet ex aceto in sulphuris hepar instillato. Intacta arbor odoris nullum indicium præbet; sed vel leviter vulnerata dicto fætore viciniam inficit brevi. Cubenses Guao appellant, asseruntque, arboris umbram subitus dormienti, sanguineo præprimis atque obeso, saepius fuisse lethalem, quam rem exemplis probare contendunt. Ego aliquamdiu sub hac arbore comoratus, mutationem in me expertus sum nullam; ad somnum vero usque experimentum prosequi non lubuit.

Crescit passim in sylvaticis circa Havanam.

TRIGYNIA.

I. TRIPALARIS (*pyramidalis*) spicis erectis, terminalibus. (*americana*) Linn. syst. 110. Loefl. tr. 256.(Pl. americ piſt. Tab. 259, fig. 3. *Calyx fructifer. Semen.*)

CALYCEM magnum trifidumque, COROLLAM nullam, STAMINA tria, & totidem STYLOS Læflingius invenit in flore, quem mihi haud contigit videre.

PER. nullum. Calyx persistens, ex tubo ovato triquetra & intus forisque piloso excurrit in alas tres, longissimas, oblongas, obtusas, membranaceas, venosas, ruſas, subpellucidas, & erecto-patulas.

SEM. Nux ovate-acuminata, triquetra, nitidissima, glaberrima.

berrima, nigra, ad angulos acuta, unilocularis, hærens in tubo calycis. Nucleus ejusdem figuræ.

Arbor erecta, elegans; trunco humanæ altitudinis; coma rara, ex ramis horizontalibus in pyramidem longam efformata. Spicæ longæ, graciles, erectæ, terminales. Folia sunt oblongo-ovata, acuminata, maxima, integra, petiolata. Ad latera nucis arcte appressa stant foliola tria, plana, cuneiformi-oblonga, obtusa, fere longitudine nucis, rufa; quæ habuisse pro petalis persistentibus, si non petala negasset in flore Læflingius. Ergo forte filamenta sunt?

Crescit in sylvis territorii Carthaginensis.

2. TRIPALARIS (*ramiflora*) racemis lateralibus, aggregatis.

(Pl. A. P. Tab. 259, fig. 4. *Calyx fructifer. Semen.*)

Arbor ramosa, diffusa. Folia ovata vel ex subrotundo ovata. Racemi laterales in ramis, aggregati, densi, a dimidio ad sesquipolicem longi, multiflori, villosi. Pedunculi proprii hirsuti, breves, sparsim aggregati in pedunculo communi a duobus ad quinque simul ex nodulo bracteato. Florem non vidi. Fructus idem cum discrimine sequenti. Paulo minor est. Calycis tubus villosus, nec pilosus est; etiam magis teres. Nux fusca nullum nitorem habet; cæterum ovata, sexfulcata, nec triquetra. Filamenta (si sunt) persistentia, sublinearia. Nuclei utriusque sapore pollent adstringente & subacri.

Crescit rarius in sylvis Carthaginæ; frequentius ad flumen Cinu.

TETRANDRIA.

MONOGYNIA.

I. PETITIA (*domingenensis*).

(Pl. A. P. Tab. 259, fig. 5. *Folium.*)

CAL. Perianthium monophyllum, parvum, erectum, quadridentatum, inferum, persistens.

COR. monopetala. Tubus cylindricus, erectus, longus.

Limbus quadrifidus: laciis ovatis, acutis, planis, reflexis, tubo duplo brevioribus.

STAM. Filamenta quatuor, subulata, brevissima, in superiori parte tubi. Antheræ erectæ.

PIST. Germen subrotundum, parvum. Stylus subulatus, erectus, longitudine staminum. Stigma simplex.

PER. Drupa subrotunda.

SEM. Nux ovata, obtusa, bilocularis. Nuclei solitarii, oblongi.

Arbuscula erecta. Rami juniores tetragoni, sulcati. Folia ovato-oblonga, acuminata, glabra, integerrima, dorso venosa, opposita, semipedalia; petiolo superne ad angulum obtusum inflexo. Paniculæ axillares, tripollicares, in divisionibus stipula subulata suffultæ. Flores exigui, plurimi, albi, saepe triandri corolla calyceque tripartitis. Hanc novi generis plantam nominavi in memoriam Francisci Petit Chirurgi, qui plantas aliquot rariores descripsit.

Crescit in sylvaticis Domingo.

I. **CALLICARPA** (*integritifolia*) foliis integerrimis, acutis, subtus levissime tomentosis.

(Pl. americ. piæt. Tab. 259, fig. 6. *Flos.*)

CAL. Perianthium monophyllum, infundibuliforme, laxe corollam ambiens, parvum, margine quadrifido obtusoque, persistens.

COR. monopetala. Tubus cylindricus, erectus, tenuis, longus. Limbus quadrifidus: laciñis ovalibus, obtusis, planis, patentissimis, tubo duplo brevioribus.

STAM. Filamenta quatuor, filiformia, erecta, corollam superantia. Antheræ ovales, incumbentes.

PIST. Germen minimum, in fundo calycis. Stylus filiformis, superne bifidus, tubo corollæ brevior. Stigmata simplicia, acuta.

PER. Bacca obovata, obtusa, unilocularis.

SEM. quatuor, oblonga, pulpa distincta.

Arbuscula inelegans, inordinate ramosa, duodecim pedes alta. Folia oblongo-ovata, acuta, integerrima, subtus tomento levissimo incana, odore subaromatico praedita, petiolata, opposita, duos tresve pollices longa. Racemi compositi, densi, incani, axillares & terminales. Flores odorati, numerosi, corolla albicante. Baccæ nitidæ, virides, ad basin flavæ, pisi magnitudine.

Crescit Carthaginæ in sylvaticis.

I. AQUARTIA (*aculeata*). Linn. syst. 130.
 (Pl. americ. pict. Tab. 15. *Ramus cum flore & fructu.*)
 CAL. Perianthium monophyllum, persistens. Tubus brevis, infundibuliformi-patens. Limbus subquadridius, patens: laciniis subrotundis, planis, duabus oppositis minoribus.

COR. monopetala. Tubus brevissimus. Limbus quadrifidus: laciniis linearibus, obtusiusculis, planis, patentissimis, calyce longioribus.

STAM. Filamenta quatuor, brevissima. Antheræ lineares, erectæ, omnium maximæ, longitudine fere corollæ.

PIST. Germen subrotundum, in fundo calycis. Stylus filiformis, totus declinatus, longitudine corollæ. Stigma simplex.

PER. Bacca subglobosa, unilocularis.

SEM. plura, compressa.

Frutex hic quadripedalis, ramosus, erectus, habitu quodammodo accedit ad Solanum tomentosum. Rami seniores lignosi & glabri armantur aculeis subulatis, brevibus, sparsisque: juniores sunt inermes & tomentosi. Folia habet subovata, integerrima, interdum leviter repanda, tomentosa, incana, alterna, petiolata, pollicaria. Pedunculi uniflori, laterales, solitarii, brevissimi que florem sustinent inodorum, corolla candida, calyce que tomentoso, in quo laciniæ minores interdum sunt obsoletæ. Fructus sequitur flavus, nitidus, piselli magnitudine, qui calycis sinui insidet. Fruticem hunc nominavi in honorem amici carissimi, virique eruditæ & historiæ naturali addictissimi, Benedicti Aquart, in patria insula Martinica primarios inter negotiationem agentis; quo in excursionibus Botanicis meis sæpen numero feliciterque usus fui socio, & cui plurimas ad historiam naturalem spectantes res pulcherrimas me debuisse, gratus recordabor semper.

Crescit in Domingo ad sinum Bayaha in rupibus fruticosis maritimis. Florentem vidi pariterque fructus maturos ferentem Octobri.

I. IXORA (*alternifolia*) foliis alternis.

(Pl. americ. pict. Tab. 16. *Ramus cum flore & fructu. Dein semen.*)

Jasminum aliud arborescens, foliis solani, minus. *Plum.*
spec. 17, ic. 157, f. I.

CAL. Perianthium monophyllum, minimum, tubulosum,
erectum, quadridentatum, acuminatum, inferum, per-
sistens.

COR. monopetala. Tubus cylindricus, tenuis, longissi-
mus, erectus, apice in globum ampliatus. Limbus
quadrifidus: laciniis linear-lanceolatis, obtusis, planis,
patentissimis, tubo duplo brevioribus.

STAM. Filamenta quatuor, brevissima, in suprema am-
pliata parte tubi, erecta. Antheræ subrotundæ.

PIST. Germen subrotundum. Stylus filiformis, longitu-
dine tubi. Stigma capitatum.

PER. Bacca ovato-oblonga, subbilocularis.

SEM. plura, oblonga, inæqualia, magna, in pulpa molli
affixa receptaculo centrali oblongo.

Arbuscula inelegans, ramosa, erecta, duodecimpe-
dalisa, ad torrentes sœpe ad viginti pedum altitudinem in-
crescit. Folia habet ex ovato lanceolata, acuta, inte-
gerrima, nitida, alterna, petiolata. Ex axillis prodeunt
pedunculi multiflori & brevissimi, qui floribus onerantur
inodoris albisque cum staminibus non raro quinque & ca-
lyce corollaque quinquefidis. Semina numero inconstantia
a quatuor ad decem continentur in baccis nigris pulpa
atropurpurea plenis. Ad Ixoræ genus retuli, distincti
forte generis plantam.

Crescit frequens in Martinicæ sylvaticis.

1. PETESIOIDES (*laurifolium*).

CAL. Perianthium monophyllum, quadripartitum: laci-
niis subrotundis, concavis, obtusis, coloratis, conni-
ventibus.

COR. monopetala, conica, erecta, longitudine calycis:
marginè quadripartito, truncato, & connivente.

STAM. Filamenta quatuor, brevissima, erecta, longitu-
dine tubi corollæ, cui inserta. Antheræ triangulares,
acuminatæ, erectæ.

PIST. Germen subrotundum, intra calycem corollamque.
Stylus crassus, erectus, longitudine corollæ. Stigma
simplex, obtusum.

PER. . . .

SEM. . . .

Arbuscula inelegans. Rami teretes, pauci. Folia ovalia, oblonga, obtusa, integerrima, nitida, crassa, ad tactum pinguia, fragilia, alterna, petiolata, quinque pollices longa. Racemi compositi, thyrsiformes, terminales, bipollicares. Flores exigui, numerosi, vix nudo oculo examinandi, calycibus subrubitibus, corollis albis. Styli mox elongantur extra corollam ad duplam ipsius longitudinem. Fructus cognita aliquando anatome definiet genus certum; ego interea ab habitu nomen fluxum imposui.

Crescit in cacumine altioris montis, qui oppido Cap Français ad meridiem imminet in Domingo, locis umbrosis. Floret Novembri.

1. *SCOPARIA (dulcis)* foliis ternis; floribus pedunculatis.

Linn. syst. 132.

Scoparia erecta, ramosa; foliis linearibus denticulatis verticillato-ternatis. *Brown. jam. I, p. 145.*

Veronica americana erecta dulcis, hexangulari caule. *Sloan. hist. jam. I, p. 195, t. 8, f. 2.*

Phuteuoides americanum, flore albo tetrapetalio. *Pluk. alm. 296, t. 215, f. 1.*

Planta erecta, ramosissima, tripedalis, annua. Caulis sexangulares. Folia plerumque terna, oblonga, acuta, ferrata, attenuata in petiolum. Pedunculi uniflori, axillares. Corollæ laciniæ ad basin instruuntur pilis plurimis stamina æquantibus. Gallis dicitur *Balai doux* sive *Scopæ dulces*, Hispanis *Escobilla menuda* seu *Scopæ parvæ*. Apud utrosque ejus infusum in usu est in morbis pectoralibus.

Crescit in Caribæarum omnium & Continentis vicinæ ruderatis, campis siccis, & similibus.

2. *SCOPARIA (procumbens)* foliis quaternis; floribus sessilibus. *Linn. syst. 132.*

Planta vix semipedalis, habitu fere præcedentis: at caulibus dichotomis & procumbenti-erectis. Folla sunt subulata, acuminata, parva, rigida, quaterna, quorum opposita duo interiora paulo breviora. Flores albi, sessiles, parvi, in dichotomia ramusculorum & in quibusdam axillis; tubo corollæ superne fimbriis ancto, at pilis in basi laciniarum nullis: cæterum prioris charætere.

Crescit Carthaginæ in arenosis maritimis circa castellum Boca chica.

I. **PETESIA** (*tomentosa*) foliis oblongis, utrinque tomentosis.

CAL. Perianthium monophyllum, campanulatum, patens, margine obsolete quadridentato, germini insidens.

COR. monopetala. Tubus cylindricus, basi subventricosus, superiore interiore parte hirsutus, calyce duplo longior. Limbus quadrifidus: laciniis subovatis, obtusis, longitudine tubi, patentissimis.

STAM. Filamenta quatuor, subulata, basi hirsuta, brevissima, erecta, orta infra divisuras limbi. Antheræ subrotundæ.

PIST. Germen ovatum, inferum. Stylus filiformis, erectus, corolla multo longior. Stigma bifidum: laciniis subulatis, acutis, longis, patentibus.

PER.

SEM.

Fruticis hujus rami sunt debiles, saepius reclinati: juniores obsolete quadrangulares & subtomentosi. Folia habet oblonga, utrinque attenuata, acuminata, integerima, tomento vix conspicuo mollissima, petiolata, opposita, triplicaria. Thysiflora laterales & terminales gerunt flores inodoros, parvos, corollis ex albido flavescens. Ad Petesiæ genus dubiam hanc stirpem reduxi, donec perspecta fructus structura aut conjecturam stabiliat, aut aliud quid doceat.

Crescit Carthaginæ in sylvaticis.

I. **CHOMELIA** (*spinosa*.)

(Pl. americ. piæ Tab. 17. *Ramus florifer. Tum fructus.*)

CAL. Perianthium monophyllum, parvum, germini insidens. Tubus cylindricus, erectus. Limbus quadrifidus: laciniis lanceolatis, acuminatis, planis, revolutis, tubo brevioribus.

COR. monopetala. Tubus cylindricus, tenuis, longissimus, erectus. Limbus quadrifidus: laciniis lanceolatis, planis, in acumen setaceum abeuntibus, patentissimis, tubo brevioribus.

STAM. Filamenta quatuor, subulata, brevissima, erecta, in superiori parte tubi corollæ. Antheræ lineares, magnæ, incumbentes, longitudine tubi.

PIST. Germen oblongum, parvum, apice quadrifido, inferum. Stylus filiformis, longitudine staminum. Stigma bifidum: laciniis oblongis, crassiusculis, patentibus.

PER. Drupa ovalis, coronata calyce.

SEM. Nux oblonga, quadrifalcata, bilocularis. Nuclei teretes, solitarii.

Arbor hæc adspicere elegans, erecta, duodecimpedalis, a terra ad verticem usque ramosissima est, & spinosissima tota. Rami sunt teretes, glabri, plurimum horizontaliter porrecti. In trunco ramisque senioribus spinæ adfunt vagæ, subulatæ, acuminatæ, pollicares, validissimæ, oppositæ; in ramusculis axillares. Folia ad extremitates ramusculorum confertim prodeunt subovata, acuta, integerrima, nitida, per venas subrugosa, basi attenuata in petiolum brevem, opposita, plus minus pollicaria, quotannis decidua. Pedunculi communes ex axillis oriuntur solitarii, plerumque triflori. Flores sunt sessiles, tenues, sesquipollicares, interdiu inodori, nocte odorem spirantes suavissimum leviterque aromaticum. Corolla levi cum virore albescit, limbumque habet duplo triplove breviorem tubo. Drupæ cortex nigricat: pulpa mollis est & albida. Nux dura solidaque. Quum Chomeliae genus, nescio quorsum amandatum, nunc exulet e Botanica; idem, huic novæ plantæ dicatum, restitui inviri celebris memoriam volui.

Crescit Carthaginæ in sylvaticis ad pedem montis de la Popa. Folia mense Aprili prodeunt, Majo & sequentibus flores. Augusto maturescunt fructus. Ex semine nata persistit in horto Vindobonensi per plures annos, floruit aliquoties, sed fructum non dedit.

I. SIDEROXYOLOIDES (*ferreum*). notis

(Pl. americ piæt. Tab. 259, fig. 7. *Pars ramuli florentis.*)

Sideroxylum americanum. Pluk. alm. 346, t. 224, f. 2.

CAL. Perianthium monophyllum, minimum, quadridentatum, acutum, germini insidens.

COR monopetala. Tubus cylindricus, incurvus, longus.

Limbus quadrifidus: laciñiis oblongis, obtusis, planis, reflexis, tubo duplo brevioribus.

STAM. Filamenta quatuor, brevissima, orta infra divisuras limbi. Antheræ oblongæ, erectæ.

PIST. Germen subrotundum, inferum. Stylus filiformis, longitudine tubi corollæ. Stigma oblongum, obtusum, crassiusculum.

PER.

SEM.

Arbor procera, ramosa. Folia ovato-lanceolata, acuta, integerrima, nitida, petiolata, opposita, semipedalia. Pedunculi axillares, brevissimi, saepe triflori, in ramis praesertim senioribus nudis. Flores parvi, externe rosei, interne candidi. Incolis a ligni duritie Bois de fer sive Arbor ferrea nuncupatur. Ob fructus defectum, genus fixum adsignare huic arbori non potui; commodatum itaque corriget nomen is, cui ipsius anatome innotescet.

Crescit in sylvis montosis Martinicæ.

I. HEDYOTIS (*americana*) foliis linearibus; floribus axillaribus, solitariis.

(*Pl. americ pict Tab. 18. Ramulus florens.*)

CAL. Perianthium tetrphyllum, germini insidens, persistens: foliolis linear-lanceolatis, acutis, concavis, erectis, hirsutis.

COR. monopetala. Tubus cylindricus, erectus, calyce duplo longior. Limbus quadrifidus: laciniis oblongis, truncatis, patentissimis, tubo fere duplo brevioribus.

STAM. Filamenta quatuor, subulata, erecta, brevissima, orta in parte superiore tubi corollæ. Antheræ oblongæ, erectæ, tubum non superantes.

PIST. Germen subrotundum, parvum, inferum. Stylus filiformis, erectus, staminibus brevior. Stigmata duo, subulata, patentia.

PER. Capsula subovata, hinc convexa, illinc plana, coronata foliolis calycis, bilocularis, bivalvis.

SEM. plurima, oblonga, minima.

Frutex hic raro tres altitudine pedes excedit. Rami eius sunt diffusi, basi saepe procumbentes, cæterum erecti. Folia habet linearia, acuminata, integerrima, carnosæ, crassa, nitida, dorso sulcata, lateribus convexa, facie planiuscula, petiolata, opposita, quadrilinearia, numerosa. Petioli utrinque uniuntur membrana ramulos amplexante & cum acumine obtusa. Floris lutei, inodori, sessilis, axillaris, & solitarii, germen corollæque pars in sinu folii reconduntur. Stipula utrinque ad latus germinis adsidet unica, longitudine & figura folioli calycini. Rupestria amat hæc planta, ipsisque nudis saepe rupium fissuris innascitur. E seminibus in horto Botanico nata, late quidem, sed tardissime increvit, post triennium sta-

turam vixdum tripollicarem adepta, lignosa tamen tota, foliisque per integrum annum onusta.

Crescit passim Havanæ in littoribus rupestribus maritimis, ubi Januario & florentem & fructescens vidi.

I. SPERMACOCE (*havanensis*) fruticosa; ramis spinosis.

CAL. Perianthium tetraphyllum, germini impositum, persistens: foliolis ovatis, concavis, acutis, erectis.

COR. monopétala. Tubus infundibuliformis, erectus, interne pilosus, calycem superans. Limbus quadripartitus: lacinias ovatis, planis, acutis, patenti-reflexis, longitudine tubi.

STAM. Filamenta quatuor, subulata, erecta, tubo corollæ paulo longiora. Antheræ subrotundæ.

PIST. Germen obverse ovatum, compressum, inferum.

Stylus filiformis, erectus, staminibus longior. Stigmata duo, obtusa, crassiuscula, patentia.

PER.

SEM. duo,

Frutex nanus, totus rigidus, lignosus, diffusus, ramosissimus, nitidus. Spinæ subulatæ, acutissimæ, axillares in foliis, & terminales in ramusculis junioribus brachiatis. Folia obverse ovata, integerrima, nitida, opposita, petiolata, semipollicaria. Paniculæ terminales. Flores exigui, candidi, inodori, numerosi, germinibus rubellis. Fructus perfecte maturus, utrum vera Spermacoces species sit dicenda, docebit.

Crescit circa Havanam in rupestribus fruticosis & apricis. Floret Decembri.

I. FAGARA (*tragodes*) articulis pinnarum subtus aculeatis. Linn. syst. 134.

(*Pl. americ. pict. Tab. 19. Ramus cum floribus nedum expansis.*)

Schinoides petiolis subtus aculeatis. *Linn. hort. Cliff.* 489.

Rhoi obsoniorum similis leptophyllos *tragodes americana* spinosa, rachi media appendiculis aucta. *Pluk. alm.* 3:9, t. 107, f. 4.

Frutex ramosus, suberectus, quinquepedalis. Aculei gemini, subulati, recurvi, fortes, subaxillares, fusci, nitidi; unicus similis, sed minor, in dorso cujusque articuli foliorum. Folia alterna, sessilia, pinnato-articulata: foliolis oblongis, basi attenuatis, obtusis, integerri-

mis, nitidis, sessilibus: articulis plerumque sex, foliorum omnino simillimis. Flores parvi, axillares, aggregati. Fructum non vidi.

Crescit circa Portum Principis in Domingo; in arenosis fruticosis maritimis. Floret Februario.

I. AEGIPHILA (*martinicensis*). Linn. syst. 134. Jacq. obs. part. 2, pag. 3, tab. 27.

CAL. Perianthium monophyllum, campanulatum, laxum, parvum, persistens; ore quadridentato.

COR. monopetala. Tubus cylindricus, gracilis, erectus. Limbus quadrifidus: lacinias oblongis, obtusis, planis, tubo æqualibus, patentissimis.

STAM. Filamenta quatuor, capillaria, erecta, corollam superantia, orta in parte inferiore tubi. Antheræ quadratæ, incumbentes.

PIST. Germen parvum, in fundo corollæ. Stylus capillaris, longitudine corollæ, semibifidus. Stigmata simplicia.

PER. Bacca subrotunda, unilocularis.

SEM. quatuor? magna.

Humanam altitudinem haud admodum hic frutex excedit, sëpe multo humilior. Capræ & reliquum pecus fœlia ramosque novellos avide appetunt. Ortum hinc est apud incolas nomen *Bois cabril* sive *Fruticis caprarum* aut *capris amati*; quod græce in *Aegiphilam* verti. Ramos juniores glabros & tetragonos ex opposito ad bipollicaria intervalla ornant folia glaberrima, integerrima, ex ovato lanceolata, in acumen attenuata, breviter petiolata, a tribus ad quinque pollices longa. Ex horum ferme omnium axillis pedunculi oriuntur subcymose paniculati, foliorum fere longitudine, ad divisiones brevissime bracteati. Tales etiam pedunculi ramulos terminant. Floris inodori corolla albet. Bacca magnitudine ciceris & ultra nitidaque colore gaudet aurantiaco, pulpaque pauca. Seminum numerum nescio quo fuerim pacto oblitus adnotare? Optime recordor, aut duo, aut quatuor, adfuisse.

In Martinica ad margines sylvarum montosarum, in que frutetis vicinis, haud infrequentem vidi.

I. CISSUS (*sicyoides*) foliis subcordatis, nudis, setaceo-serratis; ramulis teretibus. Linn. syst. 133.

(Pl. americ. piæt. Tab. 20. *Ramulus florens.*)

Irisiola scandens, foliis oblongo-ovatis, ad margines denticulis setaceis refertis. *Brown. jam. 2*, p. 147, t. 4,
f. 1 & 2.

Vitis foliis dentatis. *Plum. ic. 259*, f. 2.

Funis crepitans. *Rumpf. 5*, p. 446, t. 164., f. 1.

Bryonia alba geniculata, violæ foliis, baccis e viridi purpurascientibus. *Sloan hist. jam. 1*, p. 233, t. 144, f. 1.

Planta hæc habitum præ se fert singularem. Caules ejus lignosi arbores valde proceras scandunt ad summa usque cacumina; per eademque horizontaliter quaqua vorsum pergendo, plurimos emittunt hinc inde ramulos geniculatos, caulesque alios simplices & ferme nudos. Ramulos folia & flores proferunt; suntque glabri, alterni, & breviusculi. Caules vero ex arborum cacumine terram versus recta descendunt, quam tandem cum attigerunt, radices eidem immittunt validas, novosque ita truncos constituunt, tempore lignosos evasuros, nec raro diametri semipedalis adepturos crassitiem. Quum vero memoratum spectaculum præbere hæc planta solummodo valeat in sylvis umbrosis vastis atque altissimis, hinc uniformium compagem hanc ramorum vel radicum diu sæpe mirabitur aliquis, priusquam cognoscat plantam, unde deriventur: folia enim tunc rarius præterquam in cacuminibus observantur, quæ tam dissita distinguere oculorum acies nequit. Parietes autem, rupes apricas, collesque abruptos eodem, quo *Hedera Europæa*, modo investire solet. Folia ramulos ornant acuta, setaceo-ferrata, nitida, petiolata, alterna, subdisticha, tres plerumque quatuorve pollices longa, a cordata figura ad ovatam variantia in locis variis. Plerumque enim in Martinica inveni magis minusve cordata, e qua insula desumpta est icon; in Domingo ex subrotundo cordata, vel ex oblongo etiam cordata, nec raro tunc semipedalia; Cathagenæ ovato-cordata; ovata in Cuba; & oblongo-ovata in Jamaica. Umbellæ compositæ, laterales, alternæ, foliis opponuntur. Minimum & multidentatum involucrum adest sub umbellis omnibus. Flores sunt parvi, numerosi, inodori, in variis locis vel rubri, vel flavi, vel virides: calycis limbo magis minusve conspicuo: receptaculi superficie cruciformi in planta Martinicensi; orbiculari in plerisque aliis. Baccæ sunt nigrae, nitidæ, succu-

lentæ, tenerrimæ, magnitudine pisi. Cæterum planta hæc mire congruit in plurimis cum Hedera; & affinitas intercedit summa, quæ haberi in diversis generibus potest. Bacca monosperma, & una quinta pars numeri dempta in flore, discrimen omne absolvunt. Videtur porro hoc genus in utrisque Indiis fatis esse extensam; uti Plumieri iconem 259 sub figuris 3, 4 & 5, hortum Rhedi Malabaricum, Rumphiique opus amplissimum insipienti patet abunde.

Crescit in Caribæis omnibus vicinaque Continente; habitu pro loci diversitate diverso.

2. CISSUS (*acida*) foliis ternatis, obverse ovatis, glabris, carnosis, incisis. Linn. syst. 133.

Irsiola triphylla scandens & clavicularia, foliis crassis serratis. Brown. jam. I, p. 147.

Bryonia alba triphylla geniculata, foliis crassis acidis. Sloan. hist. jam. I, p. 233, t. 142, f. I.

Bryonides trifoliatum indicum, foliis succulentis crassis & crenatis. Pluk. alm. 71, t. 152, f. 2.

Folium causonis. Rumph. amb. 5, p. 450, t. 166, f. 2.

Planta hæc caulibus lignosis, diffusis, ramosissimis, & cirriferis, tecta muros sepesque obtexit densissime, in sylvaticis incultis minus obvia. Folia sunt ternata, alterna; foliolis obverse ovatis, acutis, ferrato-incisis, glabris, crassis, succulentis, sapore acidulo. Umbellæ precedentibus similes. Sloanei descriptio est optima; at in ejusdem icone male delineantur fructus filamentis quibusdam insidentes. Errori ansa, opinor, data fuit; quod soleant folia & ramusculi hujus plantæ vitiœ ac monstrose in glomera degenerare filamentosa amplissima, sed quæ flores proferant nunquam. His procul dubio fructus adnexit delineator, pedunculos illa esse, arbitratus. Erroribus istiusmodi semper erunt obnoxiae, quæcunque ad specimina sicca, longeqne a natali translata regione, icones elaborabuntur.

Crescit Carthagena, in Jamaica, & Domingo.

3. CISSUS (*trifoliata*) foliis ternatis, hirsutis, ferratis; ramis membranaceo-angulatis. Linn. syst. 133.

(Pl. americ. pict. Tab 259, fig. 8. Folium.)

Irsiola triphylla scandens, foliis ovatis subdentatis, petiolo communi marginato, calyculis majoribus. Brown. jam. 3, p. 147.

Bryonia alba triphylla maxima. *Sloan. hist. jam. I, p. 233, t. 144.*

Caules cirrhiferi, scandentes, lignosi, sarmentosi; seniores angulati & diametro pollicari; juniores petiolique membranaceo-angulati, setaceo-pilos. Folia sunt ternata, alterna; foliolis acutis, inæqualiter ferratis, pilosis, hirsutis, venosis, rugosis; quorum medium est ovatum; lateralia semicordata, latere interno ad basin obliterate. Umbellæ & flores, quales in *Cissus sicyoide*, at paulo majora omnia. Qualecumque caulis lignosi frustulum, si abscissum ramo cuiusdam arboris imponitur, vel etiam domi in cubiculo adservatur, brevi radices terram versus emittit, eidem tandem infigendas.

Crescit in Jamaica & Carthagene in arbustis.

I. RIVINA (*dodecandra*) racemis simplicibus; floribus dodecandris. *Jacq. obs. part. I, pag. 6, tab. 2.*

(*Pl. americ. piæt. Tab. 21. Ramulus fructescens. Dein flos.*) *Rivinia* sarmentosa, sarmentis crassioribus, foliis ovatis, floribus spicatis dodecandris. *Brown. jam. 2, p. 149, t. 23, f. 2.*

Rivinia scandens racemosa, amplis solani foliis, baccis violaceis. *Plum. gen. 48.*

CAL. *Perianthium tetraphyllum*, coloratum, persistens: foliolis subovatis, obtusis, valde concavis, reflexis.

COR. nulla.

STAM. Filamenta duodecim, subulata, calyce paulo breviora, patentissima; quorum quatuor, posita ante calycis foliola, solitaria sunt; alia autem cum his adeoque etiam cum calyce alternantia ubique bina sunt. Antheræ magnæ, hastatæ, incumbentes.

PIST. Germen ovatum, staminibus brevius. Stylus nullus. Stigma penicilliforme.

PER. Bacca subrotunda.

SEM. unicum, lentiforme, nitidum, magnum.

Ramosissima saepe, nec inelegans, & arbusculæ quindecimpedalis induit erecta habitum. Plerumque tamen debilis virgatos suos primarios ramos, eosque flexiles & longissimos, inter arbusta porrigit, ex his in medias saepe usque vias, si juxta has vegetat, arcuatim protensos. Ex similibus tunc ramis incolæ quibusdam in locis circulos fabricant doliares; unde apud Martinicenses nomen *Lian-*

ne à baril, ac si plantam diceres scandentem dolarem, obtinuit. Folia habet oblongo-lanceolata, acuminata, integra, glaberrima, petiolata, alterna, numerosa, a tribus ad sex pollices longa. Racemi rari & simplices ramulos juniores terminant; alii nonnunquam axillis foliorum insident. Calyx in flore albus est, in fructu violaceo-ruber. Baccæ atropurpureæ & pisellum æquantis pulpa ab aviculis expetitur. Semen nigricat. Linnæus meam hanc stirpem, sub Rivenæ octandrae titulo, cum Læflingiana conjungit. Sed quum Læflingius in sua numeravit stamina ab octo ad duodecim, ego sola duodecim perpetuo observaverim, nec pauciorum fiat apud Brownium mentio; & quum addat etiam ille, suæ esse plantæ baccam rugosiorem & angulosa semina, dum in dodecandra mea semen nitidissimam nullisque notatam angulis lentem exactissime referat, nec bacca rugas habeat; distinguere opportunius judicavi.

Inveni crescentem in declivibus montium fruticosis inque sepibus arboreis Caribæarum.

DIGYNIA.

I. CUSCUTA (*americana*) floribus pedunculatis. Linn.
syst. I40.

Cuscuta surinamensis. Schill. lepr. pag. 200, tab. 2.

Cuscuta caule aphylo volubili repente. Gron. virg. I8.

Cuscuta ramosa repens, floribus conglomeratis. Brown.
jam. I, p. I49.

Cuscuta inter majorem & minorem media, filamentis longis & floribus late super arbores & campos se extensis. Sloan. hist. jam. I, p. 201, t. I28, f. I.

CAL. Perianthium monophyllum, obovatum, corollæ concolor, apice quinquefido, persistens: lacinias subrotundis, obtusis, concavis, brevibus, conniventibus.

COR. Petalum cylindricum, erectum: tubo longitudine calycis: limbo quinquefido, parvo, patenti.

Nectarium e squamis quinque, fimbriatis, conniventibus, infra stamina adnatis corollæ.

STAM. Filamenta perpetuo quinque, erecta, orta in superiori parte tubi, longitudine corollæ. Antheræ oblongæ, erectæ.

PIST. Germen subrotundum. Styli duo, filiformes, erecti, corollam leviter superantes. Stigmata capitata.

PER. Capsula subrotunda, unilocularis, horizontaliter bifariam dehiscens.

SEM. pauca, hinc convexa, inde planiuscula.

Planta parasitica, aphylla, volubilis, ramosissima, tenera, nitida, subflavescens. Pedunculi communes brevissimi. Flores parvi, inodori, aggregati, flavescentes vel virentes. Calyx marcescit. Semina duo, tria, vel unicum ad maturitatem perveniunt, abortantibus reliquis paucis.

Crescit in sepibus & fruticosis Caribearum.

TETRAGYNYA.

I. MYGINDA (*uragoga*). Linn. syst. 142.

(Pl. americ. Pift. Tab. 22. *Ramus cum flore & fructu. Dein radicis pars*).

CAL. Perianthium quadripartitum, minimum, persistens.

COR. Petala quatuor, subrotunda, plana, obtusa, patentissima.

STAM. Filamenta quatuor, subulata, erecta, corolla breviora. Antheræ subrotundæ.

PIST. Germen subrotundum. Styli quatuor, erecti, breves. Stigmata simplicia, acuta.

PER. Drupa subglobosa.

SEM. Nux ovata, acuta, ossea, unilocularis. Nucleus ejusdem figura.

Frutex erectus, in paucos ramos divisus, in littoribus arenosis tripedalis, in sylvaticis umbrosioribus octopedalis; radici innititur crassæ, nodosæ, irregulari; cuius cortex est fuscus externe, & intus coloris aurantii; matieres vero solida, albida, atque amarissima. Folia sunt ovata vel lanceolata, acuta, tenuissime ferrata, donata petiolis brevissimis rubentibus, opposita, interdum alterna, dimidium vel sesquipollicem longa. Pedunculi communes, filiformes, axillares, oppositi, bifidi; lacinia utraque trifida & triflora: flore medio diu ante laterales se explicante. Flores exigui, nitide atrorubentes. Fruktus rubri, molles, magnitudine piselli. Hispanis audit *Yerva de maravedi* sive *Herba obolaris* vel levi pretio ve-

nalis. Carthaginenses passim in usu medico adhibent radicum decocta atque infusa, quæ validissime urinaspellunt: qua etiam virtute, licet debiliore, folia pollere perhibentur, quæ tamen in usum non recipiuntur. Nominavi hunc fruticem in honorem viri nobilissimi Francisci a Mygind, Consiliarii aulici, rei herbariæ peritissimi, & horti Botanici Viennensis fautoris egregii.

Crescit copiosissime in territorio Carthaginensi, & in insula sancti Martini circa oppidum Philippi; locis a mari haud dissipatis.

PENTANDRIA.

MONOGYNIA.

- I. **PLUMBAGO** (*scandens*) foliis petiolatis, ovatis, glabris, caule flexuoso-scandente. *Linn. syst. 167.* (*Pl. americ. pict. Tab. 23. Ramus florens. Dein fructus.*) **Plumbago americana**, viticulis longioribus sempervirentibus. *Moris. hist. 3, p. 599.*
- Dentellaria lychnoides** sylvatica, scandens, flore albo. *Sloan. hist. jam. I, p. 211, t. 133, f. 1.*
- Caapomonga.** *Marcgr. bras. 28. Pis. bras. 200.*
- CAL.** *Perianthium monophyllum*, tubulosum, oblongum, quinquesulcatum, setis clavatis glandulosis & glutinosis undique obsitum, quinquedentatum, persistens: denticulis acutis, erectis.
- COR.** monopetala. *Tubus cylindricus, erectus, calyx duplo longior. Limbus quinquefidus, patens: laciniis obverse ovatis, planiusculis, emarginatis cum acumine, tubo triplo brevioribus.*
- STAM.** Filamenta quinque, filiformia, erecta, longitudine tubi corollæ, receptaculo inserta. Antheræ oblongæ, obtusæ, incumbentes.
- PIST.** Germen ovatum, quinquangulare, parvum. Stylus filiformis, erectus, longitudine staminum. Stigma quinquefidum, obtusum.
- PER.** Capsula ovata, acuta, quinquesulcata, fere magnitudine calycis, unilocularis, quinquevalvis.
- SEM.** unicum, ovatum, acutum.

Planta fruticosa, ramosa, debilis, a tribus ad octo pedes alta. Folia sunt oblongo-ovata, acuta, petiolata, glabra, integerrima, alterna. Racemi in ramulis junioribus terminales, semipedales, imo quandoque tandem bipedales. Flores inodori, fere sessiles. Corolla alba

Crescentem inveni in insula sancti Christophori, in Martinica circa vicum Carbet, copiosissime in Domingo.

I. HELIOTROPIUM (*gnaphalodes*) foliis linearibus, obtusis, tomentosis; pedunculis dichotomis; spicarum floribus quaternis; caule frutescente. Linn. *Syst. 155.*

(*Pl. americ. piæt. Tab. 259, fig. 9. Folium.*)

Heliotropium arborescens maritimum tomentosum, gnaphalii americanæ foliis. Sloan. *hist. jam. I, p. 213.*

Heliotropium gnaphaloides littoreum fruticescens americanum. Pluk. *alm. 182, t. 193, f. 5.*

CAL. Perianthium quinquepartitum, persistens: laciniis ovatis, concavis, acutis, tomentosis, conniventibus.

COR. Petalum unicum. Tubus cylindricus, longitudine calycis. Limbus quinquefidus: laciniis ovatis, obtusis, planis, tubo paulo brevioribus, patentissimis. Faux patula, subquinquangularis a tubo infra limbi divisuras in stellulam quinquefidam leviter prominente.

STAM. Filamenta quinque, erecta, brevissima, orta in media tubi parte. Antheræ oblongæ, erectæ.

PIST. Germen ovatum, parvum. Stylus nullus. Stigma conicum, obtusum, magnum.

PER. nullum. Calyx immutatus semina in sinu fovet.

SEM. quatuor.

Planta hæc est fruticosa, erecta, plerumque bipedalis, rarius sexpedalis. Ramos habet teretes, parum divisos, seniores nigricantes, juniores inferne a foliis delapsis cicatricibus refertos, simul formantes comam convexam, candicantem, non raro pulcherrimam, atque eminus a mari navigantibus conspicientiam. Folia sunt e cuneiformi linearia, obtusa, avenia, crassa, utrinque tomentosa, glauca, sessilia, numerosa, sparsa confertaque in summis ramis, inferioribus gradatim marcescentibus. Pedunculi communes teretes, tomentosi, erecti, foliis paulo longiores, terminales, pauci in quolibet ramo, superne bifidi aut trifidi: ex hac divisione natis pedicellis singulis abeuntibus in spicam secundam, sèpius bifidam ipsam.

interdum tamen etiam simplicem, habitu congenerum. Florum parvorum calyces sunt connati omnium, ut e spica eximi flos nullus absque dilaceratione vicini alterius possit. Corollæ sunt albæ.

Crescit in littoribus maritimis Cubæ & insulæ sancti Eustachii. Floret præprimis Decembri & Januario.

I. CONVOLVULUS (*martinicensis*) caule repente, radicante; foliis ellipticis.

(Pl. americ. pict. Tab. 24. *Ramus florens.*)

Caules teretes, glabri, prostrati, longi, terræ radices fibrosas immittentes, ad vicina etiam adscendentes & subvolubiles. Folia elliptica, obtusa cum stipula terminali, integerrima, glabra, petiolata, bipollucaria. Pedunculi uniflori, axillares, solitarii, tripollucares, superne bracteis duabus oppositis parvisque instructi. Calycis foliola tria exteriora ovata, acuta, maxima, laxissima; interiora duo multo minora, lanceolata, acuta. Corolla alba.

Crescit in umbrosis sæpe inundatis circa vicum Roberti in Martinica.

2. CONVOLVULUS (*havanensis*) caule volubili; foliis ovatis, obtusis, nitidis.

(Pl. A. P. Tab. 264, fig. 97. *Folium. Flos.*)

Planta herbacea, ramosissima, altitudinis humanæ, totaque glabra; caulis volubilibus & teretibus. Folia numerosissima, alterna, ovata vel magis oblonga, obtusissima, nitida, semipollucaria, in umbrosis duplo sæpe longiora, integerrima. Pedunculi uniflori, axillares, foliis duplo breviores. Flores inodori, albidi & parvi. Corollæ tubus vix est calyce longior; limbus autem semierectus in lacinias lineares longas acutas & reflexo-patentissimas dividitur. Antheræ sunt hastatæ. Character reliquus omnino Convolvuli Linnæani est.

Crescit in frutetis littoralibus circa Havanam. Vidi florentem Decembri.

I. IPOMAEA (*carnea*) foliis cordatis, glabris; pedunculis multifloris; corollis emarginatis. *Linn. syst. 172.*

(Pl. americ. pict. Tab. 25. *Caulis summus florens. Semen, & fructus integer.*)

CAL. Perianthium pentaphyllum, persistens: foliolis subrotundis, concavis, obtusis, minimis, conniventibus;

COR. monopetala. Tubus basi infundibuliformis, dein cylindricus, erectus, longissimus. Limbus infundibuliformis, amplius, plicatus, patens, fere longitudine tubi, obtusus cum emarginaturis quinque.

STAM. Filamenta quinque, subulata, erecta, inæqualia, tubo breviora, eidemque ad calycis altitudinem accreta. Antheræ lanceolato-oblongæ, obtusæ, erectæ, magnæ.

PIST. Germen ovatum, minimum. Stylus filiformis, erectus, longitudine staminum. Stigma capitatum, subglobosum, obsolete quadrifidum, magnum.

PER. Capsula ovata, obsolete tetragona, quadrilocularis, quadrivalvis.

SEM. solitaria, subovata, lanugine longa densaque vestita.

Planta hæc fruticosa est atque perennis; in apricis suberecta, seque sustentans ipsa ad humanam altitudinem; in syivis caule scandente elevans se ad viginti altitudinem pedum: tota, exceptis feminibus, glaberrima. Cortex cinereus. Ramuli juniores viridesque ornantur foliis e subrotundo cordatis, acuminatis vel obtusis cum acumine exiguo, integerrimis, venosis, petiolatis, alternis, octo interdum polices longis latisque cum petiolo tripolligari. Pedunculi subracemosi, multiflori, & terminales, gerunt flores elegantes, inodores, tripolligares, coloris carnei, successive sese explicantes. Capsulæ fuscæ nitidæque semina continent nigricantia lanaque multa e fusco cinerea obducta. Habet hæc planta cum Convolvulis plura communia, ita ut & ad hos referri haud inepte queat. Examinavi Convolvulorum & Ipomæarum inter tropicos ubi vis crescentium species numerosas; & profecto inter receptum utrumque genus limites constantes invenire nullos potui. Oportet itaque aut confundi hæc genera, aut notam constitui artificialem aliquam, ab unica, neglectis cæteris, corollæ parte petitam, quæ discrimen perpetuum determinet, quantumvis simul arbitrarium atque a natura fortasse alienum. Incolis dicitur *Campanilla* sive *Campanula*.

In arenosis fruticosisque maritimis passim crescit prope Carthaginem. Floret Februario & Martio. Ex semine nata in caldario horti Vindobonensis per plures annos lâte vegetavit, altissima excrevit, sed tandem sine ulla fructificatione interiit.

2. IPOMAEA (*filiformis*) foliis cordatis, obtusis cum acumine, integerrimis; pedunculis racemosis, filiformibus.

(Pl. A. P. Tab. 26. *Ramus cum flore & fructu.*)

CAL. Perianthium quinquepartitum, ovatum, acutum, connivens, parvum, persistens.

COR. Petalum infundibuliforme. Tubus cylindricus, tenuis, longissimus. Limbus semiquinquefidus, patens: laciniis semiovatis, obtusis.

STAM. Filamenta quinque, subulata, erecta, fere longitudine corollæ, alternantia cum aliis quinque sterilibus & duplo brevioribus. Antheræ oblongæ, obtusæ, incombentes.

PIST. Germen subrotundum. Stylus filiformis, longitudo staminum. Stigma capitatum, bifidum.

PER. Capsula ovata, acuta, bilocularis, quadrivalvis: valvulis singulis apice bifariam dehiscentibus. Dissepimentum cordatum, acutum.

SEM. in quolibet loculamento bina, subovata, acuta:

Planta tota glaberrima caulis volubilibus teretibus que vicinos frutices scandit ad altitudinem decem pedum. Folia obtusissima cum acumine stipulari, magnitudine valde variant, brevibusque petiolis instruuntur. Racemi axillares, laxissimi, graciles, & foliis longiores, stricte patent. Flores sunt purpurei, inodori, in eadem planta admodum numerosi. Capsulæ fuscæ semina atra glabrae includunt.

Crescit in Martinicæ sylvaticis, præcipue ad margines inundatorum maritimorum. Floret Novembri, Decembri, & Januario.

3. IPOMAEA (*repanda*) foliis cordato-acuminatis; repandis; pedunculis ramosis, cymosis. Linn. syst. 172.

(Pl. americ. pict. Tab. 27. *Ramus florens.*)

CAL. Perianthium quinquepartitum, ovatum, obtusum, connivens, parvum, crassum, corollæ concolor, persistens.

COR. monopetala, crassiuscula. Tubus longissimus, subcylindricus. Limbus quinquefidus, patentissimus: laciniis ovatis, acutiusculis, reflexis, tubo fere duplo brevioribus, marginibus utrinque introrsum plicatis.

STAM. Filamenta quinque, filiformia, in tubo supra ger-

men orta basibus hirsutis latis conniventibus tubumque claudentibus, corolla paulo breviora. Antheræ oblongæ, obtusæ, erectæ.

PIST. Germen ovatum, abiens in stylum filiformem, corollæ longitudine. Stigma capitato-globosum, subbifidum.

PER. Capsula ovato-oblonga, bilocularis, quadrivalvis.

SEM. in quovis loculamento bina, hinc convexa, inde angulata.

Planta tota glaberrima, forte annua. Caules teretes, volubiles. Folia obtuse acuminata cum exiguo acumine, facie viridi, dorso e viridi glauca venisque insignita violaceis, petiolata. Pedunculi communes solitarii, axillares, crassi, longitudine fere foliorum, ramosi, subcymosi; partialibus saepius trichotomis; propriis cum ipsis floribus saepe decidentibus. Flores elegantes, nitidissimi, coccinei, inodori, numerosi, bipollicares: in quibus collarum laciniae ob latera plicata videntur primo intuitu multo angustiores & lanceolatae.

Crescit in Martinicæ collibus fruticosis prope vicum Sancti Francisci. Florentem vidi Decembri & Januario.

4. IPOMAEA (tuberosa) foliis palmatis: lobis septenis, lanceolatis, acutis, integerrimis; pedunculis trifloris.
Linn. syst. 171.

Ipomæa heptadactyla major scandens, flore majori campanulato, calyce membranaceo, seminibus majoribus villosis. Brown. jam. 6, p. 155.

Convolvulus major heptaphyllus, flore sulphureo odorato.
Sloan. hist. jam. I, p. 152, t. 96, f. 2.

Convolvulus americanus, mandjuccæ multifido folio, heptaphyllo, flore albo fundo purpureo, radice tuberosa, cortice albo. *Pluk. alm. 116, t. 276, f. 5.*

Tota scatet lacte candido. Caules ex eadem tuberosa radice plures, fruticosi, volubiles; infimi lignosi & pollicis crassitie. Folia glabra, longe petiolata, palmæ humanæ amplitudine. Pedunculi, multiflori, axillares. Flores flavi, speciosi, bipollicares, suaveolentes. Capsula membranacea, nitida, subpellucida, quadrato subrotunda, magna, bilocularis. In quolibet loculamento sunt semina bina, atra, villosa, inter congeneres forte maxima. Hæc plures annos etiam in Europa permanent fæ-

cunda, germinantque in caldariis ilico; sed enatæ toties mihi plantæ, quantumvis æstate vegetæ, & jam septem pedales, ad hyemis adventum perierunt pleraque, alteram hyemem sustinere nullæ. Solent inde in Caribæorum insularum hortis pergulæ exstrui, quas penetrare ob foliorum ramorumque sempervirentium multitudinem radii solis nequeunt. Mira plantæ florantis pulchritudo est, cui florum summa grataque fragrantia novum pretium addit.

Colitur passim in Caribæis. Sylvestrem inveni in Domingo in montibus editoribus, qui arcis Picquolet ad portum oppidi Cap François imminent, nudas præruptasque rupes copiosissime obvestientem.

ECHITES.

CAL. Perianthium quinquepartitum, acutum, suberectum, parvum.

COR. Petalum unicum, calyce multoties majus. Tubus erectus. Limbus quinquelobatus, planus, patentissimus.

Glandulae nectaræ quinque, obtusa, erectæ, germen non superantes, eidemque circumstantes,

STAM. Filamenta quinque, tenuia, erecta. Antheræ rigidæ, ex oblongo acuminatæ, conniventes in conum acutum.

PIST. Germina duo, obtusa, parva. Stylus unicus, filiformis, erectus, longitudine staminum. Stigma oblongo-capitatum, apice bifido, glutine quodam antheris adnexum.

PER. Folliculi duo, longissimi, uniloculares, univalves.

SEM. plurima, imbricata, instructa pappo longo. Receptaculum longitudine folliculi, membranaceum, liberum.

Exclusæ speciebus singulis notæ propriæ hasce supra datae relinquunt notæ communes, quæ genericum characterem constituant. Patebit autem ex describendis hujus generis plantis, glandulas seminaque in folliculis papposæ maximi esse in charactere momenti, sed nihil valere corollam, quæ in variis diversissima spectatur. Stigma in omnibus adglutinatur parieti cuidam interno coni ex antheris formati, qui in pollinis explosione secedit; indissoluto interim remanente coni pariete externo: ita ut fæcundatio perficiatur in octo prioribus speciebus clauso co-

rollæ tubo, in ultimis vero duabus intra cōnum extra tubum corollæ porrectum. Habent plantæ hæ in habitu singulare aliquid, quo dignosci facile primoque adspectu possint. Folia insuper omnibus sunt opposita, petiolata, integrerrima, venosa, nitidaque; quæ tamen sola Echites suberesta habet sœpe scabra. Pedunculi communes folia raro superant, laterales alternique semper, præterquam in Echite spicata. Flores ubique inodori. Hæc præmitto, ne in singulis repetere cogar. Ad hoc porro genus etiam pertinere mihi videntur stirpes sequentes.

Katu-pal-valli. *Rheed. mal. 9, t. II.*

Pal-valli. *ibid. t. 12.*

Kametti-valli *ibid. t. 14.*

Funis papius latifolius. Rump. 5, p. 14, t. 10.

Funis papius parvifolius. ibid. p. 15, t. II.

Funis cratum. ibid. p. 16, t. 12.

Nerium caule volubili, foliis lanceolatis, folliculis filiformibus, tortuosis, pendulis. Burm. Plum. p. 19, t. 27, f. I.

Periploca florum divisoris circinatis & crispis. ibid. p. 210, t. 216, f. I.

Apocynum scandens, salicis folio, flore amplo plano. Catesb. car. 2, p. 53, t. 53.

I. ECHITES (*biflora*) pedunculis bifloris. *Linn. syst. 209.*
(*Pl. americ. piæt. Tab. 28. Ramus cum flore, & fructu nedum maturo.*)

Apocynum scandens, flore nerii albo. Pluk. amer. p. 82, t. 96.

CAL. *Foliola ovata, minima, decidua.*

COR. *Tubus infundibuliformis, inferne attenuatus. Limbi laciniæ maximæ, obverse ovatæ, truncatæ, obliquæ.*

Glandulæ ovatæ, concavæ, fere longitudine germinis.

STAM. *Filamenta brevissima, pubescentia, in medio tubo. Antheræ lanceolatæ, apice pubescentes.*

PIST. *Germina subovata, calyce breviora. Stigma pubescens.*

PER. *Folliculi teretes, obtusi, erecti.*

SEM. *linearia, lenga.*

Frutex ramosus, totus lacte niveo scatens, caulis partim volubilibus, partim erectis, vicinis se arboribus sustentat, easdemque scandit ad viginti pedum altitudi-

nem, habitum hinc s^epe arboris acquirens. Folia sunt oblonga, basi attenuata, obtusa cum exiguo acumine, tricoccularia. Pedunculi biflori, rarissime triflori. Flores speciosi, candidissimi cum fauce lutea. Gallis dicitur *Liane Mangle* sive *Hedera Rhizophorarum*.

Crescit in plerorumque Caribearum inundatis maritimis inter Rhizophoras, Avicennias, & Conocarpas.

2. ECHITES (*umbellata*) pedunculis umbelliferis; foliis ovatis, obtusis cum acumine. Linn. syst. 210.

(Pl. americ. pict. Tab. 29. *Ramus florens. Tum fructus.*) Echites scandens, foliis ovatis, nitidis, venosis; floribus herbaceis. Brown. jam. I, p. 182.

Periploca alia, floribus amplis circinatis & crispis, seu Nerium scandens, radice Bryoniæ tuberosæ. Plum. ic. 216, f. 2.

Apocynum scandens majus, folio subrotundo. Sloan hist. jam. I, p. 207, t. 131, f. 2.

Apocynum scandens, folio cordato, flore albo. Catesb. car. I, p. 58, t. 58.

CAL. Foliola ovata, minima, persistentia.

COR. Tubus longissimus, quinquestriatus, basi cylindricus, dein in ventrem ampliatus, hinc denuo cylindricus & intortus.

Glandulæ subrotundæ, concavæ, germine triplo breviores.

STAM. brevissima, crassissima, in ventri tubi.

PIST. Germina subovata, calyce paulo breviora. Stylus superne crassissens.

PER. Folliculi subteretes, obtusi, superne leviter intorti, interne sulco longitudinali exarati, lateribus obtuse angulatis, horizontaliter reflexi.

SEM. ovato-oblonga, angulata.

Caulibus fruticosis, volubilibus, lentis, inferne lignosis & suberosis, superne viridibus teretibus nitidisque, ad pedum quindecim altitudinem arbores vicinas scandit hæc planta; tota succo glutinoso & aquei coloris abundans. Folia sunt e subrotundo ovata, basi subcordata, tres vel quatuor pollices longa. Pedunculi communes apice flores a quatuor ad septem ceu in umbella locant, stipulis aliquot involuci vices obeuntibus. Flores sunt magni, pulchri, limbo candido, tubo externe viridanti. Merito

Judicavit ex considerato hujus plantæ charactere clarissimus Browneus, ad cognita jam genera recte reduci ipsam non posse; unde Echitis condidit.

Crescit passim in sepibus arboreis & fruticetis Jamaicæ, Domingo, & Cubæ. Inveni florentem ab Octobri ad Februarium.

3. ECHITES (*adglutinata*) pedunculis racemosis; foliis ovatis: emarginatis cum acumine. Linn. syst. 210.

(Pl. americ. Pict. Tab. 30. *Ramus florens.*)

CAL. Foliola ovata, minima, persistentia.

COR. Tubus cylindricus, quinquesulcatus, longus, in medio ventricosus. Limbi lacinia lanceolatæ, acuminatae, paulo breviores tubo, obliquæ.

Glandulæ oblongæ, germine paulo breviores.

STAM. Filamenta brevissima, in ampliata tubi parte. Antheræ longitudine tubi corollæ.

PIST. Germina ovata, longitudine calycis.

PER. Folliculi teretes, erecti, apicibus conglutinatis.

SEM. ovali-oblonga.

Caules volubiles, fruticosi. Folia ovata, quadripollicaria. Pedunculi communes longitudine foliorum, sæpe difformes, interdum bifidi. Flores parvi, candidi. Folliculi si ab invicem separantur, quod vi quidem fit levi, ex utroque separationis punto ad apices, quibus nempe cohaeserunt, guttula emanat liquidi aquei & glutinosi, quali scatet tota planta.

Crescit in fruticetis montosis in Domingo circa Cap François. Vidi florentem Decembri.

4. ECHITES (*trifida*) pedunculis subtrifidis, multifloris; foliis ovato oblongis, acutis. Linn. syst. 210.

(Pl. americ. pict. Tab. 31. *Ramus florens.*)

CAL. Perianthii lacinia ovatae, concavæ

COR. Tubus inferne ovatus, superne subcylindricus, longus. Limbi lacinia oblongæ, apice latiores, truncatae, tubo duplo breviores, obliquæ.

Glandulæ subrotundæ, compressæ, longitudine germinis.

STAM. brevissima, interne villosa, in fundo partis tubi cylindricæ.

PIST. Germina subovata, calyce duplo breviora.

PER.

SEM.

Caules volubiles, fruticosi. Folia oblongo-ovata, triplicaria. Pedunculi communes breves, saepius trifidi, pedicellis difformibus. Flores magni, pulchelli, tubo sordide purpureo, limbo sordide virenti. Tota planta latetescit, arboresque scandit ad duodecim pedes.

Carthagena crescit in fruticetis apricis ad pedem montis de la Popa. Vidi florentem Octobri.

5. ECHITES (*quinquangularis*) pedunculis racemosis; foliis obverse ovatis, acutis. Linn. syst. 210.

(Pl. americ. pict. Tab. 32. Ramus florens.)

CAL. Foliola ovata, concava, minima, apicibus reflexis.

COR. Tubus cylindricus, longus, ad ortum limbi incrassatus in marginem pentagonum. Limbi laciniæ oblongæ, superne latiores, truncatæ, obliquæ, tubo duplo breviores.

Glandulæ ovatæ, compressæ, longitudine germinis.

STAM. Filamenta brevissima, interne villosa, infixæ tubo paulo supra medietatem. Antheræ hastato-lanceolatae, tubi longitudine.

PIST. Germina ovata, calyce paulo breviora.

PER. . . .

SEM. . . .

Caules volubiles, fruticosi, scabriuscui. Folia tres pollices longa. Racemi simplices. Flores circiter sedecim, virentes, magni, limbo flaviusculo, margine tubi pentagono alboque. Non latetescit planta. Nec hujus nec præcedentis fructum contigit videre; quum paulo ante discessum meum ex ista regione florere cœperint.

Crescit & floret cum præcedente.

6. ECHITES (*suberecta*) pedunculis racemosis; foliis sub-ovatis, obtusis cum acumine. Linn. syst. 210.

(Pl. americ. Pict. Tab. 33. Ramus florens & fructescens.)

Apocynum scandens, amplio flore luteo villoso, siliquis angustissimis. Plum. spec. 2.

Apocynum erectum, fruticosum, flore luteo maximo & speciosissimo Sloan. hist. jam. I, p. 206, t. 130, f. 2.

CAL. Foliola lanceolata, decidua.

COR. Tubus cylindricus, longitudine calycis. Faux campanulata, amplissima. Limbi laciniæ inæqualiter subrotundæ, obliquæ, longitudine faucis.

Glandulæ oblongæ, concavæ, longitudine germinis.
 STAM. Filamenta brevissima, in tubi limbo ad ortum faucis inserta. Antheræ hastatæ.
 PIST. Germina subovata, calyce multo breviora.
 PER. Folliculi teretes, obtusi, erecti.
 SEM. oblonga, utrinque acuminata.

Planta fruticosa, lacte abundans candido, in fruticetis decempedalis, in pratis siccioribus tripodalis vel interdum etiam vix pedalis. Caules vix volubiles, scandentes; reclinati vero, si nullis sustentaculis occurrant. Folia magis minusve ad ovatam figuram accedunt; nunc glabra utrinque; nunc dorso scabra. Pedunculi multiflori sustinent flores paucos, flavos, magnos, externe hirsutos, speciososque. Folliculi sunt tenues & fusci. Hic frutex habitu a congeneribus longius recedit.

Crescit in Jamaica vel in ipso oppido Kingston; omnium vero copiosissime in vastis pratis Limonade & Jáquesi in Domingo. A Septembri ad usque Martium observavi florentem.

7. ECHITES (*torulosa*) pedunculis subracemosis; foliis lanceolatis, acuminatis. Linn. syst. 210.

(Pl. americ. pict. Tab. 34. *Ramus florens.*)

Nerium farmentosum, scandens, ramulis tenuibus, folliculis gracilibus torosis. Brown. jam. 4, p. 181, t. 16, f. 2.

CAL. Foliola lanceolata, erecto-patentia, persistentia.

COR. Tubus cylindricus, in medio ventricosus & obsolete pentagonus, calyce fere duplo longior. Limbi laciniae basi angustæ, apice latissimæ, truncatæ, obliquæ, longitudine tubi.

Glandulæ subrotundæ, germine duplo breviores.

STAM. Filamenta brevissima, in ventre tubi. Antheræ pauxillo breviores tubo.

PIST. Germina subovata, calyce breviora.

PER. Folliculi torulosi, teretes, acuminati, erecti.

SEM. oblonga.

Caules volubiles, teretes, fruticosi. Folia bipinnata. Pedunculi circiter sex flores ferunt parvos & flavos. Tota planta glutine lacteo abundat.

Crescit in Jamaica in sylvis montosis Liguané. Martinio florentem vidi.

8. ECHITES (*repens*) pedunculis multifloris, divisiis; foliis lanceolato-oblongis.

(Pl. americ. pict. Tab. 35. *Pars caulis cum ramo florente*)

CAL. Foliola lanceolata, persistentia.

COR. Tubus cylindricus, longus, superne parum ampliatus. Limbi laciniæ triangulares, maximæ, obliquæ, tubo breviores.

Glandulæ subrotundæ, germine duplo breviores.

STAM. in ampliata parte tubi, brevissima.

PIST. Germina subovata.

PER. & SEM. . . .

Planta elegans, fruticosa, lacte carens, caules habet teretes, glabros, farmentosos; seniores procumbentes, terræque immittentes radiculas; juniores suberectos, ad folia in nodos discoideos incrassatos. Pedunculi communes saepius bifidi gerunt flores elegantes, tenellos, rubros. Fructum non vidi.

Crescit in insulæ Domingo rupestribus; præcipue circa arcem Picquolet haud procul ab oppido Cap Français, & ad margines sylvarum circa Bayaha. Vidi florentem Octobri, Novembri, & Decembri.

9. ECHITES (*spicata*) spicis axillaribns, brevibus; staminibus eminentibus; foliis lanceolato-ovatis. Linn. syft. 210.

(Pl. americ. pict. Tab. 36. *Ramulus florens*)

CAL. Foliola ovata, concava, rigidiuscula, corollæ concoloria, conniventia, exterioribus latioribus.

COR. Tubus infundibuliformis, superne clausus villis plurimis horizontaliter conniventibus, calyce paulo brevior. Limbi laciniæ lanceolatæ, acutæ, revolutæ, tubo duplo longiores.

Glandulæ oblongæ, parvæ.

STAM. Filamenta orta in fundo tubi corollæ, quo paulo longiora. Antheræ connientes in conum obtusiusculum, basi quinquedentatum, erectum, extra corolla tubum.

PIST. Germen ovatum, villosum. Stigma acuminatum.

PER. . . .

SEM. . . .

Hæc planta, scatens tota lacte niveo & copioso, arbores vicinas ad sexaginta pedum altitudinem scandit.

Caules habet teretes, lignosos, lentes, volubiles, diametro pollicari; qui ad distantias varias ornantur ramusculis alternis, sesquipedalibus, per totam longitudinem foliosis. Folia sunt oblonga, venosa, glabriuscula, in acumen desinentia, disticha, semipedalia. Spicæ axillares, oppositæ, densæ, sesquipollicares, solitariæ, patentes, rarius divisæ in duas; gerunt flores numerosos, candidos, parvos, subsessiles, vix odoriferos. Fructum non vidi, quem incassum per plures menses exspectavi & quæsivi; doluique, flores abortasse omnes. Facile fuisse, hanc plantam distincti esse generis, suspicatus, ignorata scilicet pericarpii conditione; verum subsequentis speciei plene cognitus character dubitatem in hac confirmavit.

Crescit Carthaginæ in sylvis densis proceris. Floret Julio & Augusto.

10. ECHITES (*corymbosa*) racemis corymbosis; staminibus eminentibus. Linn. syst. 210.

(Pl. americ. pict. Tab. 37. *Ramus florens.*)

CAL. Foliola ovata, concava, conniventia, corollæ concoloria, persistentia.

COR. Tubus cylindricus, brevissimus. Limbi laciniae lanceolatæ, obtusæ, reflexæ, calyce triplo longiores.

Glandulæ ovatæ, parvæ.

STAM. Filamenta orta in fundo tubi corollæ, eodemque paulo longiora. Antheræ magnæ, conniventes in conum acuminatum, basi decemdentatum, extra tubum corollæ.

PIST. Germen ovatum, didymum.

PER. Folliculi hinc convexi, illinc compressi, horizontaliter reflexi.

SEM. oblonga.

Caulibus volubilibus fruticosisque arbores ad pedes usque viginti scandit hæc planta, tota scatens lacte glutinoso candidoque. Folia habet ovata ovalia vel obversæ ovata, acuta, numerosa, bipollicaria, in ramis junioribus pedalibus oppositisque. Flores rubri, numerosi, parvi, in racemis ramosis & corymbosis. Stylus fulco utrinque longitudinali levissimoque notatur, juxta quem in duas partes facile potest separari. Fructus est crassitie atque longitudine æqualis illi, quem dat Echites umbellata. Incolis nuncupatur *Gras de galle* sive *Pinguedo scabiei*, cuius nominis rationem ignore.

Crescit in sylvaticis insulæ Domingo. Floret imprimis Novembri.

1. PLUMERIA (*rubra*) foliis ovato-oblongis, planis petiolis biglandulosis. *Linn. syst. 210.*

Plumeria arborescens, ramulis crassis, foliis oblongo-ovatis, petiolis biglandulosis, floribus geminatis per spicas terminales. *Brown. jam. 2*, p. 181.

Plumeria flore roseo odoratissimo. *Catesb. car. 2*, p. 92, t. 92.

Nerium arboreum, folio maximo obtusiore, flore incarnato. *Sloan. hist. jam. 2*, p. 61, t. 185, f. 1, & 186, f. 1.

Nerio affinis barbadensis arbor latifolia, flore purpureo-jasmini odore. *Pluk. alm. 109*, t. 207, f. 2.

Jasminum indicum. *Merian. Surin. 8*, t. 8.

Arbor hæc procera, ramosa, comaque prædita est ampla, sed rara, in Americæ Continente; ex qua videatur fuisse in Caribæas insulas aliasque transportata, ubi rarius quindecimpedalem altitudinem attingit. Folia habet frondosa & plana. Latte scatet niveo. Flores gerit numerosissimos, suavissime olentes, rubros & speciosos; quibus capillitia sua exornare mulieres Americanæ quibusdam in regionibus assueverunt. Tum etiani vestitui lineo illos interponunt, uti lavandulam Europæi. E ramis putatis facilime propagatur; imprimis si per quatuordecim dies loco sicco asservati tum demum serantur. A me ex Martinica transmissa, nunc florere Vindobonæ in Horto Cæsareo quotannis pulcherrima solet. Gallis vocatur *Frangipanier rouge*.

Crescit sylvestris in Continente; at cultam in Caribæis solummodo vidi.

2. PLUMERIA (*alba*) foliis lanceolatis, revolutis; pendunculis superne tuberosis. *Linn. syst. 210.*

(*Pl. americ. pict. Tab. 38. Ramus florens. Dein autumnum pistillum.*)

Plumeria flore niveo, foliis oblongis, angustis & acuminatis. *Tourn. inst. 659.*

Apocynum americanum frutescens, longissimo folio, flore albo odoratissimo. *Comm. hort. 2*, p. 47, t. 24.

Nerium arboreum altissimum, folio angusto, flore albo. *Sloan. hist. jam. 2*, p. 62.

CAL. Perianthium monophyllum, minimum; margine quinquedentato, obtuso.

COR. Petalum infundibuliforme. Tubus longissimus, crassus, sensim ampliatus, incurvus, basi angusto foramine pervius. Limbus quinquefidus: laciniis obverse ovato-oblongis, planis, obliquis, patentissimis, tubum fere superantibus.

STAM. Filamenta quinque, brevissima, in tubi infima parte. Antheræ oblongæ, acutæ, conniventes.

PIST. Germen subrotundum, bifidum. Stylus primum bifidus, mox incrassatus in cylindrum maximum, longitudine staminum. Stigma bifidum: laciniis subulatis, patentibus, obtusiusculis.

PER. Folliculi duo, longi, acuminati, ventricosi, horizontaliter reflexi, uniloculares, univalves.

SEM. numerosa, oblonga, plana, fasciæ membranaceæ ovatae ad basin inserta, imbricata.

Arbor habitu præcedentis, at parum ramosa, & quindecim altitudine pedes rarius superans, lacte etiam candido copiosoque abundat. Folia sunt frondosa. Flores candidi cum fauce flavescente odorem spirant suavissimum lateque se quaquavorsum diffundentem. Paulo ante discessum meum ex insulis Caribæis ferebatur innotuisse occultum barbarorum remedium, quo certo tutoque sine ullo mercurii usu tollebant illi morbum dictum *Epian*, qui videtur luis esse venereæ species: illud autem dicebatur radicum hujus *Plumeria* recentium decoctum. Utrum anterior indagatio confirmarit assertum, ignoro. Viennæ etiam hæc viget, beneque habet, at flores protulit nedum. Gallis audit *Frangipanier blanc*.

Crescit in rupestribus maritimis Martinicæ.

3. **PLUMERIA** (*inodora*) caudice vix diviso.

Arbuscula octopedalis, erecta, caudice in paucissimos brevesque ramos diviso. Folia *Plumeria* rubræ. Flores alibi, inodori, congeneribus duplo maiores. Nullus dubito, quin alia posset meliorque dari specifica hujus plantæ differentia: in *Plumeria* autem, nescio, quo fuerim pacto examinandis negligentior. At vero præter illa, quæ in adversariis meis adnotata invenio, memoria diffusus, adducere nihil ausim.

Crescit Carthagena in sylvaticis passum.

4. PLUMERIA (*pudica*) florum limbis clausis. Linn.
syst. 210.

Quas ego vidi, erant arbusculæ lactescentes, erectæ, quinquepedales; cæterum habitu præcedentium. Folia habebant oblonga, frondosa, plana, venosaque. Ferebant flores per binos menses continuo invicem succeden-tes numerosos, flavescentes totos; in quibus corollarum limbi erecti clausique permanebant etiam post lapsum, obvoluti fere in modum, quo Hibisci Malvavisci flores. Odorem spirant præcedentibus longe gratiorem, & cui, mei olfactus æstimatione, cedunt cuncti mihi cogniti flo-res. Curaçaviensibus in maxima æstimatione sunt, vo-canturque specioso nomine *Donzellas* sive *Virgines*, eo quod nunquam explicitur.

Colitur in hortis Curaçao, aliunde istuc allata; co-piose in horto egregii, dum vivebat, mercatoris van Len-nep circa Zoutpan.

I. CAMERARIA (*latifolia*) foliis ovatis, utrinque acu-tis, transverse striatis. Linn. syst. 210.

(Pl. americ. pict. Tab. 39. *Ramus cum flore & fructu.*)

Cameraria lato myrti folio. Plum. ic. 72, f. I.

Cameraria arborea, foliis ovato-acuminatis nitidis rigidis reflectentibus, folliculis alatis. Brown jam. I, p. 182.

CAL. Perianthium quinquepartitum, acutum, connivens, minimum, deciduum.

COR Petalum subinfundibuliforme. Tubus cylindricus, longus, basi & apice ventricosus, ventre superiori quinquestriato. Limbus quinquefidus: laciniis oblongis, obtusis, planis, patentissimis, obliquis, longitudine tubi.

STAM. Filamenta quinque, brevissima, ad basin notata appendicula, posita in superiore tubi parte Antheræ oblongæ, conniventes, singulæ ad apicem instructæ setis duabus flaccidis longitudine ipsorum staminum.

PIST. Germen subrotundum, bifidum. Stylus filiformis, longitudine staminum. Stigma oblongum, capitatum, magnum, bifidum.

PER. Folliculi duo, propter emissas duas alas laterales breves intermediumque longissimam hastato-oblongi, compressi, horizontaliter reflexi, basi biloculares Dis-segmentum tenui, membranaceum.

SEM. solitaria, subrotunda, obtuse acuminata, compressa.

Arbor procera, adspectu perelegans, cōmosa, ramosa, tota lacte niveo abundans: trunco erecto crassoque; ramulis ut plurimum dichotomis. Folia rotundato-ovata, in acumen abeuntia, integerrima, striis transversim parallelis notata, nitidissima, rigidula, petiolata, opposita, numerosa. Pedunculi uniflori vel multiflori, tenues, longi, axillares aut in ramulorum dichotomiis. Flores candidi. Folliculi fusci, structura quidēm bivalves, at quorum valvulae dehiscent nunquam; imo quæ vix summa adhibita vi divelli queunt.

Crescit in Cuba, Jamaica, Domingo. Amat pratenſia.
TABERNAEMONTANA.

CAL. Perianthium quinquefidum, acutum, erectum, deciduum.

COR. Petalum unicum. Tubus cylindricus, erectus, calyce longior. Limbus quinquepartitus: laciniis inæqualiter obverse ovatis, truncatis, planis, patentissimis, obliquis.

Glandulæ nectareæ quinque, bifidæ, minimæ, germini circumstantes.

STAM. Filamenta quinque, brevissima. Antheræ oblongæ, acuminatæ, conniventes.

PIST. Germina duo, subovata, parva. Stylus filiformis, erectus, longitudine staminum. Stigma oblongum, capitatum.

PER. Folliculi duo, ventricosi, horizontaliter reflexi, uniloculares, univalves.

SEM. plurima, oblonga, obtusa, rugosa, longitudinaliter umbilicata, imbricata, pulpa molli obvoluta.

Hujus generis plantæ habitum præ se aliquid ferunt, quo facile dignosci ab affinibus possunt, & qui præprimis in foliis obtinet. Propter hunc ipsum communem habitum magis arduum est, species rite atque evidenter determinare; quas, præter jamjam enumerandas, alias adhuc observasse me recordor, sed, aut otio deficiente aut occasione, scripto non notatas. Folliculi pulpa farcti optime ab affinibus hoc genus distinguunt. Glandulæ quidem, ut in Echite adsunt; verum minimæ illæ, fæpe vix conspicuæ, bifidæque; si Tabernæmontanam excepéris grandifloram, in qua majores sunt, integræ, & sulco longitudinali notatæ.

1. TABERNAEMONTANA (*citrifolia*) foliis oppositis, ovatis; floribus lateralibus, glomerato-umbellatis. Linn. *syst. 211.*

(Pl. A. P. Tab. 40. *Ramus cum flore & fructu.*)

Tabernæmontana citri foliis undulatis. Plum. ic. 248, f. 2.

Arbuscula octopetalis, erecta, ramosa, tota lactescens. Folia nitidissima, acuta, per venas contrahentes undulata, virentia quidem, sed ita, ut lac, quibus abundant, transparere videatur. Flores pauci candidi, levigrataque suaveolentia prædicti. Stamina intra corollæ tubum occultata. Folliculi acuti, semper virides. Semina rugosa & fusca locantur in pulpa aurantiaca & molli. Galiis audit *Bois laiteux* seu Arbuscula lactea.

Crescit in sylvaticis Martinicæ.

2. TABERNAEMONTANA (*laurifolia*) foliis oppositis, ovatis, obtusiusculis. Linn. *syst. 211.*

Tabernæmontana frutescens, foliis subnitidis ovatis venosis. Brown. *jam. I*, p. 182.

Nerium arboreum, folio latiore obtuso: flore luteo minore. Sloan. *hist. jam. 2*, p. 62, t. 186, f. 2.

Arbuscula erecta, quinquepedalis, ramosa, lactescens, habitu præcedentis. Flores lutei, odoratissimi, pauci. Stamina intra corollam abscondita. Fructus virides.

Crescit in Domingo & Jamaica.

3. TABERNAEMONTANA (*cymosa*) foliis oppositis; floribus densissime cymosis. Linn. *syst. 211.*

(Pl. americ. pict. Tab 259, fig. 10. *Flos. Folliculi.*)

Arbuscula elegans, erecta, trunco sexpedali, nonnunquam duplo altior. Folia ex ovato lanceolata, acuta, integerrima, vix undulata, opposita, semipedalia. Cymæ amplæ, pulchræ, convexæ, densæ, axillares. Flores inodori, sordide albescentes aut rufescentes, circiter quadraginta in eadem cyma, magnitudine præcedentium. Calycis foliola plana, lanceolato-oblonga. Corollæ tubus basi quinquangulari-ventricosus. Stamina in basi ampliata tubi. Stigma basi marginatum. Folliculi oblongi, obtusissimi, incurvi, maximi, rubescentes cum maculis ferrugineis, præbuere ansam nominis obscuræ, *Cojones de fragas*, quod hæc planta apud incolos arbitraria comparatione obtinet. Horum plerumque alteruter abortat. Pulpa coloris est aurantii.

Crescit frequens Carthagenaе in fruticetis & sylvis.
Floret Julio & Augusto.

4. TABERNAEMONTANA (*amygdalifolia*) staminibus
extra tubum corollæ eminentibus.

(Pl. A. P. Tab. 259, fig. II. Flos.)

Arbuscula erecta, ramosa, lactescens, sexpedalis. Folia ex ovali lanceolata, acuta, plana, nitidissima, opposita. Pedunculi pauciflori. Flores candidi, odoratissimi. Corollæ tubus basi apiceque leviter ampliatus. Filamenta in suprema tubi parte, antheris extra tubum porrectis. Folliculi subovati vel oblongi, semper acuminati, virides, nitidi, accedentes ad Tabernæmontanam citrifoliam, sed sæpius duplo triplove minores. Pulpa aurantia. Quum florere incipit, foliis plerumque caret.

Crescit frequens Carthagenaе in sylvaticis & fruticosis.
5. TABERNAEMONTANA (*grandiflora*) foliis oppositis; caule dichotomo; calycibus inæqualibus, laxissimis. Linn. syst. 2II.

(Pl. americ piæ. Tab. 4I. Ramus cum flore. Tum fructus.)

Arbuscula erecta, ramosa, lactescens, octo pedes alta; ramulis dichotomis. Folia ovalia, utrinque attenuata, acuta, integerrima, nitida, petiolata, opposita, magnitudine valde inæquali. Pedunculi communes irregulares, biflori vel triflori, solitarii ad latera bifurcationis ramuscularum ultimæ: propriis stipula suffultis. Flores inodori, congenerum respectu maximi. Calyx dividitur in foliola quinque, plana, albida, laxissima, longitudine inæqualia; quorum exteriora duo sunt cordata & amplissima, interiora reliqua oblonga angustaque. Corollæ tubus supra calycem est contortus, eodemque duplo longior; limbus vero amplissimus. Glandulæ sunt subrotundæ, obtusæ, parvæ, externe sulcatæ, lateribus in unam coalitæ. Stamina locantur in medio tubo. Stigma magnum apice gaudet bifido. Folliculi e subrotundo ovati, acuminati, glabrique, virent. Ergo quiddam commune flos habet cum Echite & Cerbera; fructus vero Tabernæmontanis respondet.

Crescit in sylvis Carthagenaëbus rarius. Vidi florentem Julio, Augusto & Septembri.

VARKONIA.

CAL. Perianthium monophyllum, campanulatum, perfistens, limbo quinquefido.

COR. monopetala. Tubus infundibuliformis, erectus. Limbus quinquepartitus, patens.

STAM. Filamenta quinque, subulata, erecta, longitudine circiter tubi, cui inserta. Antheræ oblongæ, incombentes.

PIST. Germen ovatum. Stylus filiformis, erectus. Stigma varium.

PER. Drupa subrotunda.

SEM. Nux subrotunda, quadrilocularis. Nuclei solitarii.

1. VARRONIA (*curassavica*) foliis lanceolatis; spicis oblongis. Linn. syst. 192.

Varronia assurgens farmentosa, foliis & capitulis oblongis. Brown. jam. 2, p. 172.

Peryclimenum rectum, salviæ folio rugoso majore oblongo bullato, flore albo, fructu longiore. Sloan. hist. jam. 2. p. 81.

Frutex quindecimpedalis; ramis teretibus, scabris, senioribus ferrugineis. Folia lanceolata, acuta, serrata, rugosa, venosa, facie scabra, petiolata, alterna. Spicæ densæ, terminales, duos tresve pollices longæ, insidentes pedunculo bipolllicari. Flores parvi, inodori. Calyx inflati laciniaæ subovatæ desinunt in denticulos setaceos ejusdem secum longitudinis. Corollæ albæ tubus longitudine calycem æquat; limbus brevis est & emarginatus. Stamina petalo sunt paulo breviora. Stylus etiam brevis stigmate capitato simplicique instruitur. Drupa rubra & parva est.

Crescit in Curaçao in sepibus arboreis.

2. VARRONIA (*macrostachya*) spicis oblongis; foliis lanceolato-oblongis.

Arbuscula erecta, duodecimpedalis. Spicæ semipedales. Folia angusta, semipedalia. Reliqua, ut in precedente.

Crescit Carthagena in fruticosis & sylvaticis.

3. VARRONIA (*martinicensis*) foliis ovato-acuminatis, spicis oblongis. Linn. syst. 192.

(Pl. americ. pict. Tab. 42. *Ramus florens.*)

Frutex humanæ altitudinis, habitu præcedentium. Folia ovata, tripolllicaria. Spicæ unum alterumve pollicem longæ.

Crescit in Martinica ad margines sylvarum.

4. VARRONIA (*globosa*) foliis lanceolato-oblongis; caule dichotomo; pedunculis axillaribus, elongatis, nudis; spicis globosis. *Linn. syst. 192.*

Frutex hic congruit cum Varronia martinicensi. Discrimen est in constanti globositate spicarum, in corollorum laciniis emarginatis ipsis, & in stigmate obtuso quadruplici.

Crescit in Caribaeorum maritimis.

5. VARRONIA (*humilis*) spicis subrotundis; fructibus dispermis.

Varronia fruticosa, foliis rugosis, ovatis, subhirsutis, serratis, alternis; capitulis subrotundis. *Brown. jam. I, p. 172, t. 13, f. 2.*

Frutex quadripedalis, ramosus, praecedenti adeo similis, ut fere crederem varietatem in rupestribus enatam. In hac vero nuces dicit biloculares Browneus; quas ego neglexi examinare.

Crescit in maritimis rupestribus Caribaeorum.

6. VARRONIA (*bullata*) spicis subrotundis; petalis hypocrateriformibus. *Linn. syst. 192.*

Pl. americ. pict. Tab 43. Ramus cum flore & fructu.

Frutex hic inter congeneres est elegantior, & altitudine duodecimum saepe pedem attingit. Folia habet ovata, vel ex oblongo ovata, utrinque scabra, bipinnaria; quoad reliqua, ut in prioribus. Pedunculi communes terminantur in capitula spicata, subrotunda, simplicia vel composita. Flores magnitudine & figura referunt Mirabilem Jalapam; suntque candidi, pulchri, & inodori. Calycis parvi laciniæ sunt ovatae, desinuntque in setas longas. Stigma in quatuor dividitur laciniis subulatas obtusas brevesque. Drupa rubra pisum æquat, farcta pulpa dulci & glutinosa. Nux est depressa.

Crescit in Domingo; passim in sepibus ipsius oppidi Portus Principis.

7. VARRONIA (*alba*) foliis cordatis; floribus cymosis. *Linn. syst. 192.*

Mespilus americana alni vel coryli foliis, fructu mucilaginoso albo. *Comm. hort. p. 155, t. 80.*

Hæc arbor triginta saepe alta pedes, coma gaudet ampla, truncoque semipedalis diametri: plantata vero in

sepibus, fruticosum dumtaxat habitum acquirit. Folia sunt ovata simpliciter vel e subrotundo ovata, basi subcordata, longa quatuor vel quinque pollices: quoad cætera, similia congeneribus. Cymas habet amplas, diametri non raro semipedalis; quæ flores locant numerosos, inodoros, & albidos. Calyx in principio integer, ab erumpente petalo fecedit horizontaliter in valvulam superiorem marcescentem; & in inferiorem persistentem, marginem quæ habet levissime quinquedentatum. Corolla limbus est campanulatus. Styli bifidi sunt, quorum laciniae bifidæ stigmatibus terminantur obtusis. Drupa oblongiuscula, semipollicaris, albescens, subpellucida, apud Curaçavienses edulis. Puppa albida, dulcis, insipida, glutinosa. Nux oblonga, striata, nigra.

Crescit Carthagena, & in Curaçao.

CORDIA

CAL. Perianthium monophyllum, tubulosum, oblongum, erectum, persistens; ore dentato acutoque.

COR. monopetala. Tubus ex oblongo infundibuliformis, longitudine calycis. Limbus planus, patens, obtusus, saepe quinquefidus, tubum non superans.

STAM. Filamenta saepe quinque, subulata, erecta, partim tubo corollæ adnata, eandemque non superantia. Antheræ oblongæ, obtusæ.

PIST. Germen subovatum. Stylus filiformis, erectus, ad minus longitudine staminum, superne bifidus: laciinis bifidis. Stigmata obtusa, crassiuscula.

PER. Drupa subrotunda, styli parte acuminata, basi calyci accreta, intra eundemque distentum & incrassatum recondita.

SEM. Nux subrotunda, magna, quadrilocularis. Nuclei solitarii, ovati.

I. *CORDIA (Sebestena)* foliis oblongo-ovatis, subrepandis Linn. syst. 191.

(Pl. americ. pict Tab. 44. Ramus florens. Tum fructus transversim dissectus. Idem integer.)

Cordia foliis amplioribus hirtis ovatis, tubo floris subæquali Brown. jam. I, p. 202.

Cordia nucis juglandis folio, flore purpureo. Plum. ic. 105. *Sebestena* scabra, flore miniato crispo. Dill. elth. 341, t. 255, f. 331.

Caryophyllum spurius inodorus, folio subrotundo scabro,
flore racemoso hexapetaloidē coccineo. *Sloan. hist.*
jam. 2, p. 20, t. 164. Catesb. car. 2, p. 91, t. 91.

Arbuscula erecta, elegans, foliosa, decempedalis, ex ipsa saepe radice plures truncoſ ramosos emittit. Folia habet maxima, ovata vel subrotunda vel ex utroque, utrinque scabra, repanda vel integra vel ferraturis aliquot incisa. Racemi cymosi, erecti, primo terminales, dein elongatis ramis laterales. Flores levissime suaveolentes, plurimi, speciosi, ferme omnes fructiferi. Calyx scabriuscus; inaequaliter sexdentatus. Corollæ miniatæ limbis semifexfidus, rarius semiseptemfidus, nunquam a me visus quinquefidus praeterquam in caldariis Viennensibus. Stamina sex plerumque, rarius quinque vel septem, numerum laciniarum corollæ non sequentia, longitudine tubi; antheris erectis. Germen basi accretum calyci. Stylus longitudine corollæ. Calyx in fructu quam maxime distentus mutatur, ut evadat niveus, crassus; glaber, succulentus; inferne nuci accrescit, superne a drupa liber, pomumque Europæum odore refert, apice connivens. Drupa dimidiata, superiorem nucis partem vestiens, calyci similis. Calyx igitur basi partem veræ drupæ constituit, superne hanc ceu altera drupa involvit. Loculum semper aliquod in nuce obsolescit. Ex nucibus purgatis & ad umbram siccatis facilime in longinas regiones transmitti, ibidemque propagari potest. Bene culta crescit celeriter, & intra annum flores profert; quos Viennæ saepius jam vidi; uti etiam fructus maturos.

Crescit Carthaginæ in fruticetis maritimis.
2. *CORDIA (juglandifolia)* foliis oblongis scabris.

Arbuscula duodecimpedalis, erecta, inelegans. Folia oblonga, acuta, integerrima, utrinque scabra, alterna, petiolata, qua uor aut quinque pollices longa, unum alterumve lata. Racemi sesquipollicares, pauciflori, axillares. Flores figura & magnitudine precedentibus similimi; sed corollæ limbis triplo brevior est tubo & perpetuo sexfidus. Stylus dumtaxat est bifidus. Fructus idem.

In Domingo crescit in fruticosis ad sinum Bayaha.
3. *CORDIA (Gerascanthus)* foliis lanceolato-ovatis, scabris; panicula terminali; calycibus decemstriatis. *Linn.*
syst. 192.

(Pl. americ. pict. Tab. 259, fig. 12. Flos.)

Gerascanthus foliis ovato-oblongis, utrinque productis, racemis terminalibus. *Brown. jam. I*, p. 170, t. 29, f. 3.

Arbor procera, erecta. Truncus saepe ad trigesimi pedis altitudinem tandem in ramos dispescitur. Flores inodori. Calyx subviridis, decemstriatus, semper quinque-dentatus. Corollæ albidae & diu persistentis limbus quinquefidus; laciniis oblongis, longitudine tubi. Stamina constanter quinque, corollam aequantia. Germen proprio quasi receptaculo insidet. Fructum maturum ego non vidi. Materies in pretio habetur apud incolas, dicitur que Gallis *Bois de Chypre* sive lignum cyprium.

Crescit in Caribearum sylvis montosis,

I. EHRETIA (*tinifolia*) foliis oblongo-ovatis, integerimis, glabris; floribus paniculatis. *Linn. syst. 192.* *Trew. Ehret. tab. 24.*

Ehretia arborea, foliis oblongo-ovatis alternis, racemis terminalibus. *Brown. jam. I*, p. 168, t. 16, f. 1.

Cerafo affinis arbor baccifera, racemosa, flore albo pentapetalo, fructu flavo monopyreno dulci eduli. *Sloan. hist. jam. 2*, p. 94, t. 203. f. 1.

CAL. *Perianthium monophyllum*, *campanulatum*, obtusum, erectum, semi-quinquefidum, persistens.

COR. *monopetala*. Tubus infundibuliformis, calyx pau-
lo longior. Limbus quinquefidus: laciniis subovatis,
acutis, planis, reflexis, tubum leviter superantibus.

STAM. Filamenta quinque, subulata, patula, petalo pau-
lo breviora, cujus fundo basi latiuscula inferuntur.
Antheræ ovatae, utrinque sulcatæ, incumbentes.

PIST. Germen subrotundum. Stylus filiformis, superne
crassior, erectus, longitudine staminum. Stigma sub-
bifidum, obtusum.

PER. *Bacca* subrotunda, unilocularis.

SEM. quatuor, hinc convexa, inde angulata, paucissima
pulpa distincta.

Arbor erecta, viginti vel triginta pedes alta, in co-
mam abit oblongam densamque. Folia habet ovalia, ob-
tusa, integerrima, glabra, alterna, breviter petiolata,
circiter quadripollicaria. Racemi paniculati, oblongi,
magni, terminalis. Flores numerosi, parvi, candidi,
subgraveolentes.

Crescit in Cuba & Jamaica. Florentem vidi Januario & Februario.

2. EHRETIA (*spinosæ*) *spinosæ*. *Linn. syst. 192.*

(*Pl. americ. pict. Tab. 259, fig. 14. Spina. Folium.*)

CAL. Perianthium pentaphyllum, persistens: foliolis lanceolatis, concavis, acutis, erectis.

COR. monopetala. Tubus infundibuliformis, longitudine calycis. Limbus quinquefidus: laciniis subovatis, obtusis, reflexis, longitudine tubi.

STAM. Filamenta quinque, subulata, erectiuscula, orta in parte superiore tubi corollæ, qua paulo breviora. Antheræ oblongæ, utrinque sulcatae, incumbentes.

PIST. Germen subrotundum. Stylus profunde bifidus: laciniis subulatis, canaliculato-carinatis, marginibus superne villosis, patentibus, longitudine tubi corollæ. Stigmata simplicia, villosa.

PER. Bacca subrotunda, unilocularis.

SEM. quatuor, hinc convexa, inde angulata, pauca pulpa distincta.

Diametro tres quatuorve pollices sœpe æquans hujus arboris truncus, jam mox supra solum dividi solet in ramos plerumque tres, qui, ceu totidem trunci, viginti quinque vel triginta pedum longitudinem adipiscuntur. Hi, paucis similibus in progressu ramis emissis, vix ad decimum altitudinis pedem perveniunt, quin jam terram versus recurventur, arborumque vicinarum ramis, quibus valide sustententur, egeant. Ornantur vero sparsim ramulis lateralibus plurimis, iisdemque brevissimis. Cortice vestiuntur cinereo glabroque. Spinæ in ramulis subaxillares, in trunco ramisque primariis sparsæ, adsunt ligneæ, fortes, subulatæ, breves, crassissimæ; quarum seniores frequenter ex media sui parte ramulum emittunt perpendicularē, foliosum, ejusdem secum longitudinis. Folia sunt oblonga, basi attenuata, obtusa, integra, interdum subrepanda, nitida, breviter petiolata, tres vel quatuor pollices longa, numero inconstanti ut plurimum quinque vel sex prodeuntia ex eodem tuberculo, quotannis decidua. Racemi breves, subcorymbosi, ramosi, stipulis subulatis suffulti, e centro tuberculorum enascuntur, non raro ante novorum foliorum eruptionem. Flores plurimi, parvi, corollis flavescentibus. Styli laciniæ

haberi pro ipso stigmate bipartito possunt, cuius singulari sit structura, ut introsipienti oculo armato vel in ipsum germen aditus pateat. Fructus pisii magnitudine subent. Incolis vocatur *Cacaracacara*. Habitu haec arbor valde diversa est a priore; flore tamen, praeterquam in calyce styloque divisis, cum eadem valde convenit. Utriusque completum characterem adduxi; ut, qui me intelligentiores sint, judicare queant, recte conjuncte sint, an ad diversum genus referendæ?

Crescit Carthaginæ in sylvis densis. Floret Augusto fructumque fert maturum sub finem Octobris.

3. EHRETIA (dubia) pedunculis unifloris, aggregatis.
Jacq. obs. I, p. 19.

CAL. Perianthium monophyllum, bivalve: valvula inferiori campanulata; superiore subrotunda, concava, ad petali eruptionem transversim ab inferiore abscedente, patentissima, duplo minore.

COR. monopetala. Tubus infundibuliformis, erectus, interne hirsutus, longitudine calycis. Limbus quinquefidus, longitudine tubi: laciniis ovatis, obtusis, planis, patentissimis.

STAM. Filamenta quinque, subulata, erecta, brevia, superiori parti tybi corollæ imposita. Antheræ ovales, didymæ, erectæ.

PIST. Germen ovatum. Stylus subulatus, erectus, semi-bifidus, calyce duplo longior: laciniis bifidis, inflexis. Stigmata acuta.

PER.

SEM.

Hanc arborem Februario mense unicam offendi in Jamaica prope oppido Kingston, loco pratenso, viginti quinque pedes altam, trunko insistentem diametri vix semipedalis, frondeque donatam non valde densa. Florebat illa, & foliis maximam partem destituebatur. Ex germine autem nihil certi de futuro fructu conjicere poteram, nec hunc exspectare, ad discessum ex insula jam accinctus. Videbatur tamen ad Ehretias prope accedere ad quas reduxi, donec cognita pericarpii conditio aliud quid statuat. Folia, quæ tunc pauca aderant, eaque primis in ramulis junioribus quidem at non florigeris, varia conspiciebantur magnitudine a tripolllicari ad semi-

pedalem; cæterum oblongo-lanceolata, acuta, integerima, glabra, petiolata, alterna. Flores parvi sordideque albentes locabantur prope ramulorum extremitates in pendulis propriis brevibusque aggregati. Calyx, ante corollæ eruptionem pyriformis, in hac horizontaliter descendit in duas partes sive valvulas, quarum inferior ipsum fundum basinque calycis constituebat; superior hujus verticem, nunc extrorsum reflexa.

4. EHRETIA (*Beurreria*) foliis ovatis, integerrimis; floribus subcorymbosis; calycibus glabris. *Linn. syst. 192.*
(*Pl. americ. pict. Tab. 45. Ramus florens.*)

Beurreria arborea foliis ovatis alternis, racemis rarioribus terminalibus. *Brown. jam. I, p. 168, t. 15, f. 2.*
Mespilus americana laurifolia glabra, fructu rubro mucilaginoso. *Comm. hort. I, p. 153, t. 79.*

Jasminum periclymeni folio, flore albo, fructu flavo rotundo tetrapyreno. *Sloan. hist. jam. 2, p. 96, t. 204, f. 1.*
CAL. Perianthium monophyllum, tubulosum, persistens: ore inæqualiter quinquefidio, acuto, erecto.

COR. monopetala. Tubus infundibuliformis, erectus, ealyce longior. Limbus quinquefidus: laciniis obtusis, integris, planis, patentissimis, tubo brevioribus.

STAM. Filamenta quinque, subulata, erecta, orta in fundo tubi, corolla paulo breviora. Antheræ incumbentes.

PIST. Germen subrotundum. Stylus filiformis, erectus, longitudine staminum. Stigmata capitata, obtusa.

PER. Bacca tetragono-subrotunda, unilocularis.

SEM. quatuor, hinc angulata & glabra, illinc convexa audaque lamellis membranaceis semicircularibus transversis, bilocularia.

Arbuscula inelegans, a sole adustum veluti habitum præ se ferens, in Curaçao sæpe quindecim pedes altitudine excedit, in Martinica rarius quinque. Truncus inæqualis, cortice rimoso. Rami inordinati, plurimi. Folia alterna, petiolata, integerima, cæterum varia: sunt enim obtusa, acuta, emarginata, in rupibus glabra, in glareosis & alibi facie scabra, magnitudine diversa, oblonga, ovata, &c. Racemi corymbosi, terminales. Flores suaveolentes; corollæ albæ laciniis subrotundis; antheris oblongis; calyce in fructu fisso. Baccæ nitidæ, croceæ aut aurantiæ, pulposæ, dulces, succulentæ; quo majores, eo magis quadrangulares, pueris barbarisque

edules. Glareosa & rupestris incolere solet, absque ulla
sæpe terra rupium hiatibus innascens: sic in Curaçao circa
Hato vidi decempedalem illam, trunco diametri bipollis-
caris ad basin appланato supraque rupem extenso, cuius
radix foramine arcto, quo solo pars rupis illa pertunde-
batur, coacta, ipsa vix digitum minimum crastitie æqua-
bat. Gallis dicitur *Bois cabril batard* sive *Arbuscula capri-*
rum *spuria*.

Crescit in Caribæis.

5. EHRETIA (*exsucca*) fructibus exsuccis, quadripartitis.
Linn. syst. 192.

(Pl. A. P. Tab. 259, fig. 13. Flos. Fructus integer. Ejus-
dem una quarta pars, sponte secedens, & medio adhae-
rens receptaculo.)

Rhamnus cumanensis. Loefl. it. 182.

Arbuscula quindecimpedalis, interdum erecta, inter-
dum vicinis arboribus se sustentans lentaque; cæterum
habitu præcedentis. Folia ovata, acuta, glaberrima, al-
terna, petiolata, bipollicaria. Racemi ramosi, subco-
rumbosi, subterminales. Flores leviter suaveolentes,
præcedentibus multo maiores; corollæ candidæ laciniis
cordatis; antheris ovatis magnisque. Cæterum eodem
charaktere. Baccæ virides, tetragonæ, leviter quadrifil-
catæ, in acumen desinentes obtusum, pulpa farcta nulli;
tandem e nigro rufescentes, cumque ipsis inhærentibus
seminibus quadrifariam secedentes, & diu adhuc in arbo-
re persistentes.

Crescit frequens Carthagena in sylvaticis montosis
A Majo ad usque Augustum floret. Fructus Octobri ma-
turescit.

6. TOURNEFORTIA (*maculata*) foliis ovatis, utrinque
glabris; spicis ramosissimis, pendulis.

Frutex ramis debilibus; foliis integerrimis, acumi-
natis, petiolatis, inodoris; fructibus luteis, basi quatuor
maculis subrotundis atrisque notatis.

Crescit Carthagena in arbustis & sepibus.

7. RAUVOLFIA (*nitida*) nitidissima, glaberrima. Linn.
syst. 208.

Rauvolfia tetraphylla angustifolia. Plum. gen. 19, it.
236, f. I.

8. CAL. Perianthium parvum, acuminatum, erectum, quin-
quepartitum, persistens.

COR. monopetala. Tubus cylindricus, basi & apice globosus, erectus. Limbus quinquefidus: laciniis obverse ovatis, planis, patentissimis, obliquis. Faux clausa duplii serie villorum conniventium.

STAM. Filamenta quinque, brevissima. Antheræ oblongæ, acuminatæ, erectæ, infra villorum seriem infimam.

PIST. Germen subrotundum, didymum, longitudine callycis. Stylus filiformis, erectus, longitudine staminum. Stigma capitato-oblongum, magnum, apice obtuso bifidoque.

PER. Drupa subrotundo-depressa, compressa, fulco longitudinali levi in parte magis convexa notata, unilocularis.

SEM. Nux basi convexa, apice depressa, bilocularis. Nuclei solitarii.

Arbuscula hæc tota est nitidissima, erecta, lacte candido glutinosoque referta, duodecimpedalis. Folia ad nodos ramuscotorum sunt quaterna, lanceolata, integerima, acuta, petiolata; quorum proxima duo quinquepollicaria reliquis duobus duplo longiora. Pedunculi communes racemosi, terminales, semipollicares, bini vel terni. Fiores inodori, parvi, petalis candidis. Fructus primo flavescunt, tandem evadunt atropurpurei, lactescunt, pisoque sunt triplo majores.

Habitat in sylvis montosis Domingensisibus.

2. **RAUVOLFIA** (*canescens*) subpubescens. *Linn. syst. 208.*
(*Pl. americ. pict. Tab. 259*, fig. 17. *Flos.*)

Rauvolfia fruticosa, foliis verticillatis, tenuissime villosis.

Brown. jam. I, p. 180.

Rauvolfia tetraphylla, latifolia. *Plum. gen. 19, ic. 263,*
f. 2.

Solani fructu fruticosa, foliis laurinis oblongis integris, subtus hirsutis, flore minore purpureo. *Sloan. hist. jam. 2, p. 107, t. 188, f. 1.*

Arbor sycophora jamaicensis, foliis minoribus. *Pluk. phyt. t. 266, f. 2.*

Frutex erectus, totus lactescens, pro soli locique varietate variam a pedali ad octopedalem acquirit altitudinem, respondente partium reliquarum magnitudine. Rami juniores sunt subhirsuti. Folia sunt quaterna, obverse ovata, basi attenuata, acuta, rugosa, hirsuta, integerima; quorum duo proxima reliquis longiora. Pe-

tioli hirsuti, teretes. Pedunculi communes ramosi, terminales, quaterni. Flores subrubentes, parvi, inodori in planta pedali valde exigui. Calycis pentaphylli foliola lanceolata. Petali laciniae quadratae, emarginatae, vis obliquae. Fauci villi absque ordine. Drupa obsolete bifida, prima rubra, tandem atra. Nuces duas, rugosae, hinc planae, illinc convexae, biloculares. Nuclei solitarii; raro plures in unica nuce, obsolescente loculamente altero. Cætera, ut in priore.

Crescit in campis siccioribus & in fruticetis apricis Caribearum & vicinæ Continentis.

3. RAUVOLFIA (*tomentosa*) *tomentosa*. Linn. *syft.* 208
(Pl. americ. pict. Tab. 46. *Ramus florens.*)

Frutex lactescens, erectus, tripedalis. Folia quaterna, lanceolata, acuta, crassiuscula, integerrima, utrinque tomentosa, subtus vero quam maxime; quorum duo proxima reliquis longiora. Pedunculi communes ramosi, terminales & axillares. Flores parvi, inodori; calycis pentaphylli foliolis, petalique candidi laciniis ovatis: stigmate globoso. Fructus magnitudine pisi, primo rubri, tandem nigri. Reliqua respondent characteri Rauvolfiae nitidæ.

Crescit Carthagena in rupestribus; nunc vel in ipsius mœnibus lapideis portisque urbis copiose.

1. CERBEKA (*Theveria*) *foliis linearibus, longissimis confertis.* Linn. *syft.* 208.
(Pl. americ. pict. Tab. 47. *Ramus cum flore & fructu.*)

Nerio affinis angustifolia lactescens, flore luteo. Pluk. alth. 253, t. 207, f. 3.

Ahouai. Pis. bras. l. 3 ad finem.

Ahouai nerii folio, flore luteo. Plum. ic. 18.

Ycotli. Hern. mex. p. 443.

CAL. Perianthium pentaphyllum, persistens: foliolis ovato-lanceolatis, acuminatis, patentibus.

COR. monopetala, infundibuliformis. Tubus erectus, calyx longior, definens in faucem campanulatam. Limbus quinquepartitus: laciniis oblongis, apice lateſcentibus, obtusis, semireflexis, obliquis, tandem revolutis.

Nectarium quinquedentatum, stellatum, lanuginosum, connivendo os tubi claudens.

STAM. Filamenta quinque, brevissima, infra nectarium.
Antheræ oblongæ, erectæ.

PIST. Germen subrotundum, subbifidum. Stylus filiformis, compressus, longitudine staminum. Stigma subovatum, capitatum, magnum, apice bifido.

PER. Drupa subrotunda, depressiuscula, nitida, in apice notata punctis duobus umbilicatis sulcoque transverso in eadem terminato, hunc decussante sulco altero obsoleto, carnosa, lactescens.

SEM. Nux depressa, utrinque producta in latera, obtusa & obsoleta tetragona, sulcis decussantibus notata, bilocularis, quadrivalvis. Nuclei solitarii.

Arbuscula elegans, tota lacte copioso candido & venenato scatens, erecta, duodecimpedalis. Rami teretes, infirmi, cicatricibus a foliorum lapsu remanentibus pleni. Folia linearia, acuminata, integerrima, glabra, petiolata, sparsa, numerosa, plus minus quadripollicularia, in extremitatibus ramulorum. Pedunculi saepius uniflori, interdum pauciflori, axillares. Flores speciosi, odoratissimi, magni, lutei. Fructus virides, diametro semipollucari.

Crescit in Cuba & Martinica rarius.

1. SOLANUM (*bombense*) caule inermi, frutescente; foliis ovalibus, utriusque attenuatis, integerrimis; racemis cymosis.

Arbuscula erecta, comosa, duodecimpedalis. Folia in planta juniore saepe pedalia. Flores parvi, corollis albis, in racemis foliis duplo brevioribus.

Crescit in fruticetis insulæ Tierra Bomba circa Carthagena.

2. SOLANUM (*havanense*) caule inermi, frutescente; foliis lanceolatis, nitidis, integerrimis; pedunculis subbifloris. Linn. syst. 187.

(Pl. americ. Pict. Tab. 48. Ramus cum flore & fructu.)

Frutex erectus, quinquepedalis. Rami pauci. Folia obtusiuscula, plana, alterna, petiolata. Pedunculi biflori vel triflori, laterales, rari. Flores pulchelli, inodori, diametro fere pollicari. Calyx pentaphylius: foliolis oblongis, obtusis, aliquot interdum membrana tenui conjunctis. Petalum caruleum, amplum, patentissimum totum, tuboque vix ullo donatum: limbe diviso in lacinijs

latas, brevissimas, cumque acumine emarginatas. Antherae crassae, utrinque obtusae, non contiguæ. Baccæ ovata, nitidissima, saturate cærulea, succo paucō aquoso rigua, pulpam continent vix ullam. Semina reniformi, compressa, affixa receptaculo carnosō-pulposo, quod utrinque longitudinaliter medio dissepimento adnascitur. Reliqua sunt, ut in charactere Linnæano. Ambigit igitur habitu æque ac fructificatione Solanum inter Capsicum que.

Crescit Havanæ in sylvis maritimis umbrosis. Flores & fructus inveni Januario.

3. SOLANUM (*triste*) caule inermi, frutescente; foliis lanceolato-oblongis, subrepandis, glabris; racemis subcymosis.

(Pl. americ. pict. Tab. 49. *Ramus cum flore & fructu.*)

Frutex erectus, aspectu injucundus, octope talis. Folia acuta, atrovirentia, petiolata, alterna, septem vel octo pollices longa. Racemi laterales, crassi, sesquipollicares, simplices vel bifidi, a dilapsis pedunculis propriis primo prodeuntibus notati cicatricibus, flores gerunt parvos & albos in pedunculis propriis subcymosis. Baccæ globosæ fordide flavescunt.

Crescit in Martinica passim ad ripas fruticosas fluvii Divi Petri.

4. SOLANUM (*racemosum*) caule inermi, frutescente; foliis lanceolatis, repandis, undulatis; racemis longis, erectis. *Linn. syst. 49.*

(Pl. americ. pict. Tab. 50. *Ramus cum flore & fructu.*)

Frutex ramosus, erectus, quadripedalis. Folia nitida, petiolata, alterna. Racemi simplices, laterales, erecti, longitudine foliorum; pedunculis propriis in flore suberectis, in fructu pendulis. Flores inodori. Petalum nivale, dissectum profundissime in lacinias lanceolato-oblongas. Baccæ rubræ piselli magnitudine.

Crescit in declivibus fruticosis montium Martinicæ.

5. SOLANUM (*subinerme*) caule subinermi, frutescente; foliis lanceolato-ovatis, integerrimis.

(Pl. americ. pict. Tab. 259, fig. 15. *Folium. Flos*)

Frutex erectus, sexpedalis. Folia acuta, alterna, facie glabra, dorso leviter tomentosa, petiolata, tres quatuorve aut plures pollices longa. Racemi laterales, duos tres ve pollices longi; pedunculis secundis. Florum corolla cæruleo. Baccæ globosæ.

Crescit

Crescit Carthagena in fruticetis & sylvaticis.

I. LYCIUM (*americanum*) foliis cuneiformi-oblongis; fructibus unilocularibus.

CAL. Perianthium monophyllum, campanulatum, acutum, quinquedentatum, persistens.

COR. monopetala. Tubus subinfundibuliformis, erexit, calyce duplo longior. Limbus quinquefidus: laciniis ovatis, obtusis, planis, patentissimis, tubo duplo brevioribus.

STAM. Filamenta quinque, filiformia, eresta, basi hirsuta, orta in superiore parte tubi corollæ, qua paulo longiora. Antheræ oblongæ, didymæ, incumbentes.

PIST. Germen ovatum. Stylus filiformis, erexit, longitudine staminum. Stigma capitatum.

PER. Bacca obcordato-turbinata, nitidissima, calyce duplo longior, unilocularis.

SEM. plura, compressa.

Frutex elegans, diffusus, humanam raro superat altitudinem. Rami teretes, lignosi, fragiles, tenues, leucophæi, saepe longissimi, foliis ornantur numerosissimis. Hæc sunt oblonga, basi attenuata, obtusa, integerrima, crassiuscula, ad tactum pinguia, sessilia, vix semipollicaria, tria primo ex eodem loco erumpentia; quibus dein alia succedunt duo, iterumque alia duo, quæ numerum sic septenum absolvunt. Hoc tempore e medio foliorum tuberculo spina protruditur subulata, fortis, & acutissima, quæ paulatim increscens apicem format novi ramuli, abruptaque successive secum ortu juniora quatuor, quæ decorent ipsum, foliola. In tuberculis aliis trifoliis vel quinquefoliis spinæ loco prodit pedunculus uniflorus, solitarius, raro bini. Flos est tenellus, inodorus, e purpureo albidus, & pollicaris. Bacca splendens, atra, pisello minor.

Crescit in littoribus arenosis maritimis insulæ Domingo; passim ad egressum oppidi Portus Principis. Pariter flores & fructus Januario carpsi.

I. CHRYSOPHYLLUM (*Cainito*) foliis ovatis, parallele striatis, subtus tomentoso-nitidis. Linn. syst. 193.
(Pl. americ. piæt. Tab. 51. Ramus fructescens. Alter ramus florens. Tum fructus transversim dissectus, & semen.)

Cainito folio subtus aureo, fructu maliformi. *Plum. gen. 10, ic. 69.*

CAL. Perianthium pentaphyllum, parvum, persistens: foliolis subrotundis, concavis, obtusis, patulis.

COR. monopetala. Tubus campanulatus, magnus, erectus. Limbus quinquefidus: laciinis subrotundis, obtusis, planis, patentissimis, tubo duplo brevioribus.

STAM. Filamenta quinque, subulata, brevissima, conniventia, fere in limbo corollæ ante lacinias posita. Antheræ subrotundæ, didymæ, incumbentes

PIST. Germen subrotundum, magnitudine calycis. Stylus erectus, brevissimus. Stigma subquinquefido-obtusum.

PER. Bacca subrotunda, decemlocularis.

SEM. solitaria, obovata, compressa, obtusa, basi attenuata, nitida, scabra margine anteriori, quo baccæ adhæserunt.

Arbor hæc procera atque elegantissima comam explicat amplissimam. Ejus materies est rufa, lenta & fibrosa. Cortice vestitur subrufo, rimoſo, lignoque tenaciter adhærente. Folia habet ovata, integerrima, acuta, subcoriacea, utrinque striata, superne nitida & saturate virentia, dorso autem tomento tenui aurei fulgentis & cinnamomum imitantis coloris vestita, alterna, breviter petiolata, quinquepollicaria. Pedunculi sunt uniflori, breves, aggregati, sparsi, interdum etiam pauciflori. Flores parvi, inodori, corollis albidis. Fructus maximi, depressoſculi, coloris rosei cum levi flavedine & virore mixti, varique pro situ vario, quo radiis solaribus fuerunt expositi. Horum cortex tenuis est glaberque; caro molliuscula, subglutinosa, ante maturitatem lactescens, versus ambitum colore carneo, cæterum albescens sordide, ſepius decemlocularis, edulis, sapore dulci insipidoque, Americanis amata, Europeis plerisque neglecta; etſi in mensis apponi soleant. Semina sunt fusca, scabro margine candida; quorum raro plura tribus vel quatuor maturescunt. Gallis vocatur & Caribæis Cainito, Caimitier, Cahimimirier.

Crescit in Martinica & Domingo.

β. CHRYSOPHYLLUM (jamaicense) fructu purpureo.
Linn. syst. γ. p. 193.

Chrysophyllum fructu globoso, majori, foliis subtus ferrugineis. *Brown. jam. I*, p. 171, t. 14, f. 2.

Anona foliis subtus ferrugineis, fructu rotundo majore laevi purpureo, semine nigro, partim rugoso, partim glabro. *Sloan. hist. jam. 2*, p. 170, t. 229.

Hæc arbor præcedentis est varietas, cujus omnè discrimin in fructus figura & colore absolvitur. Est enim ille subovatus; vestitus cortice viridi, purpureo, vel ex his mixto; carne purpurea, sublactescente, saporis paucio melioris, quæ comedentis labia glutine obvestit. Vocatur Jamaicensibus *Starapple* sive *Pomum stellatum*, primasque apud illos vulgo cum *Citro* grandi obtinet inter fructus indigenas; et si mihi ac non paucis aliis displicerit uterque semper.

Crescit in Jamaica.

v. *CHYSOPHYLLUM (caeruleum)* fructu cæruleo, globoso. *Linn. syst. ð. p. 193.*

(*Pl. americ. pict. Tab. 52. Ramus fructescens.*)

Habitu hæc arbor prorsum cum præcedentibus congruit, unde varietatem esse, judicavi. Fructu vero ab iisdem differt, qui ferme est globosus, totus cæruleus, triploque minor. Pulpa cærulea, mollior, lactescit; saporis fere ejusdem. In mensis apponitur; & incolis nuncupatur *Gros Bouis*.

Crescit in Martinica.

ð. *CHRVSOPHYLLUM (microphyllum)* foliis minoribus.

(*Pl. americ. pict. Tab. 53. Ramus florens.*)

Arbuscula decempedalis, erecta. Folia vix sesqui-pollucaria. Cætera omnino priorum. Fructum non vidi.

Crescit Havanæ passim in fruticosis & sylvaticis; præcipue in collibus, qui ex adverso trans portum urbi opponuntur iu vicinia castelli Moro.

2. *CHYSOPHYLLUM (argenteum)* foliis falcato-ovatis, subtus tomentoso-nitidis,

(*Pl. americ. pict. Tab. 54. Ramus cum fructu. Dein semen.*)

Arbor habitu præcedentium Materiei & corticis color est leucophæus. Folia sunt ovata, abeuntia in acumen falcatum, integerrima, alterna, petiolata breviter, facie viridia glabraque, subtus vestita tomento ex argenteo viridi nitidoque. Fructus subrotundi, sordide & purpureo cærulei, magnitudine pruni mediocris, edules;

carne molli cærulecente leviterque lactescente; sapore ferme priorum. Incolis dicitur *Bouis*.

Crescit in Martinica.

3. CHRYSOPHYLLUM (*glabrum*) foliis utrinque glaberrimis.

(Pl. americ. pict. Tab. 55. *Ramulus fructescens.*)

Arbor quindecimpedalis, erecta, ramosa. Folia ovata, acuta, integerrima, utrinque nitida, subcoriacea, alterna, petiolata, vix bipinnicaria. Fructus cærulei, figura & magnitudine olivæ minoris, sapore præcedentis; at vix nisi pueris servisque comestus. Semina minus compressa.

Crescit in sylvis Martinicæ.

JACQUINIA.

CAL. Perianthium pentaphyllum, persistens: foliolis subrotundis, concavis, obtusis, erectis.

COR. monopetala. Tubus campanulatus, ventricosus, calyce duplo longior. Limbus decemfidus: lacinias subrotundis, obtusis, tubo brevioribus; quarum quinque interiores, duploque breviores.

STAM. Filamenta quinque, subulata, erecta, orta basi lata in fundo corollæ, longitudine fere tubi. Antheræ hastatæ, gibbæ, erectæ.

PIST. Germen ovatum. Stylus brevis, fere longitudine staminum. Stigma capitatum.

PER. Bacca subrotunda, acuminata, unilocularis.

SEM. unicum, subrotundum, cartilagineum.

I. JACQUINIA (*armillaris*) foliis obtusis cum acumine. Linn. syst. 190.

(Pl. americ. pict. Tab. 56. *Ramus florens. Tum fructus, & semen.*)

Chrysophyllum. Lœfl. hisp. 204, 277 & 278.

Arbuscula hæc erecta, sëpe elegantissima, quatuor vel quinque pedes altitudine rarius excedit. Truncо insit tereti, ad ramos nodoso atque incrassato, cortice vestito cinereo. E quolibet nodo rami enascuntur fere quinque, verticillati, patentibusque, qui eodem subdividi modo ultra pergunt; unde tandem coma formatur valde concinna globosaque. Hæc crescendi ratio magis in apricis faxosis calidisque locis obtinet; in aliis autem a dicta elegancia varie recedit. Infra singulos nodos aut ad distan-

tiam inde aliquam locantur numero incerto folia aliquot verticillata, qualia etiam verticillatim ramusculos terminant. Sunt hæc oblonga inter & subrotundam figuram varia, obtusa aut emarginata, semper autem cum exiguo rigidoque acumine, cæterum integerrima, nitida, coriacea, rigida, in petiolum attenuata brevissimum, lateribus interdum revolutis. Racemus laxus, circiter septemflorus, simplex, terminalis, solitarius, pendulus, bipinnatis. Flores parvi, rigiduli, petalis albis, odorem jasmino spirant æmulum, quem etiam post putatos abjectosque ramos, haud emarcidi, per plures dies conservant. Petali lacinia exterior unica concava est & erecta, dum reliquæ quatuor convexæ pateant: quæ vero erectæ istius latus claudunt interiores duæ, eriguntur, subpatentibus tribus reliquis. Baccæ pisi majoris volumine, ex aurantio rubentes, pulpam continent aurantiam & aviculis amatam. Semina sunt glabra, cartilaginea, nuda, e flavo subfuscata. Ex his foramine pertusis, margaritarum in modum, lineas efformant Caribæi, quibus adornant brachia: hinc apud Gallos audit *Bois bracelets* *) five Arbuscula armillaris. Contusa folia ramique, & aquis injecta, feruntur pisces inebriare, supernatantes ut manu capi queant. Hispanis dicitur *Barvasco* five *Verbascum*.

Crescit in fruticosis & sylvaticis a mari haud distitis, in Curaçao, Martinica, Carthagena, & alibi. In caldariis Viennensis floruit, diuque lète vegetavit.

2. JACQUINIA (*ruscifolia*) foliis lanceolatis, acuminatis.

Linn. syst. 191.

(*Pl. americ. pict. Tab. 57. Ramulus florens.*)

Fruticulus foliis ruscii stellatis. *Dill. elth. p. 148, t. 123.*

Alius frutex. *Loefl. hisp. 204?*

Frutex tripedalis, habitu præcedentis omnino, ut discriminem solum adduxisse sufficiat. Folia sunt lanceolata, acuminata, pungentia, rigidissima, breviora. Pedunculi sunt uniflori, etiam penduli. *Dillennii icon* est optima;

*) Nota, barbaros gallice loquentes nec declinare nomina, nec verba conjugare, nec uti articulis, &c. Unde *Bois bracelets* dicunt loco à bracelets, maître moi pro mon maître, moi couper cannes pro je coupe des cannes, &c. Quae hic monere volui.

at quos ille aculeos delineavit, ego non observavi, forte negligentia mea.

Crescit Havanæ in sylvis montosis. Floret Januario & Februario.

3. JACQUINIA (*linearis*) foliis linearibus, acuminatis. Linn. syst. 191.

(*Pl. americ. Pict. Tab 58. Ramulus florens.*)

Frutex bipedalis, ramosissimus, habitu quidem in universum præcedentium, at minus concinno. Folia sunt rigidissima, spinarum ad instar pungentia, saepe contorta, subsessilia, pollicaria, quatuor frequentius ad quemlibet nodum verticillata. Pedunculi uniflori, solitarii, terminalis, penduli, foliis breviores. Flores inodori, rigidiusculi. Petali albi laciniae omnes convexæ, exteriores patentes, interiores erectiusculæ. Baccæ flavæ.

Crescit passim in littoribus maritimis oppidi Portus Principis in Domingo. Januario flores una cum fructibus maturis carpi.

I. SIDEROXYLUM (*foetidissimum*) inerme; foliis sub oppositis; floribus patentissimis. Linn. syst. 194.

CAL. Perianthium pentaphyllum, persistens: foliolis subrotundis, obtusis, concavis, patulis.

COR. Petalum rotatum, calyce duplo longius. Tubus infundibuliformis, calyce pauxillo longior. Limbus quinquefidus: laciinis subovatis, obtusis, planis.

Nectarii squamæ quinque, cuspidatæ, ferratæ, patentissimæ, positæ singulæ ad divisuras petali, quo duplo breviores.

STAM. Filamenta quinque, subulata, patentissima, cum squamis alternantia, earundemque longitudine. Antheræ oblongæ, incumbentes.

PIST. Germen ovato-oblongum, definens in stylum subulatum, erectum, longitudine staminum. Stigma obtusum, simplex.

PER. Drupa subrotunda, apice depresso-sculo stellaque radiata insignito cum medio acumine.

SEM. Nux ovata, unilocularis. Nucleus ejusdem figurae.

Arbuscula duodecimpedalis, erecta, non lactescens. Folia lanceolato-oblonga, obtusa, saepe emarginata leviter, integra, nitida, subundulata, petiolata, quadripollicaria, in ramis præsertim junioribus, opposita quidem

at altero pauxillo altiori. Pedunculi uniflori, axillares & ramei, bilineares, aggregati, viginti saepius simul. Flores fastidissimi, diametro circiter semipollicari, petalis albis. Fructus cerasi fere magnitudine, nunc oblongior, nunc rotundior.

Crescit in Domingo in sylvis montosis. Floret Octobri. Fructus maturescunt Januario.

2. SIDEROXYLUM (*pauciflorum*) inerme; foliis alternis; floribus patentissimis.

Arbor erecta, vigintipedalis, praecedenti simillima. Discrimen spectatur in foliis semper obtusis, planis, vereque alternis. In pedunculis ternis vel quaternis, qui flores sustinent minus fastidos, corollæ tubum habentes brevissimum, laciniæ vero apice concavas calyceque triplo longiores. Stamina corollam æquant. Fructum non vidi. Comparavi aliquoties has stirpes, & semper mihi dubium remansit, utrum specie sint vere distinctæ.

Crescit & floret cum praecedente.

1. ACHRAS (*mammosa*) floribus solitariis; foliis cuneiformi-lanceolatis. Linn. syst. 281.

(Pl. americ pict. Tab. 59. *Ramus fructescens. Dein flos, & duo semina*)

Achras fructu maximo ovato, seminibus paucioribus oblongis turgidis. Brown. jam. 5, p. 201.

Malus persica maxima, foliis magnis, integris, longis, fructu maximo oblongo scabro, ossiculo partim rugoso partim glabro. Sloan. hist. jam. 2, p. 124, t. 218.

Arbor americana pomifera, frondosis ramulis, foliis amplis longioribus obtusis duris & venosis margine æquali. Pluk. alm. 39, t. 268, f. 2.

CAL. Perianthium campanulatum, decaphyllum, persistens: foliolis subrotundis, concavis, imbricatis; quarum interiora emarginata, gradatim majora magisque colorata; exterioribus integerrimis.

COR. monopetala. Tubus campanulatus, calyce pauxillo longior. Limbus decemfidus, erectiusculus: laciniis exterioribus quinque, subovatis, planis, obtusissimis, longitudine tubi; interioribus subulatis, filamentiformibus, paulo brevioribus.

STAM. Filamenta quinque, subulata, erecta, orta in media tubi parte, cum laciniis corolla: interioribus alter-

nantia, earumdemque longitudine. Antheræ oblongæ, incubentes.

PIST. Germen ovatum, villosum. Stylus subulatus, erectus, longitudine corollæ. Stigma obtusum.

PER. Bacca maxima, subovata, obtusa, cortice scabro, quinquelocularis.

SEM. solitaria, magna, elliptica, nitidissima, margine elliptico scabro, quo baccae adhæserunt.

Arbor hæc erecta, leviter latifrons, atque elegans, comam expandit amplam e ramis parum subdivisis constantem. Ramuli ultimi sunt crassi, teretes, ad folia tomentosi, infra eademque inæquales a numerosis cicuticibus & tuberculis, quorum hæc a florū fructuumque, illæ a foliorū remanent lapsu. Cortex est fuscus. Folia habet oblonga, basin versus attenuata, acutiuscula, integerrima, nitida, venosa, petiolata, octopolligaria, plurima sparsim & frondose ad ramuscotorum fines posita. Pedunculi uniflori brevesque infra folia ramusculos nudos ad magnam sæpe extensionem densissime obsident. Flores sunt inodori, parvi, corollis subalbidis. Fructus subovatus, tres quatuor vel quinque pollices longus, magis minusque ad figuram oblongam vel subrotundam accedit. Ejus cortex est ferrugineus & ad tactum rufus; sed nullatenus squamosus aut reticulatus, qualis in iconē Sloanei exhibetur. Pulpam continet mollem, subcarnosam, glutinosam, e carneo subrubentem, edulem, sapore dulci insipidoque. Semina sunt maxima, fusca, pulchra, splendentia, margine scabro albicante; quorum unico plurarissime ad maturitatem perveniunt. Nucleus est candidus, odore gratissimo fortissimoque amygdalæ amaræ præditus, in binos lobos separabilis. Seminis icon habetur apud Clusium exot. l. 2, c 29, f. I ubi qæz differit ille de balsamo, erronea sunt. Hispanis vocatur *Sapota*; Gallicis & Anglis *Mamei-Sapote*. Tantam natura constituit in hac arbore & in subsequente affinitatem, ut, partium in fructificatione numero neglecto, in unum coniunxerim genus; cui etiam ob hanc pentandram speciem liceat in classe locari magis conveniente, idque vicinæ stirpibus illis, quibuscum majorem similitudinem habet.

Crescit Carthaginæ, in Cuba, Jamaica. Floret Decembri. Fert fructus Februario, Martio, & Aprili.

2. ACHRAS (*Sapota*) floribus solitariis, foliis laeceolato-ovatis. Linn. syst. 281.

(Pl. americ. pict. Tab. 60. *Ramulus florifer. Duo fructus, & semen.*)

Achras. Loefl. hisp. 186.

Achras fructu elliptico scabro majori, floribus solitariis, alaribus, cicatricula seminis ultra mucronem porrecta.

Brown. jam. 1, p. 200, t. 19, f. 3.

Sapota fructu ovato majori. Plum. gen. 43.

β. Achras (*Sapotilla*) brachiatus diffusus, fructu subrotundo, cicatricula mucrone breviori. Brown. jam. 2, p. 200.

Anona foliis laurinis viridiusculis, fructu rotundo minore. Sloan. hisp. jam. 2, p. 171, t. 230.

Sapota fructu turbinato minori. Plum. gen. 43.

CAL. Perianthium hexaphyllum, partim persistens: foliolis erectis, ovatis, concavis, acutis; exterioribus brevioribus, subferrugineis, interioribus coloratis.

COR. monopetala, calyce paulo longior. Tubus campanulatus, leviter sexfulcatus. Limbus duodecimfidus: laciiniis sex exterioribus ovatis, concavis, erectis, obtusis cum acumine; interioribus oblongis, convexis, emarginatis, angustioribus, erectis, cum prioribus alternantibus, eademque longitudine.

STAM. Filamenta sex, brevia, subulata, in fauce ad basin laciinarum corollæ exteriorum orta, horizontaliter introrsum versa. Antheræ oblongæ, acutæ, adscendentes tuboque parallelæ.

PIST. Germen ovatum, semiimmersum receptaculo villoso. Stylus crassus, sensim attenuatus, corolla longior. Stigma simplex, obtusum.

PER. Bacca magna, carnosæ, mollis, multilocularis.

SEM. solitaria, oblonga, basi acuminata, obtusa, nitida, compressa, margine scabro, quo baccæ adhæserunt.

Arbor hæc elegans, tota lacte scatens candido tenacissimo & vel per ipsas sæpe foliorum gemmas transudanti, pro ætatis aut soli discrimine decem vel quinquaginta pedum altitudinem adipiscitur. Materies albida cortice circumdatur subfuscō. Ramuli extremi sunt crassuli. Folia habet oblonga, utrinque acuta, integerrima, glabra, crassula, petiolata, tres quatuorve pollices longa, alter-

natim sparsa, s^epius frondosa. Pedunculi uniflori, breves, axillares & ramei. Flores inodori, corolla albida, diu persistentes. Hi ante fecundationem figuram habent ovatam, in ipso autem fecundationis actu toti explicantur magis, ut evadant campanulati; quod, ut ista succedit, antherae inclusae stylusque corolla longior videntur exigere: unde tunc in situ figuraque mutatio partibus accidit insignis. Fecundatione autem peracta, ovatam de novo assumunt. Extra hunc actum florem descripsisse videtur beatus Læflingius, cujusmodi ipse illum ego s^epiissime examinavi: addidi igitur characterem, qualem in ipsam fecundatione semper se mihi exhibuit. Fructus variat magnitudine & figura, quæ globosa, ovalis, aut ovata conspicitur. Cortex illi est scaber, fragilis, & e fusco ferrugineus. Caro sordide abescit, mollissima est, & sapore dulci gratissimoque prædita. Loculamentorum numerus inconstans est a septem ad tredecim. Semina externe atra, nitidissima, amarissima, in Sapota hamulo instructa acuminato & extanti, in Sapotilla eodem destituta, raro ultra quatuor ad maturitatem perveniunt. Fructus edulis solummodo est, quando jam putrescere cœpit; quod fieri, si non decerpitur, in ipsa arbore solet. In mensis ubique apponitur, & venit in foris; suntque non pauci apud quos, vel Bromeliæ antelatus, primas fructus inter Americanos obtinet. Corticem trunci adstringentem multi cum successu adhibent loco Peruviani in debellandis febribus. Seminibus decorticatis attribuunt Martinicenses vim maxime diureticam, iisdemque passim utuntur in Dysuriis, Stranguriis, similibusque morbis. Videlicet sex semina pro dosi in mortario comminuta immixtaque vini aut aquæ cyatho, uno haustu sumenda quotidie porrigitur: aut majori immiscentur liquoris copiæ; unde tum sumit pro lubitu æger, ita ut evacuet in diem. Kepeti jubetur dosis ad levamen usque mali. Seminum vero dosis ad duodenum numerum augetur, nunquam ultra, si ægni temperamentum fortius aut morbi ratio auctas medicamenti vires requirunt: alias dolores atroces generant, nec periculi sunt expertia. Propter fructuum bonitatem atque abundantiam a vespertilionibus gliribusque frequens incolitur hæc arbor. Horum etiam vicinia pellectæ incautæque Coraciæ pensiles suos longissimosque pulcherri-

mo spectaculo nidos in ramis altissimis suspendunt, brevi, trucidatis devoratisque pullis, gliribus in habitacula cefuros. Meliori certe consilio novit in sylvis densis vastisque barbarus venator has sibi arbores eligere, sub quarum umbra prædam suam tranquille exspectat, Meleagrides, Graces, aliasque ex genere gallinaceo aves, horum fructuum cupidissimas. Solet porro hæc arbor ramulos sape aliquot terram versus recta propellere, quorum folia frondosa infima expetit sibi Trochilus minimus, quibus nidulum suum, e florum partibus variis mirifice venustaque concinnatum, inaedificet; superioribus foliis umbraculum ipsi tectumque præbentibus. Utraque varietas Hispanis *Nispero*, Batavis *Mispelboom*, sive *Mespilus* dicitur: a. Gallis *Sapotier*, Anglis *Sapodille-tree* sive *Arbor sapodilla*: b. Gallis *Sapotillier*, Anglis *Nisbury*.

Crescit in Caribæarum hortis cultisque; in Continente vicina sylvestris.

I. RONDELETIA (*odorata*) foliis petiolatis, subovatis, obtusis. *Linn. syst. 177.*

(*Pl. americ. piæt. Tab. 61. Ramulus florifer.*)

CAL. Perianthium pentaphyllum, germini insidens, persistens: foliolis oblongis, concavis, acutis, erectis.

COR. Petalum infundibuliforme. Tubus cylindricus, erectus, calyce triplo longior, ampliatus leviter superne, auctusque margine crasso ipsam limbi basin superante. Limbus quinquefidus: laciniis subrotundis, obtusis, planis, patentissimis, tubo triplo brevioribus.

PIST. Germen subrotundum, inferum. Stylus filiformis, erectus, staminibus multo brevior. Stigmata duo, oblonga, crassiuscula, patula.

PER. Capsula subrotunda, coronata calyce, bilocularis, ab apice bifariam discedens.

SEM. plurima, rhomboidea, minima.

Frutex inelegans, inordinatus, erectus, sex pedes altus. Rami teretes, juniores villosi. Folia subovata, obtusiuscula, integerrima, scabriuscula, breviter petiolata, opposita. Pedunculi communes erecti, terminales, terni, triflori; intermedio interdum in tres alias similes subdiviso: propriis flores in umbellam colligentibus speciosam. Flores miniati, pulchri, margine tubi proterante aurantio, odore violarum suavissimo. Corolla

sæpiissime est sexpartita cum calyce hexaphyllo, quamvis
stamina perpetuo sint quinque.

Crescit Havanæ in rupestribus fruticosis maritimis,
ipsis saepe innata nudis rupibus. Vidi florentem Januario
& fructibus adhucdum maturis onustam.

**2. RONDELETIA (*disperma*) foliis petiolatis, ovalibus
obtusis.**

(*Pl. americ. piæ. Tab. 259, fig. 18.* Pars racemi fructi-
feri. Capsula solitaria. Eademque inversa, ut basi
ejus in summa maturitate bifariam fissa conspicitur.)

CAL. Perianthium pentaphyllum, germini insidens, tan-
dem deciduum: foliolis lanceolatis, planis, acutis, pa-
vis, patentissimis.

COR. Petalum hypocrateriforme. Tubus cylindricus
longissimus, erectus, circa medium ventricosus. Lim-
bus quinquefidus: laciniis obovatis, obtusis, planis,
brevibus, patentissimis.

STAM. Filamenta quinque, brevissima. Antheræ lineare
erectæ, in ventre tubi.

PIST. Germen subrotundum, inferum. Stylus filiformis
erectus, staminibus paulo longior. Stigma bifidum:
laciniis linearibus, obtusis.

PER. Capsula subrotunda, vestita pellicula multivalvi &
decidua, bilocularis, bivalvis: disseimento valvulis
contrario, longitudinaliter diviso; valvulis ipsis basi
bifariam dehiscentibus.

SEM. solitaria, hemisphærica, striata, leviter umbilicata.
Arbuscula erecta, ramosa, saepe quindecim pedes alta.
Folia ovalia, basi attenuata, obtusa, integerrima, glabra,
opposita, petiolata, magnitudine valde varia. Racemi
compositi, axillares, laxi, trifidi; pedunculis communis-
ibus partialibus dichotomis. Flores numerosissimi, leviter
odorati, sessiles atque pedunculati, e purpureo albican-
tes. Capsula involvitur pellicula succulenta ceu bacca,
quæ paulatim exsiccatur in maturitate, calycisque in mo-
dum polyphylli abscedit; tuncque valvulae aperiuntur.
Si quis distincti generis hanc stirpem esse voluerit, facile
patiar.

Crescit Carthaginæ locis rupestribus & sylvaticis;
omnium frequentissime in insulis Baru & Tierra Bomba.
Floret Julio.

3. RONDELETIA (*trifoliata*) foliis ternis. Linn. *sys.* 177.
(Pl. americ. pict. Tab. 62. *Ramus florens.*)

CAL. Perianthium monophyllum, campanulatum, parvum,
quinquedentatum, acuminatum, persistens: tubo ad
basin germini circumnato.

COR. Petalum hypocrateriforme. Tubus cylindricus, ere-
ctus, longissimus. Limbus quinquefidus: laciniis ob-
longis, obtusis, planis, patentissimis, tubo triplo bre-
vioribus.

STAM. Filamenta quinque, tubo circa medietatem inserita.
Antheræ lineares, erectæ, tubo breviores.

PIST. Germen subrotundum, calyci adnatum. Stylus sub-
ulatus, erectus, longitudine staminum. Stigma bifidum:
laciniis linearibus, crassiusculis.

PER. subrotundum, obsolete didymum, coronatum den-
tibus calycinis, biloculare,

SEM. solitaria, subrotunda.

Arbor erecta, duodecimpedalis. Rami juniores ob-
tuse triangulares, hirsuti. Folia terna, lanceolata, acu-
ta, integerrima, facie glabra, dorso leviter tomentosa,
tripollicaria; petiolis hirsutis. Stipulæ subrotundo acu-
minatæ, ternæ, alternantes cum foliis. Racemi hirsuti,
inæquales, ramosi, axillares, sesquipollicares. Flores
inodori, exigui, rubelli, sessiles & pedunculati. Fructum
maturum non vidi; qui immature carptus in specimine
exsiccato meo bivalvis evanit, dissepimento valvulis op-
posito. Ad Rondeletias reduxi, donec cognitus pericar-
pii character aliud statuat.

Crescit in Jamaica ad pedes montium in Ferry. Flo-
rentem vidi Februario.

I. CHIMARRHIS (*cymosa*).

CAL. Perianthium margo integer, coronans germen, per-
sistens.

COR. Petalum infundibuliforme. Tubus brevissimus. Lim-
bus quinquefidus: laciniis lanceolatis, concavis, obtusis,
inferne lineola longitudinali media hirsutis, patentibus.

STAM. Filamenta quinque, subulata, basi hirsuta, infra
divisuras limbi, longitudine corollæ. Antheræ ovales,
erectæ.

PIST. Germen subrotundum, inferum. Stylus filiformis,
longitudine staminum. Stigma bifidum, obtusum.

PER. Capsula subovata, obtusa, coronata, bilocularis bivalvis; valvulis apice bifidis.

SEM. solitaria.

Arbor procera, comosa, atque elegans. Rami primarii patent horizontaliter. Folia sunt lanceolato-oblonga, utrinque acuminata, integerrima, nitida, petiolata opposita, pedalia, in summitate cujusque ramuli octo plerumque aut decem subfrondosa. Flores numerosi, parvi, inodori, corollis albidis; in racemis cymosis diametri semipedalis, qui in axillis sunt oppositi & solitarii, terminales plerumque quaterni. Capsulae parvae. Matrices alba ad asperes vulgares conficiundos adhibetur. Vocatur ab incolis Bois de riviere sive Arbor fluviorum. A'no τὸ χειμάρρος, quod ad torrentes plerumque crescat, nomen derivavi.

Crescit in Martinica.

I. CINCHONA (*caribaea*) pedunculis unifloris. *Linn.*
spec. pl. pag. 245.

(*Pl. americ. pict. Tab. 63. Ramulus florens. Dein fructus maturus, hujus altera valvula, & duo semina*).

Periclymeno recto accedens arbuscula Virginiana siliquosa
Pluken alm. 288, tab. 103, fig. 3.

CAL. Perianthium monophyllum, minimum, quinque dentatum, acuminatum, erectum, germini insidens, persistens.

COR. monopetala. Tubus cylindricus, longissimus, eretus. Limbus quinquefidus: laciniis linearibus, obtusis, concavis, reflexis, tubum superantibus.

STAM. Filamenta quinque, filiformia, orta in fundo tubi, eodemque longiora. Antherae lineares, eretæ, longitudine corollæ.

PIST. Germen oblongum, inferum. Stylus filiformis eretus, longitudine staminum. Stigma obtusum.

PER. Capsula subovata, obtusa, coronata calyce, bipartibilis & dehiscens in duas partes; quarum singulæ longitudinaliter semiovatae, & uniloculares, latere intiore, quod dissepimentum totius fructus bilocularis duplicatum fuit, fere ad basin usque dehiscunt, in dorso autem dehiscunt tantum in vertice.

SEM. plura, suborbiculata, plana, imbricata.

Arbuscula erecta, ramosa, decempedalis, corticis

tinereo & saporis Corticis peruviani. Folia lanceolata, acuta, integerrima, glabra, apicibus saepe reflexis, petiolata, opposita, duos tresve pollices longa. Stipulae inter petiolos locantur latæ acutæque. Pedunculi uniflori, breves, axillares, solitarii. Flores odoratissimi, e carneo albidi, sesquipolligares. Capsulae ante maturitatem virides, amarissimæ, scatentes succo, qui naribus labiisque titillationem inducit ardensem.

Crescit in fruticetis circa Havanam; & in Domingo ad sinum Bayaha. Floret Septembri & Octobri. Fructus maturos collegi Decembri.

I. PORTLANDIA (*grandiflora*) floribus pentandris. Linn.
syst. 178.

(Pl. americ. piæ. Tab. 64. Ramulus cum flore & fructu.
Tum capsulae valvula una cum contentis seminibus, &
semen).

Portlandia foliis majoribus nitidis ovatis oppositis, floribus amplissimis. Brown. jam. I, p. 164, t. II.

CAL. Perianthium pentaphyllum, germini insidens: foliolis ex oblongo lanceolatis, acutis, planis, subcoloratis, laxe patentibus.

COR. monopetala. Tubus elongato-infundibuliformis, longissimus, quinquangularis, leviter incurvus. Limbus quinquefidus, brevis: lacinias semiiovatis, obtusifusculis, planis, patentibus.

STAM. Filamenta quinque, filiformia, inferne hirsuta, declinata, ipsa ex basi tubi orta, eundemque ibidem cum stylo exacte claudentia. Antheræ lineares, obtusa, compressæ, erectæ, longitudine petali.

PIST. Germen obverse ovatum, quinquangularare, inferum. Stylus filiformis, situ & longitudine staminum. Stigma simplex, obtusum.

PER. Capsula obverse ovata, quinquangularis, crassa, lignea, apicis convexi margine ab induratis destruci calycis reliquiis inæquali, bilocularis, bivalvis, ab apice dehiscens: dissepimento valvulis contrario & bifarium per capsulae dehiscentiam sexto.

SEM. plurima, suborbicularia, compresso-plana, imbricata.

Arbor hæc erecta, elegantissima, raro quindecim altitudine pedes excedens, comam fert oblongam raram-

que. Truncum habet plerumque rectum, longum, diametro bipollicari; cortice vestitum crasso suberisque ad instar semper in omnem partem fisso, at non caduco. Rami pauci, parum subdivisi, brevesque, horizontaliter porrigitur omnes, ad distantias circiter pollicares notati a foliorum lapsu totidem nodis, qui articulationes imitantur. Folia sunt ovata, acuta, integerrima, nitida, crassiuscula, plus minus quinquepollicaria, breviter petiolata, opposita, pagina altera ad basin leviter oblitterata: quibuscum alternant stipulae oppositae, virides, latæ, subrotundæ, & acumine brevi auctæ. Pedunculi communes sunt axillares, solitarii, oppositi, crassi, brevissimi, ut plurimum triflori; propriis etiam crassis atque brevissimis. Flores sunt maximi, pulcherrimi, semipedales, mutuo succedentes, interdiu prorsum inodori, noctu odore late spirantes gratissimum & reficiem. Calycis foliola e viridi rubroque miscentur. Corolla candida, angulis & limbi margine rubentibus, lineis seu striis longitudinalibus quindecim insignitur. Stamina flavescent, & a fundo tubi ortum ducunt; unde error in figura Brownei conspicitur. Capsulae nigrescent, diuque persistunt in arbore. Semina inveni plerumque ab insectis comedunt omnia, etiam in tenellis adhucdum immaturisque fructibus. Hæc nimirum cunctorum post seminum destructionem, qua intrarunt, sponte iterum capsulis exeunt, relictis sui loco excrementis, quæ, ut vulgo fit, minutorum faciem seminum præ se ferunt. Imposuisse illa videtur delineatori in iconē Brownei, quæ excrementsa dicta quidem, semina vero neutiquam exhibit. Quem delinearem ego, aquæ imposueram abscissum ramulum, aperto flore unico ornatum. Iste per quatuor noctes subsequentes cubiculum omnino meum fragrantia sua implevit; ad solis videlicet ortum amittens quotidie, quem sub vesperam recuperabat odorem.

Crescit in Jamaica copiose ad pedes montium in Ferry, locis rupestribus, inque ipsis nudis sæpe rupibus. Vidi florentem Januario & fructibus simul maturis onustam.
2. PORTLANDIA (*hexandra*) floribus hexandris. Linn. syst. 178.

(Pl. A. P. Tab. 65. Ramus florens. Tum fructus integrum semen, & capsula in valvulas suas secedens.)

Cou-

- Coutarea speciosa. *Aubl. cayenn. vol. I, p. 314, t. 122.*
- CAL. Perianthium monophyllum, parvum, germini insidens, marcescens, profunde sexpartitum: lacinias ovatis, desinentibus in setas acutas & suberectas.
- COR. monopetala. Tubus infundibuliformis, longissimus, basi globosus, superne leviter arcuatus & gibbus. Limbus sexfidus: lacinias ovatis, planis, patentissimis, tubo triplo brevioribus.
- STAM. Filamenta sex, filiformia, declinata, orta in ipso tubi fundo, eundemque cum stylo ibidem exakte claudentia, fere longitudine tubi. Antheræ lineares, obtusæ, erectæ, compressæ, longitudine petali.
- PIST. Germen obverse ovatum, compressum, striatum, inferum. Stylus filiformis, superne utrinque sulco notatus longitudinali, situ & longitudine staminum. Stigma simplex, obtusum.
- PER. Capsula obverse ovata, compressa, apice a destruicti calycis induratis reliquiis inæqualis, subligneæ, bilocularis, bivalvis, ab apice dehiscens: valvulis carinatis, apice bifariam dehiscentibus. Dissepimentum membranaceum, valvulis contrarium, indivisum.
- SEM. plurima, orbicularia, plana, aucta in circumferentia margine membranaceo, imbricata.
- Frutex sexpedalis, erectus, in ramos dividitur teretes, ad pedunculorum ortum compressos, verrucis minimis scabriusculis adspersos. Folia sunt ovata, integerima, in acumen obtusiusculum desinentia, glaberrima, venosa, petiolata, opposita, quinquepollicaria. Pedunculi communes sunt triflori, axillares solitarii, terminales terni; propriis brevibus. Flores sunt pulchri, suaveolentes, numerosi, fere tripolligares; petalis externe carneis, interne candidis, lineatis. Capsulæ fuscae punctis cinereis variegantur. Semina ut plurimum ab insectis eroduntur. Tanta profecto in utraque planta est floris totiusque adeo habitus similitudo, ut ultro liqueat, sub eodem esse genere locandas, etiam si classe artificiali discrepent.
- Crescit passim Carthagenaæ in fruticosis. Floret Augusto & Septembri. Aprili semina matura inveni.
- I. SCAEVOLA (*Lobelia*). *Linn. syst. 178.*

- (Pl. americ. Pict. Tab. 199. *Pars caulis florentis. Drupa, nux, eademque transversim secta*).
Lobelia frutescens, portulacæ folio. Plum. ic. 165, f. I.
Catesb. car. I, p. 79, t. 79.
Buglossum littoreum. Rumph. 4, p. 116, t. 54.
CAL. Perianthium margo parvus, inæqualiter quinquedentatus, germen coronans.
COR. monopetala, subinfundibuliformis, tota longitudinaliter fissa patensque. Tubus oblongus, interne hispatus, longissimus, superne adscendens. Limbus quinquefidus, tubo duplo brevior: laciniis lanceolatis, planis, secundis, patentissimis, basi ciliatis, in ambitu membranula austis.
STAM. Filamenta quinque, capillaria, orta ex superficie germinis, tubo corollæ breviora. Antheræ distinctæ, oblongæ, obtusæ, erectæ.
PIST. Germen ovatum, inferum. Stylus filiformis, superne crassescens, e fissura corollæ totus egressus, statim minibus duplo longior, superne versus corollam ad angulum rectum recurvatus abiensque in Stigma aplana-tum, obtusum, ore aperto & ciliato.
PER. Drupa subrotunda, nitida, pulposa, mollis, nota puncto umbilicato.
SEM. Nux ovata, acuta, rugosa, bilocularis. Nuclei solitarii, hinc convexi, illinc plani.
 Frutex bipedalis, lignosus, fragilis, diffusus, basi ramosus & procumbens, habitu neglecto, littora arenosis maritima ad. magnam sèpe extensionem dense obliterat. Folia habet ovata, crassa, nitida, succulenta. Flores albescunt. Drupa atra est.
 Crescit in insula sancti Martini.
I. LAUGIERIA (odorata). Linn. syst. 193.
 (Pl. americ. pict. Tab. 259, fig. 16. *Flos. Drupa. Nux Pars ramuli foliosi*).
Edechi. Laefl. hisp 259, 271 & 306.
CAL. Perianthium monophyllum, tubulosum, erectum, parvum, ore inæquali, germini insidens, deciduum.
COR. Petalum hypocrateriforme. Tubus cylindricus, erectus, longissimus. Limbus quinquefidus: laciniis obverse ovatis, planis, obtusis, patentissimis.
STAM. Filamenta quinque, brevissima, in superiore pa-

te tubi. Antheræ lineares, longæ, tubum non superantes.

PIST. Germen subovatum, parvum, inferum. Stylus filiformis, erectus, tubo paulo longior. Stigma capitatum, obtusum.

PER. Drupa subrotunda, punto umbilicato.

SEM. Nux subrotunda, obsoleta quinquesulcata, quinquelocularis. Nuclei solitarii, oblongi.

Frutex decempedalis, erectus, ramosus. Folia subovata, acuta, integerrima, glabra, petiolata, opposita, bipinnicaria. Racemi paniculati, laxi, axillares, foliorum longitudine. Flores fordide rubentes, interdiu vix odoriferi, noctu odoratissimi, pedunculati, cum uno sessili in qualibet racemi divisione. Fructus aterrimi, piso maiores, molles, numerosissimi, in maturitate ad levem arbustulæ commotionem in terram decidui. E seminibus meis, ex una eademque arbore Americana carpitis, in caldariis Viennensibus enatos vidi frutices & inermes, & spinis oppositis longis rectisque armatos alios. Adeoque Læflingii uterque frutex, spinosus atque inermis, ejusdem erunt speciei. Spinosum vero mihi in America videre haud contigit. Nominavi hanc novi generis plantam in honorem viri clarissimi Roberti Laugier, in Universitate Vindobonensi Chemiæ & Botanices Professoris; qui primus novum hortum Botanicum ibidem adornavit, & legationibus illustravit.

Carthaginæ & Havanæ crescit in arbustis apricis maritimis.

I. MORINDA (*muscosa*) arborea; capitulis sessilibus, terminalibus.

(*Pl. americ. piæ. Tab. 66. Ramus florens.*)

Arbor quindecimpedalis, erecta, inelegans. Rami teretes, dichotomi, muscis & algis vestientibus semper foedi. Folia lanceolato-ovata, acuminata, integerrima, glabra, venosa, brevissime petiolata, opposita, tres quartuorve pollices longa. Stipulæ setaceæ, ferrugineæ, plures, inter petiolos locantur. Flores exigui, congeneribus quoad characterem congrui; nisi quod paleæ plures, latæ, concavæ, dentatæ, virides, magnitudine variæ, persistens, corollis interponantur; tum etiam, quod semina sint duo, hinc convexa, illinc plana. Corolla est alba.

Crescit in Martinicæ sylvis densis & vastis ad ripas fluviorum. Floret Aprili.

PSYCHOTRIA.

CAL. Perianthium monophyllum, minimum, quinquedentatum, acuminatum, germini insidens, persistens.

COR. monopetala, hypocrateriformis. Tubus longus. Limbus quinquefidus: laciniis subovatis, acutis, planis, patentissimis, tubo brevioribus.

STAM. Filamenta quinque, brevissima, intra tubum. Antheræ lineares, erectiusculæ, tubum non superantes.

PIST. Germen subrotundum, parvum, inferum. Stylus filiformis, erectus, longitudine staminum. Stigma bifidum: laciniis crassiusculis, obtusis.

PER. Bacca subrotunda, mollis, coronata calyce, unilocularis.

SEM. duo, ovata, hinc convexa & striata, illinc plana.

1. PSYCHOTRIA (*carthagrenensis*) frutescens; foliis obovatis.

(Pl. A. P. Tab. 260, fig. 19. Flos. Fructus Folium.)

Psychotria asiatica. Linn. Syst. 179.

Psyhotrophum fruticulosum, foliis amplioribus ovatis, stipulis rigidis interpositis, ramulis classioribus, racemis umbellulatis, sustentaculis ternato-ternatis. Brown. jam. 2, p. 160, t. 17, f. 2.

Frutex suberectus, ramosus, humanæ altitudinis. Folia obovata, acuta, basi attenuata, integerrima, nitida, petiolata, opposita, variæ magnitudinis, ad ovatam interdum figuram accendentia. Racemi terminales. Flores inodori; in quibus petali albi tubus est erectus, subinfundibuliformis, limbo triplo longior. Stamina sæpe sex cum corolla sexfida, aut septem cum eadem septemfida. Baccæ rubræ coronantur calyce fere concolore, & pulpam continent rubram. Semina alblicant.

Habitat Carthagena in fruticetis, arbustis, sepibusque, passim ubique. Floret Augusto.

2. PSYCHOTRIA (*domingensis*) frutescens; foliis lanceolato-ovatis.

Frutex quinquepedalis, suberectus, ramosus, inelegans. Rami teretes, glabri. Folia ex lanceolato ovata, acuta, integerrima, nitida, petiolata, opposita, quinquepollicaria. Racemi terminales, ramosi, plerumque

bini. Flores inodori, sessiles, pollicares; corollæ albæ tubo cylindraceo, incurvo, limbum ad triplum superante. Baccæ atræ, nitidæ, pisi magnitudine; pulpa aquæ, nec colorata.

Habitat in Domingo ad ripas torrentum fruticosas, inque umbrosis humidis & montosis. Florentem Decembri vidi.

3. PSYCHOTRIA (*herbacea*) caule herbaceo, repente; foliis cordatis, petiolatis. Linn. syst. 179.

(Pl. A. P. Tab. 67. *Plantulae integræ florentes & fructigera*).

Psychotrophum herbaceum repens sylvaticum, foliis subrotundo-cordatis oppositis, floribus paucioribus alaribu, laciniis corollæ erecto - patentibus. Brown. jam. 7, p. 161.

Jasminum inodorum, repens, foliis violæ Martiæ. Plum. spec. 17.

Violæ folio baccifera repens, flore albo pentapetaloidæ, fructu rubro dicocco. Sloan. hist. jam. I, p. 243.

Pyrolæ affinis malabarica. Pluk. alm. 309.

Karinta-Kali Rheed. mal. 10, p. 41, t. 21.

Planta tenella, triplicaris, erecta, simplex, & quadrifolia, oritur e stolone (vel caule, vel radice, si mavis) repente supra terram, eidemque hic illic radiculas immitente fibrosas, ad duorum triumve pollicum distantias novam iterum plantulam proferente, ita ut tantem earundem sylvula exsurgat. Folia cordato-subrotunda, integerrima, opposita; petiolis inferiorum longissimis. Pedunculi communes erecti, terminales, duos tres quatuorve flores sustinent. In his inodoris, pedunculatisque, corollæ albæ tubus cylindraceus est, erectus, & duplo longior limbo patentissimo. Baccæ rubræ & succulentæ pulpa quoque rubra gaudent. Semina alblicant.

Habitat copiose in uliginosis umbrosis circa vicum Roberti in Martinica. Decembri inveni flores & una fructus maturos numerosissimos ferentem.

COFFEA.

1. COFFEA (*occidentalis*) floribus tetrandis; fructibus monospermis. Linn. syst. 179.

(Pl. americ. pict. Tab. 68. *Ramulus florifer*).

Pavetta foliis oblongo-ovatis oppositis, stipulis petiolis interpositis. Brown. jam. I, p. 142, t. 6, f. 1.
Jasminum arborescens lauri foliis, flore albo odoratissimo.
Plum. ic. 156, f. 2.

CAL. Perianthium monophyllum, minimum, quadridentatum, germini insidens.

COR. monopetala. Tubus cylindraceus, ad basin attenuatus, leviter incurvus, calyce multoties longior. Limbus quadripartitus, laciniis ovato-lanceolatis, acuminatis, reflexis, tubo longioribus, lateribus revolutis.

STAM. Filamenta quatuor, filiformia, orta in fundo tubi, cui per totam longitudinem adnata, & quo duplo breviora. Antheræ lineares, incumbentes, filamentis duplo breviores.

PIST. Germen subrotundum, inferum. Stylus filiformis, erectus, tubum corollæ leviter superans. Stigmata duo, subulata, crassiuscula.

PER. Bacca subrotunda, depresso-globosum, umbilicata, calyce coronata obsoleto, unilocularis.

SEM. unicum, depresso-globosum, cartilagineum, basi umbilicatum, inferne semiquadrilobum, arillo membranaceo inclusum.

Arbuscula erecta, sexpedalis. Folia habet lanceolato-ovata, in acumen abeuntia obtusum, integerrima, nitida, petiolata, opposita in ramulis dumtaxat junioribus, quadripollucaria. Stipulae cum petiolis alternant subulatae, acuminatae, erectae, atque oppositae. Racemi trichotomi, interdum paniculati, plerumque terminales, saepe etiam axillares, flores sustentant summa suaveolentia præditos, quibus corolla est nivea. Foliis ramisque junioribus equi lubenter capræque vescuntur. Tanta est hanc plantam inter Coffeamque Arabicam similitudo, si numerum in fructificatione demas solum, ut locare sub eodem genere neutquam hæsitaverim. Imo tunc jam temporis summo tenebar desiderio experiundi, an non usitata semina infusum præbuissent palato gratum; sed ante perfectam horum maturitatem ex Hispaniola discessi, nec postea obviam stirpem habui.

Habitat passim in Domingo circa Cap. Français in collibus fruticosis. Floret Decembri.

CHIOCOCCA.

I. CHIOCOCCA (*racemosa*) foliis oppositis. *Linn. Syst.*
179.

(*Pl. americ. pict. Tab. 69. Ramus cum flore & fructu.*)
Chiococca farmentosa foliis myrtineis oppositis, spicis
plurimis tenuissimis terminalibus & ex alis supremis.
Brown. jam 1, p. 161.

Chiococca scandens, farmentis tenuissimis & fere indivisis.
Brown. jam. 2, p. 164.

Periclymenum racemosum, flore flavescente, fructu niveo.
Dill. elth. 306, t. 228, f. 295.

Jasminum folio myrtino acuminato, aliorum adminiculo
se sustentans, flore albicante racemoso. *Sloan. hist.*
jam. 2, p. 97, t. 188, f. 3.

CAL. Perianthium parvum, erectum, quinquedentatum,
acuminatum, germini insidens, persistens.

COR. monopetala, infundibuliformis. Tubus longus,
erectus, patens. Limbus quinquefidus: laciniis lan-
ceolatis, acutis, planis, reflexis, æqualibus, tubo bre-
vioribus.

STAM. Filamenta quinque, capillaria, brevia, hirsuta,
patula, orta in fundo corollæ. Antheræ lineares, ere-
ctæ, ad minus longitudine tubi.

PIST. Germen subrotundum, compresso-planum, inferum.
Stylus filiformis, erectus, longitudine petali. Stigma
simplex, obtusum.

PER. Bacca subrotunda, compressa, coronata dentibus
calycinis, punto umbilicato, unilocularis.

SEM. duo, subovata, obtusa, compresso-plana, pulpa
distincta.

Frutex ramosus, altitudinis humanæ, suberectus; in
ramos dispescitur longos, teretes glabros, & reclinatos:
quem, multorum aliorum adinstar, in sylvis umbrosis
densisque multo excrescere altius, ramos laterales paucio-
res emittere, evadareque farmentosum, observavi; &
hinc ad primum conspectum videri habitu diversissimum
ab illo, qui nascitur ad margines sylvarum, in fruticetis,
inque apricis: quem itaque Browneus haud recta in duas
species divisit. Folia habet ovata, acuminata, integer-
rima, nitida, opposita, bipinnicaria. Racemi bipinnica-
rii, penduli, axillares sunt oppositi, & terminales. Flo-
res albi, inodori; vel flavescentes, odoriferi. Baccæ ni-

veæ, sicciores, spongiosæ, parvæ, coronantur dentibus calycis virentibus.

Passim habitat in collibus sylvestribus alibique Cathagenæ, in Jamaica, Domingo.

2. CHIOCOCCCA (*nocturna*) foliis alternis.

CAL. Perianthium monophyllum, oblongum, parvum, quinquedentatum, acuminatum, inferum, persistens.

COR. monopetala. Tubus cylindraceus, superne sensim leviterque ampliatus, erectus, longissimus. Limbus quinquefidus: laciniis lanceolatis, acutis, planis, patentissimis, tubo triplo brevioribus.

STAM. Filamenta quinque, filiformia, orta in superiori parte tubi corollæ, erecta, longitudine tubi. Antheræ subrotundæ, incumbentes.

PIST. Germen subovatum, superum. Stylus filiformis, erectus, longitudine staminum. Stigma capitatum, obtusum.

PER. Bacca subrotunda, subumbilicata, unilocularis.

SEM. unicum, ovatum, hinc convexum, inde concavo-umbilicatum.

Arbuscula duodecimpedalis, trunco erecto. Rami teretes, longi, fragiles, subreclinati, ornantur utrinque ramusculis junioribus alternis axillaribus plurimis. Folia sunt lanceolata, acuta, integerrima, nitida, petiolata, alterna, in ramis junioribus pollices tres, in senioribus quatuor eosdem longa. Racemi subpaniculati, circiter duodecimflori, axillares, quadripollicares, in ramis junioribus, omnino numerosi; flores sustinent sessiles, pollicares, de die prorsum inodoros, noctu odorom late exhalantes jasmino æmulum; quibus corolla interne alba est, externe leviter viret. Baccæ sunt niveæ, sicciores, spongiosæ; pisello duplo minores, paucæ. Semina fusca obortant pleraque. Ultra unicum nunquam in una baccæ inveni; utrum vero extiterint plura in germine, detegere non valui: et si illud umbilicati seminis figura situsque videantur suadere. Propter fructus similitudinem totiusque etiam habitum ad Chiococcam retuli; haud tamen ignarus, germinis foliorumque situm posse genus distinctum exigere. Domingenses vocant *Lilac de nuit* sive *Syringam nocturnam*,

Habitat in sylvis Domingo.

MUSSAENDA.

CAL. Perianthium monophyllum, quinquefidum, germini insidens, persistens; laciniis oblongis, acutis, erectis,

COR. monopetala. Tubus cylindraceus, superne ampliatus, erectus, longissimus, externe hirsutus. Limbus quinquefidus: laciniis lanceolatis, acuminatis, planis, patentissimis, tubo brevioribus.

STAM. Filamenta vix ulla. Antheræ quinque, lineares, magnæ, incumbentes supremæ parti tubi.

PIST. Germen oblongum, villosum, inferum, parvum. Stylus filiformis, erectus, superne crassiusculus, longitudine circiter tubi. Stigma bifidum laciniis crassis, obtusis, patulis.

PER. Bacca subovata, corticosa, obtusa, magna, coronata calyce, subbilocularis. Dissepimentum membranaceum, tenue, sæpe interruptum.

SEM. plurima, subovata, compresso-plana, cartilaginea, transversim & dense mutuo incumbentia, disposita serie longitudinali quadruplici, pulpa obvoluta.

I. MUSSAENDA (*formosa*) inermis; floribus solitariis, sessilibus. Linn. *syst. 182.*

(Pl. americ. pict. Tab. 70. *Ramus cum flore. Tum fructus, & semen*).

Frutex hic debilis erectusque, sextum raro altitudine pedem superat. Ramis instruitur lantis, lignosis, parum divisus, teretibus, glabris, ornatisque per totam longitudinem foliis. Hæc sunt lanceolata, utrinque attenuata, acuta, integra, levissime hirsuta, petiolata, opposita, magnitudine valde varia, interdum etiam obovata basique simul attenuata, quatuor plerumque ex eodem tuberculo. Flos sessilis. solitarius in centro cujusque tuberculi, erectus, quatuor vel sex pollices longus, odorem spirat noctu præprimis suaveolentem, in quo Dianthi aliquid mihi visus sum deprehendere. Huic calyx est semiquinquefidus, tubulosus, villosus, vel in ipso sæpe fructu persistens integer. Corollæ tubus longissimus, tenuis, viridis, hirsutissimus: laciniæ vero interne candidissimæ, externe longitudinaliter semicandidæ glabræque & semivirides villosæque. Filamenta omnium sunt brevissima, & antheras gerunt utrinque obtusas. Stigmatis laciniæ sunt ovales. Bacca decemstriata pulpam continet odore sapore & colore

pulpam Cassiae Fistulae referentem. Pulcherrimum præbet hic frutex, quum floret, spectaculum; alias satis inelegans: tunc enim corollarum limbis ceu stellis totidem niveis atque odoratissimis tegitur totus undique, dum tubi ipsarum ob viorem foliis similem oculos fugiant spectatoris.

Habitat passim Carthaginæ in sylvaticis & fruticosis. Floret Octobri. Fructus maturescunt Decembri, diutissimeque persistunt.

2 MUSSAENDA (*spinosa*) spinosa; floribus sessilibus, aggregatis. Linn. *syst. 182.*

(*Pl. americ. pict. Tab. 71. Ramus florifer. Fructus, & duo semina.*)

Arbusculæ hujus decempedalis atque inelegantis trun-
cus rarissime diametrum tripollarem excedit, sæpe mox
supra terram divisus in ramos primarios paucos. Rami
sunt teretes, glabri, lignosi, brachiati, lenti; quorum
longiores vicinarum arborum sustentaculo egent. Ra-
musculi ultimi in extremitate ipsa aut prope eandem ar-
mantur spinis quatuor, subulatis, acuminatis, fortibus,
patentibus, cruciatim positis, in ramis etiam senioribus
hic illic conspicuis. Folia sunt subovata, utrinque atte-
nuata, acuta, integra, venosa, interdum rugosa, utrin-
que subhirsuta, petiolata, magnitudine admodum varia-
lia, numero inconstanti pauca simul ex apicibus ramuscu-
lorum inter spinas prodeuntia. Flores sessiles, semipol-
licares, aut sesquipollicares, totam odore suavissimo vi-
cinam replentes, quatuor circiter ex apice cujuslibet ra-
musculi simul orti, mutuo ita in explicatione succeden-
tes, ut quotidie sub vesperam decidentibus priorum co-
rollis, novorum alia explicentur, sequente etiam vespera
ipsæ periturae. Calyx profunde quinquefidus & glabriuscu-
lus in lacinias dividitur figura & proportione quam maxi-
me varias, numero constantes a me semper observatas;
unde, si recte numeravit Læflingius, vix videtur ipsius
Menais *hisp. 306* ad hoc genus pertinere. Petali candidi
tabus longitudine lacinias ad triplam, duplam, unamve
tertiam superat partem. Filamentorum omnino sunt ve-
stigia nulla: antheræ autem acutæ media sui parte adna-
scuntur supremo corollæ tubo infra divisuras; unde pro
varia quidem insertionis suæ altitudine, aut eriguntur,

aut incubunt sulcis a contiguis laciñiis limbi ortis. Stylus longior vel brevior tubo corollæ, vel eidem æqualis, stigmate gaudet interdum globoſo didymoque, ſepiuſ tam en laciniis oblongas bipartito. Bacca non striata, coronata calycis parte dumtaxat aliqua, cortice veftitur duriori, primum flavescente, tandem fuſco. Pulpam præcedentis pulpæ ſimi limam cum iſlis ſeminibus ab animalibus, nescio quibus, comeſtam, foramine in cortice eroſo, plerumque inveni. Folia & flores eodem ſolent faciem vertere, quo ſpeciosum ſæpe fasciculum efformant. Hispanis propter ſitum spinarum vocatur Cruzeta, ſive Crucicula.

Habitat Carthaginæ & in Martinica; in sylvaticis & fruticosis. Floret Majo & Junio.

HAMELIA.

CAL. Perianthium quinquepartitum, minimum, acutum, erectum, coloratum, germini insidens, persistens.

COR. monopetala, tubulosa. Tubus oblongus, in medio attenuatus, basi ipſo germine amplior, quinquangularis, erectus, longissimus. Limbus quinquepartitus, acutus, erectus, parvus.

STAM. Filamenta quinque, filiformia, eretta, orta in parte inferiore tubi, antheris breviora. Antheræ lineares, eretta, longitudine corollæ.

PIST. Germen ovatum, coloratum, apice conico obtuso calyceque paulo longiori. Stylus filiformis, erectus. Stigma lineare, obtusum, longitudine staminum.

PER. Bacca ovato-oblonga, coronata denticulis calycinis, nitida, e centro apicis retufi producta in appendiculam obtuso-conicam umbilicatamque, quinquelocularis. Dissepimenta membranacea.

SEM. numerosa, compressa, minima, nidulantia.

I. HAMELIA (*erecta*) racemis erectis.

Frutex quinquepedalis, erectus, ramosus: caulinis inferne teretibus, lignosis, glabris; ſuperne obtufe triangularibus & villosis. Folia ſunt terna, poſita in coſtis caulinis extantibus, ovata, acuminata, integerrima, utrinque ſubtomentosa, tres quatuorve pollices longa; petiolis, in dorſo venis, nervoque medio utrinque, rubentiibus. Racemi rubri, terminales, quaterni, eretti, ſecondi: quorum tres ſitu ſunt exteriores & ad basin com-

pressiusculi, subdividunturque in tres alios consimiles; quartus autem inter priores medius & triangularis in tremitidem exteriores basique compressiusculos abit quidem sed & habet intermedium triangularem pariter sibi similem. Omnes hic racemuli ultimi sunt triflori vel quatrilobi; pedunculis propriis unifloris, rubris, & brevissimis. Flores sunt pollicares, inodori, toti subcoccinei. Baccæ nigrae succum continent atropurpureum. Plantam hanc viro clarissimo Joanne Baptista Du Hamel du Monceau rei maritimæ inspectore generali, &c., operibus etiam Botanicis illustridicere volui.

Habitat in sylvis Carthaginensisibus, copiose vero in insula Mango.

2. HAMELIA (*patens*) racemis patentibus. *Linn. syst. 1759*. (*Pl. americ. piſt. Tab. 72. Ramus cum flore & fructu*).

Frutex quinquepedalis, præcedenti in omni parte simillimus; præterquam quod in hoc racemi semper pa-teant, nec ordine constanter eodem dividantur, exterio-ribus scilicet bifidis; singulis circiter sexfloris. Florum perianthium & germen sunt coccinea, corolla miniata. Nullus dubito, quin ad idem pertineant genus plantæ illæ, quas exhibuit nobis Plumierus in tabulæ 218. figu-ris 1 & 2.

Habitat in Domingo in proclivibus montium fruti-cosis.

1. ERITHALIS (*odorifera*) arborea, erecta.

(*Pl. americ. piſt. Tab. 260, fig. 20. Flos. Fructus*).

Sambucus ligno duro, odoratissimo; seu Santalum race-mosum, foliis obtusis. *Plum. ic. 249, f. 2.*

CAL. Perianthium monophyllum, quinquedentatum, acu-tum, minimum, germini insidens, persistens.

COR. monopetala. Tubus infundibuliformis, brevissimus. Limbus quinquefidus; laciniis lanceolatis, planis, obtusis, longis, patenti-reflexis.

STAM. Filamenta quinque, subulata, erecta, orta in fun-do tubi, quo paulo longiora. Antheræ lineares, acutæ, erectæ, corolla paulo breviores.

PIST. Germen subrotundum, inferum. Stylus filiformis, superne compressus, fere longitudine staminum. Stigma simplex.

PER. Baccæ subrotunda, coronata calyce, unilocularis.

SEM. plura, hinc convexa, inde angulata.

Arbor erecta, elegans, ramosa, quindecimpedalis.
Folia subovata, obtusa cum exiguo acumine, nitida, integerrima, saturate virentia, petiolata, opposita, tripolicaria. Racemi compositi, corymbosi, axillares, oppositi. Flores numerosi, caduci, petalis albis, magnam partem hexandri cum calyce corollaque sexfidis, suaveolenta sua perfecte imitantur Syringam vulgarem. Baccæ sunt parvæ & purpureæ. Semina numero inconstanti sunt circiter novem. Forte Erythalis utraque Brownæ mearam dumtaxat constituit varietatem; sed quum istas ego non viderim, ille autem admodum descripscerit compendiose, nihil ausim definire.

Habitat in sylvis Martinicæ.

β. ERITHALIS (*inodora*) fruticosa, procumbens. Linn.
Syst. 181.

Frutex hic bipedalis, ramis procumbentibus diffusisque, cæterum adeo est similis præcedenti, ut pro specie distincta offerre non sustinuerim. Allatum fortasse discri-
men induxit soli ingens differentia; nam incolit anfractus rupestres maritimos, terra fere omni destitutos. Folia etiam habet crassiora & numerosa: bacca floresque minores, hos inodoros, illas albidas rarissimeque purpureas.

Habitat passim in Curaçao.

I. VISCOIDES (*pendulum*).

(Pl. americ. piæt Tab. 73. *Ramus cum flore & fructu*).
CAL. Perianthium monophyllum, minimum, quinque-dentatum, acutum, coloratum, germini insidens, persistens.

COR monopetala, hypocrateriformis. Tubus cylindricus, superne leviter ampliatus, erectus, longissimus. Limbus quinquefidus: laciinis lanceolatis, parvis, patentissimis.

STAM. Filamenta quinque,

PIST. Germen subrotundum, coloratum, inferum. Stylus filiformis, longitudine staminum. Stigma . . .

PER. & SEM.

Planta fruticosa, ramosa, in truncis arborum seniorum parasitica; ramis teretibus, glabris, pendulis. Folia sunt lanceolata, subfalcata, acuminata, integerrima, avenia, nitida, crassa, subdisticha, petiolata, opposita, plus minus sesquipolicaria. Racemi compositi, corymbosi,

rubentes, penduli, terminales & axillares. Flores in-dori, semipollulares, calyce germineque rubris, corolis albis. Plantam haec plenius describere neglexi; nomen itaque fluxum imposui, donec certum statuat partium desideratarum cognitio.

Habitat in Martinicæ sylvis.

- 1. RHAMNUS (*iguanaeus*) spinosus;** racemis axillaribus, floribus quinquefidis, monœcis. *Linn. syst. 196.*

Jujube americana loti arboris folio & facie, fructu rotundo parvo dulci. *Comm. hort. I., p. 141, t. 73.*

Arbuscula inelegans. Rami lenti, longissimi, vis divisi, reclinati, per totam saepe longitudinem ornantur ramusculis alternis, distichis, superioribus gradatim brevioribus. Spinæ axillares ad folia & ramusculos, subulatæ, acutissimæ, fortes, breves, recurvæ, solitariæ, vel geminæ. Folia sunt lanceolata, acuminata, leviter hic illuc dentato-serrata, glabra, petiolata, alterna, disticha; ut plurimum longa pollices tres quatuorve, rarius octo. Ex axillis egrediuntur racemi parvi, solitarii, vel bini, vel terni. Flores sunt monœci, exigui, & flavi; in quibus calyx dividitur in lacinias quinque, ovatas, concavæ & patentes; tubo vix ullo. Squamulæ nullæ adsunt. Styli in sœminis sunt duo patulique, stigmatibus bifidis. In mariibus loco pistilli est corpus oblongum, truncatum; calyce duplo brevius. Fructus est drupa subrotunda vel ovata, coronata stylo emarcido, flava, pisello duplo major, pulpam continens dulcem pueris barbarisque ex-petitam. Nux est rugosa, crassa, ossea, alba, unilocularis. Curaçaviensibus vocatur Wilde Kerseboom sive Cerasus sylvestris, atque etiam Iguanabesienboom seu Baccifera arbor Iguanarum, quod soleat haec arbuscula iisdem in locis crescere, in quibus haec lacertæ degunt; incolit enim rupestria fruticosa, ruderata, sepes apricos, septa lapidea, similiaque; quamvis etiam non infrequenter in meliori solo reperiatur.

Habitat in plerisque Caribæis & in Continente vicina.

- 2. RHAMNUS (*colubrinus*) inermis;** floribus monogynis hermaphroditis; capsula triloculari; ramis foliisque horizontalibus; floribus sursum versis. *Linn. syst. 195.*

(Pl. americ. piæt. Tab. 74. Ramus. Dein ramulus fructifer capsulae una valva, & semen).

Rhamnus arboreus foliis ovatis venosis, capsulis sphæricis inferne ad medietatem calypratis; pedunculis umbellulatis alaribus, cortice glabro. *Brown. jam. 2, p. 176.*
Arbor baccifera indica, foliis majoribus splendentibus, flore pentapetalo. *Comm. hort. I, p. 175, t. 90.*

Arbor est erecta. Rami plerique horizontaliter patent. Hi juniores cum petiolis, pedunculis, & externa foliorum calycumque facie, tomento obducuntur levi. Folia sunt ex oblongo ovata, acuta, integra, superne glabra & splendentia, petiolata, alterna, plerumque disticha. Racemi breves, corymbosi, circiter septemflori, axillares. Flores inodori, omnes sursum spectantes, squamis virentibus. Calyx profunde quinquefidus. Antheræ extra squamulas prodeunt. Stylus simplex in stigma definit trifidum. Capsula subrotunda, trisulcata, trilocularis, trivalvis; valvulis apice bifariam dehiscentibus. Semina solitaria, subrotunda, compressiuscula, emarginata, atra, nitidissima. Gallis Martinensibus dicitur Bois couleuvre sive Arbor colubrina. In sylvis altis montosis, ad viginti pedes excrescit, in fruticosis maritimis raro septimum attingit: hic folia quadripollucaria, illic semipedalia habet. Tomentum in cuba argenteum, alibi semper ferrugineum observavi.

Habitat in insulis sancti Martini, Domingo, Cuba & Jamaica. Vidi florentem Januario, Junio, & Novembri.
3. RHAMNU_s (cubensis) inermis; floribus monogynis, hermaphroditis; capsula triloculari, ramis foliis floribusque quaquavorum spectantibus. *Linn. syst. 195.*
(Pl. americ. pict. Tab. 75. *Ramus florens. Flos auctus*).

Arbuscula erecta, septempedalis, ramosa, habitu proxime accedit ad Viburnum Lantanam. Folia sunt ovata, utrinque obtusissima, integerrima, utrinque tomentosa, petiolata, alterna, quadripollucaria. Petala ad lentem ciliata. Flores & fructus præcedentis.

Crescit passim in fruticetis maritimis Cubæ.
I. RUY SCHIA (clusiaefolia) appendicis calycinæ foliolis lateralibus calyci similibus.

(Pl. americ. Piæt. Tab. 76. *Ramus florens*)

CAL. Perianthium pentaphyllum, persistens: foliolis subrotundis, concavis, obtusis, conniventibus, imbricatis. Auctum basi squamis duabus, foliorum consi-

milibus: inter easdemque appendice obovato, acuto, perpendiculariter dependente, subtus convexo, postice concavo, majori foliolis.

COR. Petala quinque, ovata, planiuscula, obtusa, reflexa, calyce triplo longiora.

STAM. Filamenta quinque, subulata, plana, patula, petalis breviora. Antheræ oblongæ, incumbentes.

PIST. Germen ovato-subrotundum. Stylus nullus. Stigma quadrangulare, cruciforme, planum.

PER. Bacca, . . .

SEM. . . .

Planta suffruticosa, bipedalis, arboribus parasitica innascitur. Folia sunt obverse ovata, obtusa, integerima, nitida, avenia, crassa, brevissime petiolata, alterna, quadripollucaria. Racemi simplicissimi, terminales, erecti, novempollicares; pedunculo communi tereti, glabro, crassoque; propriis brevibus, sparsis, patentibus, numerosis. Flores inodori, parvi; petalis purpureis; filamentis etiam purpureis, saepe septem, interdum sex, plerumque quinque. Fructum videre maturum haud contigit. Ob foliorum cum Clusiæ foliis similitudinem apud incolas nomen fortitur *Aralie à perites feuilles*, sive *Clusiæ parvifoliæ*. In memoriam celeberrimi Ruyschii plantam hanc nominavi; quandoquidem quæ sub hoc olim nomine planta venit, fuerit ad *Dracocœphala* verius relata. *Souroubea Aubletii Guian.* vol. I, p. 244, tab. 97 omnino pertinet ad hoc genus.

In Martinicæ sylvis vastis humidisque crescit. Florentem vidi Aprili.

I. BYTTNERIA (*carthaginensis*) foliis ovatis, in costa petiolisque aculeatis.

CAL. Perianthium monophyllum, profunde quinquefidum, deciduum: laciniis ovato-acuminatis, patentissimis, planis, subcoloratis.

COR. Petala quinque, oblonga, superne latiuscula & concava, brevia, introrsum conniventia, laciniis calycinis angustiora: terminata in setam subulatam, longam, basi nectario incumbentem atque contiguam, at non accretam, dein erecto-patentem, calyce longiorem; & alias setulas duas, laterales, breves, & reflexas.

Nectarium pentaphyllum, ventricoso-campanulatum, calyce brevius: foliolis obverse ovatis, obtusis, planis, erectis, per filamenta semiconnatis.

STAM. Filamenta quinque, subulata, extra nectarium ex ejusdem proximis duobus foliolis orta singula, patula, longitudine fere nectarii. Antheræ in quolibet filamento gerinæ, subrotundæ, bifidæ, distinctæ.

PIST. Germen quinquangulari-subrotundum, verrucosum, nectario brevius, in cujus centro. Stylus subulatus, brevis. Stigma obtusum, obsolete quinquefidum.

PER. Capsulæ quinque, subrotundæ, compressæ, apophysis circiter octo pungentibus variisque longitudinis armatæ, uniloculares, non dehiscentes, margine interiore truncato simul adhaerentes receptaculo communis centrali subulato. Vel Capsula (si inavis) pentacocca, ad centrum usque divisa.

SEM. solitaria, ovata, compressa, latere interiori acuto.

Planta sarmentosa, diffusa quaquavorsum, habitu ad Rubum fruticosum quodammodo accedit. Caulis sunt perennes, sublignosi, quinquangulares, fulcis angulisque obtusis, armati aculeis recurvis sparsis & numerosis, arbustulis fruticibusque partim sese sustentantes. Ramuscum juniores teretes, aculeati, alterni. Folia glabra, integririma vel ferratura una alterave incisa, alterna, quotannis decidua, petiolo costaque media aculeatis in dorso: in ramis senioribus ovata, acuta, quadripollicularia vel longiora; in junioribus lanceolato-acuminata, minora. Rami breves, aggregati & axillares in ramis junioribus. Flores inodori, patvi, albicantes, numerosissimi. Ex Aubletii historia plantarum Guianensium, in qua icon Bythneriæ scabriæ Linnæi proponitur, nunc video, hanc meam plantam a Linnæana Læflingianaque esse specie diversam; quare meæ novum nomen imposui.

Crescit passim Carthagena: ad semitas in cacumina montis de la Popa. Floret Septembri & Octobri.

SAUVAGESIA (erecta). Linn. syst. 203. Aubl. guian.

I, p. 151, t. 100, f. a.

(Pl. americ piæ. Tab. 77. *Ramus cum flore & fructu*). Iton harbaceus minor, foliis oblongis, tenuissime crenatis; stipulis ciliatis; floribus singularibus ad alas. Brown. jam. I, p. 179, t. 12, f. 3.

CAL. Perianthium pentaphyllum, persistens: foliolis lanceolatis, acuminatis, concavis, patentibus.

COR. Petala quinque, rhomboideo-ovata, acuta, plana, patentia, longitudine calycis.

Nectarii foliola quinque, oblonga, obtusa, ereta, petalis duplo breviora, cincta pilis pluribus brevioribus & filamenta mentientibus.

STAM. Filamenta quinque, brevissima, intra nectarium Antheræ lineares, eretæ, acutæ, nectario paulo breviores.

PIST. Germen subrotundum. Stylus filiformis, eretus, fere longitudine nectarii. Stigma simplex, obtusum.

PER. Capsula oblongo-ovata, acuminata, longitudine calycis, unilocularis, apice trifariam dehiscens.

SEM. plurima, minima, serie longitudinali affixa infra divisuras capsulae dehiscentis.

Plantula hæc semper erecta, pedem vix unquam aititudine excedit. Caules sunt teretes, ramosi, & herbacei. Folia ovato-lanceolata, acuta, ferrata, glabra, alterna, petiolata. Stipulæ lanceolatæ, acuminatæ, in marginis ambitu ornatae ciliis setosis. Pedunculi uniflori, axillares, solitarii, foliis duplo breviores, eretti in flore, deflexi in fructu. Flores inodori, petalis atque nectario candidis. Radix fibrosa, forte plusquam annua.

Crescit in Martinicæ prætensis montosis.

I. CONOCARPUS (*erecta*) *erecta*, foliis oblongo-lanceolatis. *Linn. syst. 181.*

(*Pl. A. P. Tab. 78. Ramus florens. Dein racemos fructescens, & semen*).

Conocarpus foliis oblongis, petiolis brevibus, floribus in caput conicum collectis. *Brown. jam. 2, p. 195.*

Conocarpus Manghana arbor curassavica, foliis salignis. *Catesb. car. 2, p. 33, t. 33.*

Alnus maritima myrtifolia coriaria. *Pluk. alm. 181, t. 240, f. 3.*

Alni fructu laurifolia maritima. *Sloan hist. jam. 2, p. 181, t. 161, f. 2.*

Frutex instar salicis pumilæ, foliis salignis. *Marcgr. bras. l. 2, c. 13.*

Innominate. *Plum. ic. 154, f. 2.*

CAL. Perianthium monophyllum, campanulatum, semi-

quinquefidum, germini insidens, deciduum: laciniis semiiovatis, acutis, erectis.

COR. nulla.

STAM. Filamenta quinque, subulata, erecta. Antheræ subrotundæ.

PIST. Germen angulato-compressum, parvum, inferum. Stylus filiformis, erectus. Stigma obtusum.

PER. nullum a semine distinctum.

SEM. unicum, obverse rotundato-ovatum, inæquale, compressum, hinc gibbum, illinc planiusculum, margine membranaceo crasso utrinque prominente.

Arbor hæc erecta, ramosa, altitudine triginta sœpe pedes superat. Rami juniores sunt angulati. Folia habet acuta, integerrima, ad tactum pinguia, alterna, brevissime petiolata, numerosa. Racemi simplices, laxi, sœpe foliosi, terminales sunt & axillares; pedunculis gerentibus receptaculum, quod germina in capitulum colligit subrotundum. Flores exigui flavescent, in Martinica decandri, staminibus calyce duplo longioribus; alibi pentandri, staminibus calycem non superantibus, at superante hunc ad duplum stylo: an ejusdem speciei? Capitulum in floribus globosum, in fructibus magis ovatum. Hispanis dicitur *Mangle Zarageza*.

Habitat in inundatis & littoribus maritimis Caribæorum vicinæque Continentis.

2. CONOCARPUS (*procumbens*) procumbens; foliis obverse ovatis. Linn. syst. 181.

(Pl. americ. pict. Tab. 260, fig. 22. *Folium.*)

Rudbeckia supina, foliis subrotundis. Amm. herb. 581.

Frutex ramosissimus, totus fere procumbens, rupum sese accommodat amfractibus. Folia habet obverse ovata, interdum ad subrotundam figuram tantillum accendentia, obtusa cum acumine, nitida, integerrima, alterna, petiolata, pollicaria aut sesquipollicaria, in margine laterali ad basin utrinque instructa glandula oblonga. Flores pentandri & hexandri; cæterum quales in præcedente; at minora omnia. Vix credo, Conocarpi erectæ folia glandulas habere; opinor enim, illas fugere me non debuisse, cum in delineatione iconis, tum in repetito ejusdem examine. Nec tamen negare ausim; quum, posteaquam in procumbente eas observaveram, in illa quærendi defuit

occasio. Porro animadvertis ego, quo magis hunc fructicem reperiebam ab ipso mari soloque rupestri remotum; eo accedere magis ejus folia ad figuram foliorum Conocarpi erectæ, eoque plures erigi ramulos aliquot, ferme in hanc opinionem suissem inductus, inter utramque solum varietatis discrimen dari; dummodo circa Havanam, ubi tot vigebant procumbentes, vere erectam invenire unicam potuisse. At hic æque exulat erecta, atque procumbens in locis illis, ubi innumeræ crescunt erectæ, etiam bipedales nanæ pariterque floriferæ.

Crescit in rupibus maritimis Cubæ.

3. CONOCARPUS (*racemosa*) floribus completis, segregatis. Linn. syst. 181.

(*Pl. americ. pict. Tab. 79. Ramulus fructescens.*)

Conocarpus foliis elliptico-ovatis, petiolis biglandulatis, racemis laxis, fructibus sejunctis. *Brown. jam. I*, p 159.
Mangle foliis ellipticis ex adverso nascentibus. *Sloan. hisp. jam. 2*, p. 68.

CAL. Perianthium monophyllum, subrotundum, quinquefidum, germini insidens, persistens: laciniis subrotundis, parvis, obtusis, erectis.

COR. Petala quinque, subrotunda, concava, obtusa, punctula, minima, vix superantia lacinias calycis, e cujus incisuris, caduca.

STAM. Filamenta decem, subulata, erecta, alterna breviora, orta in tubo calycis, cuius fere longitudine Antheræ subrotundæ.

PIST. Germen verticaliter subcordatum, compressum, in utroque latere sub calyce auriculatum squamula persistente, apice depresso ornatoque intra calycem stellula orbiculari villosa decemradiata, inferum. Stylus subulatus, erectus, staminibus paulo brevior. Stigma capitatum, obtusum.

PER. Capsula obverse ovata, coriacea, compressa, inqualis, coronata calyce, unilocularis, non deliquescentia. Vel nulla; si hanc pro crusta seminis exteriore sumas.

SEM. unicum, teres, acutum, germinans intra pericarpium.

Arbor hæc procera ramosaque ipsam sæpe prope terram in tres quatuorve truncos dividitur. Rami juniori nitent, rubent, & mutuo opponuntur. Folia sunt lan-

ceolato-ovata, obtusa, integerrima, nitida, crassiuscula, ad tactum pinguia, saturate virentia, opposita, tripollicaria; petiolo rubenti & superne biglandulofo. Racemi simplices, terminales, plerumque terni; vel (quod in arbusculis nanis frequenter obtinet,) compositi ex lateribus oppositis utrinque tribus, atque simplicibus his, vel & ipsis trifidis, & ex medio terminali simplici: verum in his arbusculis tunc flores sunt multo minores, & plerique germine vix ullo donati abortant. Flores parvi & sessiles levem nec ingratum spirant odorem. Petala albescunt. Stamina perpetuo & ubique numeravi decem; quorum alterna quinque breviora primam insipientis attentionem non raro fugiunt. Semen pericarpio coriaceo inclusum constat lamellis duabus virentibus ovatisque, sed involutis in corpus teres; &, quæ has circumdet, membrana tenuissima. Lamellæ in pericarpii basi abeunt in corpusculum teres obtusum nitidumque, quod centrum seminis longitudinale occupat, radices dein acturum. Capsulae enim in terram delapsæ coronatum apicem illud penetrat, radiculisque tunc terræ immissis, primum constituit futuri trunci rudimentum: inde per nutritionis vim auctæ volumine lamellæ capsulam disrumpunt, evaduntque folia radicalia. Interdum duo semina eidem inclusa pericarpio inveni. Incolæ corticem arboris adstringentem ad densanda coria adhibent. Hispanis vocatur *Mangle bobo* sive *Mangle stulta*, Anglis *White Mangrove* sive *Mangle alba*. Patet ex data descriptione, valde differre a prioribus hanc arborem, et si in multis etiam conveniat; imo debere fortisan sub distincto genere tradi.

Crescit in littoribus maritimis sabulosis & limosis Caribæarum vicinæque Continentis.

I. ACHYRANTHES (*altissima*) caule scandente.

Amaranthus americanus altissimus longifolius, spicis e viridi albicantibus. *Plum. spec. 6.*

Blitum album majus scandens. Sloan. hist. jam. 2, p. 142, t. 91, f. 2.

Caules scandunt arbores vicinas ad altitudinem viginti pedum. Folia sunt ovata, acuta, glabra, integra, petiolata, alterna, semipedalia. Spicæ paniculatæ, terminales & axillares; particularibus circiter septemfloris. Flores e viridi albicant.

Crescit in sylvis Domingensibus.

I. ILLECEBRUM (*ficoideum*) caulis repentibus, glabris; foliis lato lanceolatis, petiolatis; capitulis orbicularis, pubescentibus. Linn. *syst. 206.*

(*Pl. americ. pict. Tab. 90. Pars caulis florigeri.*)

Gomphræna caule diffuso repente, capitulis sessilibus. Roy. *Lugdb. 418.*

Amaranthoides marina repens, polygoni folio, capitulis argenteis. Plum. *spec. 20* an varietas *Plum. ic. 21, fig. 2?*

CAL. Perianthium triphyllum, aridum, persistens: folio exterius ovato, acuminato, concavo, erecto; duobus lateralibus subulatis, falcatis, acutis, erectis.

COR. Petala quinque, acuta, erecta, arida, calyx duplo longiora, persistentia; quorum exteriora duo sunt lanceolato-ovata, concava; tria interiora lanceolata, convexa, medio latiori.

STAM. Filamenta quinque, subulata, erecta, longitudine germinis. Antheræ subrotundæ, simplices.

PIST. Germen subrotundum, compressum. Stylus omnium brevissimus, unicus. Stigma obtusum, villosum.

PER. Capsula cordato-orbiculata, compressa, instructa stylo & stigmate, unilocularis.

SEM. unicum, orbiculare, compressum.

Pianta repens, ad singula genicula radices terræ immittit. Folia cuneiforme-lanceolata, acuta, sessilia. Capitula subrotunda, sessilia, numerosa.

Crescit copiose in Martinicæ pratis, quæ pessimadat; hinc ruricolis invisa.

DIGYNIA.

I. CYNANCHUM (*racemosum*) caule volubili; foliis cordatis, acutis, glabris; racemis simplicibus. Linn. *syst. 212.*

(*Pl. americ. pict. Tab. 80. Ramus florifer.*)

CAL. Perianthium pentaphyllum: foliolis lanceolatis, concavis, acutis, patulis.

COR. monopetala. Tubus campanulatus, brevissimus. Limbus quinquesfidus: laciniis lanceolatis, planis, patentissimis, apice revolutis & emarginatis, calyce pauculo longioribus.

Nectaria quinque, erecta, longitudine calycis, ova-ta, plana, apice trilaciniato & acuminato: in centro floris e basi sua producta denuo assurgentia in corpuscula quinque, oblonga, brevia, obtusa, abeuntia in membranas cucullatas & dissepimento medio biloculares.

STAM. Filamenta decem, capillaria, brevissima, orta bina simul ex eodem punto inter nectarii cucullos. Antheræ ovales, teretes, erectæ, reconditæ in loculamentis cucullorum.

PIST. Germina duo, minima, in centro nectarii. Stylus unicus, filiformis, erectus, fere longitudine nectarii. Stigma maximum, utrinque planum, quinquangulare, angulis acutis.

PER. & SEM. . . .

Caules herbacei, volubiles, glabri, scandentes, lacte candido pleni. Folia cordata, acuta, integerrima, nitida, leviter undulata, facie luteo viridentia, dorso æruginosa, opposita, petiolata, quadriplicata. Racemi simplices, laterales, triplicares, solitarii; ad quorum latus etiam novus prodit ramusculus floribus onustus. Flores parvi, inodori, corollis candidis. Fructum haud vidi.

Crescit Carthagena in fruticetis apricis & in sepibus arboreis. Floret Octobri & Novembri.

Hanc plantam cum secuturis congeneribus in Enumeratione mea Asclepiadibus adnumeraveram; ad has enim quam ad Cynancha accedere propius, ex positis a clarissimo Linnæo characteribus, mihi videbantur. At vero posthac instituto majore cum attentione Asclepiadum affiniumque plantarum examine, & collatis pariter authorum descriptionibus, evidenter perspexi, vera harum stamina vidisse vel certe scripto prodidisse ante me neminem: unde sequi erroneam vel incompletam nectarii descriptionem omnino oportuit; sicuti etiam stigma, quod in Asclepiadis charactere corpusculum truncatum vocat Linnæus, pro parte nectarii perperam habuerunt. De candra ego Asclepiades, quas examinavi, omnes, utramque Stapeliam, & Cynanchum acutum, inveni: in quibus omnibus semper ex eodem punto fusco, in floris inspektione statim conspicuo, duo oriuntur filamenta, antheras gerentia pro ratione floris satis magnas; sed quæ in membranis cucullatis & faccatis nectarii perpetuo occultantur;

his suspensa manu retrorsum diductis, tum demum in conspectum prodeunt. Mandare igitur has plantas ad Cynanchorum familiam malui, quibuscum habitu toto congruunt. Multo plures, quam quas hic recensebo, hujusce generis species in America offendit; imo omisi Caribæas omnes. Scilicet præoccupatus characteribus Linnæanis, ad quos torquere ipsarum explicationem volebam, nec poteram, aggrediebar examen, quod in singulis magis me reddebat incertum. Pertæsus tandem ingrati laboris, illas describere neglexi; donec examinati Cynanchi longiflori flores stamina mihi vera casu exhibuerunt; unde illico tota evidenter evadet fructificatio, quam in reliquis postea obviis, bono usus microscopio, confirmavi.

2. CYNANCHUM (*planiflorum*) caule volubili; foliis cordatis, facie glabris, subtus tomentosis; pedunculis subracemosis. *Linn. syst. 212..*

(*Pl. americ. pict. Tab. 81. Ramus florifer.*)

CAL. Perianthium pentaphyllo: foliolis lanceolatis, planis, acuminatis, patentissimis, subcoloratis, corollam fere superantibus.

COR. monopetala, plana. Tubus patens, brevissimus. Limbus quinquefidus: laciniis ovato-subrotundis, planis, patentissimis.

Nectaria quinque, lateribus connata in unum corpus figura & magnitudine tubi corollæ; in centro floris basi sua producta assurgentia in corpuscula quinqueotusa, erecta, tubo corollæ duplo longiora, apice aucta membranulis cucullatis & bilocularibus.

STAM. Filamenta decem, capillaria, brevia, orta binasimul ex eodem punto inter cucullos nectarii. Antheræ obverse ovatae, obtusæ, teretes, erectæ, reconditæ in cucullis.

PIST. Germina duo, ovata, hinc convexa, illinc plana, longitudine tubi corollæ, intra centrum nectarii. Styli duo, breves, erecti. Stigma unicum, simplex, maximum, quinquangulare, in centro fissum, infundibuliforme.

PER. & SEM.

Planta latifrons; caulis volubilibus, teretibus, glabris. Folia ex oblongo cordata, acuminata, integerima, subtus tomento vix conspicuo molliissima, superne

glabriuscula, ad petioli ortum ciliis abruptis rigidis ferrugineis & brevissimis barbata, opposita, petiolata, ferme quadripolicaria. Pedunculi communes glabri, laterales, solitarii, racemosi, plus minus quinqueflori, vix pollicares: propriis ultra communem elongatis. Flores inodori, planissimi, diametro semipollucari, corollis venosis & æruginosis, calycibus ex albo virentibus. Frustrum non vidi.

Crescit circa Carthaginem in præcipitiis montis de la Popa. Floret Julio & Augusto.

3. CYNANCHUM (*maritimum*) caule volubili; foliis cordatis, facie hirsutis, subtus tomentosis; pedunculis aggregatis. *Linn. syst. 212.*

(*Pl. americ. piæt. Tab. 82. Ramus florifer.*)

CAL. Perianthium quinquepartitum: laciniis lanceolatis, acutis, parvis, patentissimis.

COR. monopetala. Tubus brevissimus, patens. Limbus quinquefidus: laciniis ovatis, acutis, planis, magnis, interne hirsutis, patentissimis.

Nectarium campanulatum, constans ex folialis quinque, obcordatis, tridentatis, patentibus, ad latera coalitis, corollæ concoloribus, longitudine calycis; e basi sua producta in centro floris assurgens in corpuscula quinque, instructa squamis quinque membranaceis culcullatis & bilocularibus.

STAM. Filamenta decem, capillaria, brevia, orta binasimul ex eodem punto inter squamas nectarii. Antheræ obverse ovatæ, teretes, erectæ, reconditæ in cucullis.

PIST. Germina duo, ovata, hinc convexa, illinc plana, in centro nectarii. Stylus basi bifidus; ad altitudinem squamarum expansus in corpus utrinque planum amplum & acute pentagonum; ex hujus iterum centro egressus simplex, filiformis, erectus, longitudine corollæ. Stigma bifidum: laciniis obtusis, patentibus.

PER. & SEM. . . .

Planta lactescens; caulis volubilibus, teretibus, hirsutis. Folia cordata, acuminata, integerrima, subtus incana, superne hirsuta, petiolata, opposita, duos vel quatuor pollices longa. Pedunculi uniflori & breviusculi aggregatim oriuntur e tuberculo inter folia. Flores inodori; calyce viridi; corolla atropurpurea. Ex hujus floris

pistillo optime patet asserti mei veritas; nimirum corpusculum illud, quod ceu nectarii partem genitalia tegere ait Linnæus, esse ipsum stigma vel styli portionem; & que enim in charactere, præprimis si cum congenibus comparetur, hic possent dici styli duo cum stigmate pentagono, quod terminetur filo apice bifido. Fructum non vidi. Hanc plantam in littore arenoso & subfruticoso reperi, evulsiique eo ipso momento, quo navim conscendi, quæ in Europam me revehheret; unde & descriptionem & iconem inter maris fluctus perfeci. Nomen triviale *maritimi* assumpsi, et si fortasse alibi quam in littoribus crescat.

Crescit in Tierra Bomba. Florentem vidi Noyembri.

4. CYNANCHUM (*altissimum*) caule volubili; foliis cordatis, utrinque tomentosis; floribus umbellatis.

(Pl. americ. piæt Tab. 83. *Ramus florifer*).

CAL. Perianthium pentaphyllum; foliolis lanceolatis, concavis, longitudine inæqualibus, externe tomentosis, erectis.

COR. monopetala. Tubus campanulatus, inferne obsolete pentagonus, erectus, longitudine calycis. Limbus quinquefidus: laciniis subrotundis, planis, obtusis, tubo duplo brevioribus, patentissimis. Faux leviter angustata.

Nectarium corpuscula quinque, minima, erecta, contigua, germen cingentia, apice instructa squamula cucullata, biloculari, in dorso aucta gibbo convexo & magno.

STAM. Filamenta decem, capillaria, brevia, orta bina simul ex eodem punto inter squamulas. Antheræ obverse ovatæ, compresso-planæ, erectæ, reconditæ in cucullis.

PIST. Germina duo, ovata, hinc convexa, illinc plana, intra nectarium. Stylus unicus, erectus, crassus, brevissimus. Stigma maximum, planum, subpentagonum, punto umbilicatum.

PER. Folliculi duo, ovati, ventricosi, in acumen obtusum desinentes, maximi, uniloculares, univalves, longitudinaliter dehiscentes.

SEM. plurima, oblonga, imbricata, coronata pappo. Receptaculum oblongum, subteres, liberum.

Planta lactescens, fruticosa, perennis, arbores ad

quinquaginta pedum altitudinem scandit. Caules volubiles, teretes; seniores lignosi, glabri, cinerei, aphylli; juniores virides, tomentosi, foliosi. Folia cordata, acuminata, integerrima, crassula, utrinque tomento molissimo at vix conspicuo obsita, petiolata, opposita, quotannis decidua, primum bipollicaria, tandem vel semipedalia. Umbellæ laterales, solitariæ, densæ, hemisphæricæ; pedunculo communi crassissimo, tereti, tomentoso, vix petiolorum longitudine; involucro polyphyllo, inæquali. Hæ simul prodeunt cum foliis; vel etiam in plantæ aphyllis ramis interdum senioribus, e nodis ortæ. Flores crassi, firmi, inodori; calycibus ex cinereo virentibus; corollis sordide purpureis. Nectarii squamæ in hac specie, uti etiam in paucis aliis, dici possent triloculares, eo quod dissepimentum in illis fit duplex; verum quum hæ duplicaturæ conniveant, locenturque antheræ ad earumdem externa latera, loculum intermedium nulius instar habui. Folliculus alteruter maturescere consuevit, abortante altero.

Crescit passim Carthagenaæ in sylvaticis. Floret imprimis Majo & Junio.

5. CYNANCHUM (*undulatum*) caule volubili; foliis lanceolatæ-ovatis, undulatis, acuminatis, glabris; umbellis subglobosis. Linn. syst. 213.

(Pl. americ. pict. Tab. 84. *Ramus florifer.*)

CAL. Perianthium pentaphyllum: foliolis ovatis, concavis, patulis.

COR. monopetala. Tubus depresso-globosus, calyce paucilo longior. Limbus quinquefidus: laciniis planis, obtusissimis, patentissimis, tubo duplo brevioribus. Faux patentissima.

Nectarium, & omnia reliqua; ut in præcedente.

Planta lactescens & tota glabra caules habet volubiles teretesque. Folia sunt integerrima, glabra, ad tactum pinguia, valde undulata, petiolis donata brevissimis, opposita, quadripollicaria. Pedunculo communi tereti, crassissculo, laterali, & petiolis fere longiori insidet umbella solitaria, subglobosa, densa, & parva. Flores sunt parvi, inodori, firmi; calycibus cinereis; corollis externe subcinereis, interne sordide purpureis.

Crescit Carthagenaæ in monte de la Popa. Floret Julio.

6. CYNANCHUM (*longiflorum*) caule volubili; foliis oblongis, acutis, villosis; floribus umbellatis.

(*Pl. americ. pict. Tab. 85. Ramus florifer*).

CAL. Perianthium pentaphyllum: foliolis lanceolatis, planis, acuminatis, erectis, laxis, coloratis.

COR. monopetala, longissima. Tubus erectus, calyx duplo longior, interne omnium pilosissimus, a basi ad usque calycis altitudinem paulo amplior & obsolete pentagonus, supra calycem subteres & elongate infundibuliformis. Limbus quinquefidus: laciniis lanceolatis, planis, acutis, interne pilosis, reflexis, tubo triple brevioribus.

Nectarium duplicaturæ ad instar adnatum toti parieti interiori baseos pentagonæ petali, ad cuius finem introrsum a corolla secedit in limbum, qui format stellulam quinquefidam conniventem & apertam: inferne autem basi producta versus corollæ centrum assurgent in corpuscula quinque, subrotunda, compressa, aucta cucullo membranaceo biloculari.

STAM. Filamenta detem, capillaria, brevissima, orta binimul ex eodem punto inter nectarii cucullos. Antherae obverse ovatae, obtuse, compressæ, erectæ, reconditæ intra cucullos nectarii.

PIST. Germina duo, ovata, illinc plana, hinc convexa, in centro nectarii. Styli duo, erecti. Stigma simplex maximum, pentagonum, convexum, punto umbilicatum, longitudine nectarii.

PER. & SEM.

Planta lactescens, caulis volubilibus teretibus & pilosis arboreis ad quindecim pedum altitudinem scandit. Folia habet obverse subovata, basi cordata, integerrima, acuta, crassula, villosa, venis nervisque pilosis, opposita, semipedalia, petiolis donata brevibus pilosisque. Umbellæ sunt laterales, solitariae, ut plurimum septemflore; pedunculo communis piloso, crasso, tereti, longitudine petioli, involucro polyphyllo, inæquali. Flores inodori, inamoeni, bipollicares; calycibus evirenti pallidis; petalis externe pallentibus, interne fuligineis pilisque argenteis numerosis vestitis. Flos unus alterve in umbelli jam in principio, ante explicationem sape, cum pedunculo proprio abortat, cuius remanet cicatrix. Fructum

non vidi. Floris facies externa singulatis & a congenieribus veluti aliena distinctum postulare genus videretur; sed pendet illa a solo corollæ tubo præter morem elongato.

Carthagenæ crescit in sylvis densis. Floret Augusto.

7. CYNANCHUM (*filiforme*) caule volubili; foliis ovatis, acuminatis, planis, nitidis; umbellis globosis.
(Pl. americ. piſt. Tab. 86. *Ramus florifer*).

CAL. Perianthium monophyllum, ultra medium quinque-partitum: laciniis lanceolatis, concavis, acuminatis, erectis.

COR. monopetala, calyce duplo longior. Tubus subrotundo-campanulatus, brevis. Limbus quinquefidus: laciniis ovatis, acuminatis, planis, interne pilosiusculis, patentissimis.

Nectarium corpuscula quinque, erecta, petalo duplo breviora, contigua, gerimen cingentia, apice instructa squamula cucullata biloculari; ad dorsi basin singula emittentia corniculum subulatum, cavum, erectum, apice patent, ejusdem secum longitudinis.

RELIQUA; ut in Cynancho altissimo.

Planta lactescens, scandens. Caules volubiles, teretes, filiformes, nitidi, ramosi, numerosissimi. Folia ovato-acuminata, integerrima, plana, opposita, petiolata, vix fesquipollucaria. Umbellæ globosæ, parvæ, erectæ, laterales, alternæ; pedunculo communí filiformi, petiolis duplo longiori. Flores inodori, exigui, petalis nectarioque niveis. Folliculus ut plurimum uterque maturescit.

Crescit passim Carthagenæ in sylvaticis & fruticosis.

8. CYNANCHUM (*clavum*) caule volubili; foliis acuminato-oblongis, ad oras revolutis; floribus umbellatis.
(Pl. americ. piſt. Tab. 87. *Ramus florifer*).

CAL. Perianthium profunde quinquepartitum: laciniis lanceolatis, concavis, acuminatis, erectis.

COR. monopetala. Tubus campanulatus, calyce paulo brevior. Limbus quinquefidus: laciniis ovatis, acutis, planis, patentissimis, tubo duplo longioribus.

Nectarium corpuscula quinque, erecta, contigua, petalo duplo breviora, stylis cingentia, ad apicem aucta squamula cucullata biloculari, orta e margine superiori tubi corollæ, singula externe ad basin oblique emit-

tentia corniculum obovatum magnum cavum clausumque.

STAM. Filamenta decem, capillaria. Antheræ obversæ ovatæ, obtusæ, compressæ, reconditæ in cucullis nectarii.

PIST. Germina duo, in fundo tubi intra nectarium. Styli duo, filiformes, erexit, longitudine nectarii, apice in unum confluentes, hinc abeuntes in Stigma magnum, subpentagonum, utrinque planum.

PER, & SEM. . . .

Planta lactescens, scandens. Caules volubiles, teretes, glabri, numerosi. Folia lanceolato-oblonga, acuminata, integrerima, venosa, nitida, lateribus revoluta, brevissime petiolata, opposita, duos tresve pollices longa. Umbellæ laterales, solitariæ. Flores inodori, corollis nectarisque niveis.

Crescit Carthagena in fruticosis.

I. ASCLEPIAS (gigantea) foliis amplexicaulibus, oblongo-ovalibus, basi pilosis. *Linn. syst. 213.*

(*Pl. americ. pict. Tab. 88. Ramus florifer.*)

Asclepias frutescens incana, foliis majoribus subrotundis, petiolis brevissimis, floribus umbellatis. *Brown. jam. I, p. 182.*

Apocynum erectum majus latifolium indicum. *Pluken. alm. 35, t. 175, f. 3.*

Bejd el oschar. *Alp. aeg. 85, t. 86 & 87.*

Ericu. *Rheed. mal. 2, p. 53, t. 31. Seb. th. I, p. 41, t. 26, f. I.*

Madorius. *Rumph. amb. 7, p. 24, t. 14, f. I.*

Zia-raek. *Brun. it. 315, t. 184.*

Videtur elegans hæc planta post Sloanei demum tempora in Jamaicam introducta fuisse; quum vir ille celeberrimus in Historia sua nullam ejus mentionem faciat; ubi tamen nunc vere sylvestris in ipsis oppido Kingston vicinis pratis late vegetat, a pecude semper intacta. In hortis quoque cultam vidi, atque excreuisse in arbusculam homine duplo altiorem, truncō brachium crasso. Tota lactescit. Cortex albicat. Rami sunt pauci, iidemque crassi & longi; quos folia superne tantum ornant, inferne delapsa nudos relinquunt. Folia sunt oppofita, breviter petiolata, integrerima, acuta, molli atque albican-

te obducta tomento, quod manu fricante abscedit. Basí cordata caulem amplectuntur. Nervus medius ad ortum ex petiolo antice pilis rigidis fuscisque instruitur. Pedunculi sunt axillares & subumbellatim racemosi. Calyx cum flavedine aliqua pallet. Corolla externe tota nivea est; interne autem tingitur ad apicem saturata purpura, quæ circa medium in albedinem inæqualiter abrumptur. Nectarium albet cum laminarum marginibus superioribus purpureis. Stigma ex viridi flavet. Quod suos flores Alpinus croceos dicat, non intelligo.

In Jamaica florentem vidi Februario.

I. GENTIANA (*aphylla*) corolla quinquefida, hypocrateriformi; caule aphylllo. Linn. syst. 222.

(Pl. americ. pict. Tab. S9. *Plantula integra cum flore & fructu.*)

Helleborine aphyllos, flore luteo. Plum. spec. 9?

CAL. Perianthium monophyllum, tubulosum, oblongum, teres, erectum, coloratum, apice quinquefido & acuto, persistens.

COR. monopetala, hypocrateriformis. Tubus cylindricus, erectus, longissimus, basi & apice leviter ampliatus. Limbus quinquefidus; laciniis ovatis, obtusis, patentissimis, planis, parvis.

STAM. Filamenta nulla. Antheræ quinque, subrotundæ, didymæ, affixæ superiori parti tubi corollæ.

PIST. Germen oblongum, calyce longius. Stylus filiformis, longitudine tubi corollæ. Stigma simplex, capitatum, obtusum.

PER. Capsula oblonga, teres, obtusa, calyce duplo longior, unilocularis, bivalvis; valvulis basi & apice cohaerentibus.

SEM. numerosa, scobiformia.

Plantula omnino aphylla, tenella, erecta. Radices teretes, albidae, tenellæ, crassæ, fasciculatae. Caules simplices, quadriplicares, n'tidi, uniflori, coloris straminei, instructi stipulis oppositis brevissimis remotisque, per quas genicula distinguuntur. Flos terminalis, solitarius, pollicaris, erectus, inodus, flavescentia. Corolla marcescit. Semina, qualia in Orchide. Incolit vetustarum arborum truncos cavos, in quibus tractu temporis humi aliqua portio fuit collecta; quo posset sensu arborum

parasitica vocari. Ego alibi non offendit plantulam; quia omnino etiam rarissime occurrit.

Crescit in Martinicæ sylvis montosis vastis & humeribus. Vidi florentem Majo & Decembri.

TETRAGYNIA.

I. EVOLVULUS (*nummularius*) foliis subrotundis; caule repente; floribus subsessilibus. Linn. syst. 247.
(Pl. americ. pict. Tab. 260, fig. 23. *Cauliculus florens*).
Convolvulus herbaceus repens, foliis subrotundis, floribus singularibus axillaribus. Brown. jam. p. 153.
Convolvulus minor repens, nummulariæ folio, flore cæruleo. Sloan. hist. jam. I, p. 157, t. 99, f. 2.

Plantula ramosa, procumbens tota, glabra, tenella, repens, ex caulibus ramisque radiculas fibrosas emittit. Folia sunt subrotunda, brevissime petiolata, emarginata, integra, alterna. Flores subsessiles, solitarii, ratione plantulæ magni, inodori, axillares. Calyx viret. Corolla rotato-concava, alba, vel cærulea, vel etiam carnea, laciniis obverse cordatis.

Crescit passim in Caribæarum pratis.

PENTAGYNIA.

I. ARALIA (*arborea*) caule arboreo; foliis simplicibus; floribus umbellatis.

Aralia caule arboreo, foliis simplicibus, umbellæ universalis radiis uniglandulosis. Linn. syst. 248?

Aralia arborea foliis nitidis, oblongo-ovatis, umbella laxa, radiis singulis glandula notatis. Brown. jam. I, p. 189.

Hedera arbor, foliis hastatis. Plum. ic. 148.

Arbor erecta, inelegans, quindecimpedalis, odorem spirans ingratum. Rami pauci, fragiles. Folia ovalia, acuminata, levissime serrata, utrinque nitidissima, alterna, plerumque sex vel septem pollices longa, interdum etiam breviora vel contra pedem superantia; petiolo duplo circiter breviori ipsa pagina. Racemi eructi & terminales constant pedunculis communibus bipollicaribus, lateralibus alternis plus minus septem, terminalibus ex eodem

dem centro circiter sex, omnibus basi ad ortum suffultis bractea lanceolata, apice vero terminatis in receptaculum, quod involucri instar monophylli colligit pedunculos proprios quadrilineares, unifloros, in umbellam dispositos, circiter quadraginta. Flores sunt parvi, sordide albescentes, omnino structura Araliae; sed in quibus constanter unicum in medio stylum eumque brevissimum observavi. An itaque planta mea diversa est a Browneana & Plumeriana? Vix credo. An vero varietas stylorum ista variis in locis obtinet? Id etiam ignoro; at examinasse me hos flores de industria, probe memini. Fructum non vidi.

Crescit Havanæ in montibus sylvestribus; ubi vidi florentem Decembri.

I. ARALIA (*capitata*) caule arboreo; foliis simplicibus; floribus in capitula congestis.

(Pl. americ. Pitt. Tab. 91. *Ramus florens.*)

Arbor est ramosa, altitudine valde varia. Folia habet e rhombo ovata vel obverse ovata, acuminata, basi attenuata, integerrima, nitida, coriacea, ad ramulorum extremitates alternatim sparsa, magnitudine admodum variantia; petiolis fere longitudine paginarum. Panicula terminalis, eretta; in qua pedunculi communes omnes suffulciuntur bractea acuminata & amplexicauli; ultimi terminantur floribus in capitulum globosum collectis. Receptaculum fructificationis commune est paleaceum. Antheræ ovales incumbunt. Stylum in flore unicum perpetuo observavi; in germinibus viro post corollæ lapsum jam adolescentibus eundem inveni ad basin fere usque divisum in plures lacinias (plerumque octo, novem, vel decem) ceu totidem stylos singulares, eosque reflexos & rigidos. Fructum perfecte maturum non offendi. Stylus igitur in flore simplex, posteane multifariam dispescitur? An vero flores in eodem racemo alii monogyni, polygyni alii, et si id attentionem meam præterfugerit? Alterutrum si in utraque hac specie obtinet, cur non ad Hederæ pertineant genus? Loculamenta plura, si quidem vere adsint illa, vix mihi videntur ad distinctionem sufficere. Vel anne potius cum in hac tum in præcedente styli in flore tam sint contigui, ut pro uno solido habuerim? Credo, ni fallat memoria, parasiticam arbori vastæ increscentem me illam aliquando reperiisse.

Crescit in sylvis Martinicæ.

H

HEXANDRIA.

MONOGYNIA.

I. BROMELIA (*Karatas*) foliis erectis: floribus acaulis, sessilibus, aggregatis. *Linn. syst. 259.*
(Pl. americ. piet. Tab. 260, fig. 24. Flos totus. Idem cum petalo disciso & expanso, ut interiora pateant. Fructus).

Karatas foliis altissimis angustissimis & aculeatis. *Plum. gen. IO.*

Caraguata-acanga. *Pis. bras. l. 4, c. 82.*

Planta acaulis, elegans. Folia numerosa, radicalia omnia, subulato-linearia, mucronata, ciliato-spinosa, ereta, minus rigida quam in congeneribus, hinc superne plerumque reflexa, humanam sæpius altitudinem superantia. Flores inodori, fere tripollicares, calyce germinaque lanugine ferruginea adspersis, corolla rosea. Fructus ovales, tripollicares, plurimi (ducenti vel trecenti) simul sessiles in sinu centrali paleaceo foliorum tunc magis patentium, componunt discum hemisphæricum diametri semipedalis. Hi sub cortice coriaceo & flavescente carnem continent albidam, succulentam, sapore acido & dulci; in qua semina nidulantur plurima, glabra, subrotunda & fusca. Decorticata caro palato non displicet, modo abunde maturi fructus sint; tunc enim levis solummodo acut percipitur, quem facile obtundit juncta dulcedo melleat, quod fatendum itidem est, raro istiusmodi reperiuntur. Immaturi stuporem dentibus inducunt, saudantque interdum comedentis palatum & gingivas, ut recte jam olim notavit Piso. Quod vero ait ille de procurando prægnantibus abortu, quæ succo horum copiosius utuntur, id videtur mihi quotidiane apud Martinicenses experientia esse contrarium. Quamcunque tamen maturitatem acquisiverint, immoderatus comedens affecisse dolore linguam aliquo, crebris observationibus mihi constitit. In horto Cæsareo jam fructus maturos sæpius planta dedit. Proles novæ e radice ad latera matris nascuntur. Incolis vocabulo Caribæo appellatur *Karatas*. Loca montosa sylvatica incolit, plerumque ad truncum arbusculæ, cuius umbra fruatur.

Crescit in Martinica & Cuba.

2. BROMELIA (*Pinguin*) foliis ciliato-spinosis, mucronatis; racemo terminali. Linn. Syst. 259. Brown. Jam. 4, p. 193.

Ananas americana sylvestris altera minor. Pluk. mant. 29, t. 258, f. 4.

Pinguin. Dill. elth. 320, t. 240, f. 311.

CAL. Perianthium monophyllum, profunde trifidum, externe subvillosum, germini insidens, deciduum: lacinias lanceolato-linearibus, acuminatis, carinatis, erectis, longissimis.

COR. Petala tria, lineari-oblonga, acuta, concava, calycem leviter superantia, basi tubo calycis accreta, apicibus patulis, cæterum erecta & amplexantia.

Nectarium nullum.

STAM. Filamenta sex, subulata, erecta, calyce duplo breviora, basibus latis inter se & cum tubo calycis petalisque connata. Antheræ lineares, basi sagittatæ, erectæ, longitudine calycis.

PIST. Germen oblongum, obtuse & obsolete trigonum, magnum, tomentosum, inferum. Stylus subulatus, triquetrus, crassus, longitudine filamentorum, erectus. Stigma trifidum, obtusum.

PER. Bacca subovata, carnosa, cortice coriaceo, unilocularis.

SEM. pauca, subovata, obtusa, nidulantia.

Planta elegans habitu congenerum; foliis rigidissimis & ciliis spinosis valdeque pungentibus armatis, sex vel quinque pedes longis. Hæc magis expanduntur, lateque in centro omnia rubore incipiunt, quo tempore in medio egreditur scapus racemosus, pyramidalis, duos tresve pedes longus, speciosus, tomento albido vestitus, sustinens flores numerosos, circiter bipollares, quorum gerumen & calyx colorem scapi habent, petala autem pulchre roseum. His succedunt fere totidem fructus flavescentes, pollares vel paulo majores, sapore acidulo vellicante nec grato prædicti, qui semina subfuscâ continent pauca, interdum nulla. Ad scapi usque interitum persistant, & plerumque exesi vacuique reperiuntur; quum muribus sint in deliciis, qui sub his plantis tuta incolere domicilia consueverunt. Nihil hac Bromelia elegantius florente; cum

ob ipsum habitum suum, tum ob varios gratosque in diversis partibus colores. Post florum productionem ex ipsa radice stolonem vel caulem protrudit aphyllum, diametro sesquipollicari, rectaque horizontaliter pergentem; qui a planta matre congruenter remotus, ad angulum rectum erigitur, ibidemque hinc radices novas terræ immittens, illinc in folia expansus, novam plantam constituit. Ex his igitur stirpibus Jamaicenses sepes suas instruunt, quibus prata, agros, hortosque circumvallant, & quas bene firmatas transcendere aut superare nec homo valet, nec bos, nec equus. Possent etiam illæ tueri urbium munimenta contra hostium inopinatos impetus, haud secus atque in eundem finem utuntur Cacto Tuna insulæ sancti Eustachii incolæ.

Crescit in Jamaica & Carthagena.

I. TILLANDSIA (*lingulata*) foliis lanceolato-lingulatis, integerrimis, basi ventricosis. *Linn. syst. 259.*

(*Pl. americ. Pist. Tab. 92.* *Tota planta florens.* *Dein flos, & fructus.*)

VISCUM CARYOPHYLOIDES maximum, capitulis in summitate conglomeratis. *Sloan. hist. jam. I, p. 198, t. 120.*

Caraguata latifolia & clavata. *Plum. ic. 74.*

CAL. Perianthium monophyllum, basi obsolete trigona receptaculo circumnatum, supra idemque tripartitum, persistens: laciniis linear-lanceolatis, canaliculato-concavis, acutis, erectis, coloratis, corolla duplo brevioribus.

COR. Petalum unicum, tubulosum, erectum, semitrifidum: laciniis oblongis, obtusis, concavis, erectis.

STAM. Filamenta sex, tubo paulo longiora, eidemque per totam longitudinem adnata. Antheræ oblongæ, acutæ, incumbentes.

PIST. Germen oblongum, obtusum. Stylus filiformis, longitudine staminum. Stigma trifidum, obtusum.

PER. Capsula oblonga, acuta, obtuse trigona, nitida, trilocularis, trivalvis.

SEM plurima, minima, pappo capillari longissimo instructa.

Planta hæc arboribus vastis parasitica innascitur. Culmus foliosus, simplex, erectus, solitarius, apice flores fert conglomeratos. Folia radicalia sunt ex linear-lingulata, acuminata, nitida, integerrima, pedalia, nume-

rosa, basi concava pluviarum tempestate aquam plurimam asservantia. Flores lutei, inodori, tripollicares. Capsula fuscæ. Incolis dicitur *Ananas de Bois* seu *Bromelia sylvatica*. Loca umbrosa & humentia sylvarum vastarum incolit.

Crescit in Martinica.

2. TILLANDSIA (*tenuifolia*) foliis linearis-subulatis, integerrimis, imbricatis; spica simplice, laxa. Linn. syst. 259?

(Pl. americ. pict. Tab. 93. *Tota planta florens*).

Caraguata tenuifolia, paucioribus spicis. Plum. gen. IO? CAL. Perianthium monophyllum, basi obsolete trigona receptaculo circumnatum, supra idemque tripartitum, persistens: laciniis oblongis, obtusis, concavis, conniventibus, corollam stricte amplexantibus, eademque duplo brevioribus, coloratis.

COR. Petala tria, linearia, concava, obtusa, erecta, lateribus sibi invicem incumbentibus tubum longum cylindricum monophyllum mentientia, supra germen introrsum plicata in collum, apicibus planis reflexisque.

STAM. Filamenta sex, filiformia, receptaculo inserta, erecta, alterna breviora, apicibus declinata, longitudine corollæ. Antheræ oblongæ, incumbentes.

PIST. Germen ovatum. Stylus filiformis, erectus, paulo staminibus longior. Stigma trifidum: laciniis oblongis, obtusis, patentibus.

PER. Capsula oblonga, obsolete trigona, acuminata, nitidissima, unilocularis, trivalvis.

SEM. numerosa, minima, pappo capillari longissimo instructa.

Planta haud inelegans & magnitudine valde varia arborum ramis parasitica increscit, radicibus fibrosis affixa. Folia habet linearis-subulata, basi ventricosa & latescientia, integerrima, acuminata, canaliculata, imbricata, spiraliiter assurgentia, externe sine nitore virentia & notata lineis transversis albicantibus. Culmus saepius simplex, interdum etiam in duos tresve ramos divisus, spica laxissima terminatus, vestitur spathis monophyllis, vagis, concavis, oblongis, obtusis, stricte amplexantibus, rubentibus. Flores nitidi, inodori, distichi, toti coccinei, includantur inferne spathæ calyce breviori. Capsulæ sunt fuscæ.

Crescit Carthaginæ in arboribus & arboreculis senioribus; præsertim in Mimosis arboreis ad inundata maritima crescentibus satis frequens. Floret præcipus Junio & Julio.

TILLANDSIA (*polykachya*) scapo spicis imbricatis, lateralibus. *Linn. Syst. 260.*

CAL. Perianthium monophyllum, hinc planum, illino convexum, persistens. Tubus brevissimus, receptaculo circumnatus. Limbus erectus, longissimus, connivens, bifidus: lacinia exteriore lanceolato-oblonga, canaliculato-concava, acuminata; interiore oblonga, acuminata, postice lateribus conniventibus canaliculata, antice plana, superne bifida.

COR. Petala tria, linearia, canaliculato-concava, acuta, erecta, lateribus sibi invicem incumbentibus, calyce fere duplo longiora.

STAM. Filamenta sex, filiformia, erecta, receptaculo inferta, corollam superantia. Antheræ oblongæ, obtuse, incumbentes.

PIST. Germen ovatum, obsolete trigonum, abiens in Stylium filiformem, situ & longitudine staminum. Stigma tria, subrotunda, patentia.

PER. . . .

SEM. . . .

Planta parasitica rupibus fruticosis & arboribus innascitur. Culmus est foliosus, erectus, tripedalis. Folia sunt linearis-subulata, acuminata, integerrima, canaliculata, basi lata & ventricosa, numerosa, inferiora bipedalia. Spicæ laterales, circiter decem, pedales, coccineæ, alternæ in culmo. Spathæ coccineæ, superne imbricatae, totas spicas obtegentes. Flores sessiles, solitarii, inodori, corollis cæruleis. Fructum non contigit videre.

Habitat Havanæ in collibus rupestribus, alibique. Inveni florentem Januario.

Hujus generis vel præcedentis aliam speciem etiam Havanæ in fruticetis maritimis rupestribus parasiticam offendit, cuius flores ignoro. Est foliis linearis-subulatis, integerrimis, imbricatis, habitu foliorum Tillandsiæ tenuifoliæ, at nec maculatis, nec situ spiralibus. Culmus dividitur in spicam compositam compressam, cuius par-

tiales alternæ sunt circiter quinque; compresso-planæ, distichæ, erectæ; ex capsulis utrinque tribus vel quatuor suberectis & alternatim imbricatis. Hanc exhibet tabula 94.

I. TRADESCANTIA (*geniculata*) caule geniculato, basi repente. Linn. *syft* 260.

(Pl. A. P. Tab. 95. *Pars caulis cum flore*).

Ranunculus aut Damasonium repens, parnassiæ foliis villosis. Plum. ic. 116, f. 2.

Planta tenella; caulis herbaceis, teretibus, geniculatis, inferne repentibus, cæterum erectiusculis. Folia sunt cordata, acuminata, amplexicaulia, vaginantia, integerrima, alterna, hirsuta præcipue ad margines. Paniculæ dichotomæ, terminales & axillares, erectæ. Flores parvi, corollis albis, omnino charactere congeneris sui. In Plumieri iconে ultra justum pubescit planta, quod est iconibus suis vitium commune. Gaudet crescere inter Commelinas & Hapalanthos.

Habitat in Martinica ad s̄æpes umbrosas atque humidiusculas.

I. BURSERIA (*gummifera*). Linn. *syft* 281.

(Pl. americ. pict. Tab. 96. *Ramulus, flos, & fructus*). Terebinthus americana polyphylla. Comm. hort. I, p. 194, t. 77.

Terebinthus major, betulæ cortice, fructu triangulari.

Sloān. hist. jam. 2, p 88, t. 199. Catesb. car. I, p. 30, t. 30

Terebinthus foliis cordato-ovatis pinnatis, cortice levi rufescente, floribus masculinis spicatis. Brown. jam. I, p 345.

Betula arbor americana, seminibus lithospermi frumentacei æmulis. Pluk. alm 67, t. 151, f. I.

CAL Perianthium triphyllum: foliolis subrotundis, concavis, parvis, patulis, deciduis.

COR. Petala tria, ovata, acuminata, plana, pateutissima.

STAM. Filamenta sex, subulata, erecta, longitudine calycis. Antheræ oblongæ, erectæ.

PIST. Germen ovatum, obtuse trigonum, longitudine staminum. Stylus brevissimus. Stigma capitatum, obtusum.

PER. Capsula ovata, obtusa, obsolete triangularis, unilocularis, trivalvis: valvulis carnosis, succulentis.

SEM. unicum, cordato ovatum, compressum; circumdatum pellicula pulposa, hinc convexa, inde angulata.

Arbor hæc ramosa comosaque sæpius procera valde evadit. Trunco gaudet erecto & interdum altissimo; qui materiem continet albida cortice vestitam lævi, tenui, rufescente, & frustatim abscedente. Tota scatet succo aqueo, glutinoso, balsamico, copioso, odore terebinthinanum haud male referente, foras egresso in gummi insipifando. Folia habet quotannis decidua, pinnata cum impari, interdum ternata vel simplicia: foliolis ovatis, acutis, nitidis, integerrimis, petiolatis, sesquipollicaribus, ut plurimum utrinque tribus vel duobus. Flores exigui, inodori, petalis albicantibus, in racemis axillaribus variisque ordinantur. Fructus sunt virentes, purpurei, vel ex his misti, nunquam a me visi cærulei, quales in Catesbaei iconে depinguntur, præ cæteris partibus balsamo imprægnati. Semina interdum triquetra, nitida, coloris subcarnei. Seminum pellicula rubra. Vidi in Curaçao arbores floribus simul & fructibus ferme maturis onustas; in quibus calyx erat quinquepartitus, petala quinque, stamina octo, germen immersum receptaculo, stylus nullus, stigma subtrifidum. Arbores Carthagenaæ observavi, quæ in racemis longis flores modo dictis simillimos gerebant; sed hi abortabant constanter omnes, nec fructus mihi vestigium ullum exhibuerunt. Hisce intermixtae arbores crescebant aliæ, quibus omnes flores erant, quales in charactere descripsi, in racemis brevissimis, atque abibant in fructum pariter omnes. Estne igitur dicenda hæc arbor dicæca? an polygama? Neque istud censeo: erant enim hermaphroditæ flores illi, qui nefcio quem ob defectum ubique abortabant. Reperi itaque hexandram fertilem; octandram sterilem: hexandram puto fertilem & octandros flores steriles una gerentem. Decandros flores, quos vidisse se, asserit Browneus; & pentandros, quales postulat, præter requisita hic desiderata alia, apud Linnæum Pistacia; nunquam mihi, et si de industria quæsiverim utrosque, offendere licuit. Exigit igitur hæc arbor novum genus, cuiusmodi posuit quidem clarissimus Browneus, in Enumeratione etiam mea servatum, sed cuius nomen,

cum alia notissima arbuscula idem quum sit, ambiguitatis vitandæ gratia, admonitus mutavi; dixique Burseriam *) in memoriam Joachimi Burseri, viri ob peregrinationes suas rei herbariæ amore peractas omnibus Botanicis notissimi. Ferunt aliqui, radicem hujus arboris suppeditare corticem, qui Europæis sub Simarubæ nomine innotuit; negant alii; & adhuc sub judice lis versatur, quæm componere nec ego autopta potui, nec potuere alii. Quod autem certum est, in istis terris, quas ego adivi, etiamsi passim obvia arbor sit, cortex ille non colligitur; institutaque ibidem experimenta vim quidem probavere in ipso eandem, at multo debiliorem. Incolæ e putatis plantatisque ramis sepes construunt. Hispanis vocatur Almacigo seu Lentiscus. Anglis Birch-tree sive Betula, & Gallicis Gommier seu Gummifera.

Habitat in Cuba, Domingo, Jamaica, Curaçao, & Continente adjacente.

I. HILLIA (*parasitica*). *Linn. syst. 283.*

(Pl. americ. piæ Tab 97. *Caulis florens. Tum germen calyce coronatum*).

CAL. Perianthium hexaphyllum, germini insidens: foliolis oblongis, acutis, planis, erectis, fere longitudine germinis.

COR monopetala. Tubus cylindraceus, sexfalcatus, incurvus, apice parum ampliatus, omnium longissimus. Limbus sexfidus: laciniis lanceolato-oblongis, obtusis, planis, patentissimis, tubo triplo brevioribus.

STAM. Filamenta vix ulla. Antheræ sex, oblongæ, erectæ, in parte ampliata tubi, quo paulo breviores.

PIST. Germen oblongum, obsolete hexagonum, inferum. Stylus fitiformis, longitudine tubi. Stigma capitatum, obtusum.

PER. oblongum, compressiusculum, biloculare, . . .
SEM. numerosa, minima.

Planta hæc fruticosa arboribus & muris vetustis inhabitat. Caules teretes, glabri, basi procumbentes, cæ-

*) Nam planta, quam pro nova penitusque incognita nobis dedit Laeblingius hisp. pag. 194. sub Burseriae genere, est omnino Verbena lappulacea Linnaei. Quæ in re deceptum fuisse illum, nihil est, quod mirer, quum a congeneribus tantopere discrepet.

terum erecti, e quovis loco radices emittunt teretes & fibrosas. Folia sunt ovalia, utrinque acuminata, glabra, integerrima, petiolata, opposita, tripollaria. Flos terminalis, solitarius, semipedalis, & sessilis, calycem habet intra foliola floralia quædam absconditum, petaloque est ex albido flavescens. Maturum fructum non inveni, qui forte capsula fuisset futurus. Hanc plantam genere distinctam novamque nominavi in honorem Joannis Hill, viri operibus suis Botanicis clari.

Habitat in sylvis densis humidisque montis Calebastre in Martinica. Floret Aprili.

LORANTHUS.

CAL. Perianthium subduplex. Fructus monophyllum, parvum, persistens. Floris margo integer, exiguis, coronans germen.

COR. Petala sex, oblonga, plana, germini imposita, cæduca.

STAM. Filamenta sex, subulata, erecta, alterna breviora, adnata basibus petalorum. Antheræ oblongæ.

PIST. Germen oblongum, inter utrumque calycem. Stylus subulatus, erectus, longitudine staminum. Stigma simplex, obtusum.

PER. Bacca oblonga, obtusa, unilocularis.

SEM. unicum, apice glutine multo tectum, in quod, appendiculæ specie, futuræ rudimentum radicis penetrat.

I. LORANTHUS (*americanus*) cymis ramosis. *Linn. syst. 282.*

(*Pl. americ. pict. Tab. 98. Ramus florens.*)

Lonicera flore coccineo, baccis nigris. *Plum. ic. 166. fig. I, gen. I7.*

Planta fruticosa, ramosa, diffusa, fragilis, ramis altissimarum arborum præprimis *Coccolobæ* grandifoliæ innascitur radice visci in modum cortici arboris firmissime adhærente. Amputato autem prope truncum ramo etiam maximo, cuius summitati increscit, altero jam die tota flaccescit planta, breveque perit; indicio, ni fallor, evidenti, ex ipsis illam motis per vivam hanc arborem liquoribus nutrimentum suum haurire. Folia sunt subovata, crassa, coriacea, avenia, integra, nitida, petiolata, opposita, rarius alterna; plerumque præmorsa & disiformia ferme omnia; puto, quia in cacuminibus crescentem

altissimarum arborum, ventorum oportet violentiæ valde esse obnoxiam. Corymbi ramosi, inæquales, axillares & terminales: ramusculis ultimis sæpius trifloris. Flores numerosi, inodori, coccinei, elegantes, pedunculati, sesquipolligares, penduli; in quibus calyx fructus est concavus & ore inæquali; calyx floris margo inæqualis. Petala acuta & omnium longissima ultra medietatem corollam mentiuntur monopetalam tubulosam hexagonam incurvamque; superne patent in limbum subsecundum. Stamina corollam æquant, quibus antheræ obtusæ incumbunt. Linnæus in *Syst. nat.* pag. 988. hanc plantam confudit cum *Scurrula prima* Brownei & cum *Læflingiana* Stelide etiam prima; quæ, etiamsi ejusdem sint generis, specie a *Plumeriana* evidenter differunt; ut patebit conferenti descriptiones.

Habitat in sylvis montosis Martinicæ.

2. LORANTHUS (*spicatus*) spicis quadrangularibus. *Linn.*
syst. 282.

(*Pl. americ. pict. Tab. 99. Ramus florens & fructifer*).

Planta fruticosa, ramosa, parasitica arbuscularum, radici innitur, quæ mox bifariam divisa ambit ramulum, cui increscit, postea in unam rursus ita confluens, ac si divisa nunquam fuisset; tuncque fibrillis ubique emissis, trans ramum ad magnam persæpe longitudinem decurrit. Rami sunt lignosi, diffusi, & fragiles. Folia habet integrifolia, obtusa, glabra, coriacea, ad tactum pinguia, petiolata, opposita, notata venis adscendentibus atque a basi ortum communem ducentibus ferme omnibus; figura valde inconstanti ovata, ovalia, obovata, vel subrotunda. Spicæ, oblongæ, crassæ, tetragonæ, quadrisulcatæ, axillares, solitariæ, folia non superantes. Floret sunt exigui, inodori, rubri, plurimi, serie longitudinali quadruplici in spica profunde sessiles. In his calyx fructus dumtaxat est squamula ore inæquali. Petala semierecta basi corollam monopetalam mentiuntur, superne æquilater patentissima, longiora duplo staminibus. Germen parvum spicæ immergitur. Bacca ex ovato oblonga virescit cum apice rubro, gluten lacteum continente.

Habitat Carthaginæ passim in fruticetis & sylvis circa arcem sancti Lazari. Floret Aprili & Mayo.

3. LORANTHUS (*uniflorus*) racemis simplicissimis. *Linn.*
syst. 282.

(Pl. americ. piæt. Tab. 100. *Ramus cum flore & fructu.*)

Planta fruticosa & parasitica radicibus ramisque prædita est, quales descripsi in præcedente. Folia sunt subovalia obtusa cum exiguo acumine, integra, glaberrima, coriacea, notata venis lateralibus e medio nervo ortis, petiolata, opposita, sæpe lœsa & difformia. Racemi simplicissimi, axillares & terminales, solitarii; pedunculis partialibus unifloris. Flores parvi & inodori. Calyx fructus trifidus in laciniæ dividitur ovatas, concavas, acutæ, atque erectas. Petala purpurea, obtusa, & paten-tissima, longitudine sunt eadem, qua germen. Filamenta petalis duplo breviora sunt: quorum longiora tria al-terna plerumque antheris carent, sed harum loco gerunt corpusculum quoddam, antheræ simile quidem, sed de-color nullumque continens pollinem. Bacca cylindracea; utrinque depresso, cortice atro, pulpa glutinosa & laetea.

Habitat in sylvaticis & fruticosis Domingo. Floret Novembri & Decembri

4. LORANTHUS (*pedunculatus*) racemis simplicibus soli-tariis; floribus ternis, pedunculatis.

Planta fruticosa, parasitica. Radix, ut in spicato. Rami nitidi, longi, reclinati; in locis, quibus alios tan-gunt ramos, iisdemve prope adjacent, radiculas emittunt crassas teretesque. Folia habet cordato-ovata, integerri-ma, acumine brevi instructa, nitida, coriacea, petiola-ta, opposita, bipollicaria, venis a nervo medio ortis. Racemi axillares, foliis breviores, solitarii, simplices, flores circiter viginti & unum sustinent: pedunculo prin-cipali compresso-plano, latoque; partialibus trifloris; pro-priis unifloris. Flores inodori, parvi, calyce fructus gaudent ovato, concavo, integro: petalis albis, cæterum ut in præcedente. Filamenta sunt duplo petalis breviora, quorum tria alterna augmentur superne duabus appendiculis subrotundis. Antheræ sæpe omnino absunt, quarum tunc occupant loca corpora cuspidata erectaque: hinc flores in hac specie abortant frequentissime. Fructum maturum non vidi.

Habitat Carthaginæ in sylvaticis, præsertim ad inun-data maritima

5. LORANTHUS (*sessilis*) racemis simplicibus, solita-riis: floribus ternis, sessilibus.

Planta fruticosa & parasitica, habitu omnino præcedentis. At rami, ut in spicato. Folia ovata, & sesquipollucaria. Flores absque pedunculis propriis insident penduli partialis incrassato apici. Filamenta semper omnia antherifera. Baccæ e rubro sordide virent.

Habitat Carthagena in sylvis.

1. PANCRATIUM (*littorale*) spatha multiflora, scapo compresso, ancipiti; corollæ laciniis tubo duplo brevioribus, foliis ensiformibus.

(Pl. americ. pict. Tab. 101. Pars summa scapi florentis.
Dein pars folii).

Radix bulbosa, pugni magnitudine. Folia ensiformia, integerrima, acuta, nitida, patentia, saturate virentia, tres quatuorve pedes longa, vix sesquipollucem lata, ad basin imbricata & distiche mutuo amplectantia. Scapus bipedalis, valde compressus, hinc pollicem latus, anceps, nitidus, viridis, rore glauco tectus, axillaris, erectus vel interdum declinatus. Spatha circiter decemflora. Flores speciosi, patuli, sessiles in apice scapi, odorem spirant gratum & aromaticum. Corollæ tubus pallide viret; estque teres, tenuis, basi leviter ampliatus, octopollucaris. Limbus candidus in lacinias dividitur lineares, canaliculatas, integerrimas, patentissimas, tripollucares, apicibus magis minusve incrassatis & solidis. Nectarium est campanulatum, erose-emarginatum, corollæ laciniis triplo brevius, patens, candidum. Filamenta subulata, patula, viridia, nitentia, limbum corollæ non excedunt. Antheræ sunt aurantiæ.

Habitat copiose in littoribus arenosis maritimis insulæ Tierra Bomba prope Carthagena.

2. PANCRATIUM (*declinatum*) spatha multiflora; scapo compresso, ancipiti; corollæ laciniis tubum subexcedentibus; foliis lingulatis.

(Pl. americ pict. Tab. 102. Pars summa scapi florentis.
Et pars folii).

Folia lingulata, utrinque acuta, integerrima, nitida, erecta, tripedalia, tres quatuorve pollices lata. Scapus longitudine foliorum, valde compressus, anceps, sesquipollucem latus, viridis, totus semper a me observatus est in terram dejectus. Spatha circiter duodecimflora. Flores odorati, candidi, sessiles, fere semipedales, laciniis

tubum leviter superantibus, nectario pollicari; filamentis longitudine corollæ.

Hospitatur cultum in Martinicæ hortis, e Cayenna fortasse allatum.

I. AGAVE (*cubensis*) corollis hexapetalis; foliis ciliatis spinosis.

(Pl. americ. pict. Tab. 260, fig. 25. Stamen. Pistillum.
Flos totus. *Bulbillus ex panicula sobolifera*).

Nequametl. Marcgr. bras. l. 2, 16.

CAL. nullus.

COR. Petala sex, ovalia, obtusa, planiuscula, patulae germini insidentia; quorum tria exteriora paulo angustiora.

STAM. Filamenta sex, patula, petalis duplo breviora, inferiore media parte obovata compressa omniumque crassissima, desinentia in superiorem partem subulatam & acuminatam. Antheræ oblongæ, maximæ, versatiles.

PIST. Germen oblongum, obsolete triquetrum, leviter incurvum, longitudine fere corollæ, inferum. Stylos triquetrus, trisulcatus, erectus, baseos omnium crassissimæ angulis applanatis marginatisque, superne subulatus & tenuior, longitudine staminum. Stigma obtusum, obsolete trifidum.

PER. Capsula oblonga, trisulca, trilocularis, trivalvis.

SEM. plurima, angulata.

Planta elegantissima. Folia ensiformia, acuminata, ciliato-spinosa, crassa, erecta, pallide virentia, tres quartuorve pedes longa. Scapus erectus, quindecimpedalis, pulcherrimus, paniculatus. Flores numerosissimi, penduli, externe sordide albentes, interne virentes sordide odorem spirantes gratiorem Tagetis. Planta est vivipara, cuius novæ siboles mentiuntur bulbos, compositos ex squamis subrotundis integerrimis sibique mutuo incumbentibus, & plantulas producunt ubique ramulis paniculæ inhærentes. Foliis saponis loco in lotionibus utuntur incolæ, apud quos Maguei audit.

Habitat frequens in Cuba. Floret Novembri & Decembri.

I. PEPLIS (*tetrandra*) floribus monopetalis, tetrandris. Linn. syst. 283.

(Pl. americ. pict. Tab. 103. Tota plantula cum flore & fructu).

Ammannia hirta, foliis parvis orbiculatis, floribus singularibus ad alas. *Brown. jam. I*, p. 145.

CAL. Perianthium monophyllum, campanulatum, tubo inferne germini circumnato: limbo circiter ostofido; laciniis lanceolatis, concavis, acutis, erectis, persistentibus.

COR. monopetala. Tubus infundibuliformis, erectus, calyce longior. Limbus quadrifidus: laciniis semiovatis, acutis, planis, patentissimis.

STAM. Filamenta quatuor, omnium brevissima, in ipso fundo tubi corollæ. Antheræ simplices.

PIST. Germen subrotundum, compressum, depresso, tubo calycis adnatum. Stylus filiformis, erectus, tubo corollæ brevior. Stigmata duo, subulata, patentia.

PER. Capsula compressa, utrinque in latus producta, laciniis coronata calycinis, bilocularis, bivalvis.

SEM. plura, subrotunda.

Plantula tenella, annua. Radix fibrosa tubera distincta profert. Caules teretes, glabri, bipollicares, ramulis alternis rarisque austi, procumbunt. Folia sunt ovato-subcordata, obtusa, integrerrima, glabriuscula, petiolata, opposita. Petiolos utrinque connectunt stipule parvae & solitariae. Pedunculi uniflori, breves, solitarii, axillares & terminales. Florum corolla candida.

Habitat passim circa Havanam in foveis rupestribus maritimis. Florentem vidi Decembri.

TETRAGYNYA.

I. PETIVERIA (*octandra*) floribus octandris. *Linn.*
sys. 288.

(*Pl. americ. piæt. Tab. 104. Ramus florens.*)

Planta fruticosa, odoris alliacei; Petiveriae alliaceæ, nunc in hortis Botanicis satis vulgari, adeo similis, ut nihil, quod addam, habeam; si non, esse flores octandros omnes staminibus inæqualibus; & corpus penicilliforme, quod germini adsidet, in hac esse rubrum, in alia album.

Habitat frequens in Martinica, aliisque Caribæis. Floret fere integrum annum.

OCTANDRIA.

MONOGYNIA.

I. TRIGONIS (*tomentosa*).

CAL. Perianthium pentaphyllum: foliolis oblongis concavis, obtusis, erectis.

COR. Petala quinque, triangularia, basi acuminata, plana, erecta, interne hirsuta, longitudine calycis, apice villosa.

STAM. Filamenta octo, subulata, erecta, basi hirsuta, petalis duplo longiora. Antheræ oblongæ, incumbentes.

PIST. Germen ovatum, hirsutum, superum. Stylus nulus. Stigma simplex, obtusum.

PER. . . .

SEM. . . .

Arbuscula duodecimpedalis, erecta. Rami juniores & foliorum costæ leviter tomentosa. Folia pinnata, alterna, semipedalia: foliolis utrinque ut plurimum tribus sine impari, oblongis, basi attenuatis, emarginatis, serratis, facie glabris, dorso tomentosis, alternatim sitis; exterioribus majoribus, & saepe vel semipedalibus costaque longioribus. Racemi simplices, erecti, axillares, septemplicares; pedunculis propriis brevibus. Flores parvi, numerosi, petalis subflavescentibus. Fructus mihi deest anatome. Ob petala inversum triangulum isosceles formantia plantam hanc, quam putavi solo flore novum genus exigere, Trigonida appellavi.

Habitat in Domingo in syriaticis

I. OENOTHERA (*odtovalvis*) foliis lanceolato-oblongis, acuminatis, planis, glabris. Linn. syst. 296.

(Pl. americ. pict. Tab. 105. Caulis summus cum flore & fructu).

Oenothera assurgens glabra, foliis lanceolatis alternis integerrimis, floribus solitariis alaribus. Brown. jam I, p. 208.

Oenothera foliis persicariæ angustioribus, flore magno luteo. Plum. ic. 175, f. I.

CAL. Perianthium tetraphyllum: foliolis ovatis, acuminatis,

tis, planis, vix coloratis, patentibus, germini insiden-
tibus, tandem deciduis.

COR. Petala quatuor, obcordata, plana, emarginata, pa-
tentissima, calyce longiora.

STAM. Filamenta octo, fabulata, incurva, fere longitu-
dine styli. Antheræ ovales, incumbentes.

PIST. Germen cylindraceum, longum, octostriatum, in-
ferum. Stylus crassus, erectus, calyce duplo longior.
Stigma capitatum, magnum.

PER. Capsula cylindracea, longissima, octostriata, unilo-
cularis, octovalvis.

SEM. numerosa, angulata, minima, pappo destituta. Re-
ceptaculum columnare, tetragonum, liberum.

Videtur hæc planta cum Epilobiis conjungere Oeno-
theras; ita cum utrisque charactere convenit, pariterque
discrepat ab isdem.

Crescit in Caribæis plerisque.

I. GUAREA (*trichitoides*). Linn. syst. 298.

Jito. Pis. bras. p. 79.

CAL. Perianthium monophyllum, quadridentatum, mi-
nimum.

COR. Petala quatuor, oblonga, obtusa, plana, patentif-
sima.

Nectarium monophyllum, cylindricum, erectum,
longitudine corollæ, apice octocrenato.

STAM. Filamenta octo, brevissima, nectario sub crenis
inserta. Antheræ oblongæ, utrinque obtusæ, erectæ,
nectario pauxillo breviores.

PIST. Germen subrotundum. Stylus cylindricus, erectus,
longitudine nectarii. Stigma capitato-orbiculare, de-
pressum.

PER. subrotundum, obtusum, quadriloculare, . . .

SEM. solitaria, hinc conv. xa, inde angulata.

Arbor erecta, comosa, alta viginti quinque pedes.
Folia pinnata, alterna, nitida; costa pedali vel sesquipedali;
foliolis utrinque numero vario a septem ad quatuor-
decim, oblongis, obtusis, apice attenuatis, integerimis,
breviter petiolatis, oppositis. Racemi laxi, axillares,
semipedales; pedunculis communibus lateralibus brevi-
busque, infimis quadrisporis, proximis trisporis, subse-
quentibus bifloris, summis unifloris. Flores pedunculati

brevissime ipsi, inodori, brevi ferdentes, petalis e viridi albentibus, nectario albo, Melia Azedarach floribus (si numerum demas) perfecte similes. Fructum immaturum dumtaxat examinare licuit. Erat hic diametro jam semi-pollicari, cortice vestitus crasso ferdideque virenti, evidenter quadrilocularis & tetraspermus, utrum vero baccas evasurus an capsula, nendum indicans. Incolis appellatur *Guara*.

Crescit in sylvis montosis Cubæ. Florentem vidi Decembri & Januario.

COMBRETUM.

CAL. Perianthium monophyllum, subcampanulatum, quadridentatum, acutum, germini insidens, deciduum.

COR. Petala quatuor, ex incisuris calycis.

STAM. Filamenta octo, capillaria, corollam superantes Antheræ incumbentes.

PIST. Germen lineare, quadrisulcatum, inferum. Style capillaris, erectus, longitudine staminum. Stigma simplex, acutiusculum.

PER. Capsula linearis, abiens in alas membranaceas quatuor fere semicirculares magnasque, unilocularis, non dehiscens.

SEM. unicum, oblongum.

I. COMBRETUM (secundum) foliis oppositis; spicis secundis. Linn. *sys. 297.*

(Pl. A. P. Tab. 260, fig. 26. Flos. Fructus Folium.)

CAL. Perianthii colarati tubus ad ortum staminum viii conniventibus clauditur. Limbi laciniæ sunt semiovatae planæ, patulæ, tubo paulo breviores.

COR. Petala ovata, plana, acuminata, patula, laciniæ calycinis duplo breviora minoraque.

STAM. Filamenta longissima, patenti-erecta, orta in media parte tubi calycis. Antheræ oblongæ.

PER. Capsulæ alæ rigidæ.

SEM. teres.

Arbuscula duodecimpedalis, ramis teretibus & longissimis arboribus vicinis se sustentat, incubitque. Folia habet ex ovato oblonga, acuminata, integerrima, glabra, venosa, disticha, petiolata, opposita, quadripollucaria, in ramulis florentibus superiora minora. Spicula pinnata ex oppositis distichis numero incerto pluribus un-

que terminali, cum ipsa rami extremitate, ex qua oritur, horizontaliter protenditur: pedunculis propriis unifloris, omnium brevissimis, densissimeque positis. Flores numerosissimi, fere inodori, e viridi flavescentes toti, anthers dumtaxat rubris, omnes sursum vertuntur atque eriguntur; unde spiculorum filamenta confectam e filis vitreis cristam eleganter imitantur. Rami fracti, tritaque manu folia, odorem spirant foetidum & valde ingratum. Semina inveni plerumque erosa ab insectis. In hoc genere facile imponit incauto germen, ac si esset pedunculi pars; sed prævia pericarpii cognitio, atque in hac quidem specie majus calycis volumen periculum erroris tollunt.

Crescit Carthagena in arbustis & fruticetis. Floret Novembri. Semina collegi Martio & Aprili.

2. COMBRETUM (*laxum*) foliis oppositis; spicis laxis, simplicibus. *Linn. syst. 297.*

CAL. Perianthium levissime quadridentatum.

COR. Petala subrotunda, concava, obtusa, patentissima, calyce duplo breviora.

STAM. Filamenta longissima, patentia, orta in fundo tubi calycis. Antheræ subrotundæ, didymæ.

SEM. quadrisulcatum, rugosum.

Frutex ramis teretibus, scandentibus, junioribus brachiatis. Folia ovata, acuminata, interdum obtusa simpliciter vel cum acumine, integerrima, glabra, petiolata, opposita, tripollicaria. Spicæ laxæ, erectæ, tripollares, axillares & terminales; pedunculis propriis brevissimis. Flores exigui, albicans; quorum petala etsi ratione floris totius sint exigua, ad dentes tamen calycis sunt maxima. Planta, quam Aubletus in *Stirpium Guianensium historia* tab. 137. sub *Combreti laxi* titulo proponit, non est mea planta, quantumvis habitu eadem, sed flore nimiopere diversa. Aubletiana hæc cum Læflingiana conjungi, novamque constituere speciem debet.

Crescit in Domingo in fruticosis. Floret Decembri.

3. COMBRETUM (*decandrum*) foliis alternis; floribus decandris.

(*Pl. americ. pict. Tab. 260, fig. 27. Fructus.*)

CAL. Perianthium quinquesfidum: laciniis semiovatis, planis, tubo duplo brevioribus.

COR. Petala quinque, oblonga, obtusa, plana, patentissima, lacinis calycis duplo longiora.

STAM. Filamenta decem, inferne erecta, superne circinata. Antheræ oblongæ, didymæ.

PIST. Germen quinquesulcatum.

PER. Capsula alæ quinque, non rigidæ.

SEM. teres.

Frutex infirmus, ramosus, vicinis se sustentat, scanditque ad viginti pedum altitudinem. Rami lenti, longissimi, tenues, lignosi, subvimei. Aculei subulati, obtusi, leviter recurvi, semipollicares, rari, sparsi, precipue in ramis senioribus. Folia ex ovali oblonga, integrerrima, nitida, petiolata, alterna, duos tresve pollices longa, quotannis decidua, desinentia in acumen obtusum subcanaliculatum cartilagineumque. Spicæ laxæ & semipedales plus minus decem in pedunculo communis etiam semipedali locantur: cuiusmodi pedunculi sive spicæ compositæ numero inconstanti plures orientur ad extremitates ramorum, qui eodem simul tempore, spectaculo singulare, ultra flores elongantur ad sex sæpe pedes, aphylli debilesque. Pedunculi proprii sunt brevissimi. Flores numerosissimi parvique totas hinc albedine sua sepes insigniunt; prodeuntque ut plurimum ante folia. Fructus subfusci, volumine præcedentium forte melius hæc stirps novum distinctumque genus mereretur. Fructus (cum addita una quinta parte) summa similitudo fecit, ut cum Combretu univerim.

Crescit Carthaginæ in sepibus, sylvaticis, & fruticetis. Floret Majo & Junio. Fert fructum Julio & Augusto.

ELAPHRIUM.

CAL. Perianthium quadripartitum, deciduum: foliolis lanceolatis, acutis, erectis.

COR. Petala quatuor, ovata, plana, acuta, patula, calyce paulo longiora.

STAM. Filamenta octo, subulata, erecta, alterna longiora, calycem non superantia. Antheræ oblongæ, obtusa.

PIST. Germen subrotundum. Stylus brevis, erectus. Stigma bifidum, acutum.

PER. Capsula subglobosa, sulco longitudinali notata, glabra, unilocularis, bivalvis: valvulis coriaceis, crassis, succo balsamico scatentibus.

SEM. unicum, subrotundum, compressionis, osseum, margine superiori acuto, inferiori obtuso, basi & lateribus pulpa molli vestitum.

1. ELAPHRIUM (*tomentosum*) foliis tomentosis.

(Pl. americ. pict. Tab. 106. Ramulus florens, semen bacatum, & folium adultrum).

Arbor hæc inelegans viginti altitudinem pedum non raro excedit; totaque scatet succo odorato, balsamico, glutinoso, ad Burseriæ succi indolem multum accedente. Materiem præbet albam & levissimam; e qua insularum Bonayres & Arubæ incolæ Caribæi ephippia perficiunt, ex una eademque trunci parte elaborata solida; quibus audiis absque pulvinari, ovino dumtaxat vellere superposito; ad equitandum utuntur; unde Batavis dicitur Zadelhout, hoc est, Lignum ephippiorum. In ramos dispersi sunt crassos, paucos, longos, irregulares, saepe fulcratos. Folia habet pinnata, utrinque tomentosa, alata, quotannis decidua, ex apicibus ramulorum cum ipsis una floribus aut paulo post eosdem prodeuntia: foliolis utrinque quatuor cum impari, ovatis, obtusis, crenatis, venosis, vix pollicaribus. Racemi simplices, pollicem vel sesquipollicem longi, ex apicibus ramulorum cum ipsis una floribus aut paulo post eosdem prodeuntia: foliolis utrinque quatuor cum impari, ovatis, obtusis, crenatis, venosis, vix pollicaribus. Racemi simplices, pollicem vel sesquipollicem longi, plures in ramuscilorum extremitatibus enascuntur. Flores sunt exigui, calycibus albidis, corollis subflavescensibus. Ex his plurimi germinant minimum receptaculoque immersum, cum stigmate duplice & obtuso, stylo intermediante nullo: quos abortare observavi. Fructus pisiformis magnitudine virescunt; quorum ruptæ valvulae guttatum balsamum exstiliunt. Semen in parte nuda nigrescit, in testa albicat. Pulpa vero ipsa, qua firmiter circumdatur, est coccinea, a capsulaque caducis valvalis protum libera. A ligni levitate (ελαφρία) novo huic generi nomen imposui.

Crescit in Curaçao vicinisque insulis; locis saxosis vel glareosis. Floret Julio & Augusto.

2. ELAPHRIUM (*glabrum*) foliis glaberrimis.

(Pl. A. P. Tab. 260, fig. 28. Folium.)

Arbuscula habitu præcedentis; at ramosa magis, neque a me visa tam alte excrescere. Folia pinnata, alata, glaberrima: foliolis lanceolato-ovatis, crenatis inæquilater. Flores & fructus iidem.

Carthagena crescit in fruticosis maritimis proxime suburbium Xiximani. Floret Julio & Augusto. Fructum dat maturum Novembri.

I. XIMENIA (americana) foliis oblongis, pedunculis multifloris. *Linn. syst. 299.*

(*Pl. americ. pict. Tab. 107. Ramus florens & fructescens*). **Ximenia aculeata**, flore villoso, fructu luteo. *Plum. gen. 6, ic. 261, f. I.*

CAL. Perianthium monophyllum, minimum, campanulatum, semiquadrifidum, acuminatum, persistens.

COR. Petala quatuor, oblonga, plana, acuta, magna, interne (basi & apice exceptis) pilis numerosis rectis obtusa, inferne erecta tubumque formantia, superne revoluta.

STAM. Filamenta octo, filiformia, erecta, germine paulo breviora. Antheræ lineares, obtusæ, erectæ, longitudine corollæ.

PIST. Germen ovato-oblongum, obtusum, petalis duplo brevius. Stylus filiformis, erectus, longitudine staminum. Stigma simplex, obtusum.

PER. Drupa subovata, magna.

SEM. Nux subrotunda, magna. Nucleus ejusdem figura.

Arbuscula hæc erecta ramosaque quindecim vulgo pendulum altitudinem adipiscitur. Folia habet ovato-oblonga, integerrima, emarginata, glabra, petiolata, bipinnicaria, tria quatuorve simul orta ex tuberculis alternantibus armatisque ad latus spina subulata quadrilineari forte, non raro tamen vel in toto quodam ramo principali absente. Pedunculi foliis breviores, numero inconstanti bini terni quaternive ex eodem cum illis tuberculo prodeunt, racemosi, & plus minus quinqueflori. Flores albidi prædicti sunt odore suavissimo lateque per viciniam se diffundente, in quo mihi sum visus animadvertere aliquid thuris accentu. Fructus sunt lutei, nitidi, ovi magnitudine columbinæ vestiti cortice tenuiori; continent pulpam paucam, sub-acido-dulcem, luteam, barbaris puerisque comedam. Nux glabriuscula est, & sordide albicat. Nucleus figura sua haud male refert nucem myristicam, substantia est eandi.

dæ ad gustumque gratae, at ignoro, utrum edulis. Apud Domingenses nomen *Croc* sive *Dentis* adunci ob spiras fortasse suas obtinuit. Perperam Plumierus, numeri partium negligens observator, in iconibus suis corollam delineavit tripetalam, quam perpetuo tetrapetalam inveni. Brownei *Amyris* tertia hujus esse species videtur, pedunculis unifloris distinguenda.

Crescit Carthagenaæ passim in sylvula Bosque; & in Domingo. Florentem vidi Septembri & Octobri. Collegi fructus Decembri.

AMYRIS.

CAL. Perianthium monophyllum, parvum, campanulatum, erectum, semiquadrifidum, acutum, persistens.

COR. Petala quatuor, subrotunda, concava, obtusa, patentissima, caduca.

STAM. Filamenta octo, subulata, erecta. Antheræ oblongæ, erectæ, fere longitudine corollæ.

PIST. Germen ovatum. Stylus crassiusculus, erectus, longitude staminum. Stigma capitato-obtusum.

PER. Drupa subrotunda.

SEM. Nux globosa, nitida. Nucleus ejusdem figuræ.

1. AMYRIS (*sylvatica*) foliis ternatis, crenatis, acutis. Linn. syst. 298.

(Pl. americ. pict. Tab. 108. *Ramus florens*).

Frutex trifolius resinofus, floribus tetrapetalis albis rameos. Catesb. car. 2, p. 33, t. 33.

Frutex erectus, foliosus, parum ramosus, varie a bipedali ad quindecimpedalem altitudinem pro loci sole varietate increscit. Totus abundat succo terebinthino, odoris fortis & ingratii. Ramusculi teretes ad extremitatem fere usque foliis ornantur, quæ sunt ternata, nitida: foliolis crenulatis, acutis, bipinnatis; ovatis, lanceolatis, cordato-ovatis, vel rhombeis. Racemi paniculati, erecti, terminales & axillares, flores sustinent plurimos, exiguos, petalis niveis. Drupa magnitudine pisiformis cum succo rubro, persistens exsiccatur & veluti in pericarpium mutatur coriaceum. Resina Elemi huic fructi ortum nullatenus debet; quæ conjectura est erronea.

Crescit copiose Carthagenaæ in sylvis umbrosis maritimis. Floret Augusto.

2. AMYRIS (*maritima*) foliis ternatis, crenulatis, obtusis. Linn. syst. 298.

Frutex nanus, ramosus, succo scatet hand priori
absimili, sed gratori & rutæ quiddam spirante. Folia
sunt ternata & nitida: foliolis ovatis, crenulatis, obtusis,
vix pollicaribus. Racemi, quales in praecedente. Fructus
duplo maiores, nigri, succo purpureo. Utrum dicta di-
scrimina soli induxerit varietas, ignoro: at Havanæ istius-
modi semper omnes inveni.

Crescit Havanæ in rupestribus maritimis.

I. MELICOCCUS (*bijugatus*). Linn. syst 298.

(Pl. americ. pict. Tab. 109. *Ramulus fructifer. Dein fru-*
ctus cum pericarpio transversim secto & semine baccato
integro. Semen. Flos in naturali magnitudine, idem-
que auctus).

Melicoccus foliis ut plurimum bijugatis ovatis, per pen-
nas alatas dispositis Brown. jam. I, p. 210.

Nux americana, foliis alatis bifidis. Comm. hort. I, p.
183, t. 94.

Nux americana, costa foliorum appendiculis aucta. Plnk
alm. 265, t. 207, f. 4.

CAL. Perianthium tetraphyllum, persistens: foliolis ova-
tis, obtusis, concavis, patentibus.

COR. Petala quatuor, oblonga, concava, obtusa, inter
foliola calycis tota reflexa.

STAM. Filamenta octo, subulata, erecta, brevissima, in
centro disci glandulosi plani circumstantia germini. An-
theræ oblongæ, obtuse, erectæ.

PIST. Germen ovatum, leviter compressum, longitudine
fere corollæ. Stylus brevissimus. Stigma subpeltatum,
magnum, umbilicatum, utrinque in latus productum,
obliquum.

PER. Drupa subrotunda, glabriuscula, magna, corticosa,
stylo obtuse acuminata.

SEM. Nux subrotunda, coriacea, glabriuscula, magna.
Nucleus ejusdem figuræ.

Arbor hæc est procera, comosa, ramosa, atque ele-
gans. Folia habet bijugata, nitida, alterna: costis com-
presso-planis, nunc alatis, nunc nudis: foliolis subovatis,
obtusiusculis, integerrimis, brevissime petiolatis, interio-
ribus alternis, exterioribus una terminalibus & majori-
bus. Racemi simplices, vel in paucos ramos divisi, &
terminales continent flores parvos & numerosos petalis

albanticibus. Varietas in his quoad odorem obtinet; dantur enim arbores, quarum flores omnes odorem spirant eminus gratissimum, & quas masculas vocant Curaçavientes, fructumque proferre, vulgo negant. Alias vero, in quibus omni flores destituuntur odore, fæminas nuncupant, easque fructiferas solas perhibent. Utriusque ego examinavi flores; nec vel minimum in partibus discrimen detxi; ulterius autem investigandi defuit mihi occasio, quandoquidem in eodem loco mora tanta haud fuerit, ut in examinatis arboribus florigeris potuerim fructus exspectare: maneat igitur penes incolas fides. Fructus subrotundi & diametro circiter pollicari, in quovis racemo tringinta fere succedunt. His cortex est viridis, glabriuscus, siccior, duos unguis crassus, interne nitidus & a pulpa liberrimus; quæ exempta, colore, magnitudine, figura, & consistentia vitellum refert ovi gallinæ minoris; estque glutinosa, edulis, sapore dulci cum acidulo atque austriusculo mistis. Incolæ fructus inter dentes prehensi corticem levi morsu in duo transversim dissilire hemisphæria cogunt: atque abjecto superiori, ex altero pulpam, corticis fundo leviter adhaerentem, una cum nuce contenta dentibus extrahunt. Hæc expulitur; illa suctione diffuit. Pro fructus maturitate perfectiore magis minusve glutinosa est pulpa; ita tamen ut etiam ex maturissimo fructu semper remaneat in ore mucus aliquis, qui dissolvi saliva nequeat. Nuces castanearum in modum igne assantur & comeduntur apud Curaçavientes. In fructibus majoribus interdum duæ vel tres nuces continentur, singulæ pulpa sua involutæ; at tunc pro numero situque figuram mutantates. Hispanis appellantur fructus Monnos, Batavis Knuppen.

Crescit Carthagenaæ sylvestris; culta in hortis Curaçavientibus vulgaris, in Jamaicensibus rara.

I, DODONAEA (*viseisa*). Linn. syst. 299.

Aceri vel paliuro affinis angusto oblongo salicis folio, flore tetrapetalo herbaceo. Sloan. hist. jam. 2, p. 27, t. 162, f. 3.

Triopteris erecta fruticosa, foliis oblongis acuminatis, ramulis gracilibus. Brown. jam. I, p. 19, t. 18, f. 1.

Triopteris Jamaicensis, angusto salicis folio, fructu minore fusco. Pluk. alm. 377, t. 447, f. 5.

Staphylocarpus foliis lauri angustis. *Plum. spec. 18,* n.
247, f. 2.

Frutex innominatus primus. *Marcgr. bras. l. 2,* c. 13.
Thlaspidioides arborescens, fructu racemoso. *Barrer
aequin.* 109.

CAL. Perianthium tetraphyllum, deciduum: foliolis ova-
tis, concavis, obtusis, patentibus, latitudine inæqua-
libus.

COR. nulla.

STAM. Filamenta octo, omnium brevissima. Antheræ ob-
longæ, acutæ, utrinque longitudinaliter sulcatæ, ar-
cuatæ, hinc connientes, longitudine calycis.

PIST. Germen triquetrum, longitudine calycis. Stylus
crassus, longissimus, obsolete trisulcatus, erectus. Stig-
ma obsolete trifidum, acutiusculum.

PER. Capsula trisulcata, inflata, aucta tribus alis subro-
tundis membranaceis & magnis, trilocularis.

SEM. in quolibet loculamento bina, subrotunda, affixa sul-
cis profundis dissepimenti ovalis utrinque acuminati &
trifulci.

Frutex hic erectus, ramosus, quinquepedalis, totus
viscosus est & foetidus. Rami juniores sunt angulati. Fo-
lia habet oblonga, cum acumine obtususcula, basi atte-
nuata, integerrima, alterna, petiolo vix ullo; in plan-
ta tenella quæ primis mensibus prodeunt, plerumque re-
panda vel serrata. Flores racemosi in iisdem saepe ramu-
lis valde variant. Sic calycem frequenter inveni triphyllum,
interdum etiam pentaphyllum. Eg. tetraphyllum
assumpsi; cum quod occurrat hujusmodi calyx frequentius;
tum quod observabam, in triphylio majuscum semper
foliolum aliquod, exaratum sulco longitudinali, tetraphyllum
originem veluti indicare. Pentaphylli vero, ut in-
frequentis, rationem nullam habui. In quoconque calyx
non raro una tertia parte caret pistillum; unde Sloaneus
in icona sua sat conveniente capsulas biloculares, nec tri-
loculares, omnes exhibuit. Neque fit hoc eo, quod ob-
solescat germinis quædam ala vel loculamentum; nam vel
minimum tunc germen est subrotundo-compressum cum
stylo bifucato. Stamina interdum sunt septem, rarissime
sex. Semen alterum crebro abortat, interdum utrum-
que; at remanent eorumdem emarginata rudimenta, nume-

ri nativī vera indicia. Icon Browneana varietatem vide-
tur repræsentare. Cæterum mire hanc plantam confude-
runt Botanici. Haud enim recte suspicatus est clarissimus
Linnæus in suis Speciebus, Sloanei plantam esse triopte-
rygem suam. Browneum erravisse inversa ratione, patet.
Triopterygem veram in Martinica examinavi sèpius, quam
perfecte cum dato a Linnæo charactere congruere cognovi.
Sunt itaque ab invicem hæ plantæ diversissimæ. Ma-
cula illa alba, cuius apud Marcgravium fit mentio, in
semine a me nunq[ue] am observata fuit. An obvium forte
Cardiospermi semen Lætio imposuit? Ego hanc plantam,
a Ptelea mihi visam distinctissimam, ad antiquum Dodo-
næ genus reduxi. Sæpissime in caldario ex semine nata
flores nunquam produxit, sed altero anno periit semper.

Crescit in Jamaicæ & territorii Carthagenaensis littori-
bus arenosis maritimis.

TRIGYNIA.

I. PAULINIA (*triternata*) foliis triternatis; petiolis mar-
ginatis. *Linn. syst. 314.*

(Pl. americ. pict. Tab. 260, fig. 29. *Folium.*)

CAL. Perianthium pentaphyllum: foliolis oblongo-ovatis,
concavis, obtusis, coloratis, patentibus; quorum duo
exteriora opposita; interiorum trium unum paulo latius
requis omnibus oppositumque duobus aliis sibi mutuo
parum incumbentibus.

COR. Petala quatuor, obverse ovata, obtusa, concava,
basi in unguem abeuntia, patentia, calyce paulo lon-
giora: quorum duo cum calycis folioli latiori alternan-
tia ad invicem magis approximantur; altera duo, folio-
rum calycis incumbentium latus cludentia, magis hinc
ab invicem distant.

Nectaria duo; quorum alterum constat ex foliolis
quatuor oblongis, concavis, coloratis, erectis, fere
petalorum longitudine, eorundemque basibus insertis,
superne attenuatis in collum; quod abit in apicem pla-
num & latescentem in triangulum obtuse dentatum,
interne vero demittit laciniam linearem planam villo-
sam truncatamque. Alterum componitur ex corpuscu-
lis quatuor, glandulosis, subrotundis, obtusis, planis,

parvis, decoloribus, sitis inter petala & stamina, ad basin cujusque petali unico.

STAM. Filamenta octo, subulata, villosa, erecta, petalis haud longiora, posita ad basin duorum foliolorum calycis mutuo incumbentium in loco a nectariis petalisque relitto vacuo, receptaculo germinis proprio inserta. Antheræ ovales, incumbentes.

PIST. Germina tria, subrotunda, parva, a staminibus cincta, imposita receptaculo proprio villoso. Styli tres, filiformes, eretti, staminibus duplo breviores. Stigmata simplicia, obtusa.

PER. & SEM.

Planta fruticosa arboreo scandit ad viginti pedes. Rami sunt teretes, glabri, sulcati, longi, flexiles. Folia habet tricornata, nitida, alterna, numerosa: costis nudis, canaliculatis: foliolis acutis, sessilibus, supramedium inæqualiter ferrato dentatis; lateralibus subrotundis; extimo duplo majori, basi maxime attenuato: petiolis cujusque folii ternati propriis alatis. Racemi axillares, quatuor pollices longi, flores circiter quinquaginta sustinent; ad bipolligarem vero usque longitudinem nudi sunt, ubi trifariam dispescuntur, emissis scilicet cirrhis duobus bipolligaribus glabris planisque. Pedunculi communes bilineares & alterni flores & ipsos brevissime pedunculatos plerumque quatuor emitunt. Flores parvi sunt; in quibus calyx sordide albescit; petala albican; nectarii primi foliorum alborum apices flavescunt, primoque intuitu stama mentiuntur. Fructum non vidi.

Crescit in sylvaticis Domingo.

COCCOLOBA.

CAL. Perianthium monophyllum, profunde quinquefidum, coloratum, persistens: laciniis ovato-oblongis, obtusis, concavis, patentissimis.

COR. nulla.

STAM. Filamenta octo, subulata, patula, calycem non superantia. Antheræ subrotundæ, didymæ.

PIST. Germen ovatum, triquetrum. Styli tres, brevissimi, filiformes, patentes. Stigmata simplicia.

PER. nullum. Calyx incrassatus, semini ad basin accretus, succulentus factus, drupam magis minusve referens, semen integre vel paucim involvit.

SEM. Nux ovata, acuta, unilocularis. Nucleus basi lobatus

I. COCCOLOBA (*Uvifera*) foliis cordato-subrotundis, integerrimis, nitidis; racemis fructuum cernuis. Linn. syst. 313.

(Pl. americ. pict. Tab. 110. *Ramulus fructifer. Semen. Nucleus*).

Coccolobis foliis crassis orbiculatis, sinu aperto. Brown. jam. 1, p. 209.

Uvifera littorea, foliis amplioribus fere orbiculatis, crassis, americana. Pluk. alm. 394, t. 236, f 7.

Prunus maritima racemosa, folio rotundo glabro, fructu minore purpureo. Sloan. hist. jam. 2, p. 129, t. 220. Catesb. car. 2, p. 96, t. 96.

Guajabara racemosa, foliis coriaceis, subrotundis. Plum. ic. 145.

Arbor procera, diffusa, ramosa, inordinata, habitu inelegans, sed foliis suis fructibusque speciosam se reddit. Rami sunt vasti, saepe fulcrati. Cortex cinereus, tenuis, in arboribus junioribus glaber est, in senioribus rimosus. Materies dura, ponderosa, rubra, costa aquam rubedine tingit, hinc forte tinturis idonea; cæterum textura fibrosa sua ad opera alia vix utilis esse potest, & ad focum instruendum fere unice adhibetur. Folia sunt subrotunda, basi cordata, integerrima, in obtusum breyeque acumen abeuntia, nitidissima, coriacea, crassa, magna, alterna, saturate virentia, nervo medio indeque ortis venis magis minusve coccineis; petiolis brevibus, basique vaginantibus. Racemi simplices, teretes, crassi, erecti, terminales, solitarii, longissimi, in fructibus penduli: pedunculis propriis unifloris, numerosis, brevibusque. Flores parvi, albicanentes, odorem spirant florum Cerasi. Stylus nunc unicus est, nunc profunde trilaciniatus, nunc vere triplex: idemque in aliis obtainere speciebus, observavi. Filamentorum basis latescens saepius levissime connascitur. Fructus succedunt purpurei, roscidi, subrotundi vel obverse ovati, magnitudine cerasi mediocris, apice leviter umbilicati ex calycis laciniarum vestigiis; cortice vestiti tenuissimo; pulpam continentis purpuream, mollem, acidо-dulcem, edulem, nec ingratam: carpti vero ex arbo-re, post unum alterumve diem odorem contrahunt fasti-

dum atque ingratum, sapore interim non mutato. *Nus*
est semitrilocularis. Nucleus trilobus est, lobis cordatis.
Post fœcundationem elongari incipit receptaculum, pro-
trudereque lacinias calycis tunc conniventes atque incrassatas; quæ ita simul, mutandum in nucem germen, totum
quantum denique involvunt, & drupæ faciem adipiscuntur.
Hinc immaturi fructus in principio sunt oblongi, tanto
que rotundiores evadunt, quo properant magis ad matu-
ritatis statum. Perfecta hæc dignoscitur, quando ad tactum
motumve levissimum sponte decidunt. In quibusdam re-
gionibus in mensis apponuntur, veneuntque in foris po-
mariis. Foliis fronti intra pileum applicatis procurata
sibi refrigerium in solis æstu solent nonnulli. Fertur haec
arbor plures a mari passus transplantata, ut ab illius (quod
ajunt) conspectu sit remota, flores producere rarissime,
fructus nunquam. Quandoque mihi contigit simili satam
loco conspicere, in qua nec florem nec fructum vidi.
Hispanis dicitur Uvero seu Uvifera, Gallis *Raisinier du*
bord be la mer, id est, *Uvifera littoralis maritima*. In
caldario, etiam si latissime & copiose jam a triginta annis
crescat, nullum florem hic usque protulit.

Crescit in Caribæarum & vicinæ Continentis littori-
bus arenosis maritimis passim, inque ipsis saepe alluentibus
undis.

2. COCCOLOBA (*leoganensis*) foliis subrotundis, integer-
rimis, nitidis, racemis fructuum erectis.

(Pl. americ. pict. Tab. 260, fig. 30. *Folium*).

Arbuscula erecta, ramosa, decempedalis. Folia ve-
nosa, coriacea, figura præcedentium, at duplo minora.
Ex habitu & racemis emarcidis huc retuli; flores enim fru-
ctusque non examinavi. Sed offerunt congeneres hæ stir-
pes in habitu singulare & proprium aliquid, quo facile
dignoscuntur.

Crescit in fraticetis maritimis ad Portum Principis &
Leogane in Domingo.

3. COCCOLOBA (*pubescens*) foliis orbiculatis, pubesce-
tibus. Linn. syst. 314.

Arbor inelegans, erecta, sexaginta vel octoginta pe-
dum altitudine. Coma saepe componitur e duobus tribus
ve dumtaxat ramis crassis, parum subdivisis, & inordina-
tis. Truncus inæqualis, altitudine interdum quadraginta

pedum, unum alterumve circa medium ramum emittit. Cortex est subfuscus, & tandem lacer. Materies saturata rubra, ponderosa, durissima, in fragmenta facile dissiliens, & fere incorruptibilis, adhibetur ad conficiendos palos, sublicas, trabesque: per saecula enim incorrupta perstat; & tandem in lapidem permutari fertur durissimum ista illius pars, quæ sub terra recondita fuit. Folia sunt subrotunda, basi cordata, integerrima, venosissima, valde rugosa, sepe hirsutissima, interdum glabriuscula, alterna, pauca, diametro bipedali; petiolo brevi vaginanteque ad basim. Neque hujus flores nec fructus vidi. Drupas edules ferre mihi dicta fuit. Incolis vocatur *Bois à grandes feuilles*, sive arbor grandifolia. Transmissa a me ante sexennium arbuscula nunc viget Viennæ in horto Cæsareo elegantissima, foliis ornata pluribus, jam virginipedalis, quam in solo natali longe speciosior, ejusdemque horti verum ornamentum.

Crescit passim in sylvis densis montosis Martinicæ.

4. COCCOLOBA (*obtusifolia*) foliis oblongis, obtusissimis. (Pl. americ. pict. Tab. III. Ramus fructifer.)

Arbuscula ramosissima, inordinata, duodecimpedalis; ramis glabris & cinereis. Folia sunt oblonga, obtusa, integerrima, nitida, coriacea, venosa, apice ut plurimum leviter latescentia, plana, alterna, petiolata, numerosa. Racemi simplices, terminales, solitarii, in ramulis junioribus alternis & distichis. Flores parvi, albi. Calycis foliola increscant, incrassantur, succulenta evadunt, arteque amplectuntur nucem atram nitidam apiceque saepius nudam; distincta autem permanent, nec conascuntur in drupam. Unde Polygono haec species valde videtur affinis. Fructus sapore sunt adstringenti.

Crescit Carthaginæ in fruticosis & sylvaticis. Floret Augusto.

5. COCCOLOBA (*flavescens*) foliis lanceolato-oblongis, obtusis, mucronatis.

(Pl. americ. pict. Tab. II. Ramus fructifer).

Arbuscula duodecimpedalis, ramosa. Folia ex lanceolato oblonga, obtusa cum acumine, integerrima, coriacea, nitida, subrigida, fere avenia, e flavo virentia, petiolata, alterna, numerosa. Racemi simplices, terminales, erecti. Drupæ subrotundæ, atropurpureæ, pisi-

majoris magnitudine, apice a concretis calycis foliolis notato sulcis; pulpa rubicunda; sapore dulci; edules; at vix in usu.

Crescit in fruticetis ad Portum Principis in Domingo.

6. COCCOLOBA (*diversifolia*) foliis ramuscularum ovatis; ramorum ovato-cordatis.

(Pl. A. P. Tab. II3. *Ramus fructescens*).

Arbuscula decempedalis, ramosa. Folia subcoriacea, integerrima, attenuata in apicem obtusum, nitida, venosa, leviter rugosa, magnitudine varia, petiolata, alterna, numerosa; in ramis cordata, in ramusculis ovata. Racemi terminales, simplices, solitarii, erecti, triplicares. Drupæ subrotundæ, apice a concretis perianthii foliolis umbilicato sulcatoque, magnitudine cerasi minoris; pellicula corticali nigricante; pulpa molli, pulchre purpurea, sapore fere ut in *Uvifera* at *austeriusculo*, pueris barbarisque comestæ.

Crescit in Domingo ad vias in declivibus fruticos montium.

7. COCCOLOBA (*punctata*) foliis lanceolato-ovatis. Linn. syst. 314.

(Pl. americ. pict. Tab. II4. *Ramus fructifer*.)

Coccolobis feliis oblongo-ovatis, venosis; uvis minoribus, punctatis. Brown. jam. 3, p. 210.

Uvifera arbor americana, fructu aromatico punctato.

Plukn. alm. 394, t. 237, f. 4.

Arbuscula erecta, ramosa, quindecimpedalis. Folia ex ovali oblonga, acuminata, integerrima, plana, subcoriacea, venosa, nitida, alterna, semipedalia, in qualibet ramusculo florigerò plerumque duo vel tria; petiolis basi vaginantibus. Racemi terminales, simplices, solitarii, erecti, vix sesquipollicares. Flores albi. In hac specie receptaculum ferme totum, contribuente ad id exigua dumtaxat calycis parte, abit in drupam subrotundam, atrorubentem, & austero-dulcem; ita ut calycis pars superstes fructum coronet, fere immutata.

Crescit Carthagena in fruticetis.

8. COCCOLOBA (*excoriata*) foliis ovatis; ramis quasi excoriatis. Linn. syst. 314.

(Pl. americ. pict. Tab. II5. *Ramus cum flore & fructu*).

Arbor vigintipedalis, ramosa, comosa, erecta. Folia ovato-oblonga, integerrima, acuta, nitida, rugosa, venosa, petiolata, alterna, semipedalia. Racemi terminales, solitarii, simplices, sursum versi. Flores exigui, flavescentes. Calyx concrescit; evadit crassus, succulentus, & niveus; ad medietatem solummodo tegit nucem triquetram, atram, nitidam, superne nudam. Fructus sapore sunt dulci & grato, unaque ipsis cum seminibus comeduntur. Gallis audit Raisinier de conde.

Crescit in Domingo & Martinica ad torrentes & rivulos; in insula sancti Eustachii culta.

ENNEANDRIA.

MONOGYNIA.

I. CASSYTHA (*filiformis*) filiformis, laxa. Linn.
syst. 318.

(Pl. americ. pict. Tab 116. *Ramuli florentes & fructiferi.*
Fructus cum pulpa dissecta. Semen).

Cuscuta baccifera Barbadensium a maritimis. Pluk. alm.
126, t. 172, f. 2.

Cuscuta altera seu major. Petiv. gaz. 77, t. 49, f. 12.

Cuscuta. Rumph. 5. pag. tab. & fig. ultimis.

CAL. Perianthium triphyllum, parvum, persistens: foliolis semiovatis, concavis, acutis, erectis.

COR. Petala tria, subrotunda, acuta, concava, patula, persistentia.

Nectarium constat tuberculis tribus, oblongis, truncatis, erectis, coloratis, fere longitudine germinis, cui circumstant in alterno cum filamentis ordinis interioris situ.

STAM. Filamenta novem, compressa, erecta, obtusa, tria in ordine interiori, sex in exteriori Horum tria alterna a tergo interiorum posita paulo reliquis sunt latiora. Antheræ adnascuntur parietibus internis filamentorum proxime apicem.

Glandulæ duæ, globosæ, nectario concolores, filamento cuilibet ordinis interioris ad latera prope basin affiguntur.

PIST. Germen ovatum, intra corollam calycemque. Stylus erectus, crassulus, fere longitudine staminum. Stigma obtusum, obsolete trifidum.

PER. nullum. Receptaculum incretum in Drupam depresso-globosam, calyce corollaque conniventibus coronatam, umbilico perforatam, molle, magnam.

SEM. Nux globosa, staminibus persistentibus & conniventibus acuminata, intra receptaculum, a quo libera, unilocularis, non dehiscens. Nucleus globosus.

Planta aphylla, diffusa, volubilis, nitida, filamentosa, parasitica fruticum; e seminibus mecum ex America translatis, terraeque in caldariis Viennensibus mandatis, optime germinavit; initio filamentosum simplicemque caulinum recta e terra sursum propellendo, dein in ramos abeundo. Hi primo, cui obviant, frutici accrescunt; neque tunc terra diutius egent, qua nutriantur. Verrucas enim emittunt situ longitudinali plures, pedibus erucarum omnino similes, quibus adeo adhaerent tenaciter, ut, si a foliis abstrahere quis illos velit, haec dilaceret, non avel lat. Etenim æque ac ramulis vicinis, sic etiam & foliis, & qua se ipsi tangunt, verrucas affigunt. Spicæ sunt laterales, laxissimæ, crassæ, ad distantias incertas alternae, strictæ. Flores inodori, minimi, albi. Fructus pellucidi, albi, nitidi, sapore dulci, magnitudine pisi. Nuces, sive semina mavis, ante maturitatem, drupæ parieti interno semper sunt contigui; at maturæ quam exsiccantur, atque ita in minus rediguntur volumen, spatium vacuum se inter drupamque relinquunt. Sunt autem illæ nigrae, nucleumque continent flavum. Receptaculum in flore minimum, sensim increscit, ambitque germen, quod suo perstat loco: stamina autem ab orta hinc compressione coguntur circa stylum in conum coire, qui exsiccatus etiam in nuce persistit, apicemque ejus efformat levi vi separabilem. Flores non perfundtorie examinatos, bonoque etiam microscopio usus, characterem possidere supra expositum, plane habeo persuasum. Quanta igitur in fructificatione Cassythæ & Laurus similitudo & affinitas! Quam toto cœlo utriusque diversus habitus! Plantam totam aphyllam usque inveni; an alibi foliosam? An potius planta in horto malabarico descripta ab hac diversa dicatur? Nec Pluknetius nec Rumphius de foliis quidquam

habent. Verrucas omisit in iconē Rumphius, quas expressit Pluknetius. Cæterum descriptio Rumphii est optima.

Crescit in insula Tierra Bomba circa Carthagena in Conocarpis erectis nanis & rupestribus; locis ab aqua pluviali ob rupium cavitatem aliquamdiu commorante irriguis. Florentem vidi fructusque pariter ferentem Junio.

I. LAURUS (*Cinnamomum*) foliis trinerviis, ovato-oblongis; nervis versus apicem evanescentibus. Linn.
syst. 317

(Pl. americ. pict. Tab. 117 *Ramus florens. Fructus*).

CAL. nullus; nisi corollam calycem dicas.

COR. Petala sex, ovata, acuminata, concava, patula, alterna exteriora latioraque.

Nectarium constat tuberculis tribus acuminatis, hastatis, germen circumstantibus.

STAM. Filamenta novem, corolia paulo breviora, compressa, obtusa, erecta, terna in quovis ordine. Antherae margini filamentorum superne utrinque adnatæ, geminæ.

Corpuscula duo, globosa, colorata, petiolo brevissimo affixa ad basin singulis filamentis intimi ordinis.

PIST. Germen oblongum Stylus simplex, longitudine staminum. Stigma capitato-depressum, trigonum.

PER. Drupa subovalis, obtusa.

SEM. Nux ovalis, membranacea, fragilis. Nucleus ejusdem figuræ.

Arbor elegans, comosa, vigintipedalis vel altior, ramosa; truncō sexpedali, diametri sesquipedalis, cortice exteriore glabriuscō & coloris e fusco cinerei. In ramulis numerosis ex opposito folia enascuntur ex ovato oblonga plerumque, vel ex oblongo acuminata, vel subovata, obtuse acuminata, integerrima, nitida, coriacea, breviter petiolata, a tribus ad quinque pollices longa, nervis insignita utrinque tribus; qui ex petiolo orti, vel statim in ipsa pagina basi ab invicem recedunt; vel ibidem veluti confluentes, ad lineæ unius alteriusve longitudinem una sic adscendere pergunt, ut supra basin foliū tunc uniti dicantur: quod utrumque promiscue in eadem arbore obtinet. Cæterum folia lætissime virent facie, dorso magis albescunt; nervis candicantibus. Saporem odo-

remque gratissimum Cinnamomi habent, quos jam per quindecim annos in herbario meo asservata nedum perdere. Ita porro opponuntur quælibet, ut alterum plerumque sit altero paulo altius. In ramulis junioribus ex axillis oppositis oriuntur pedunculi communes tenues, pollicem unum terminales, duos tresve reliqui longi, apice triflori, vel trifidi cum partialibus trifloris. Flores parvi, e flavo virentes, insipidi fere, odorem late spirant subfætidum, qualèm habet *Lilium Martagon*. His succidunt fructus olivæ mediocris figura & magnitudine, insipidi, coloris saturate cærulei, mollesque; qui nucem includunt tenuem & leucophæam, nucleo foëtam candido, brevi germinante atque in arbusculam ex crescente, postquam cecidit in terram; unde maturitatis tempore subjecta arbori area sylvulam alere stirpium noviter nascientium conspicitur. Cæterum ad sationem transportari semina nequeunt; quum paucos intra dies nuclei corrumpantur, atque effæti evadant. Cortex interior trunci colore, odore, sapore atque figura *Cinnamomum Orientale* exacte refert; discrimen solum observo in illius compage minus subtili, magisque sapore acri; quod utrumque a climate vario aliave causa pendere potest. Quantumvis certe evollam authores, qui de *Cinnamomo Orientali* scripsérunt, vix aliud mihi persuadere possum, si non quod arbor hæc eadem cum illo sit, vel saltem aliqua ex varietatibus istis, quæ hunc corticem largiuntur, & quæ tam multæ numerantur. Materies alpha, nec valde solida, ad asseres est idonea. Radix crassa ramosaque *Camphoram* exsudat copiose, cuius etiam sapore gaudet, adstringendo simul fortiter. Binas miseram ex America arbusculas, quarum æquabat truncus brachium. Iter hæ sustinuerunt optime; & per triennium late viguerunt in horto Cæsareo; ubi folia produxerunt magis longa minusque lata, æque cinnamomea.

Crescit in sylvis montosis Martinicæ ad montem Calebasse. Floret Februario & Martio.

2. LAURUS (*Persea*) foliis ovatis, coriaceis, transverse venosis, perennantibus, floribus corymbosis. Linn. syst. 317.

(Pl. americ. piæt. Tab. 264, fig. 92. Fructus).

Laurus foliis oblongo-ovatis, fructu obverse ovato, pericarpio butyraceo. Brown. jam. 4, p. 214.

Persea. Plum. gen. t. 40. Clus. hist. 2.

Persea americana. Bauh. pin. 441.

*Pyro similis fructus in nova Hispania, nucleo magno.
Bauh. pin. 439.*

Prunifera arbor fructu maximo pyriformi viridi, pericarpio esculento butyraceo nucleus unicum maximum nullo ossiculo tectum cingente. Sloan. hist. jam. 2, p. 132, t. 222, f. 2.

Arbor americana, amplissimis pergamenis foliis, superficie nitidissima, fructu pyriformi crustaceo cortice coriato. Pluk. alm. 39, t. 261, f. I.

Ad altitudinem extensionemque pyri europeæ vastioris accedit, cæterum non inelegans & satis foliosa. Tertio ætatis anno jam fructum ferre dicitur. Materies leucophæa cortice ferme concolore obducitur. Flores producit numerosos, parvos, albidos & subodoratos; quibus fructus succedunt in hoc genere ingentes, pugno majores, ex rotundo obverse ovati, initio latè virentes, maturi ex fusco plerumque saturate purpurascentes. Maturitas concussione cognoſcitur ex nuclei contenti sonitu. Asservantur tamen per paucos adhucdum dies, ut teneriores evadant. Cortex non admodum crassus & fragilior tunc fructatim abstrahi a carne potest subjecta. Hæc virescens, eoque in albedinem magis vergens, quo longius distat a cortice, digitum crassa, odoris fere expers, consistentia butyracea, gaudet sapore singulari & gratissimo, in quo aliquid cynarae & nucis avellanæ mihi visus sum deprehendere, cum nullo tamen fructu europæo bene comparando. In centro libere locatur nucleus subrotundus, superficie inæqualis, albus, diametro pollicem excedens, non edulis, lacte candido sed ad aëris attactum rufescente scatens, fructu exemptus altero jam dia effœtus, pellicula tenui membranacea & madescente laxe obductus. Fructus in mensis nobiliorum fere quotidie apponitur, & apud Gallos una cum elixa bovina comeditur crudus, aut nullo cum aromate, aut sale & pipera adspersus. Solet autem cum ipso cortice longitudinaliter circa nucleus caro scindi in lamellas sesquidigitum latas, adsidentibus singulatim offerendas, nam multa simul, nimiopere satians, non comeditur. Est porro hominibus non tantum in deliciis; sed, qua forte inter vegetantia cætera fruitur hic fructus

æstimatione solus, etiam omnis generis animantibus acceptus: ut æque a gallina, vacca, cane & fele expetatur. Ego certe nullum in America fructum comedи avidius; et si primo alteroque in prandio, quod noviter advenientibus etiam contigit aliis, haud valdopere placuisse. Hispanis vocatur *Peral de abogado* & Gallis *Poirier d'avocat*, id est, *Pyrus caudicis*. Anglis etiam eodem nomine *Avocato - Pear - Tree*, vel alio *Alligator - Pear - Tree*, sive *Pyrus crocodili*, venit.

Crescit passim in Caribæarum cultis; in Americæ Continente sylvestris.

DECANDRIA.

MONOGYNIA.

I. SOPHORA (*havanensis*) foliis pinnatis: foliolis numerosis, vijfoliis, oblongo-ovatis, emarginatis. (Pl. americ. piſt. Tab. 261, fig. 62. Flos).

Frutex erectus, quadripedalis; ramis junioribus, foliis, & pedunculis villosissimis. Folia sunt pinnata; foliolis utrinque circiter duodecim cum impari, oblongo-ovatis, obtusis, emarginatis, petiolatis, pollicaribus, lateribus revolutis. Racemus simplex, erectus, terminalis, pedalis. Flores erecti, vix odori: quibus est calyx laxus, æqualis, duplo brevior corolla flava. Vexillum oblongo-ovatum, emarginatum, lateribus conniventibus, ungue longitudine calycis. Alæ patulæ, appendicula nulla. Corolla dipetala, concava, alis conformis, marginibus positivis contiguis. Filamenta apice adſcendunt. Germen villosum mutatur in legumen acuminatum & longum. Reliqua congruunt characteri Linnæano.

Crescit Havanæ passim in fruticosis apricis. Vidi florēt Januario.

I. BAUHINIA (*aculeata*) caule aculeato. Linn. syst. 326. (Pl. americ. piſt. Tab. 260, fig. 31. Foliū. Flos. Semen. Legumen).

Bauhinia aculeata, folio rotundo & emarginato. Plum. gen. 30, ic. 44, fig. I.

CAL. Perianthium monophyllum, ovato-oblongum, con-

cavum, antice longitudinaliter a basi ad apicem dehiscens, hinc reclinatum ad posticam partem, basi deflexum in plicam trifariam discissam, apice tridentatum, acutum, dentibus duobus plerumque coalitis, deciduum.

COR. Petala quinque, ovali-oblonga, obtusa, leviter concava, patula, subæqualia, calycem superantia, eodemque triplo brevioribus prædita unguibus.

STAM. Filamenta decem, subulata, adscendentia, petalis paulo breviora, omnia fertilia, quorum novem basi levissime colita, decimum superius basi liberum; alterna longiora, situ exteriora, non ortu. Antheræ lineares, magnæ, incumbentes.

PIST. Germen oblongum, compresso-planum, pedicellatum, tomentosum; desinens in Stylum subulatum, longitudine corollæ & situ staminum. Stigma capitatum, obtusum, bifidum.

PER. Legumen oblongum, compresso-planum, acuminateum, uniloculare, bivalve.

SEM. plura, subovata, compresso-plana.

Frutex erectus, inelegans, altitudine humana; trunco ramisque admodum aculeatis. Folia subrotunda, apice biloba; lobis subrotundis, obtusis. Flores magni, odore levi ingratoque, petalis candidis. Calyx interdum plica est integra, nec fissa.

Crescit frequens circa Carthagena in sylvaticis & fruticosi.

I. BAUHINIA (*punctata*) foliis subrotundo-cordatis, glabris, lobis semiorbiculatis; ramulis cirrhosis.

(Pl. Amer. pict. Tab. 26o, fig. 32. *Folium. Flos. Legumen*).

CAL. Perianthium monophyllum, oblongo-campanulatum, antice non fissum, erectum, semibifidum, deciduum; laciniis labiatis, semiovatis, concavis, erectis, longitudine æqualibus; superiore angustiore & bidentata; inferiore tridentata: dentibus subulatis, acuminatis, erectis, æqualibus; sinibus obtusis.

COR. Petala quinque, plana, obtusa cum exiguo acumine, longitudine æqualia, unguibus villosis calycem æquantes: quorum superius erectum, oblongum, apice patenti; duo inferiora & reliqua duo ad horum latera posita obverse ovata, patentia.

STAM. Filamenta decem, soluta; quorum quinque alterna filiformia, leviter conniventia; reliqua quinque subulata, longiora, situ nec ortu exteriora, calycem & quantia, apicibus leviter conniventibus; fertilia omnia. Antheræ oblongæ, connientes.

PIST. Germen oblongum, compressulum, erectum, hirsutum, non pedicellatum; desinens in Stylum subulatum, apice adscendentem, longitudine staminum. Stigma obtusum.

PER. Legumen oblongum, compresso-planum, obtusum, in parte apicis laterali acuminatum stylo, uniloculare, bivalve.

SEM. plura, subovata, compressa.

Frutex scandens, humanæ altitudinis. Rami teretes, inermes, glabri, longissimi, ornati ramulis alternis postea in cirrhos mutandis; principaliores compressi & utrinque sulcati. Folia subrotundo-cordata; utrinque glabra; lobis subrotundis, obtusis, stipulaque intermedia instrutis; figura & magnitudine Bauhiniae tomentosæ apud Burmannum Zeyl. tab. 18 *, & Rheedium Mal. I, tab. 35, sed basi magis cordata, qualia apud Pluknetium Phyt. t. 44, f. 6. Pedunculi multiflori, terminales in ramulis. Florum corolla erecto-patens, e flavescenti viridis, interne punctis purpureis variegatur, unde nunc punctatam potius dixi quam glabram. Certe ad nullam Linnæanam reduci speciem potest.

Crescit Carthaginæ in sylvis & fruticetis.

I. MYROSPERMUM (fructescens).

(Pl. americ. pict. Tab. 118. Ramus florens. Fructus. Semen).

CAL. Perianthium monophyllum, campanulatum, patens, marcescens; limbo levissime quinquedentato, superne introrsum protruso.

COR. papilionacea, pentapetala, caduca.

Vexillum subrotundum, obtuse emarginatum, superne concavum, patentissimum, ungue brevissimo latoque.

Alæ duæ, oblongæ, planæ, obtuse cum exiguo acuminè, patentæ, longitudine vexilli, unguibus brevibus, appendicula nulla.

Carina dipetala, concava, erecta, lateribus posticis conniventibus, anticis sibi incumbentibus, hinc clausa, cæterum alis conformis.

STAM. Filamenta decem, distincta, subulata, declinata, in carina recondita, longitudine corollæ, persistentia, marcescentia. Antheræ subovales, incumbentes.

PIST. Germen oblongum, pedicellatum, planum, situ staminum, desinens in Stylum subulatum, adscendentem, longitudine staminum. Stigma simplex, acutum

PER. Capsula membranacea, oblonga, plana, obtusa cum acumine abrupto laterali, basi attenuata, apice unilocularis. non dehiscentia.

SEM. pauca, reniformi-oblonga, compressa.

Frutex inelegans, parum ramosus, erectus, octo decemve pedum altitudine. Folia habet pinnata, alterna, octopollucaria, quotannis decidua, in ramis junioribus: foliolis cum impari utrinque ut plurimum septem, oblongis, obtusis, integerrimis, glabris, alternis, pollucibus, brevi petiolo donatis. Racemi sunt laxi, subterminales, erecti, simplices bifidive; pedunculis propriis unifloris erectisque. Flores inodori, corollis ex albido roseis. Capsulæ membrana venosa, magna, e leucophæo fusca. Semen plerumque unicum, raro bina ad maturitatem perveniunt, abortantibus paucis reliquis; scatent autem balsamo odoris ingrati & fortis, sicut etiam loculum ipsum: unde huic plantæ nomen imposui, scilicet διὰ τὸ πύρον τῷ σπέρματος. Flores prodeant post nova folia; hæc vero ante fructuum perfectam maturitatem jam decidunt omnia, qui tum soli diu in frutice persistunt. Videtur Hoitziloxitl. Hern. mex. libr. 3, cap. II ad hoc genus pertinere.

Crescit copiose in fruticetis apricis ad pedem montis de la Popa proxime Carthaginem.

I. PARKINSONIA (aculeata). Linn. sys. 326.

(Pl. americ. piæt. Tab. II9. Ramus florens & fructescens.

Dein semen.

Parkinsonia aculeata; foliis minutis, uni costæ adnexis.

Plum. gen. 25.

Parkinsonia aculeata, foliis minutissimis pinnatis, penna longiori compressa. Brown. jam. I, p. 222.

Parkinsonia aculeata, foliis mimosæ, uni costæ affixis.

Walth. hort. tab. I3.

CAL. Perianthium pentaphyllum, receptaculo campanu-

lato insidens: foliolis lanceolato-ovatis, concavis, aequalibus, coloratis, reflexis, aequalibus, deciduis.

COR. Petala quinque, plana, patentissima, calyce duplo longiora; quorum quatuor ovata, ungue brevissimo; quintum superius ovato-subrotundum, ungue erecto, longissimo.

STAM. Filamenta decem, subulata, levissime declinata, ungue petali quinti paulo longiora. Antheræ oblongæ, incumbentes.

PIST. Germen oblongum, teres, declinatum. Stylus filiformis, leviter adsurgens, longitudine staminum. Stigma simplex, obtusum.

PER. Legumen oblongum, ad semina torosum, inter eademque contractum & compressum, longum, acuminatum, uniloculare, bivalve.

SEM. plura, oblonga, subteretia, obtusa.

Arbor erecta, ramosa, duodecimpedalis, elegantissima. Cortex aequa trunci ac ramorum diu manet viridis, nitidusque; tandem in arbore seniore subfuscus evadit & striatus. Materies est candida. Aculeos habet solitarios, subulatos, subaxillares, acuminatos, leviter recurvos, quadrilineares; in ramis senioribus sœpe ternos, intermedio fortissimo & novemlineari. Folia sunt pinnata, nitida, terna quaterna quinave ex eadem axilla; costa pedali, lata, & compresso-plana; foliolis exiguis, oblongis, numerosis. Racemi laxi, simplices, glabri, axillares & terminales, circiter decemfiori. Flores suaveolentes, flavi, petalo superiori ad basin maculis coccineis variegato. Legumina sunt e fusco lutea; quæ semina nitida ab uno ad sex continent. Sata e semine hæc arbor primo jam anno floret, celeriterque increscit. E Parkinsonis & Poincianis, mixte denseque satis, ortas vidi in Martinica sepes adspicere omnium pulcherrimas A Poinciana videtur solis fere calycis laciniis aequalibus vere distingui. Gallis nuncupatur *Genet épineux*, sive *Genista spinosa*. Ex seminibus per plurimos annos fertilibus facile in caldariis germinat, lateque excrescit, primo anno tripedalis; sed hyemem raro sustinuit, altera estate semper sine flore periit.

Crescit in Caribæis & in vicina Continente. Sæpius in anno floret, simulque fert maturos fructus.

2. POINCIANA (*pulcherrima*) aculeis geminis. Linn.
syst. 328.

(Pl. americ. Pict. Tab. 120. *Ramus florens.*)

Poinciana aculeata, foliis bipinnatis, floribus croceis pulcherrimis, pedunculis longis spicatis insidentibus. Brown. jam. I, p. 225.

Senna spuria, arborea, spinosa, foliis alatis ramosis seu decompositis, flore ex luteo & rubro specioso. Sloan. hist. jam. 2, p. 49.

Crista pavonis. Rumph. amb. 4, p. 53, t. 20.

Crista pavonis flore elegantissimo variegato. Burm. zeyl. 79.

Frutex pavoninus, Crista pavonis. Breyn. cent. 61, t. 22.

Flos pavonis. Merian. sur. p. 45, t. 45.

Tsietti-mandaru. Rheed. mal. 6, p. 1, t. 1.

CAL. Perianthium pentaphyllum, coloratum, receptaculo campanulato insidens, deciduum: foliolis oblongis, obtusis, concavis, laxis, patentibus: infimo fornicato pauloque longiori.

COR. Petala quinque, subrotunda, plana, crenata, patentissima, calycem superantia, desinentia in unguem longum; quorum duo inferiora divaricata; quintum superius paulo minus reliquis, magis erectum, difforme, ungue longissimo canaliculato.

STAM. Filamenta decem, setacea, basi hirsuta, petalis duplo longiora, declinata, arcuata superiora versus, quorum supremum pedicellatum, margini receptaculi insidentia. Antheræ ovales, incumbentes.

PIST. Germen oblongum, compressum, declinatum, calyce brevius, ortum e fundo receptaculi. Stylus setaceus, situ & longitudine staminum. Stigma simplex, obtusum.

PER. Legumen oblongum, compresso-planum, obtusifuscum, uniloculare, bivalve, dissepimentis quasi transversis.

SEM. plura, subovata, obtusa, compresso-plana.

Frutex erectus, octopetalis, pulcherrimus, caulis e radice interdum pluribus emissis. Aculei adsunt in ramis senioribus, rarissime in junioribus, saepe omnino absentes in quibusdam. Flores speciosissimi, e croceo & coccineo variegati, sapore atque odore nauseosis. Hi, infusi potatique theæ potionis ad instar, vi pollent aperient.

te, audiuntque febrifugi. Semina immatura a pueris bat barisque cruda comeduntur. Gallis appellatur *Poinciad* nec non *Fleurs de Paradis* seu flores paradisi. Vindobonæ s̄epe floruit. Datur varietas floribus omnibus ex crebro unicoloribus.

Crescit vulgaris in Caribæis.

2. POINCIANA (*bijuga*) aculeis solitariis; foliis emarginatis. Linn. syst. 328.

CAL. Perianthium pentaphyllum, coloratum, receptaculo campanulato compresso insidens, deciduum: foliolis oblongis, obtusis; quorum quatuor plana, laxa, reflexa; quintum inferius concavum, longius, patentissimum.

COR. Petala quinque, obtusa, plana, margini receptaculi insidentia, calyce paulo longiora; quorum duo inferiora oblonga, declinata, utrinque a foliolo calycis quinto divergentia; sequentia duo obverse ovata, patentissima; quintum superius subrotundum, reflexum.

STAM. Filamenta decem, subulata, basi hirsuta, interptala inferiora declinata, margine receptaculi inserta longitudine corollæ; quorum superius brevi insidet per dicello. Antheræ ovatæ, incumbentes.

PIST. Germen oblongum, compressum. Stylus subulatus declinatus, staminibus paulo longior. Stigma simpliciter obtusum.

PER. Legumen oblongum, compresso-planum, obtusulum, uniloculare, bivalve, dissepimentis quasi transversis.

SEM. pauca, compressa.

Arbuscula erecta, ramosa, inelegans, interdum viginis quinque altitudine pedes superat. Cortex nigricans. Aculei subulati, validi, acuminati, axillares, solitarii semipollicares, s̄epe absentes. Folia sunt bijuga; collis pollicari; foliolis emarginatis, glabris, plus minus obverse cordatis, s̄epe difformibus. Pedunculi multiflori e tuberculis ramuscilorum egrediuntur. Flores lutei, inodori, præcedentibus duplo minores.

Crescit frequens in Curaçao, locis saxosis, glareosis, aridis.

3. POINCIANA (*coriaria*) caule inermi; racemis spicatis. (Pl. americ. pict. Tab. 260, fig. 33. Flos. Legumen. Semen).

Siliqua arboris Guatapanæ ex Curaçao insula. *Brynn. cent.*
pag. 58, fig. 5.

CAL. Perianthium pentaphyllum, receptaculo campanulato compresso insidens, deciduum: foliolis oblongis, obtusis, laxis, reflexis; quorum quatuor plana; quintum infimum longius reliquis & concavum.

COR. Petala quinque, calyce vix longiora, margini receptaculi insidentia; quorum quatuor subrotunda, concava, æqualia, integerrima, erecta; quintum superius difforme, reflexum, lateribus conniventibus.

STAM. Filamenta decem, subulata, inferne hirsuta, inferiora versus leviter arcuata, petalis duplo longiora, margini receptaculi insidentia. Antheræ oblongæ, incombentes.

PIST. Germen oblongum, compressum, ortum in fundo receptaculi. Stylus filiformis, longitudine & situ statim. Stigma simplex, obtusum.

PER. Legumen oblongum, compressum, obtusiusculum, lateraliter incurvum, latere interiori concavum, exteriori convexum, spongiosum, submultiloculare, legume inter semina connato.

SEM. solitaria, pauca, subovata, compressa.

Arbor elegans, comosa, ramosissima, tota perpetuo inermis, quindecim pedes alta. Cortex nigricat, adspergiturque punctis saturate leucophæis. Folia sunt duplicito-pinnata, ad ramulorum extremitates numerosa: pinna communi sesquipolllicari; partialibus pollicaribus, sex canticiter paribus cum impare: foliolis circiter duodecim jugatis sine impari, oblongis, obtusis, glabris, integerrimis, bilinearibus. Pedunculi communes spicam densam formant, prodeuntque in extremis ramulis; propriis brevissimis, unifloris, numerosis. Flores parvi subflavescent, odore prædicti leviusculo. Legumina fusca matura ab Hispanis & barbaris adhibentur ad condensanda coria, iisdem nuncupata *Libidibi*.

Crescit in Curaçao & Carthagena frequens; in limosis præsertim inundatisque maritimis; ad salinas.

I. HYMENAEA (*Courbaril*). *Linn. syst. 326.*
(*Pl. amerit. pict. Tab. 264, fig. 95. Fructus*).

Hymenæa foliis geminatis, parallelis, paginis inæqualibus, racemis terminaticibus. *Brown. jam, I, p. 221.*

Conbaril bifolia, fructu pyxidato. *Plum. gen. tab. 36.*
Ceratia diphylllos antegoana, ricini majoris fructu nigro,
 siliquæ graadi inclusio. *Plu. alm. 96, t. 82, f. 2.*

Arbor siliquosa, ex qua gummi Elemi *Bauh. pin. 404.*
Jetaiba. *Pis. bras. l. 4, c. 8.* *Marcgr. bras. l. 3, c. 5.*

Arbor vasta, trunco sæpe altissimo, coma ampla,
 cortice satis glabro & fusco. Materies est durissima, no-
 dorum fere expersa, coloris badii, polituræ idonea, pon-
 derosissima ut pes cubicus circiter centum libras pendat.
 Hinc ad varium usum adhibetur, ad supellestilem, impri-
 mis vero ad dentes rotarum in machinis, quia simul haud
 facile dissilit. Folia sunt bijuga, glabra, saturate virentia,
 lanceolata, acuta, superne ad invicem incurvata.
 Flores inodori, papilionacei cum filamentis distinctis,
 flavi. Legumina oblonga, compressa, badia, lignea, se-
 mipedalia. Implantur farina flavescente, subpulposa, dul-
 ci, odoris mihi ingrati, eduli; in qua semina pauca ni-
 dulantur. Emittit truncus ex cortice gummi pellucidum,
 flavescentia, sed plane inodorum.

Crescit in Martinicæ sylvis.

I. ANACARDIUM (occidentale). *Linn. syst. 318.*

(*Pl. americ. pict. Tab. 121.* *Ramus florens & fructescens.*
Nux cum nucleo dissecta).

Anacardium fructu obverse ovato, nuce reniformi, rae-
 mis terminalibus. *Brown. jam. I, p. 226.*

Pomifera seu potius prunifera indica, nuce reniformi.
Catesb. car. 3, p. 9, t. 9.

Cassuvium cadju. *Rumph. I, p. 177, t. 69.*

Acaju. *Pis. bras. l. 4, c. 6.*

Kapa-mava. *Rheed. mal. 3, p. 65, t. 54.*

CAL. *Perianthium pentaphyllum*, deciduum: folialis ova-
 to-acuminatis, concavis, erectis.

COR. Petala quinque, lanceolato-linearia, acuta, plana,
 calyce duplo longiora, inferne erecta, semireflexa.

STAM. Filamenta decem, capillaria, erecta, calyce bre-
 viora; quorum unum sterile duplo reliquis longius. An-
 theræ subrotundæ, parvæ.

PIST. Germen subrotundum. Stylus subulatus, incur-
 vus, fere longitudine corollæ. Stigma obtusum, ob-
 liquum.

PER. nullum. Receptaculum obverse ovato-turbinatum, maximum, carnosum, nitidum.

SEM. Nux reniformis, glabra, magna, ad apicem receptaculi posita. Nucleus ejusdem figuræ.

Arbor elegans, vigintipedalis; coma in cultis concinna, in incultis neglecta; trunco rarius sesquipedem diametro excedente; ramis fulcratis & inæqualibus. Folia sunt coriacea, subovata, nitida, integerrima, petiolata, alternatim sparsa. Panicula corymbosæ, diffusæ, terminalesque, continent flores numerosos parvos & suaveolentes, receptaculo insidentes oblongo vix a pedunculo distinguendo. Corolla est rubra. Staminibus gaudent plerique decem, quorum unum perpetuo antheris caret: frequenter dumtaxat sunt octo, fertilia omnia; vel istiusmodi septem. Quandoque etiam inveni flores mere fœmineos, in quibus omnia stamina desiderabantur: unde quodammodo polygama stirps dicenda foret. Stigma ferme antheram refert. Ilico post floris peractam fecundationem germen increscit in nucem reniformem, brevi tempore volumen debitum adepturam. Tunc tandem elongari receptaculum augerique incipit, antea tenue adeo, ut pedunculi credi pars potuisset. Magnitudine autem, figuraque pyri habitum mediocris acquirit; viride in principio, sub finem coccineum aut flavum aut ex utroque belle mixtum, pro varia, opinor, solis irradiatione. Carnem habet albam fibrosam spongiosam & succulentam, præditam, si perfecte matura, sapore vinoso acidulo dulci gratissimoque, alias austero dentesque hebetanti. Succus solet exsugi; abjiciturque, solvi quæ renuit substantia. Sunt tamen, qui integra devorent receptacula. Nux oleo scatet valde caustico & hinc venenatissimo; quod labia, palatum, totumque adeo os incaute gustantis inflamat, tumefacit, & summo cum dolore excoriat. Hæc candelæ accensæ proxime admota, spectaculo singulari ignes artificios imitatur; aëre nimirum contento, per vim caloris elastic redito, summo impetu quaquavorsum inflammatum oleum expellente. Nuclei sunt candidissimi, pellicula vestiti subsufca, teneri, & dulces. Incolæ nuces culello in binos lobos separant, quibus divisos etiam nucleos eximunt, frigidæque imponunt; quo fit, ut adhærens forte olei caustici portio abluitur. Sic præparati impune

comeduntur, ac sapore omnibus fortasse nucleis præpiunt palmam. Alii nucleos leviter assant, interque belaria in mensis apponunt. Potest etiam ex illis componi Chocolatæ dictæ potionis species, quæ satis arridet palato. A colore receptaculorum atque volumine variis alias atque alias numerant Americani species, quæ mihi meræ vise fuerunt varietates a soli discrimine situsque ortæ. Gallis vocatur *Acajou* vel *Pommier d'Acajou*.

Crescit in Caribæis & in vicina Continente.

I. HEISTERIA (*coccinea*). Linn. syst. 336.

(Pl. A. P. Tab. 122. *Ramus fructescens*).

Borbonia fructu oblongo nigro, calyce coccineo. Plum. gen. 4.

CAL. Perianthium monophyllum, campanulatum, quinquefidum, acuminatum, parvum, decolor, persistens.

COR. Petala quinque, ovata, concava, acuta, patentia.

STAM. Filamenta decem, ovata, acuta, plana, ereta, alterna breviora. Antheræ subrotundæ.

PIST. Germen subrotundum, depresso. Stylus brevius, erectus. Stigma obtusum, quadrisidum.

PER. Drupa oblonga, apice depresso, insidens calyci colorato & maximo.

SEM. Nux ovalis, obtusa. Nucleus ejusdem figuræ.

Arbor inelegans, ramosa, vigintipedalis. Folia oblonga, integerrima, apice attenuata in acumen falcatum, nitida, breviter petiolata, alterna, semipedalia. Flores parvi, pedunculati, axillares, corollis albis. Calyx in flore parvus & viridis; in fructu coccineus, limbo maximo & patentissimo, laciniis subrotundis brevibus & obtusissimis. Incolis vocatur *Bois perdrix* sive Arbor turturum, ob fructus turturibus amatos. Quum Plumerianum Borboniæ genus, altera ejusdem specie vere relata ad Laurum, alterius (de qua hic agimus) ignoratio huc usque fido charætere, in aliam longe familiam fuerit translatum, aliunde etiam Heisteriæ nuperum genus cum nunc sub Polygala militet; distinctam hanc a cæteris plantam in eruditu hujus viri memoriam nominatam *Heisteriam* volui.

Crescit in sylvis densis Martinicæ ad torrentes. Floret Februario & Martio. Fert fructum Junio.

I. SWIETENIA (*Mahagoni*). Linn. syst. 332.

Cedrela foliis pinnatis, floribus sparsis, ligno graviori.

Brown. jam. 2. p. 158.

Arbor foliis pinnatis, nullo impari alam claudente, nervo ad latus unum excurrente, fructu angulo magno, semine alato instar pinus. *Catesb. car. 2, pag 81, t. 81.*

CAL. Perianthium monophyllum, campanulatum, obtusum, minimum, quinquefidum, deciduum.

COR. Petala quinque, obverse ovata, concava, obtusa, patentia.

Nectarium monophyllum, cylindricum, erectum, longitudine corollæ, ore decemdentato acutoque.

STAM. Filamenta decem, vix conspicua, nectario infra dentium divisuras inserta. Antheræ oblongæ, erectæ, non superantes nectarium.

PIST. Germen ovatum. Stylus subulatus, erectus, longitudine nectarii. Stigma capitatum, depresso-planum.

PER. Capsula ovata, maxima, obtusa, quinquelocularis, quinquevalvis; valvulis ligneis, crassissimis, a basi dehiscentibus.

SEM. plurima, compressa, imbricata; aucta ala membranacea, oblonga, obtusaque. Receptaculum oblongum, obtusum, maximum, quinquangulare; quinquesulcatum.

Arbor hæc proceræ & ramosissima coma ampla nitidaque spectabilem se reddit. Materies ejus rubra, dura, ponderosa, polirique perquam idonea, suppellectilem præbet Americanis, præprimis vero Anglis, pulcherrimam satisque omnibus notam. Folia habet pinnata, reclinata, alterna, nitida, octopollicaria, in ramis junioribus numerosa; foliolis sine impari ut plurimum quatuor, sæpe tribus, rarius quinque, falcato-lanceolatis, integerimis, acuminatis, retrorsum inflexis, petiolatis, oppositis, sesquipollicaribus. Racemi subcorymbosi, plus minus octoflori, axillares, solitari, bipollicares, flores albicantes parvosque gerunt. Capsulæ cortex est coloris ferruginei. Flos itaque Meliae, & fructus Cedrelæ a basi dehiscens, distinctum genus poscunt. Hoc in honorem Viri illustrissimi Gerardi L. B. a Swieten dixi Sibiereniam: hujus enim plurima ut præterea nec peritura unquam in scientias merita, id unum juvat commemorasse, quanto illi etiam ipsa Flora devincta sit beneficioz qui apud

AUGUSTISSIMAM AUSTRIAEC DOMINAM confilio suo effecit, ut Botanico horto elegantissimo aucta sit alma Universitas Vindobonensis.

Crescit in Caribæis majoribus. Floret Decembri.
TRICHLIA.

CAL. Perianthium monophyllum, parvum, quinquepartitum, acutum, deciduum.

COR. Petala quinque, oblonga, plana.

STAM. Filamenta decem, oblonga, plana, acuminata, erecta, petalis paulo breviora, simul cylindrum formatia. Antheræ oblongæ, erectæ.

PIST. Germen subovatum. Stylus erectus, staminibus brevior. Stigma capitatum obtusum.

PER. Capsula subrotunda, trilocularis, trivalvis.

SEM. solitaria, vestita pellicula pulposa.

I. **TRICHLIA** (*spondiodes*) foliis pinnatis; foliolis intermediis majoribus.

Trichilia hirta. Linn. *sys. 332.*

Trichilia subhirsuta, foliis pinnatis ovatis, racemis alribus. Brown. *jam. I*, p. 278.

Eunonymus caudice non ramoso, folio alato; fructu roundo tripyreno. Sloan. *hist. jam. 2*, p. 103, t. 210 f. 2 & 3.

Arbuscula decempedalis vel multo humilior, caudia erecta & in paucissimos ramos diviso. Folia pinnata glabra aut subhirsuta, pedalia, alternatim sparsa in extremitatibus ramorum: foliolis utrinque circiter decem cum impari interdum deficiente, lanceolato-ovatis, obtuse acuminatis, integerrimis, petiolatis, bipollicularibus intermediis gradatim majoribus. Racemi axillares, solitarii, in floribus tripollicares, in fructibus sæpe semipendentes; pedunculis simplicibus vel ramosis. Flores inodori parvi, triginta circiter in eodem racemo. Calyx semi-quinquefidus, patentia-planus, minimus. Petala albitionia, patentia. Filamenta interne hirsuta. Germen villosum, stylo crasso. Capsula subfusca, trifurcata. Semina in fructibus majoribus in eodem loculamento interdum bina, mutuo incumbentia, vel alterum ad latus alterius. Gallo vocatur *Mombin barard* sive *Spondias spuria*.

Crescit in Domingo, Jamaica, & Carthaginæ. Floret præcipue Novembri.

2. TRICHILIA (*glabra*) foliis pinnatis, foliolis extimis majoribus. Linn. syst. 332.

(Pl. americ. pict. Tab. 260, fig. 35. *Folium*).

Arbor procera, ramosa, comosa, odorem spirat fœtidum ingratissimumque. Habet folia pinnata, nitida, alterna, & numerosa; costa tereti, utrinque levissime alata, quinquepollicari; foliolis utrinque tribus aut duobus cum impari, obverse ovatis, basi attenuatis, integerrimis, obtusissimis, vix petiolatis, exterioribus gradatim majoribus. Racemi axillares, brevissimi. Capsulae globosæ, virentes.

Crescit circa Havanam in sylvis montosis.

3. TRICHILIA (*trifolia*) foliis ternatis. Linn. syst. 332.

Laeft. hisp. 188.

(Pl. americ. pict. Tab. 123. Ramus fructescens. Dein capsula expansa in suas valvulas, & duo semina).

Arbor quindecimpedalis, erecta, tota odore prædita levi ingratoque. Materies albicans. Cortex e leucophæo fuscus. Rami numerosi, teretes, inordinati, ex ipso prope terram sæpe trunco, patentes. Folia ternata, nitida, alterna, numerosa, petiolo vix pollicari; foliolis obverse ovatis, basi cuneiformibus, integerrimis, obtusissimis, sessilibus, medio multo lateralibus longiori. Racemi axillares, brevissimi, plus minus sexflori. Flores parvi; calyce campanulato, erecto, quinquedentato; petalis albicantibus, erectis, calyce triplo longioribus. Capsulae virides cum punctis e fusco leucophæis, primum perfecte globosæ, tandem trisulcatae. Semina solitaria, hinc convexa, illinc angulata; pellicula coccinea. Servæ afræ radicibus hujus arbusculæ in decocto utuntur, quibus abortum sibi procurent. Curaçaviensibus vocatur Kerseboom seu Cerasus, et si nihil commune cum Ceraso habeat. Hispanis etiam audit Ceraso macho seu Cerasus mas. Magna illi est cum priore affinitas.

Crescit in Curaçao in locis gramineis siccis; & in vicina Continente. Fioret Aprili & Majo.

4. TRICHILIA (*terminalis*) racemis terminalibus.

Arbor vigintipedalis. Rami numerosi, diffusi, ad terram fere usque reclinati. Folia pinnata, nitidissima, novempollicaria, alterna, numerosa: foliolis utrinque tribus cum impari, lanceolatis, obtusis, integerrimis,

petiolatis, bipollicaribus. Racemi paniculati, terminales, plures. Flores subfætentes, numerosissimi, struc-
ta Meliaæ flores mentientes; calycis laciniis profunde dis-
sectis, ovatis, concavis, acutis, patentissimis; filamentis
decem primo intuitu unum constituere corpus visis, re-
vera tamen distinctissimis; germine corpori glanduloso,
subrotundo semiimmerso; stylo subulato; stigmate crasso.
Unicam hujusmodi arborem haud procul ab oppido King-
ston juxta viam inveni Januario florentem; quam postea,
fructus examinandi causa denuo quæsitam, radice tenui
amputatam ablatamque dolui.

Crescit in Jamaica.

I. ZYGOPHYLLUM (*arboreum*) caule aboreo; foliis pin-
natis. Linn. *sys. 333.*

(Pl. americ. p. 124. *Ramulus florens cum fructu.*)

Arbor hæc est speciosissima, quadraginta pedes alta;
& coma densa amplissima elegantique conspicua. Truncus
infestus erecto & sexpedali. In ramusculos dividitur nu-
merosos, oppositos vel dichotomos. Folia habet pinna-
ta, nitida, opposita, numerosissima: costa tripollicari,
abrupta: foliolis utrinque sex septemve, oblongis, in-
tegerrimis, obtusis, sessilibus, alternis, pollicaribus. Ra-
cemi sunt laxi, oppositi, sæpe dichotomi, axillares &
terminales. Flores inodori, magni, speciosi; quibus ca-
lyx e viridi flavescit. Petala sunt fulva, subrotunda,
ungue longitudine calycis. Nectarii squamæ hirsutæ, in
filamentis superioribus sensim majores, in supremo maxi-
ma. Stamina connivent. Germen basi attenuatur in pe-
dicellum longum, crassum, & quinquesulcatum. Capsula
abit in alas quinque membranaceas & maximas. Quando
floret hæc arbor, adspectum præbet jucundissimum; flo-
ribus videlicet numerosissimis undique obtegentibus comam
densam & latissime virentem. Folia ante floram eruptio-
nem incauto imponunt facile, ac si forent duplicato-pin-
nata. Incolis dicitur *Guayacan*, quo apud illos generico
nomine appellantur omnia ligna dura, materiaturæ aptissi-
ma. Fertur etiam ipsius truncus sub terra sepultus in la-
pidem mutari, nec unquam corrumpi.

Crescit Carthagena in vallis sylvaticis; & passim
in sylvis arenosis maritimis. Floret Julio.

I. MELASTOMA (*discolor*) foliis integerrimis, quinque-

nerviis, oblongo-ovatis, glabris, margine lăvibus.

Linn. syst. 337.

(Pl. americ. pīst. Tab. 125. *Ramus florens*).

Grossularia plantaginis folio apicibus candidis & falcatis.

Plum. ic. 42, f. I.

Grossulariæ fructu non spinosa, malabatri foliis subtus nivēs, fructu racemoso in umbellæ modum disposito.

Sloan. hist. jam. 2, t. 198, f. I.

Arbor americana quinquenervia, comantibus flosculis, foliis amplissimis glabris, prona parte albicantibus. Pluk. alm. 40, t. 264, f. 4.

CAL. Perianthium monophyllum, persistens, basi subrotundum & germini circumnatum, hinc in collum coarctatum; definens in limbum quadrangulari-campanulatum, patentem, quadridentatum, angulis fornicatis.

COR. Petala quatuor, oblonga, truncata, concava, erecta, calyci inserta, eodemque duplo longiora.

STAM. Filamenta octo, subulata, compressa, erecta, calyci inserta, longitudine corollæ. Antheræ oblongæ, extra corollam declinatae.

PIST. Germen subrotundum, tomentosum, subinferum. Stylus subulatus, erectus, staminibus longior. Stigma simplex, obtusum.

PER. Bacca subglobosa, coronata limbo calycis, quadilocularis.

SEM. numerosa, minima, angulosa, nidulantia.

Arbor quindecimpedalis, habitu congenerum. Rami subreclinati, cinerei, juniores tomentosi. Folia ovata, acuminata, integerrima, margine interdum levissime crenata, facie virentia glabraque, dorso leucophæa ac tomentosa, quinquenervia, nervis interioribus ante basin coadunatis, petiolata, opposita. Racemi ramosi, subcymosi, tomentosi, terminales, bini. Flores parvi, inodori, petalis flavis. Baccarum succus purpureus.

Crescit in sylvaticis Martinicæ. Martio floret.

2. **MELASTOMA** (*septemnervium*) foliis septemnerviis.

Arbor erecta, habitu congenerum. Folia ovata, acuta, subtus tomentosa, venis parallelis transversis insignita nervisque septem. Floret decandri.

Crescit in sylvis montosis Martinicæ.

1. SAMYDA (*decandra*) floribus decandris.

CAL. Perianthium monophyllum, interne coloratum. Tuber campanulatus, decemstriatus. Limbus quinquefidus: laciniis ovatis, planis, patentissimis, duabus acuminis auctis, reliquis obtusis.

COR. nulla.

Nectarium monophyllum, cono truncato æmulum, decemstriatum, fere longitudine calycis, cuius limbo ad basin insertum, ore obtuse decemdentato.

STAM. Filamenta nulla. Antheræ decem, oblongiusculæ, erectæ, parvæ, dentibus nectarii insidentes.

PIST. Germen ovatum, villosum. Stylus subulatus, eretus, longitudine nectarii. Stigma capitatum, obtusum.

PER. Capsula subrotunda, quadrisulcata, coriacea, crassa, unilocularis, quadrivalvis.

SEM. plurima, subovata, obtusa, basi foraminulo notata, affixa internæ parti valvularum, obvoluta pellicula pulposa. Hinc receptaculum nullum.

Frutex inelegans, quinquepedalis, eretus. Flores interni nivei, externe virentes, odorem late spirantes suavissimum, floribus Citri æmulum. Mense Junio vidi florentem, foliis omnino destitutum; sed numeri staminum constantissima diversitas hanc & subsequentem abunde distinguit.

Crescit in insula sancti Martini in rupibus fruticosis maritimis.

2. SAMYDA (*serrulata*) floribus octodecandris. Linn. syst. 341.

Guidonia ulmi folio, flore niveo. Plum. ic. 146, f. 2.

Frutex eretus, tres quatuorve pedes altus. In hoc folia pariter adsum cum floribus. Sunt hi inodori, duplo precedentibus majores, nectario octodecim dentibus totalemque antheris instruto. Capsula sèpans quinquevalvis. Posset etiam hoc genus in Monadelphia forte locari; ut nectarium haberetur pro filamentis coalitis.

Crescit in Domingo, in collibus fruticosis. Flores Novembri.

CASEARIA.

CAL. Perianthium pentaphyllum, deciduum: foliolis oblongis, planis, coloratis, patentissimis.

COR. nulla.

Nectarium e foliolis oblongis, obtusis, hirsutis, suberectis, staminibus duplo brevioribus, alternoque cum iisdem situ.

STAM. Filamenta octo vel decem, subulata, suberecta, calycem non superantia. Antheræ oblongæ, incumbentes.

PIST. Germen subrotundum. Stylus filiformis, erectus, longitudine staminum. Stigma capitatum, obtusum.

PER. Capsula subrotunda, obtusa cum exiguo acumine e styli parte residua, obtuse trigona, unilocularis, coriacea, crassa, trivalvis.

SEM. plura, ab invicem compressa, hinc angulata, valvulis affixa, in pulpa molli. Receptaculum nullum.

Caseariam a Samyda adhucdum separo propter calycem nectariumque monophylla in Samyda, pentaphylla in Casearia; unde floris longe alius exoritur habitus.

1. CASEARIA (nitida) inermis; floribus octandris.

(Pl. americ. pict. Tab. 126. *Ramus florens. Tum calyx discissus expansusque cum staminibus & nectario.*)

Arbuscula, quindecimpedalis. Rami numerosi, inermes, horizontaliter patentes, jam mox supra terram e trunko emissi. Folia ovata, obtusa, crenato-serrata, nitida, breviter petiolata, alterna, sesquipollucaria, in ramulis dumtaxat viridibus junioribus; ceterum valde variantia, præprimis magnitudine; etenim in insula Mango, ubi copiose crescit, inveni sæpe oblonga illa, in acumen desinentia obtusum, & quadripollucaria: &c. Racemi ramosi, corymbosi, axillares, alterni, pollicares, sursum versi. Flores albidi, parvi. Capsula rubicunda aut atropurpurea pulpam continet colore coccineo tingentem, & semina plerumque duo, interdum unicum, rarius plura. Calycis in hac specie foliola sunt obtusa. Plantam hanc, distinctum genus constituentem, nominavi in memoriam Joannis Casearii in civitate Cochinenſi ecclesiæ Batavæ ministri, qui Horti Malabarici stirpium descriptiones adornavit, egregie hinc de Botanica meritus.

Crescit passim Carthaginæ in fruticosis.

2. CASEARIA (aculeata) aculeata; floribus octandris.

Samyda spinosa. Linn. syst. 340.

Guidonia aurantii foliis, aculeata. Plum. ic. 147, f. I.

Arbuscula septempedalis. Rami numerosi, inordi-

nate dispositi, ex ipso etiam supra terram orti truncos, juniores inermes, seniores armati aculeis solitariis subulatis rarisque. Folia ovata, utrinque acuta, leviter serrata, glabra, petiolata, alterna, numerosa, sesquipollicaria; ad distantias quadrilineares ab invicem remota. Pedunculi uniflori, brevissimi, circiter duodenii in eadem ala. Flores candidi obſident totos ramos juniores. Calycis foliola obtusa. Capsula e purpureo virescit, & pulpam continet tingentem colore aurantio. Semina plura, ovata, acuta. In valvularum pariete interno per stigmata totidem alba spectatur varius seminum numerus.

Crescit copiose in montosis suffruticosis Domingo.

3. CASEARIA (parviflora) floribus decandris.

Samyda parviflora. Linn. syst. 340. Lael. it. 260.

(Pl. americ. piæt. Tab. 127. *Ramulus florens*).

Arbuscula quindecimpedalis, erecta. Rami diffusi, tenues, inermes. Folia ovato-acuminata, obtusa, serrata, glabra, petiolata, alterna, pollicaria, in ramis junioribus virentibus. Pedunculi uniflori, aggregati, in ramis aphyllis senioribus. Flores candidi, numerosi. Calycis foliola acuta. Non vidi fructum.

Crescit in montibus sylvaticis circa vicum Case-Pilon in Martinica. Vidi florentem Aprili.

I. COPAIFERA (officinalis). Linn. syst. 341.

(Pl. americ. piæt. Tab. 128. *Ramus florens*.)

Copaiba. Marcgr. bras. l. 3, c. 17. Pis. bras. l. 4, c. 4 CAL. nullus.

COR. Petala quatuor, ovato-lanceolata, concava, acuta patentissima.

STAM. Filamenta decem, filiformia, arcuata versus stylum, corolla paulo longiora. Antheræ oblongæ, incurvantes.

PIST. Germen rotundum, compresso planum, pedicellatum. Stylus filiformis, incurvus, longitudine staminum. Stigma simplex, obtusum.

PER. globosum, styli parte acuminatum, . . .
SEM. . . .

Arbor hæc est procera, comosa, atque elegans. Rami ultimi ad axillas sunt flexuosi, & vestiuntur cortice glabriusculo coloris e cinereo fusi. Folia habet pinnata, alterna; costa tereti & quadripollicari; foliolis absque impari utrinque tribus aut quatuor, lanceolato-ovatis, in

acumen obtusum desinentibus, integerrimis, nitidis, subcoriaceis, venis plurimis oblique adscendentibus, nervo medio subtus prominente ferrugineo, breviter petiolatis, duos tresve pollices longis, pagina interiore ferme duplo angustiore; supremis duobus oppositis, altero ex his non raro deficiente, ut tum pinnata cum impari quis crederet; reliquis alternis. Racemi axillares, solitarii, patentes, stricti, teretes, longitudine pinnarum; dividuntur laxe in pedunculos communes laterales alternos, sesquipolliares, circiter octo: dense quibus insident flores albi, Germen increscens ex applanato in globosum convertitur. Fructum non vidi maturum, de quo consulatur Marcgravius. Ex trunco inciso effluit balsamum illud celebre, quod *Copaiuae* audit. Hujus folius per vitellum ovi aquæ immisi usu interno; una sæpe cum ejusdem meri in urethram injectione, gonorrhœa liberare se aliquibus in locis Americani empirice solent, & plures ipse liberatos vidi: Crescit hæc arbor frequens circa oppidum Tolu triginta distans Carthagena leucis, promiscue cum arboribus illis, quæ balsama Tolutanum, Peruvianum, aliaque fundunt. Peruvianum enim perperam tale vocatur, quod in Peruvia regno nusquam occurrit: sed olim ex Terra Firma istuc translatum, quum tandem e Peruvia in Europam recta portaretur, creditum ab Europæis fuit nasci in Peruvia, atque exinde nomen obtinuit. Hæc ab incolis habui, penes quos sit fides. Mihi desideratas has stirpes conspicere atque examinare, quantumvis vicino, & utcunque cupienti, fors mea negavit.

Vidi hospitantem in Martinica circa vicum Carbet, e Continente olim translatam.

TRIGYNIA.

I. ERVTHROXYLUM (*areolatum*) foliis obverse ovatis.

Linn. syst. 357.

(Pl. americ. piæt. Tab. 129. *Ramulus florens. Dein nux transverse dissepta. Tota drupa.*).

CAL. Perianthium monophyllum, campanulatum, acutum, quinquepartitum, parvum, persistens.

CCR. Petala quinque, ovalia, obtusa, leviter concava, patentissima.

Nectarii squamæ quinque, latæ, basi concavæ, ad apicem incisæ, erectæ, coloratæ, duplo breviores petalis, ad quorum basin accretæ.

STAM. Filamenta decem, filiformia, patentia, longitudine corollæ, basi connexa membrana campanulata & truncata. Antheræ subrotundæ, incumbentes.

PIST. Germen ovale, membrana filamentorum paulo longius. Styli tres, filiformes, patentes, longitudine statim minum. Stigmata oblongo-capitata, obtusa.

PER. Drupa oblonga, obtusa, obsolete trigona.

SEM. Nux oblonga, obtuse quadrangularis, lateribus duodus proximis duplo angustioribus, unilocularis. Nucleus oblongus, compressus.

Arbor duodecimpedalis, ramis diffusis, patentibus, numerosis, strictis, sæpe vel mox supra terram e trunco ortis, cortice vestitis saturate fusco. Materies est e fusco leucophæa & solida. Folia sunt obverse ovata, rarius subrotunda, emarginata, integra, nitida, facie virentia, dorso leucophæa tribusque lineis longitudinalibus basi & apice unitis (interdum absentibus) insignita, alterna, petiolata, sesquipollicaria. Pedunculi uniflori, breves, in ramulis lignosis aggregati. Flores numerosissimi, integras sæpe ramulos obtegentes, diametro ferme semipollicari, petalis candidis, odorem spirantes suavissimum nec multum absimilem Narciso Jonquillæ, at leniorem facileque evanidum. Fructus mollis, ruber, nulli animali, quoad mihi visum fuit, expetitus, succo rubro. Suspicar, esse hanc Brownei Erythroxylum primum, nisi color obstatet materiæ, nunquam ad rubedinem vergentis, quam data opera pluries examinavi.

Crescit passim in maritimis arenosis circa Carthaginem. Floret Aprili, Majo, & Junio.

2. **ERYTHROXYLUM (havanense)** foliis ovatis. Linn. *syst. 357.*

(Pl. A. P. Tab. 130. *Ramulus fructescens*).

Frutex tripedalis, habitu omnino prioris: sed foliis sunt ovata, obtusa, integerrima, subtus lineis nullis notata. Fructus aurantii. Vix arbitror, posse hanc stirpem precedentis varietatem esse.

Crescit Havanae in rupestribus maritimis.

1. **MALPIGHIA (angustifolia)** foliis linearis-lanceolatis,

setis decumbentibus utrinque rigidis; pedunculis umbellatis. *Linn. syst. 356.*

Frutex humanæ altitudinis; foliis acuminatis, oppositis, numerosis; floribus e roseo albentibus; fructu a me non visto.

Crescit in insulæ sancti Martini fruticetis rupestribus. Vidi florentem Junio.

2. MALPIGHIA (*martinicensis*) foliis ovatis, subitus setis decumbentibus rigidis.

Arbuscula hæc præfecte congruit habitu cum Malpighia glabra, a qua solis setis distingui potest, & sapore fructus minus grato; adeoque a Malpighia urente vel solis foliis est distincta. Omnium vero, quæ urunt, congenerum hæc est urentissima. Edules quidem Malpighiæ omnes fructus habent; at solæ glabra urensque in usu receptos. Hujus insuli pueris barbarisque crudi expetuntur; illius aciduli, & sapore quodam singulari prædicti, in saccharo cocti in mensis apponuntur; crudi negligi solent. At ego olim per arenosa maritima Venezuelæ iter faciens, & siti pene exhaustus, ad quam sedandam nulla aqua aderat, una cum duobus sociis copiam ingentem crudorum horum devoravi absque ulla subsecuta noxa.

Crescit in fruticetis Martinicæ.

3. MALPIGHIA (*nitida*) foliis lanceolatis, utrinque glabris; racemis axillaribus. *Linn. syst. 356.*

Arbuscula erecta; foliis oppositis, abeuntibus in acumen obtusum, quadripollicaribus; stylo in flore unico. Semina glabra, plerumque bina.

Crescit Carthaginæ in fruticetis apricis.

4. MALPIGHIA (*diphylla*) foliis ovalibus, glabris; racemis terminalibus.

Frutex erectus, octopedalis. Folia integerrima, opposita. Racemi simplices, bipollicares, in ramulis diphyllis. Flores flavi. Baccæ rubræ.

Crescit Carthaginæ in sylvaticis maritimis.

5. MALPIGHIA (*odorata*) foliis ovatis, emarginatis, utrinque tomentosis; racemis axillaribus.

(Pl. A. P. Tab. 260, fig. 36. *Flos. Fructus Folium.*) CAL. Perianthium pentaphyllum, minimum, persistens: foliolis ovatis, concavis, obtusis, conniventibus.

Glandulæ nectaræ oblongæ, utrinque obtuse, cal-

losæ, binæ cuilibet calycis foliolo subiectæ, quarum quatuor in binas coalitæ.

COR. Petala quinque, reniformi-subrotunda, planiuscula crenata, unguibus longis linearibus imposita; quorum quatuor inter calycis foliola deorsum reflexa, quintum patens.

STAM. Filamenta decem, subulata, æqualia, basibus litiusculis, conniventi-erecta, calyce duplo longiora. Antheræ magnæ, subquadratæ.

PIST. Germen subrotundum. Stylus unicus, subulatus, erectus, longitudine staminum. Stigma bifidum, patens.

PER. Bacca subrotunda, sulco longitudinali circumdata, unilocularis.

SEM. duo, hinc convexa, inde plana, glabra.

Frutex ostopedalis, erectus. Folia obtusa, integriflora, opposita, triplicaria. Racemi oppositi. Flores suaveolentes, odore Lupinum luteum referentes; petalis flavis; stigmate interdum trifido, cum fructu trifulcato seminibusque ternis hinc convexis illinc angulatis. Bacca aurantiæ. Præter has, omnes examinavi etiam Malpighias Linnæanæ, crassifolia excepta: atque inveni, magis minusve modo dato characteri convenire. Discriumen observavi in glandulis calycinis, quæ aut liberæ omnes sunt, vel numero vario coalescent aliquæ. Stylus etiam in aliis unicus, in aliis tres adsunt; in his stigmata perpetuo sunt simplicia, in illo bifidum est vel trifidum, quem numerum sequuntur semina. Bacca in paucis subtriloba, in pluribus sulcata, continet semina vel rugosa vel glabra.

Crescit Carthaginæ in fruticosis.

6. MALPIGHIA (*grandifolia*) foliis lanceolato-oblongis; racemis corymbosif, axillaribus.

Arbuscula decempedalis, erecta, comosa. Folia integriflora, opposita, pedalia. Florum petala flava.

Crescit in sylvis apricis Martinicæ.

7. MALPIGHIA (*altissima*) foliis lanceolatis, subtus ferrugineis, supra glabris, integrifloris; racemis terminalibus, erectis. *Jacq. obs. I, pag. 40 an Aubl. guian. I, p. 455, tab. 181?*

Arbor triginta & plures pedes alta; trunco erecto; coma pyramidali, elegante. Folia sunt late lanceolata;

tres quatuorve pollices longa, acuta, integerrima, glabra, petiolata, facie late virentia, dorso saepe colore ferrugineo tincta. Flores flavi & suaveolentes locantur in racemis longis terminalibus erectisque; unde amoenum nec hippocastano absimile spectaculum arbor praebet. Baccæ flavæ, molles, utrinque depresso, ceraso minores, sapore acido nec grato, ab ipsis hinc incolis fere neglectæ, sed expertitæ ab aviculis. Materies est albida. Ab incolis vocatur *Bois tan*. *five Arbor coriaria*, quia cortex coriis densandus aptus habetur, & forte in usu fuit.

Vidi crescentem ubertim in sylvis circa vicum Roberti in Martinica.

I. HIRAEA (reclinata). *Linn. syst. 356.*

(*Pl. americ. pict. Tab. 260, fig. 37. Folium.*)

CAL. Perianthium pentaphyllum, persistens: foliolis ovatis, planis, obtusis, erectis, parvis.

COR. Petala quinque, æqualia, subrotunda, concava, obtusa, patentissima, unguibus longis insidentia.

STAM. Filamenta decem, subulata, suberecta, apicibus conniventia, alterna longiora calycem ad duplum superantia. Antheræ subrotundæ, erectæ.

PIST. Germen subrotundum, villosum. Styli tres, subulati, suberecti, longitudine staminum. Stigmata bifida, obtusiuscula, patentia.

PER. Capsulæ tres, subrotundæ, dorso auctæ duabus aliis membranaceis maximis subrotundis, uniloculares, non dehiscentes.

SEM. solitaria, subrotunda.

Arbuscula hæc quindecim pedes altitudine raro superat. In ramos dispescitur teretes, longos, lento, glabros, reclinatosque; quibus vicinis se arbustis sustentat. Cortex est cinereus. Folia sunt oblonga, superne paulo latiora, utrinque obtusa, integerrima, subtus glabra, facie villis mollibus decumbentibus & vix conspicuis obsita, tres inter & sex pollices longa; petiolo ad basin ornato stipulis duabus erectis setosisque. Pedunculi communes crassi, brevissimi, numerosissimi, integros & longissimos pulcherrimo spectaculo ramos obsident, abeuntque in apicem per bracteas duodecim semiovales & breves quadrilocularem: pedunculis partialibus unifloris, pollicaribus, solitariis, adeoque quatuor in quolibet pedun-

culo communi. Flores sunt pulchelli, inodori, flavi, diametro pollicari. Planta hæc quum novum genus constitutat, dicta a me fuit *Hiraea* in memoriam Nicolai de la Hire, cujus opuscula physico-botanica extent in Actis regiae Academiæ Parisinæ, & cujas manu plantarum icones singulari arte factæ, & quatuor voluminibus comprehensæ, in Bibliotheca Cæsarea asservantur.

Crescit Carthaginæ in sylvis. Floret Junio. Maturescunt semina Septembri.

PENTAGYNIA.

SPONDIAS.

CAL. Perianthium monophyllum, subcampanulatum, parvum, patentiusculum, corollæ concolor, quinquefidum, deciduum.

COR. Petala quinque, oblonga, plana, patentia.

STAM. Filamenta decem, subulata, erecta, alternatim longiora, corolla breviora. Antheræ oblongæ.

PIST. Germen oblongum, receptaculo immersum. Styli quinque, breves, erecti, orti e circumferentia laterali superiore germinis. Stigmata obtusa.

PER. Drupa oblonga, obtusa, magna, quinque punctis a casu stylorum notata.

SEM. Nux ovata, lignosa, ossea, magna, extus fibrosa, subquinqangularis, quinquelocularis. Nuclei solitarii.

I. SPONDIAS (*Mombin*) racemis paniculatis, terminalibus; costa foliorum terete. *Linn. syst. p. 357, num. 2. Laefl. it. 209.*

Spondias foliis paucioribus pinnatis ovatis nitidis, racemis terminalibus. *Brown. jam. 2, p. 229.*

Prunus brasiliensis, fructu racemoso, ligno intus pro officulo. *Sloan. hist. jam. 2, p. 126.*

Prunus americana. *Merian surin. 13, t. 13.*

Prunifera arbor americana, fructu luteo ovali, officulo majore. *Pluk. alm. 307.*

Arbor nuci juglandi similis quinta seu Hobos. *Bauh. pin. 417.*

Mombin arbor, folio fraxini, fructu luteo racemoso. *Plum. gen. 44.*

Acaja & Ihametara. *Pis. bras. l. 4, c. 16. Marc. bras. l. 3, c. 16.*

Arbor hæc procera atque elegans comam gerit amplissimam, ramosam, & sœpe umbrosam. Cortex cinereus est & rimosus. Materies est albida, levis, non durabilis, suberibus conficiendis focoque instruendo dumtaxat idonea. Folia sunt pinnata, alterna, subfrondosa: costa tereti, pedali: foliolis cum impari ut plurimum obovato-oblongis, abeuntibus in acumen obtusum, glabris, integerrimis, petiolatis, intermediis circiter triplicari- bus, exterioribus utrinque brevioribus. Racemi laxe paniculati, subflavescentes, longitudine foliorum, terminales. Flores numerosissimi, parvi, albidi, sessilesque, calycem habent quinquedentatum acuminatumque; petala sublanceolata, acuta, & patentissima: antheras erectas; stigmata compressa ac bilamellata. Fructus in quolibet racemo floribus istis numerosissimis pauciores succedunt, expositi scilicet ob altitudinem frondis ventorum impeditibus. Sunt hi flavi cum levi interdum mixta rubidine, odorati, tenui pellicula vestiti, volumine ovi columbini, repleti pulpa pauca succulenta & acidula, at nuce prægrandi, a pueris paucisque incolis appetiti, collecti in optimum porcorum pabulum. Rami putati terraque commissi facillime vegetant: unde a nonnullis adhibentur ad instituendas sepes. Una alteraque etiam apud aliquos plantari arbor solet in pascuis, ut confugere in solis summo æstu sub gratam hujus umbram pecus possit. Gallis & Caribæis vocatur *Mombin*, Hispanis *Jobo*, Anglis *Hog-Plum tree* sive *Prunus porcina*.

Crescit in Caribæis omnibus & in vicina Continente.

2. SPONDIAS (*Myrobalanus*) racemis sparsis; foliorum costa compressa. Linn. syst. pag. 356, num. I.
(Pl. americ. pict. Tab. 131. *Ramulus florens. Fructus. Nux, eademque transverse sedata*).

Spondias diffusa, foliis pluribus minoribus pinnatis, pena compressa sulcata, floribus præcocibus. Brown. jam. 1, p. 228.

Myrobalanus minor, folio fraxini alato, fructu purpureo. officulo magno fibroso. Sloan. hist. jam. 2, p. 126, t. 219, f. 3, 4 & 5.

Myrobalanus folio fraxini alato, fructu luteo; officulo magno fibroso. Sloan. hist. jam. 2, p. 125, t. 219, f. 1 & 2.

Prunus americana, ossiculo magno ex filamentis lignosis reticulatim conflato. *Pluk. alm.* 307, t. 218, f. 3.

Arbor inelegans, altitudine pro soli atque ætatis discrimine valde varia, interdum trigintapedali. Cortex crassus. Materies albida, fragilis. Truncus erectus; nisi negligens aut obliqua plantatio, vel calamitas in juventute perlata, situm induxerint procumbentem aliove modo vitiatum. Rami crassi, pauci, fulcrati, inordinati. Folia pinnata, alterna, nitida, plerumque in extremitatibus posita ramorum; quotannis decidua, præcipue maturiscentibus fructibus: foliolis subovatis, integris, vel supra medium serratis, venosis, brevissime petiolatis, magnitudine varia, utrinque circiter decem cum impari. Racemi breves, sine ordine in ipsis quibuscumque ramis idque saepe satis dense positi; quorum interdum loco produnt pedunculi uniflori, biflori, &c. Flores parvi, rubri; in quibus calycis laciniæ sunt obtuse, subrotundæ, & concavæ; petala obtusa, apiceque concava; stigmata simplicia. Fructus cortice plerumque vestiti purpureo, vel & fluvo, aut ex utrisque mixto, pulpam continent dulcem leviterque acidulam, flavam, paucam, sapore præditam singulari nec ingrato, odore suavi. Hi vero figura variant, quum sint oblongi, subovati, apice obtusissimo, aut magna illic appendice aucti. Apud Americanos in pretio sunt, in mensisque non raro apponuntur. Nuclei vix unquam maturescunt; sed adeo facile hæc arbor etales propagatur, ut, si quis fructibus parvulis onustum ramum absindat, terræque imponat, ad perfectam saepe eosdem maturitatem pervenire miretur, & carpere se posse. Hinc Domingenses e putatis ramis sepes construunt, paucos post menses floribus fructibusque spectabiles. Trunko ad altitudinem aliquam amputato, rami exsurgunt (præsertim in humidis locis) absque divisione longissimi, erecti, foliisque sparsis & numerosis per totam longitudinem ornati; ut rei ignaro imponat, ac si esset arbor omnino diversa. Hispanis appellatur *Ciruelo* seu *Prunus*; Gallis *Prunier d'Espagne*, & Anglis *Spanish plum-tree*, sive *Prunus Hispanica*.

Crescit sylvestris in territorio Carthaginensi; inde in Caribæas transportata, frequentissima jam in Domingo; frequens in Jamaica, Curaçao, & sancti Martini insula; raro in plerisque aliis.

I. SU.

I. SURIANA (*maritima*). *Linn. syst. 359.*

Suriana foliis portulacæ angustis. *Plum. gen. 37*, *ic. 249*, *f. I.*

Suriana maritima, foliolis lanceolatis, floribus singularibus, staminibus subhirsutis. *Brown. jam. I*, *p. 190.*

Thymelææ facie frutex maritimus tetraspermus, flora tetrapetalo. *Sloan. hist. jam. 2*, *p. 29*, *t. 162*, *f. 4.*

Arbor americana salicis folio frondosa. *Pluk. alm. 44*, *t. 241*, *f. 5.*

CAL. *Perianthium pentaphyllum*: foliolis lanceolato-ovatis, acutis, planis, erectis, persistentibus.

COR. Petala quinque, ovalia, obtusa, patentia, longitudo fere calycis.

STAM. Filamenta decem, filiformia, erecta, alterna longiora, corollam non superantia. Antheræ subrotundæ, sulcatæ.

PIST. Germina quinque, subrotunda, parvi. Styli quinque, filiformes, erecti, longitudine fere staminum, ortus quilibet ex interiore latere sui germinis. Stigmata obtusa.

PER. nullum. Calyx patens in sinu semina continet.

SEM. quinque, subrotunda, hinc convexa, inde angulata. Frutex tripedalis, erectus, elegans. Lignum rubrum, durissimum. Rami teretes, erecti. Folia oblonga, superne latiora, acuta, integerrima, crassula, mollia, dilute virentia, sparsim & dense ramorum summitates ornantia. Flores inodori; corolla flava caducae; staminibus sœpe aliquot deficientibus, antheris sœpissime, utrisque etiam caducis.

Crescit in littoribus maritimis plerarumque Cari-

bœrum.

DODECANDRIA.

MONOGYNIA.

I. RHIZOPHORA (*Mangle*) pedunculis bifidis trifidis-

ve; fructibus subulato-clavatis. *Linn. syst. 368.* (*Pl. americ. piæt. Tab. 132.* *Ramulus florens cum a b per-*

carpio ferme adulto, cuius apicem b penetrare semen d

M

jam coepit abcd rotus maturae fructificationis apparatus, in quo ab est pericarpium calyce coronatum; bc cruris pars infima ultra pericarpium elongata; cd semen proprio dicendum. ef c est crus, cuius caput ef occultatur in calyptra g, cavitas autem conica c excipit sumnum apicem acutum bc seminis. i est membrana illa subcornea, qua muniuntur extremitates radicum ab arbore descendantium versus terram).

Rhizophora utrinque brachiata; foliis elliptico-ovatis, summis ramis dispositis. *Brown. jam. I, p. II.*

Mangles aquatica, foliis subrotundis & punctatis. *Plum. gen. I3.*

Mangle pyri foliis, cum siliquis longis, sicu*i* indicæ affinis. *Sloan. hist. jam. 2, p. 63.*

Mangle arbor pyrifolia, fructu oblongo tereti, summis ramis radicosa. *Pluk. alm. 24I, t. 204, f. 3.*

Mangue Guaparaiba. *Pis. bras. l. 4, c. 87.*

Candela americana, foliis laurinis, flore tetrapetalo luteo, fructu angustiore. *Catesb. car. 2. p. 63, t. 63.*

CAL. Perianthium monophyllum, coloratum, profundè quadripartitum, persistens: laciniis lanceolatis, acuminateis, coriaceis, interne longitudinaliter notatis linea protuberante, patentibus.

COR. Petala quatuor, linear-lanceolate, acuminata, plana, interne hirsutissima, reflexa inter lacinias calycis, quibus paulo breviora, caduca.

STAM. Filamenta omnino nulla. Antheræ octo semper linear-lanceolatae, acuminatae, æquales, erectæ, corolla breviores, caducae.

PIST. Germen subrotundum. Stylus subulatus, longitudinaliter utrinque sulcatus, erectus, semibifidus, longitudine staminum. Stigmata simplicia, acuta.

PER. ovato-oblongum, carnosum, crassum, versus inferiore coronatum calycis laciniis decoloribus reflexisque, apiceque perforatum pro semine transeunte, cuius tantum basin continet

SEM. unicum, omnium longissimum, carnosum, teres, acuminatum, versus apicem sensim crassescens.

Arbor hæc quinquaginta pedalem altitudinem plerumque attingit; cuius materies albida, in aquis macerata rubescens, focoque instruendo dumtaxat utilis, cortice

vestitur ferrugineo, crasso, coriisque condensandis aptissimo. Folia habet ovata, apice attenuata leviter, obtusa, integerrima, nitida, coriacea, facie saturate virentia, dorso e flavescenti viridia punctisque nigricantibus adspersa; petiolata, opposita, a tribus ad sex pollices longa; in ramulis junioribus, qui floribus carent, duos circiter pollices ab invicem distantia; in arbusculis junioribus saepe vel ad semipedale internodium; in ramis senioribus & floriferis magis vicina, in valde adultis ferme frondosa. Quælibet bina folia ante explicationem involvuntur binis bracteis oblongis, convolutis, erectis, post eorundem eruptionem marcescentibus breviisque cædentibus; relictis in ramulo cicatriculis duabus cum foliis alternantibus: unde ceu gemmifera spectari hæc arbor potest. Pedunculi communes axillis insident solitarii, pollicares, compressi, fulco longitudinali exarati, biflori, bifidi; interdum triflori & obsolete trigoni: propriis teretibus & semipollicaribus. Illi vero in fructibus ad duos pollices ultraque elongantur. Flores sunt saepius inodori, interdum leviter suaveolentes; calyce flavescenti; petalis candidis; antheris perpetuo otonis, basi elastice bifariam secendentibus, hinc valde caducis.

Quum vix aliud in plantarum historia mihi videtur examine & attentione dignius Botanici, quam arboris hujus, adeo in omnibus peregrinatorum itinerariis ob singularem crescendi modum celebratae, fructus; atque inde etiam considerans, vix sperandam Europæo, si non per egre, ejusdem ocularem inspectionem; haud abs re factum me esse, arbitror, descriptioni & indagini hujus si immorer diutius.

Totus quantus apte dividi fructus potest in quatuor partes, re vera quidem distinctas, sed mutuo cohærentes: videlicet in *Pericarpium*, *Crus*, *Calyptram*, & *Semen* proprie dicendum. *Pericarpium*, quod non receptaculum, sed ipsa re tale est, propterea quod ex hoc in flore stylus oriatur, quando de semine nihil adhucdum apparet, est corpus ex ovato oblongum, carnosum, pollice longius, externe fuscum & scabriuscum, ore utrinque styli parte divisa coronatum, interne ad basin usque cavum. *Crus* est corpus subcylindricum, nitidum, paleide virens, vix sesquipollicare, pericarpio tamen semper

longius, attenuatum superne in collum, hinc terminatum in caput incurvum obtusum & ex luteo aurantium, interne excavatum in conum acuminatum pertingentem ad collum usque, cuius est superficies candida nitidaque. Constat autem e fibris albidis longitudinalibus & tenerioribus, capite excepto, in cuius substantia fibræ nullæ apparent. *Calyptra* est corpus difforme, campanulatum, cavum, aurantium, substantiæ glandulosæ teneræque, capiti cruris pilei ad instar impositum; limbo in fimbriam terminato integrum, qua collo ejusdem adnectitur; gibbosam partem cavitatis pericarpii replens exacte. *Semina* est pars fructus illa maxima, teres, pollices decem ut plurimum longa, ponderosa, in parte crassiore æquans digitum, plus minus arcuata, saturate viridis, ad apicem rubescens, interdum ex atro rubens tota, in apicem defens conico-subulatum, hinc pericarpium versos sensim facta gracilior, tandemque definens in conum acuminatum, qui cavitati cruris respondet. Sapor ejus est adstringens. *Cortex* est fragilis, lineam crassitie æquans, & interne albicans. *Medulla* constat fibris longitudinalibus numerosis, dissectioni transversæ resistentibus quam maxime, albis, ad liberi aëris attactum rubentibus, omnemque habentibus ligni junioris similitudinem. *Cortex* ad extremitatem cruri contiguam ex abrupto definit in marginem albicantem; medulla autem continuatur abitque in conum modo dictum viridem, qui ex foliolis aliquot componitur platicatis convolutis facillimeque explicandis. Utrinque ad hunc adstant (quæ sœpe etiam desiderantur) foliola duovirentia & ex ungue longo terminata in bracteam subrotundam conumque amplexantem. Etsi vero conus iste intret ad impletione cavitatem cruris, liber tamen est ab ejusdem pariete interno; at utriusque limbi invicem adnectuntur per tubercula minima sinusque correspondentes. Hæc articulatio, si ita appellare licet, cohaesionem liceat, eo evadit debilior, quo ad maturitatem proprius accedit semen: cuius rei fortasse causa est inducta pedentim excissio partium.

Corpus igitur cruris videtur succum nutrititium habere mediante calyptra; quæ, upte conflata ex substantia glandulosa succoque plena, infervire quoque præparandis & perficiendis succis ad seminis incrementum necessaria.

riis credi potest. Hanc certe omnium partium primam sub exigui globuli forma conspicere licet in fundo discissi germinis in flore; quando ne vestigium quidem sive cruris sive seminis detegi microscopio potest. Ex floris receptaculo & germine trans calyptam in cruris caput, hinc per ejusdem corpus ad limbum usque delatus succus nutritius, per limbum seminis correspondentem pergit. Nam si immaturum semen e cruris extrahitur cavitate, soli utriusque contigi limbi succum illico extillant subrufum, qui in maturis vel maturitati proximis fructibus siccii deprehenduntur.

Jam pericarpium incrementum dimidium acquisivit, instruiturque adhuc stylo integro, quando prodire foras semen incipit. Scilicet ex ipsius apice emergit mucro viridis, qui paulatim increscens eum ita findit, ut absque ruptura crassitie semper æquet factum foramen, lenti incrementi indicio. Stylus tunc ipse etiam bifariam secat, at sectione fulco suo divisionique propriæ contraria; unde pluralitatem stylorum in fructu falso quis suspicaretur. Stylus sic divisus perstat exsiccatus. Semine requisitam longitudinem fere adepto, pericarpio tandem aliquando egreditur crus; forte quia, negante semine ulteriore in tunc æquali copia succi admissionem, impulsu ejusdem majorum in se actionemque experitur; quibus fit, ut elongetur. Etsi enim cruris caput, calyptra sua obvolutum, in fructu vix tripollicari ad debitum jam pervenire volumen soleat, corpus tamen ejusdem collumque adhuc per exigua sunt, conspiciturque seminis conus brevissimus capiti, cui foveolam tantum imprimit, fere contiguus. Porro ex institutis attente observationibus collegi, a floris fecundatione ad perfectam fructus maturitatem annum ferme elabi. Primi mensis spatio germen in medio flore pīsum vix æquat; rūdior evadit calyx viridiorque; petala & stamina absunt; cæterum hos vix mutatur. Tertio mense prodit seminis apex, qui per duos menses parvus persistit, donec adolevit pericarpium. Protrudi pergit deinde semen singulis mensibus circiter ad sesquipollicem. Currente decimo crus in conspectum venit; caditque circa duodecimum maturum semen.

Quando radicibus agendis fructus est idoneus, sponte a partibus reliquis descriptis semen separatur, atque ex

arbore dilabitur. Illæ post paucos dies etiam decidunt, pedunculo communi a ramo soluto. Vidi interdum, cecidisse in terram semen pericarpio crurique adhucdum innoxum; quod aut ab avibus aut a vi alio quoque modo externe illata contigisse, arbitror: tuncque germinasse quidem seminis conum deprehendi, verum semper a comprimentibus partibus læsum pessimeque habentem, ac forte peritum. Porro facile patet, semen hoc ex arbore dilapsum subulato apice suo terræ impingere necessario debere, idque aut perpendiculariter, aut suboblique, nisi quid impedimenti casu accidat. Situs enim in ipsa arbore dependentis perpendicularis est ad terram, pondusque ad apicem gravius eodem ultro tendit in lapsu. Si dein consideretur solum ejus natale paludosum limosum & aquos crebro submersum, adeoque molle & resistentiæ levis, non mirum videbitur, infixum terræ ad pollicis circiter altitudinem hærere, & sic radices emittere posse, quibus se sustentet firmius. Quædam vidi in ipsas cecidisse aquas tres quatuorve pedes profundas, earundemque fundo inhaesisse: verum ibine etiam crescere perrexerint, ignoror in aqua semipedali abiisse in arbores, scio.

Seminis igitur apex, solo infixus, brevi e suis lateribus emittit radices paucas, fibrosas, lentes, atque horizontales. Marcescunt, caduntque bractæ duæ, qui copartem constituebant exteriorem; atque etiam illa, qua adstabant huic utrinque foliola. Conus vero protrudit in ramulum pollicarem, superne ornatum foliis binis sequipollicularibus gemmaque intermedia consimili: atque ita crescere pergit. Fructus igitur ille subulatus futuræ arboris verus truncus est. Radices tempore lignosæ evadunt &, sive has alluens perpetuo transiensque mare, limum arenasve alio abripiendo, causa sit; sive re ipsa radices sursum æque ac deorsum in incremento elongentur; post paucos menses solo altiores arcuumque in modum sustentare arbusculæ truncum elevatum & a tellure remotum conspicuntur. Seminis jam vegetantis pars infima valde est arcuata sæpe; quod fieri; credo, quando oblique ad modum terræ illapsum, radicibusque jam actis veluti firmatum, solis aërio vi attrahente sua erigit; unde incurvari oportet inferne.

Vixdum bipedalem vel tripedalem altitudinem at-

git, ramulisque ornata aliquot comam formavit; quin e trunco, loco prioribus paulo altiori, novæ radices prorumpant, quæ terram versus arcuatæ, eidemque tandem immisæ, nutriendæ & fulciendæ arbori inserviant. Eodem modo ad duodecimum usque pedem vulgo pergere solet, quando apparet sylva radicum e trunco ramisque senioribus ad quinquepedalem altitudinem ortarum. Ad hanc ætatem perrecta arbor radices paucas emitit; sed incipit tunc suam quaquavorsum comam extendere, & in ramis scilicet proferendis esse tota. Tandem etiam ex ramis vel altissimis radices, absque situ determinato ramosas ipsas, & aliquando terram ingressuras, generat; quæ omnes, sicuti etiam præcedentium plurimæ, ortæ ad angulum circiter octoginta graduum five recto paulo minorem, primo recta tendunt, dein proprio pondere incurvantur versus solum. Sunt autem hæ radices teretes, ferrugineæ, primo fragiles, dein lenta & firmæ, cortice crassio, medulla fibrosa; quarum apex obtusus tegitur membrana campanulata, subcornea, nigrante, sub terra discedente. Pereunte autem a contusione vel fractura hoc apice, protrusio ulterior impedita cessat; sed unius loco supra partem læsam emergunt tres quatuor pluresve radicum rami novi.

Ex dictis colligi potest, quam densas & quam vastas sylvas in incultis inundatisque littoribus constituere hæ arbores tempore valeant; quamque præbeant stupendum Europæis spectaculum? His proxime pernoctare, ne dicam habitare, ob pessimorum cylicum horrendam frequentiam, Europæo in summam pœnam cedere posset, etsi moderate id barbari ferant; in ipsis autem mediis sylvis vix est, qui perpetetur. At has incolunt ardeæ numerosæ, fulicæ, aliæque id genus aves. Ibi cancrorum agmina inventre est. Intexta radicum infimarum compages stabile ac firmum solum præbet assueto barbaro venatori, ut gradi super limo & undis absque periculo possit. Arcubus radicum mare spectantium submersarumque accrescunt jastrata illa in itinerariis ostrea, quæ feruntur arboribus innasci, non minus avide ab Americanis omnibus expetita comedantque quam ab Europæis sua. Fructus adhibentur æque ac cortex ad condensanda coria. Hispanis dicitur *Mangle*, Anglis *Mangrove*, Gallis *Paletuvier* & *Mangle*.

Crescit in Caribæis vicinaque Continentē copiosissime.

I. BOCCONIA (*frutescens*). Linn. *syst.* 367.

Bocconia ramosa, *sphondylii folio tomentoso*. *Plum. gen.* 55. *Trew. Ehr.* t. 4.

Bocconia ramosa, *foliis majoribus sinuatis*, *racemis terminalibus*. *Brown. jam. I*, p. 244.

Chelidonium majus arboreum, *foliis quercinis*. *Sloan. jam. I*, p. 195, t. 125.

Cocoxihvitl. *Hern. mex.* 158.

CAL. *Perianthium diphyllum*, *caducum*: *foliolis oblongis*, *obtusis*, *fornicatis*, *totis reflexis*.

COR. nullā.

STAM. Filamenta duodecim vel sedecim, capillaria, brevia, pro florū sitū pondus antherarum sequentia. Antheræ lineares, obtusæ, maximæ, longitudine calycis.

PIST. Germen ovale, compressum, pedicellatum, longitudine calycis. Stylus crassus, erectus, jam ante floris explicationem calycem penetrans, eodemque longior. Stigma bifidum, reflexum, acutum.

PER. & SEM. . . .

Arbuscula novempedalis. Truncus inæqualis, cavus, medulla repletus Sambuci instar alba, ligno scatente succo rufo, qualis in *Chelidonio*, superne dividitur in ramos paucos, teretes, fragiles, & a casu foliorum cicatricibus refertos. Folia sunt pinnato-laciniiata, subtus tomentosa, semipedalia, petiolata, alterna, subfrondosa: lacinia ovato oblongis, acutis, leviter & inæqualiter serratis, exterioribus majoribus. Panicula pedalis, axillaris in cuiusque rami extremitate unica, onusta floribus numerosissimis, virescentibus, calyce clauso obverse ovatis. Quæ in iconē Flumieri petala creduntur, sunt stamina quatuor post reliquorum lapsum residua. Hæc autem in flore clauso semper numeravi duodecim vel sedecim, & rarissime inter utraque, pauciora autem vel plura nunquam. Fructum maturum ego non vidi: super quo consulatur Ehreti apud Trewium tabula.

Crescit in Cuba, Domingo, & Jamaica. Vidi florētem Octobri & Januario.

I. TRIUMFETTA (*Lappula*) floribus calyce destitutis. Linn. *syst.* 369.

Triumfetta fructu echinato racemoso. *Plum. gen. 40,*
ic. 255.

Agrimonia lappacea inodora, folio subrotundo dentato.
Sloan. hist. jam. I, p. 211.

Lappula bermudensis althæoides spicata, fructu orbiculari
majore. *Pluk. alm. 206, t. 245, f. 7.*

Frutex octopetalis, ramosus, erectus. Flores calycis
vestigium omnino nullum habent.

Crescit in Martinica ad ripas torrentum fruticosas.

2. TRIUMFETTA (*semitriloba*) floribus calyculatis; fo-
liis semitrilobis. *Linn. syst. 369.*

(*Pl. americ. pict. Tab. 133. Ramus florens. Tum ramu-*
lus fructescens).

Triumfetta villosa, foliis inferioribus angulato-ovatis, fer-
rato-dentatis, floribus ternatis: fasciculis geminatis,
foliis suboppositis *Brown. jam. 2, p. 233.*

Frutex sexpedalis, erectus, ramosus. Flores per-
petuo calyculati. Adeo præcedenti quoad habitum similis,
ut primo adspicere confundi possent. Utramque plenius
describere neglexi.

Crescit in Caribæarum fruticetis.

3. TRIUMFETTA (*rhomboidea*) floribus calyculatis; fo-
liis rhombo-ovatis.

(*Pl. americ. pict. Tab. 134. Ramus florens*).

CAL. *Perianthium pentaphyllum, deciduum: foliolis li-*
nearibus, acuminatis, apice cuculatis, coloratis, re-
flexis.

COR. *Petala quinque, oblonga, basi attenuata in unguem*
pilosum brevem, obtusa, plana, calyce pauxillo bre-
viora.

Glandulæ nectaræ quinque, globosæ, sitæ ad peta-
lorum basin.

STAM. *Filamenta quindecim, subulata, erecta, longitu-*
dine calycis. Antheræ subrotundæ, incumbentes.

PIST. *Germen subrotundum. Stylus filiformis, erectus,*
longitudine staminum. Stigma simplex, acutum.

PER. *Capsula globosa, aculeis uncinatis undique obvalla-*
ta, sexlocularis.

SEM. *solitaria, ovata, hinc convexa, inde angulata.*

Frutex tripedalis, erectus, ramosus, totus ingrato
odore præditus, præcipue autem semina. Rami subdi-

chotomi. Folia alterna, subsessilia, serrata, acuta, integra, rugosa, villosa, suprema minus rhomboidea. Flores numerosissimi, petalis flavis, calycibus rubentibus in pedunculis multifloris brevissimis, axillaribus, aggregatisque; hinc verticillati. Sæpe in pericarpis loculum aliquod deficit; sunt tamen sexlocularia pleraque. Gallis dicitur *Cousin* sive *Consanguineus*; eo quod fructu maturi tibialibus vestibusque prope ambulantium adhaerent. Differt a *Triumfetta Bartramia* foliis non angulatis.

Crescit in Martinicæ pratis fruticulosis.

1. PORTULACA (*triangularis*) foliis obverse ovatis, planiusculis; racemo simplici, triquetro. *Linn. syst. 370*.
(*Pl. americ. Piæt. Tab. 135. Ramus florens.*)
Helianthemum frutescens, portulacæ folio. *Plum. in 150, f. 2.*

Planta fruticosa, bipedalis. Caules teretes, inferne lignosi, glabri, ramosi, procumbenti-erecti. Folia oblonga vel subovata, basi attenuata, nitida, crassula, emarginata enim acumine, convexa vel plana, lateribus sepa revolutis, fragilia, alternatim sparsa. Pedunculi ad minus biflori, erecti, triangulares, terminales. Flores inodori, calyce bifido, petalis luteis, pulchelli. Capsula perpendiculariter trifariam dehiscit.

Crescit in rupestribus maritimis Caribæarum.

2. PORTULACA (*paniculata*) floribus paniculatis. *patens*
Linn. syst. 371.
(*Pl. americ. piæt. Tab. 136. Caulis florens.*)

Planta fruticosa. Caules teretes, inferne lignosi, glabri, fragiles, suberecti. Folia ovalia, utrinque acuta, crassa, ad tactum pinguia, integerrima, petiolata, alterna, inferiora tripolligaria, superiora sensim minora. Panicula pedalis, effusa, erecta, terminalis. Flores parvi, numerosi, rubentes, inodori. Calyx bifidus, concavus. Petala patentissima, concava. Stamina ad minus quatuordecim, corollam æquantia. Stigmata tria, crassiuscula. Capsula subrotunda, obsoleta trigona, perpendiculariter trivalvis. Cætera, ut in charactere Linnæano

Crescit in rupibus maritimis Martinicæ & Domingo.
3. LYTHRUM (*carthaginense*) foliis oppositis, lanceolatis, petiolatis, scabriusculis; floribus dodecandris.

Planta annua, erecta, pedalis vel semipedalis; cau-

libus teretibus pilosisque. Folia utrinque attenuata, acuta. Flores parvi, plerumque solitarii, laterales. Calyx pilosus. Corolla purpurea. Filamentum sœpe aliquod desideratur. Semina quatuor, subrotunda, compressa. Habitus omnino congenerum.

Crescit Carthagenaæ in sylvis umbrosis & humidulis.

I. GINORIA (*americana*). Linn. *Syst. 372.*

(*Pl. americ. piæ. Tab. 137. Ramus florens cum fructu*).

CAL. Perianthium monophyllum, persistens. Tubus campanulatus. Limbus sexfidus: laciñis lanceolatis, acuminatis, patentissimis, subcoloratis, tubo paulo longioribus.

COR. Petala sex, subrotunda, patentissima, calyce duplo longiora, ungue longo inserta superiori parti tubi calycini.

STAM. Filamenta duodecim, subulata, patula, longitudine calycis, cuius tubo infra petala inserta. Antheræ magnæ, reniformes.

PIST. Germen subrotundum, depresso. Stylus subulatus, erectus, longitudine corollæ, persistens. Stigma obtusum.

PER. Capsula depresso-subrotunda, colorata, nitida, obsoleta quadrisulcata, unilocularis, quadrivalvis, ab apice dehiscens.

SEM. plurima, parva. Receptaculum subrotundum, maximum.

Elegantissimus hic frutex ad trium quatuorve pedum altitudinem erectus adscendit. In ramos dividitur teretes, glabros, ad ortum ramuscilorum foliorumque compresos, lignosos omnes. Folia habet lanceolata, acuta, integriformia, glabra, patentia, petiolis donata brevissimis, opposita, sesquipollicaria, numerosa. Pedunculi sunt uniflori, tenues, patentes, solitarii, pollicares, axillares & terminales. Flores inodori, pulchri, diametro fere pollicari; calyculum habent rubentem; corollam cœruleam; capsulam atrorubentem, quæ baccam externe mentitur nitidissimam; semina albicantia. Capsula cum calyce & stylo vel styli parte post seminum demissionem diu integra persistit. Incolis vocatur *Rosa del rio* sive *Rosa fluvialis*. Novum hoc plantæ genus nominavi in memoriam illustrissimi Marchionis Caroli Ginori in Hetruria Liburni, dum

viveret, pro Cæsare Gubernatoris, &c., viri in Historiam Naturalem propensissimi; in quo cives perdiderunt patrem, litterati fautorem, ego benefactorem atque amicum. Maximis suis hic impensis Florentiae hortum adornavit, plantis exoticis rarissimis superbientem. quem augere indies nunc pergit filius isto patre dignissimus Maricio Laurentius Ginori.

Crescit ad ripas fluviorum rupestres & glareosas in Cuba. Flores & fructus maturos decerpsti Decembri.

TRIGYNIA.

L. EUPHORBIA (*Tithymaloides*) inermis, fruticosa; foliis distiche alternis, ovatis. Linn. syst. 374.

Pl. americ. pict. Tab. 138. Ramus foliosus. Tum rambulus florens).

Tithymalus curassavicus myrtifolius, flore coccineo melifluso. Herm. parad. 234, t. 234.

Tithymalus curassavicus myrtifolius, flore papilionaceo parvo. Comm. hort. I, p. 31, t. 16. Pluk. alm. 369, t. 230, f. 2.

Tithymaloides laucocerasi folio non ferrato. Dill. eth. 383, t. 230, f. 372.

CAL. Perianthium diphyllum, bivalve, caducum: foliolis ovatis, concavis, acuminatis, corollæ concoloribus.

COR. monopetala, irregularis, quadripartita. Lacinia superior subtriangularis, emarginata, obtusa, incumbens. Duæ laterales oblongæ, obtusæ, antrorsum productæ, conniventes, duplo longiores superiore. Quarta minima, oblonga, obtusa, inter laterales sub superiori posita.

Glandulae nectaræ quatuor, subrotundæ, sitæ in gibbo cavo corollæ, a lacinia superiore & parte lateralium concreta efformato; quarum duæ ad basin adstant lacinia superioris, reliquæ prorūm claudunt latus

STAM. Filamenta circiter sedecim, subulata, inæqualia, situ corollæ, qua quædam longiora. Antheræ subrotundæ, didymæ.

PIST. Germen ovatum, triquetrum, a pedicello longissimo extra corollam dependens. Stylus subulatus, unicus, germine longior, persistens. Stigmata tria, reflexa, semibifida.

PER. Capsula subrotunda, a pedicello dependens, tricocca, trilocularis, trivalvis: loculis elasticis, bivalvibus.
SEM. solitaria, subrotunda.

Planta fruticosa, virgata, suberecta, sexpedalis, tota scatens lacte niveo amariuscule & abundanti. Caules numerosi, teretes, glabri, debiles, lentissimi, ramosi, pollicis aut digiti crassitie, seniores cinerei, juniores virides. Folia sunt ovata, obtusa vel acuta, coriacea, integerrima, alterna, petiolata, disticha, saturate virentia, duos tresve polices longa, quattuor tannis decidua, dumtaxat in ramis virentibus, nervo medio dorsali petioloque auctis lamella longitudinali magis minusve undulata & conspicua; in principio saepe utrinque tomentosa, at facie levissime, marginibusque quam maxime undulatis; tandem semper utrinque plana glabraque. Pedunculi uniflori, breves, circa ramulorum extremitates aggregati, erumpunt praesertim, quando foliis planta destituitur. Flores inodori, pulchre coccinei, calceiformes, structura sua singulariter merentur forte distinctum genus, et si plura habeant cum Euphorbiis communia. Calyx in ipsa jam floris explicatione decidit. Plantæ totius, præcipue caulum, saturatum decoctum a medicis Curaçaviensibus pro potu ordinario dosique arbitraria prescribitur lue venerea laborantibus. Eodem in Continente utuntur Americanae in menstruorum suppressionibus. In caldariis Viennensisibus late vegetat, & propagatur e taleis; at flores nedum protulit.

Crescit in variis Caribæis & in Continente vicina; locis saxosis fruticosis, plerumque a mari haud remotis. Vidi florentem Aprili, Junio, & Julio.

2. EUPHORBIA (mesembryanthemifolia) inermis, fruticosa; caulis inferne nudis, superne ornatis foliis ovatis, integerrimis.

Planta lactescens, erecta, lignosa, vix pedalis. Folia opposita, crassa, glabra, parva, numerosa, imbricatim ad caules posita, quos superne totos obtegunt. Neglexi hanc plantam, uti & congeneres subsequentes, plenius describere.

Crescit Carthagena in rupestribus maritimis.
3. EUPHORBIA (bombensis) dichotoma; foliis oppositis, oblongis, integerrimis, obtusis cum acumine; floribus solitariis, axillaribus; caule prostrato.

Planta herbacea, annua, procumbens, lactescens, ramosa, circumferentia pedalis. Folia e rubro virentia, crassula, quadrilinearia. Flores axillares, & in caulum dichotomia, solitarii.

Crescit in arenosis maritimis circa Carthagena.

4. EUPHORBIA (*graminea*) dichotoma; foliis lanceolato-ellipticis, petiolatis, integerrimis; pedunculis dichotomis; caule erecto. Linn. syst. 375.

(Pl. americ. Pict. Tab. 139. *Ramus florens. Dein calyx corollifer discissus & expansus*).

Planta herbacea, lactescens, erecta, debilis, tota viridis & dichotoma, tenella, duos tresve pedes alta. Folia lanceolata, acuta, nitida, sesquipollucaria, pauca, petiolis donata pollicaribus. Pedunculi communes terminales, dichotomi, erecti, tenues. Calyx campanulatus, interne hirsutus. Petala duo, subrotunda, integerrima, alba. Capsulae nitidæ, glabræ, parvæ.

Crescit Carthagena in locis gramineis uidis.

5. EUPHORBIA (*obliterata*) umbella trifida; foliis oblongis, serratis, altera baseos parte oblitteratis.

Planta caulis hirsutis, lactescientibus; foliis apie attenuatis.

Crescit Carthagena in arenosis maritimis.

ICOSANDRIA.

MONOGYNIA.

I. CACTUS (*Pitajaya*) triangularis, erectus. Linn. syst. 382.

Planta hæc habitu cum sequente convenit; at eretum se sustinet ad altitudinem octo decemve pedum; altior vero vicinae arboris fulcro indiget, nec tamen radiculas in decursu emittens; adeoque distincta a triangulari species. Flos nocturnus, vix odorus, pulcherrimus, albido, diametro semipedali; calyce octo pollices longo. Fructus figura & magnitudine ovi gallinacei, externe totus coccineus nitidusque, auctus foliolis aliquot calycinis præmorsis Pereskiae adinstar: pulpa candida, carnosa, dulci, eduli, referta seminibus exiguis atris nitidisque. In-

colis *Pitajaya* dicitur. Verbo hic addam, quotquot vidi in America Cactos, omnium esse fructus edules, paucos palato Europæo gratos.

Crescit Carthaginæ in fruticetis maritimis; copiose in insula Mango. Floret præprimis Julio Augusto & Septembri; fructus primos dat maturos Octobri.

2. CACTUS (*triangularis*) triangularis, repens. Linn.
syst. 383.

a. (*aphyllum*) fructu aphylo, acidulo.

Arbores hæc planta ad magnam altitudinem scandit, radicibus emissis se affigens; nec absque fulcro sustinere se potest. Rupes etiam umbrosas investit. Fructus inter omnes congeneres sapore præstantissimus, cum dulcor acidulus, gratus, refrigerans, figura præcedentis, sed, foliorum loco, solis cicatricibus inæqualis. Martinicensibus, apud quos in pretio est, vocatur *Poirier de chardon* sive *Pyrus cardui*.

Crescit in sylvis Martinicæ montosis.

b. (*foliosus*) fructu folioso, fatuo.

(Pl. americ. pict. Tab. 260, fig. 38. *Fructus.*)

Varietatem constituere præcedentis opinor hanc plantam; cuius est fructus multo major, nitide coccineus, foliolis vestitus fere integris; pulpa candida, subdulci, fatua, eduli, referta seminibus atris nitidisque.

Crescit in insula sancti Bustachii.

1. EUGENIA (*Pseudopodium*) foliis integerrimis; pedunculis unifloris, pluribus, lateralibus & terminalibus.

Linn. syst. 384.

(Pl. americ. pict. Tab. 140. *Ramus fructescens. Semen.*)

Arbor erecta, vigintipedalis, habitu haud absimilis Pyro Europæo juniori. Folia sunt ex lanceolato ovata, apice acuminato falcatoque, integerrima, nitida, breviter petiolata, opposita, lète virentia, tres quatuorve pollices longa. Pedunculi uniflori, pollicem superantes, aggregati Calyx profunde quadripartitus. Petala alba. Fructus globosi, e virore per flavedinis varios gradus ad ruborem coccineum maturando transeuntes, diametro vix semipollicari: pellicula tenui; carne molli, dulci, rubra, Semen globosum, magnum. Ab incolis ob fructuum similitudinem aliquam appellatur *Goyavier batard* sive *Psidium spurium*.

Crescit in sylvis montosis Martinicæ. Flores Octobri, fructus fert Decembri & Januario.

2. EUGENIA (*carthagagenensis*) foliis integerrimis; pedunculis ramosis, axillaribus.

(Pl. americ. pict. Tab. 260, fig. 39. *Folium. Semen*).

Arbuscula erecta, ramosa, tripedalis vel altior. Folia habet ovata, attenuata in acumen obtusum, glabra, coriacea, integerrima, breviter petiolata, opposita, quadripollaria, graveolentia. Pedunculi communes breves sunt & multiflori. Flores leviter odorati, diametro quadrilineari; calyce rubescente, profundissime diviso in lacinias subrotundas; petalis obverse ovatis & candidis; antheris subrotundis ac quadrifalcatis. Fructus sunt globosi, pisi magnitudine, primo rubentes, dein atri; pulpa paucitandem exsiccata. Hispanis dicitur *Cimbrarera*, eo quod rami lenti mulionibus prætereuntibus suppeditent virgulas, quibus instigent mulas.

Crescit Carthagena in sylvaticis.

3. (*baruensis*) pedunculis partialibus elongatis.

Præcedentis credo varietatem. Folia sunt in hac multo minora; & pedunculi communes omnium brevissimi: partiales autem pauci fereque semipollares.

Crescit in sylvaticis maritimis insulae Baru.

γ. (*myrtifolia*) pedunculis partialibus brevissimis, numerosis.

Et hanc pro varietate ejusdem habui: quod tamen afferere certo ne neutra ausim. Habitu foliorum non male refert Myrtum latifoliam. Pedunculi communes sunt circiter quadrilineares; partiales autem brevissimi, sed numerosi; ita ut videantur flores haud injucundo specieulo in omnibus esse axillis verticillatim positi.

Crescit Carthagena in collibus sylvaticis.

1. MYRTUS (*triflora*) foliis alternis; pedunculis trifloris. (Pl. americ. pict. Tab. 261, fig. 49. *Folium. Flos. Pedunculus florifer post petala delapsa*).

CAL. Perianthium tetraphyllum: foliolis subrotundis, concavis, obtusis, patentibus, subcoloratis, germini impositis.

COR. Petala quatuor, obverse ovata, obtusa, calyce duplo longiora, semirevoluta.

STAM. Filamenta numerosa, filiformia, inæqualia, ereta, totam

totam germinis supremam aream occupantia, petala non superantia. Antheræ quadratae, incumbentes.

PIST. Germen obverse ovatum, superne abiens in superficiem planam amplam & subquadranglem. Stylus subulatus, erectus, staminibus paulo brevior. Stigma acutum, inflexum:

PER. & SEM.

Arbor alta, habitu simili Lauro nobili. Materies durissima. Folia oblonga, basi attenuata, emarginata, integra, nitida, coriacea, facie saturate virentia, dorso & viridi cinerea, petiolata, alterna; octopollicaria, trita odorem spirantia aromaticum & graveolentem. Ex axillis pedunculi prodeunt triflori, teretes, semipollicares, sèpius terni. Flores sessiles, diametro octolineari, odorem suavissimum at lenissimum Hyacinthi Orientalis spifant; bracteis vel calyce germinis nullis; petalis flamantis styloque candidis; antheris flaviusculis; germe calyceque e viridi albentibus. Fructum haud vidi, quum abortarunt flores, quos observavi, omnes.

Crescit frequens Carthagena in sylvis. Floret Julio Augusto & Septembri.

2. MYRTUS (*caryophyllata*) pedunculis trifido-multifloris; foliis obverse ovatis Linn. syst. 385.

Caryophyllus aromaticus Indiæ occidentalis, foliis & fructu rotundis. Pluk. alm 188; t. 155, f. 3.

Merito de præstantia certare hæc Myrtus cum elegantissimis arboribus potest. Ex Indiis Orientalibus olim advecta in quædam Caribæas fuisse dicitur; unde ortum, quod hodiecum apud Gallos obtinet, Bois d'Inde sive Arboris Indicæ nomen creditur. Increscit lente; ac floret tarde, idque bis in anno. Aetate acquirit crassitatem & altitudinem plus quam mediocrem. Truncus speciosus recta erigitur, abiisque semper in cōmam pyramidalem altissimam densam pulcherrimamque. Cortex in junioribus fuscescit; dein cinereus evadit. In senioribus albet totus, aut albidus maculis variegatur amplis flavis. Adeo hic est foris lœvis & æquabilis, præcipue in adultis, ut etiam ad tactum, omnino non adesse, suspicari quis posset. Hinc illinc ab arbore secéndens, perque segmina tenua dependens, sui videtur redintegrationem indicate. Sapore gaudet adstringenti, nec aromate omni destituitur.

Materie durissima, rubra, compacta, ponderosa, & polituræ idonea, utuntur incolæ ferri loco ad fabricandos dentes in moletrinarum saccharinarum rotis, & ad similia alia, quæ sustinere diu attritum validum debent. Kami juniores acute tetragoni virent. Folia numerosa, coriacea, integerrima, ex oblongo obverse ovata, nitida, late virentia, venis transversis notata, obtusa, in petiolum brevem attenuantur, semperque sibi opponuntur. Tres quatuorve pollices plerumque longa sunt. Odore aromatico & suavissimo pollut, & propter saporem simul astrigentem gratumque incolæ cibis admiscent. Floribus parvis & cum levi rubore albicantibus succedunt baccæ rotundæ, pisi magnitudine, calycinis reliquiis coronatæ, odore & sapore aromatico præditæ, quæ incolis etiam in usum culinarem cedunt. Singulæ septem vel octo circiter semina continent. Missæ a me in Europam brachiali crassitie arbusculæ proximis annis in caldariis Cæsareis late viguerunt; dein periere omnes.

Crescit nunc vere sylvestris in Martinica, Guadeloupa, & Grenada.

I. CHRYSOBALANUS (Icaco). Linn. syst. 387.
(Pl. americ. piæt. Tab. 141. Ramus cum flore & fructu). Chrysobalanus fruticosus, foliis orbiculatis, alternis, fibris laxe racemosis Brown.jam. I, p. 250, t. 17, f. 5. Frutex cotini folio crasso, in summitate deliquium patiente, fructu ovali cæruleo ossiculum angulosum continente. Catesb. car. I, p. 25, t. 25?

Icaco. Plum. ic. 158, gen. 44.

Guajeru. Marcgr. bras. l. 2, c. 14.

CAL. Perianthium monophyllum, campanulatum, semi-quinquefidum, marcescens: laciniis semiovatis, patens.

COR. Petala quinque, oblonga, obtusa, planiuscula, emarginata, patentia, magna, unguibus calyci inserta.

STAM. Filamenta plurima, subulata, basi compressa & hirsuta, erecta, in orbem posita, inæqualia, longitudine corollæ, calyci inserta. Antheræ parvæ, didymæ.

PIST. Germen subrotundum, villosum. Stylus figura & longitudine filamentorum, orta ex basi laterali germinis. Stigma simplex, obtusum.

PER. Drupa subrotunda, magna.

SEM. Nux subovata, acuminata, obsolete pentagona, rugosa, unilocularis, subquinquevalvis. Nucleus cavus, figura nucis.

Arbuscula ramosa, inordinata, a tribus ad decem pedes alta. Cortex ferrugineus punctis leucophæsis adsperritur. Folia ex ovato subrotunda, obtusa, integra, coriacea, nitida, brevissime petiolata, alterna, bipinnicaria. Racemi ramosi, corymbosi, laxi, terminales & axillares, breves; pedunculis communibus ultimis trifloris. Flores inodori, parvi, petalis albidis. Fructus sunt subrotundi, diametro plus minus pollicari, nunc integerimi, nunc sulcis plerumque quinque vel & sex septemve exarati; colore pro soli locique diversitate rubro, purpureo, flavo, albido, aut ex his mixto, nunquam a me viso cæruleo, unde forte Catesbæi frutex specie est diversus. Pellicula vestiuntur tenui; & pulpam continent paucam, candidam, fere inodoram, nuci firmissime adhaerentem, consistentia mali cocti, sapore dulci & austero nec ingrato. Nux figura variat; semper tamen accedit ad ovato-acuminatam, angulis interdum sex septemve notata. Nucleus dulcis, edulis. Fructus in foro veneunt, crudique comeduntur; quorum ego siticulosus in excursionibus aliquando magnam copiam devoravi absque ulla subsecuta noxa. Saccharo conditi magni aestimantur, solentque quotannis in Hispaniam ingenti copia transmitti. Hispani appellant Iaco, Galli Prunier Iaque, Angli Coco-plum-tree.

Crescit in Caribæis & Continente vicina; in maritimis fruticosis & apricis, aut a mari procul haud distitis locis. Floret fere per integrum annum; at fructus præprimis dat Junio & Decembri.

TRIGYNI A.

I. SESUVIUM (*Portulacastrum*) Linn. *syst. 388.* *Læst.*
it. 191.

(*Pl. americ. pict. Tab. 142. Caulis cum flore & fructu.*)
Portulaca curassavica, angusto lucidoque folio. *Herm.*
parad. 212, t. 212.

Portulaca aizoides maritima procumbens, flore purpureo.
Sloane. hist. jam. I, p. 204.

Portulaca marina latifolia, flore suaverubente. *Plum. it.*
223, f. 2.

Crithmus indicus. *Rumph. 6, p. 156, t. 72, f. 1.*

Planta succulenta, perennis. Caules teretes, crassi, glabri, diffusi, ramosi, procumbenti - erecti. Folia ex ovali oblonga, acuta, integerrima, glabra, avenia, crassa, succulenta, supra planiuscula, dorso convexa, semiamplexicaulia, opposita, sesquipollucaria. Pedunculi uniflori, axillares, solitarii, in flore erecti, in fructibus reflexi. Flores inodori, externe e glauco virentes, interne candidi rosei vel purpurei, quorum characteri Linnæano optimo addam sequentia. Calyx constare videtur e corolla calyceque connatis, cuius in apicibus limbi duplicatura spectari potest, apice interiore colorato obtusoque, exteriore viridi & acuto. Filamenta semper sunt purpurea & in orbem erecta. Stylos in Martinica perpetuo observavi quatuor, in Cuba semper tres, in Domingo tres quatuor: quorum numerum sequitur numerus locularium. Capsula circa medium horizontaliter bifariam dehiscit.

Grescit in Caribæarum littoribus maritimis & inundatis.

POLYANDRIA. MONOGYNIA.

1. MARCGRAVIA (*umbellata*). *Linn. syst 405.*
(Pl. americ. pict Tab. 143 Ramus florens. Fructus).
Marcgravia scandens, fructu radiatim posito. *Plum. it.*
173.

Marcgravia scandens, foliis caulinis subrotundis, ad margines glandulatis; ramorum integris, ovatis alternis distiche sitis; floribus umbellatis terminalibus. *Brown. jam. I, p. 244, t. 26.*

CAL. Perianthium hexaphyllum, imbricatum, persistens: foliolis subrotundis, concavis, obtusis; quorum extiora dum reliquis multo majora.

COR. Petalum unicum, integerrimum, conico - ovatum,

obtusum, imperforatum, coriaceum, crassum, decolor, calyce quadruplo longius, basi abscedens, caducum.

STAM. Filamenta numerosa, plana, post corollæ lapsum patentia, caduca. Antheræ oblongæ, obtuse, compressæ, erectæ, maximæ.

PIST. Germen subrotundum, a filamentis comprimenti- bus striatum; assurgens in Stigma crassum, capitatum, obtusum. Stylus nullus.

PER. Capsula subglobosa, coriacea, coronata stigmate, multilocularis, multivalvis.

SEM. numerosissima, oblonga, minima, nitidissima, nidulanta in pulpa molli.

Planta fruticosa, arborum parasitica, repens, ramis reclinatis vel pendulis. Folia integerrima, acuta, glabra, & disticha; figuræ in diversis valde incertæ, lanceolatæ, ovatæ, ovalis, falcato-ovatæ, &c. Umbellæ simplices, magis minusve perfectæ, pendulæ, terminales. Pedunculi proprii centrales instruuntur corporibus utriculari- bus, nunc floriferi, nunc sterile. Capsula plerumque in decem loculamenta dividitur. Semina & pulpa coccineo splendent colore. Vocatur Martinicensibus *Bois des couilles* sive *Frutex testicularis*.

Crescit in Caribæarum sylvis.

CAPPARIS.

CAL. Perianthium quadripartitum, subcoriaceum.

COR. Petala quatuor, obtusa, patentia, calycem superantia.

STAM. Filamenta plura, patula. Antheræ oblongæ, versatiles, inclinatæ.

PIST. Germen oblongum, pedicello erecto insidens, longitudine staminum. Stylus nullus. Stigma sessile, obtusum.

PER. carnosum, uniloculare, pedicellatum.

SEM. plurima, nidulanta in carne molli.

Datum hunc characterem genericum cunctis hoc usque cognitis speciebus congruere, opinor, includere quo Breynias veras, quæ habitu & flore nimium affines visæ clarissimo Linnæo sunt, quam ut potuerint ab iisdem separari. Debet igitur in hoc genere fructum ratio valere nihil, quæ tamen in determinandis speciebus momentum afferre tunc poterit maximum; utpote qui summopere

inter se se discent. In Capparidibus pulcherrima & nemorosa inque Morisonia fructuum & foliorum similitudo est ejusmodi, qua vix invenias majorem. Breyniae sic stricte dictæ omnes, tenuissimam si forte exceperis, in habitu suo singulare ferunt quiddam, quo illico dignoscantur. Haud itaque inepte, si quis ad habitum velit fructusque discrimen, ceu ponderis in constitudo genere alicujus rem, respicere, dispescet ille has plantas in Capparidem, cujus sit pericarpium capsula; in Breyniam, quæ siliquam proferat coriaceam & bivalvem; & in tertium novum quoddam genus, cujus flos Breyniae sit, fructus Morisoniae.

I. CAPPARIS (*Cynophallophora*) pedunculis multifloris; axillis glandulosis; foliis ovalibus, utrinque nitidis. Linn. syst. 405.

(Pl. americ. pict. Tab. 145. Ramus florens. Fructus, ejusdemque sectio transversa).

Capparis arborescens, lauri foliis, fructu longissimo. Plum. spec. 7, ic 73.

Cynophallophorus seu *penis caninus*, Caribæarum arbor, foliis subrotundis, clavos pulpiferos phalloides pro si liquis gerens. Pluk. alm. 126, t 172, f. 4.

CAL. tetraphyllus, deciduus: foliolis subrotundis, concavis, obtusis, reflexis, quorum duo opposita reliquis duplo longiora.

COR. Petala obverse ovata, concava, emarginata, maxima, caduca.

Foveæ glandulosæ quatuor in receptaculo ante calycis foliola.

STAM. Filamenta numerosissima, capillaria, petalis triplo longiora.

PIST. Pedicellus filiformis. Stigma capitatum.

PER. Siliqua longissima, teres, glabra, obtusa, ad semina torosa, carnosa, bivalvis.

SEM. plurima, reniformia, carnosa, dupli ordine disposita, pulpa involuta.

Fruticem hunc reperi nascentem in solo pingui, gla- reoso, rupestri, arenoso; in apricis, umbrosis; verbo ubivis, præterquam in sylvis montosis densis. Hinc valde variat habitu, trunco, ramis, foliisque. In sepiibus apri- cis debilis vicinos inter frutices sustentat se ramis longis-

simis & vix divisis, Capparidi spinosæ præ reliquis Americanis habitu tunc proximus. In pratensis vero atque inundatis maritimis, a vicinis libera, in arbusculam excrescit duodecimpedalem concinnamque. Folia habet alterna, petiolata, utrinque glabra, crassula, rigidula, magis minusve disticha, tripollicaria; cæterum ovata, obverse ovata, ovalia, lanceolato-ovata, subrotundo-ovata, saepius tamen oblonga; obtusa, aut emarginata, aut levissimo acumine aucta. Axillis glandula insidet solitaria, subrotunda, flavescens, rariissime absens. Pedunculi communes breves, crassi, teretes vel angulati, terminales, duos tres quatuorve flores proferunt: propriis glandula simili suffultis. Adest insuper quandoque in folio uno alterove supremo alter pedunculus axillaris. Flores sunt speciosi, odoratissimi, patentissimi; petalis candidis vel ex candore in viorem vergentibus; staminibus saepe quadripolliticibus. Siliqua circiter semipedalis, crassitie varia, externe virens vel e viridi purpurea, sutura rubente, in binas valvulas longitudinaliter dehiscit in ipso frutice; quæ utrinque ab apice ad pedicellum revolutæ dimitunt successiva semina, cortice candido vestita, intus virentia, carne pulposa eoccineaque circumdata, & mox germinatura. Unde hæc in Europam transmitti nequeunt, non magis atque aliarum Capparidum Americanarum semina, quæ servata statim exsiccantur, & pereunt. Vocabulo Gallico-Caribæo Martinicensibus vocatur *Pois Mabouia*, sive *Faba diaboli*.

Crescit in Caribæis & in Venezuela.

2. CAPPARIS (*eustachiana*) pedunculis multifloris; foliis ovatis, acuminatis, utrinque nitidis; fructibus glabris.

(Pl. americ. piæt. Tab. 146. *Ramus florens.*)

Hæc arbuscula habitu gaudet præcedentis; at folia semper eadem habet ovata, acuminata, minus crassa, & quadripollicaria. Flores sunt inodori, vix pollicares, corollis purpureis. Fructus similes. Species mihi visa distinctissima est a reliquis.

Crescit in insulæ sancti Eustachii præcipitio interno cavi montis, olim, opinor, ignivomi, incolis dicti De Kuyl.

3. CAPPARIS (*hastata*) pedunculis multifloris; foliis hastato-lanceolatis. Linn. *Syst.* 406.

(Pl. americ. pīt. Tab. 147. *Ramus florens cum fructu inscrescente*).

Frutex erectus, infirmus, in ramos dividitur paucos & longissimos, s̄epe sexpedales. Folia sunt alterna, petiolata, coriacea, rigida, a tribus ad septem pollices longa, ab oblonga subintegraque ad hastatam figuram intermedias omnes induentia, idque vel in eodem non raro frutice. Pedunculi communes racemosi, terminales, plus minus octoflori, fere semipedales. Flores subodorati, purpurei, praecedentium structura, at duplo maiores. Fructus idem.

Crescit frequens Carthagena in sylvis ad declivias montis de la Popa.

4. CAPPARIS (*verrucosa*) pedunculis multifloris; foliis oblongis, acutis, utrinque nitidis; fructu verrucoso.

(Pl. americ. pīt. Tab. 148. *Ramus florens. Fructus*.)

Habitu convenit hēc cum Cynophallophora; at folia semper oblonga & acuta sibi constant. Glandulas in axillit habet nullas. Flos structuræ ejusdem, at vix odorus, petala habet candidissima & patentissima, glandulas nectareae planas punctoque umbilicatas, stamina pollicaria corollam haud admodum superantia. Fructus est siliqua oblonga, teres, nitida, tota muricate verrucosa, viridis, fesqui-pollicaris, bivalvis; pulpa alba.

Crescit Carthagena in sylvis & fruticetis.

5. CAPPARIS (*ostrandra*) pedunculis multifloris; foliis lanceolatis, acuminati, subtus tomentosis; floribus octandris.

(Pl. americ. pīt. Tab. 149. *Ramus florens*).

CAL. Perianthium monophyllum: laciniis ovatis, planis, acutis, patentissimis, parvis.

COR. Petala subovata, plana, patentissima, unguibus brevissimis.

Nectarium est perianthium quasi alterum, ejusdem cum vero figuræ; at minus & erectum.

STAM. Filamenta plerumque odio, subulata, suberepta, longitudine corollæ. Antheræ magnæ, erectiusculæ.

PIST. Pedicellus teres, crassus, brevis. Stigma capitatum.

Arbuscula erecta, ramosa, decempedalis; ramis ju-
nioribus petiolisque tomentosis. Folia alterna, petiolata,
integerrima, lanceolata, acuminata, facie glabra & vi-
rentia, dorso vestita tomento e cinereo subflavescenti.
Pedunculi communes subracemosi, tomentosi, subtermi-
nales, circiter septemflori. Flores diametro semipollucari,
albidi & inodori, in aliis purpurei & subodoriferi. Fru-
ctum non licuit videre.

Crescit in Domingo ad Portum Principis in fruticosis
 maritimis.

6. **CAPPARIS (comosa) pedunculis multifloris; coma sub-**
 rotunda, densa.

Hæc arbuscula spectaculo pulcherrimo comam format
 perfecte subrotundam, floribus fructibusque onustam, dia-
 metro circiter quinquepedali, trunco suffultam tripodali
 erectoque, constantem ramis diffusis & numerosis. Flo-
 res, quales in octandra; at suaveolentes semper; calycis
 laciinis ex lanceolato acuminatis; staminibus corolla bre-
 vioribus. Fructus simillimus Capparidi Breyniæ, at te-
 nuior. Folia ut in præcedente, at dorso magis virentia.

Crescit passim in inundatis maritimis Jaquesi in Do-
 mingio.

7. **CAPPARIS (jamaicensis) pedunculis multifloris; foliis**
 oblongis, emarginatis, subtus tomentosis; corollis se-
 mierectis.

(Pl. americ. piæt. Tab. 150. *Ramus florens*).

CAL. Perianthium tetraphyllum, deciduum; foliolis ob-
 longis, planis, acutis, reflexis.

COR. Petala oblonga, plana, calyce paulo longiora, in-
 ferne erecta tubumque formantia, superne reflexa.

Glandulæ nectaræ oblongo-acuminatæ, erectæ, mi-
 nimæ.

STAM. circiter viginti, subulata, petalis fere duplo longiora.

Arbuscula comosa, erecta, ramosa, decempedalis.
 Rami seniores nigricantes, glabri: juniores subtomentosi,
 cinerei. Folia petiolata, alterna, obtusissima, emarginata,
 oblonga, coriacea, facie lète virentia nitidaque, dor-
 so tomentosa & cinerea, bipollucaria. Pedunculi com-
 munes tomentosi, cinerei, plus minus quinqueflori, ter-
 minales & subaxillares. Flores suaveolentes, sordide al-
 bidi, fere pollicares. Non vidi fructum.

Crescit in Jamaica in Ferry & Linguanee; ubi florantem inveni Februario & Martio.

S. CAPPARIS (*linearis*) pedunculis subracemosis; foliis linearibus. Linn. syst. 406.

(Pl. americ. piat. Tab. 151. *Ramus cum flore & fructu*.)

CAL.

COR. } ut in *Capparide verrucosa*.

STAM.

PIST. Germen teres in pedicello crasso brevissimo.

PER. Siliqua glabra, ad semina torosa, brevis, bivalvis.

SEM. pauca, subreniformia.

Arbor erecta, comosa, elegans, ramosa, quindecim pedes alta, tota glaberrima. Folia linearia, coriacea, integra, avenia, obtusa, nitida, medio nervo insigniter protuberante, brevissime petiolata, alterna, lateribus sanguineis revolutis, quadripollicaria, numerosa, plerumque omnium sursum versa. Racemi terminalis aut axillares, plus minus decemflori, ut plurimum cum ultimis ramulis horizontaliter patent. Floret inodori, albi, diametro sex millicollicari. Fructus aurantii cum mixta rubedine, pollicares. Germini in hac specie vix subest pedicellus.

Crescit Carthagena in collibus sylvaticis; valde autem frequens in arenosa amplaque valle, in qua situm est oppidum Coro, Venezuela metropolis. Junio & Julio flores & fructus maturos decerpsti.

9. CAPPARIS (*Breynia*) pedunculis subumbellatis; foliis ovali-oblongis, acutis, subtruncatis scabris; fructibus tomentosis. Linn. syst. 406.

(Pl. americ. piat. Tab. 152. *Ramus cum flore & fructu*. *Breynia elaeagni* foliis. Breyn. ic. rar. pag. II.)

CAL. Perianthium monophyllum, deciduum: laciniis lanceolatis, minimis, acutis, erectis.

COR. Petala ovata, concava, maxima.

Nectarium, quale in *Capparide ostendra*.
STAM. numerosa, filiformia, corollam superantia.

PIST. Pedicellus filiformis.

PER. Siliqua longissima, teres, tomentosa, ad semina torosa, bivalvis.

SEM. plurima, reniformia, subduplici ordine disposita.

Arbuscula elegans, erecta, decempedalis. Rami extremi, pedunculi, & petioli adsparguntur punctis tomen-

tosis ferrugineis. Folia sunt integerrima, facie nitida, subitus scabre tomentosa pallideque virentia, acuta vel obtusiuscula, petiolata, alternatim sparsa, magnitudine varia. Pedunculi communes angulati, axillares & subterminales, tomentosi, multiflori, subumbellati, interdum ramosi. Flores odore gratissimo prædicti, corollis candidis, numero vario; quandoque integrum in eodem ramulo fasciculum formantes densissimum & valde speciosum. Siliqua novempollicaris, tenuis, tomentosa, eluteo fusca, carne coccinea. Semina ab insectis solent erodi. Hæc omnino planta fuit, e qua Plumierus Breyniæ genus condidit, nec alia; uti evidenter patet ex iconè floris, quem in generibus suis expressit. Sitne autem ipsius amygdalifolia, an elæagnifolia, determinare nequeo. Breyniæ affinem Læflingii *it. pag. 207.* conjicio esse plantam diversam ab omnibus speciebus a me enumeratis.

Crescit in Caribæis & in Continente vicina; in locis saxosis, glareosis, inundatis maritimis, vallis fruticosis, aliisque.

10. CAPPARIS (*frondosa*) pedunculis subumbellatis; foliis ad intervalla confertis. *Linn. syst. 405.*

(*Pl. americ. pict. Tab. 153. Ramus florens. Fructus*).

CAL. Perianthium monophyllum, persistens: laciniis subrotundis, planis, obtusis, patentissimis.

COR. Petala obverse ovata, plana, maxima.

Glandulæ nectareæ subrotundæ, minimaæ.

STAM. filiformia, petalis longiora.

PIST. Pedicellus filiformis.

PER Siliqua oblonga, teres, ad semina torosa, bivalvis.

SEM. pauca, reniformia.

Arbuscula hæc plerumque septem altitudine pedes attingit, quam in sylvis densis & umbrosis ad vigesimum sepe extendit. Rami paucissimi vixque divisi recta sussum tendunt. Folia lanceolata, acuta, nitida, undulata, integerrima, subcoriacea, petiolata, magnitudine varia admodum, crebro vel pedalia, ad varias in ramis distantias frondose nascuntur. Pedunculus communis teres, nitidus, erectus, terminalis, solitarius, apice gerit umbellatum paucos flores inodoros, virides purpureosve, diametro pollicari, post fecundationem brevi petala revolventes & varie intorquentes stamina. His succedunt

siliquæ pollicares vel sesquipollicares, nitidæ, atropurpureæ, carne albida.

Crescit Carthagena & in Domingo in sylvaticis. Flores vidi Aprili & Majo, fructus maturos Augusto & Septembri.

II. CAPPARIS (*tenuisiliqua*) racemis simplicibus, erexit; fructibus siliquois; foliis deciduis.

(*Pl. americ. pict. Tab. 154. Ramulus florens. Tum fructu Semen. Feliū adūlturn*).

CAL. Perianthium monophyllum, campanulatum, semi-quadrifidum, deciduum: laciñiis ovatis, acuminatis, planis, patentibus.

COR. Petala ovata, concava, magna, reflexa.

Nectarium perianthium quasi alterum, ejusdem cum vero figuræ, sed minimum erectumque.

STAM. circiter viginti quatuor, filiformia, longissima.

PIST. Pedicellus filiformis.

PER. Siliqua longissima, tenuis, glabra, teres, ad semi-na torosa, bivalvis.

SEM. plurima, oblonga, utrinque obtusa, subteretia, corice duriusculo, ordine simplici disposita.

Arbuscula erecta, parum ramosa, in sepiibus & fruticosis apricis octopetalis, ad quindecim pedes excrescit in sylvis umbrosis. Rami seniores sunt subcinerei lignosique: juniores virescunt, & basi ad ortum stipulis ornantur setaceis. A Januario ad Aprilem foliis spoliatur; hoc autem mense e summis ramulis racemi prodeunt erexit, sex vel septem pollices longi, terminales, solitarii, floribus circiter quinquaginta successive sese explicantibus onusti, hinc ultra mensem florentes: pedunculis propriis siliqua setacea suffultis. Floribus primis sese expandentibus egrediuntur demum folia, quæ sunt tunc lanceolata, acuminata, integririma, nitida, tenuia, alterna, petiolata, semipedalia; sensim vero in majus volumen increscunt, figuramque assumunt oblongo-ovatam, obtusam, obtuse acuminatam, vel vere acuminatam, ita quidem priori suo statui dissimilia, ut facile quis rei ignarus stirpem diversam suspicetur. Flores inodori e viridi alblicant, staminibus pollicaribus, inferiores soli fructigeri, racemo post peractam omnium florescentiam superne marcescente. Fruetus sunt virides, graciles, & sex vel septem pollices lon-

gii Valvularum separatio sepiissime in altera tantum accedit sutura; interdum etiam in utraque, sed hinc inferne, illinc superne, in neutra absolvitur. Caro siliquæ est mollis, albicans, subpellucida. Seminum cortex duriusculus nigricat, lamellæ virent.

Crescit Carthagenaæ frequens. Fructum fert maturum Septembri & Octobri.

12. CAPPARIS (*pulcherrima*) floribus racemosis; foliis oblongis, obtusis; fructu baccato. *Linn. syst. 405.*
(*Pl. americ. Pict. Tab. 155. Ramus florens. Fructus. Semen.*).

CAL. Perianthium tetraphyllum, deciduum: foliolis sub-linearibus, superne leviter latescentibus, acutis, planis, interne subtomentosis, reflexis, basibus distantibus, coloratis.

COR. Petala oblonga, plana, acutiuscula, utrinque tomentosa, semireflexa, calyce paulo longiora.

Glandulæ nectaræ parvæ, acutæ, erectæ, extra petala positæ, situ cum iisdem alternante.

STAM. circiter viginti, filiformia, corollam superantia.

PIST. Germen ovato-oblongum, insidens pedicello cylindrico crasso erectoque. Stylus brevissimus, crassus, persistens. Stigma capitatum, umbilicatum.

PER. Bacca subrotunda, maxima, stylo optuse acuminata, cortice crasso scabriuscio.

SEM. plurimæ, reniformia, subrotunda, compressula, nivalantia.

Arbor inelegans, erecta, in apricis aridis duos vel tres, in sylvaticis umbrosioribus pedes duodecim alta. Truncus diametrum habet bipollicarem. Rami sunt crassi, teretes, lignosi, glabri. Folia habet oblonga, obtusa, nitida, integririma, coriacea, breviter petiolata, alterna, saepe vel decempollicaria. Racemus terminalis, simplex, erectus, crassus, solitarius, semipedalis, speciosissimus. Flores pulchri, ex flavo albentes, odorem spirant suavissimum. Filamenta sesquipollicaria primo die sunt candida, altero annone purpurea. Bacca una alterave in quolibet racemo succedit, corticem induta e viridi & fusco varium, diametro duos quatuorve pollices æquans, cuius imminutæ caro est dura fereque inodora, maturæ autem est mollis, nauseosa, fastidissima, nullique animali

unquam tacta: cortice tum fragili & ad flavedinem his illic leviter vergente. Semina cortice membranaceo albo & tenaci circumdantur.

Crescit passim Carthagena in declivibus montium. Floret Julio & Augusto. Fructum dat maturum Martio Aprili, & sequentibus.

I3. CAPPARIS (nemorosa) floribus racemosis; foliis acuminatis; fructu baccato.

(Pl. A. P. Tab. 156. *Ramus fructescens*).

Arbor erecta, ramosa, vigintipedalis. Folia ovato-acuminata, integerrima, petiolata, alterna, facie nitida subtilis vestita tomento etate & frictione abscedente, coriacea. Fructus oblongo-ovatus & minor praecedentem ceterum ejusdem prorsus structuræ. E floris nedum explicati examine judicavi esse ejusdem generis, ad quod etiam totus faciebat habitus praecedenti simillimus.

Crescit Carthagena in sylvis densis.

I. MENTZELIA (aspera). Linn. syst. 411.

Menzelia foliis & fructibus asperis. Plum. gen. 41, 174, f. 1.

Menzelia setis uncinatis munita, foliis lobatis, fructibus singularibus ad divaricationem ramorum. Brown. jah. I, p. 249.

Onagra americana, folio betonicæ, fructu hispido. Tourn. inst. 302.

CAL. Perianthium pentaphyllum, germini insidens, deciduum: foliolis lanceolatis, concavis, acuminatis, externe asperis, patentibus.

COR. Petala quinque, obverse ovata, plana, acuminata, patentia, calyce paulo longiora.

STAM. Filamenta circiter triginta, erecta, longitudine calycis; quorum decem sunt exteriora, superne spathulata, obtusa, & concava; reliqua interiora, & subulata. Antheræ subrotundæ.

PIST. Germen cylindricum, asperum, longitudine corollæ, inferum. Stylus filiformis, erectus, longitudine staminum. Stigma simplex, obtusum.

PER. Capsula cylindrica, longissima, aspera, unilocularis; apicis superficie plana & trivalvi; valvulis patentibus.

SEM. raro ultra sex, oblonga, angulata.

Planta annua, erecta. Capsula matura nequaquam succulenta est, nec pulpam habet, nisi perpaucam eamque exsuccam penitus.

Crescit copiosissime in saxosis, glareosis, ruderatis, & arvis insulæ Curaçao. Vidi florentem Aprili, Mayo, & Junio.

I. CORCHORUS (*hirsutus*) capsulis ovato-oblongis, laniatis; foliis ovatis, obtusis, tomentosis, æqualiter serratis. Linn. syst. 417.

(Pl. A. P. Tab. 157. *Ramulus florens*).

Guazuma frutex chamædryfolia, fructu lanuginoso major & minor. Plum. gen. 36, ic. 104.

CAL. Perianthium pentaphyllum: foliolis lanceolatis, acutis, concavis, æqualibus, coloratis, reflexis, deciduis.

COR. Petala quinque, obverse ovata, obtusa, concava, patentissima, longitudine calycis.

STAM. Filamenta plurima, capillaria, erecta, corolla paucilo breviora, inserta receptaculo germinis. Antheræ subrotundæ, parvæ.

PIST. Germen subovatum, villosum, receptaculo proprio a corolla & calyce parumper remotum. Stylus simplex, longitudine staminum. Stigma obtusum.

PER. Capsula ovato-oblonga, leviter incurva, obtusa, lanata, quadrilocularis, quadrivalvis.

SEM. numerosa, angulata, parva.

Frutex parum ramosus, erectus, bipedalis vel tripedalis. Ramii teretes, superne angulati, dense vestiti tomento e fusco incano. Folia oblongo-ovata, utrinque obtusissima, utrinque lanuginosa, crenata, petiolata, alterna, pollicaria, marginibus subundulatis. Pedunculi communes tomentosi, petiolis oppositi, eorundemque longitudine, proprios quinque vel sex similes umbellatim emittunt. Calyx externe est tomentosus. Petala sunt flava. Hæc planta est Havanensis. At in Curaçao folia sunt acuta, & pedunculi tantum biflori vel triflori. In sancti Martini insula folia interne dumtaxat mollia sunt, & utrinque virent. Cætera convenient. An ergo Havanensis plantæ foliæ varietates dicantur reliquæ?

Crescit Havanæ, in Curaçao, & insula sancti Martini; locis saxosis, asperis, maritimis.

I. MUNTINGIA (*Calabura*), Linn. syst. 408.

(Pl. americ. pi&t. Tab. 158. Ramus cum floribus & fructibus)
Muntingia folio sericeo molli, fructu majori. Plum. gen.
41, ic. 205.

Muntingia fruticosa & villosa; foliis serratis oblongis, ab
uno latere brevioribus. Brown. jam. I, p. 145.

Loti arboris folio angustiore, rubi flore, fructu poly-
spermo umbilicato. Sloan. hist. jam. 2, p. 80, t. 1941
f. I.

CAL. Perianthium monophyllum, profunde quinquefidum
deciduum: laciniis lanceolato-acuminatis, basi concavis
patentissimis.

COR. Petala quinque, subrotunda, integerrima, leviter
concava, calycem superantia, patentissima, unguibus
brevibus.

STAM. Filamenta plurima, capillaria, patentia, petalis
duplo breviora. Antheræ subrotundæ, parvæ.

PIST. Germen subrotundum, longitudine staminum. Sty-
lus nullus. Stigma peltato-capitatum, radiatum, pen-
tagonum.

PER. Bacca globosa, coronata stigmate peltato, quinque-
locularis. Dissepimentum membranaceum, tenuissimum.

SEM. numerosa, subrotunda, minima, nidulantia.

Arbuscula erecta, infirma, duodecimpedalis, tota
abit in ramos longos, villosos, alternatim ornatos ramu-
sculis distichis. Folia habet oblonga, acuminata, ser-
rata, villosa, viscosa, basi altera oblitterata, breviter pe-
tiolata, alterna, disticha, quatuor vel quinque pollices
longa, suprema sensim breviora, integros ramulos occu-
pantia. Pedunculi axillis exeunt bini, villosi, uniflori
pollicares, successive florem iamjam explicandum ad fo-
liorum faciem vertentes, antea ad eorundem dorsum re-
flexi. Flores inodori, pulchelli, diametro pollicari, ca-
lycem habent cinereum: & petala candida. Bacca cum
admixta flavedine rosea, transversim discissa, primu in-
tuitu unilocularis creditur; in aqua vero leniter pressa;
ut pulpa seminaqueexeant, per tenue dissepimentum quin-
que loculamenta distinctissima exhibet.

Crescit in sylvaticis irriguis alluvione, alibique in
Domingo. Floret Augusto & Septembri.

I. SYMPLOCOS (*martinicensis*). Linn. syst. 582.
(Pl. americ. pict. Tab. 261, fig. 41. Flos).

CAL.

CAL. Perianthium monophyllum, semiquinquefidum, parvum; lacinias subrotundis, obtusis, erectis.

COR. Petala quinque, oblonga, obtusa, basi erecta tumque formantia, superne patentissima.

STAM. Filamenta numerosa, subulata, plana, petalis paucis breviora, triplici quadruplici serie tubo corollæ in orbem accreta, inferiora gradatim breviora. Anthæ subrotundæ, parvæ.

PIST. Germen subrotundum. Stylus filiformis, erectus, longitudine staminum. Stigma capitatum, subtrifidum.

PER. & SEM.

Arbor ramosa, viginti quinque pedum altitudine. Folia ovata, acuta, serrata, nitida, subcoriacea, petiolata, situ indeterminato. Flores albi, odore Cratægi Oxyacanthæ. Est in hac planta singulare, filamenta inferi corollæ polypetalæ, quam interne monopetalam quasi reddunt, basibus suis planis connectendo petalorum margines. Fructum non vidi. Floris tamen structuram solam sufficere existimo, ad novum constituendum genus, quod græco vocabulo ἀπὸ τῆς συμπλέτεσθαι derivavi ob raram Petalorum connexionem.

Crescit in sylvis Martinicæ. Floret Novembri.

I. LAETIA (*completa*) floribus petaloideis, completis.

Linn. syst. 410.

(Pl. americ. piæt. Tab. 261, fig. 42. *Folium*).

CAL. Perianthium pentaphyllum, marcescens, . . .

COR. Petala quinque, longitudine calycis, . . .

STAM. Filamenta plurima, capillaria, . . .

PIST. Germen subrotundum. Stylus filiformis, erectus,

PER. Capsula subovata, obtusa, tomentosa, unilocularis, trivalvis: valvulis carnosæ - coriaceis, crassissimis, patentissimis, interne auctis membrana cartilaginea adnata tandemque crispata abscedente.

SEM. plurima, carnosæ, ab invicem compressa, hinc angulata, distincta involutaque pellicula pulposa.

Arbuscula novempedalis, ramosa. Folia subovata, oblongiuscula, obtusa, dentato-crenata, interdum emarginata, rugosa, glabra, petiolata, alterna. Pedunculi communes axillares, tomentosi. Fructus ex flavo rubelli baccas ante dehiscentiam mentiuntur, saepe obsolete tri-

angulares. E flore emarcido cum germine jam adolescente characterem desumpsi.

Crescit Carthagena in sylvis densis circa La Quinta. Fert fructus maturos Augusto & Septembri, floruisse mihi visa Junio.

2. LAETIA (*apetala*) floribus apetalis. *Linn. syst. 410.* (*Pl. americ. piæt. Tab. 159. Ramus florens. Fructus.*) *Laetia. Laefl. hisp. 190.*

CAL. Perianthium pentaphyllum, marcescens: foliolis obverse ovatis, concavis, obtusis, reflexis, coloratis, minus vero exterioribus duobus.

COR. nulla.

STAM. Filamenta circiter quadraginta, subulata, patentia, longitudine calycis. Antheræ subrotundæ, di-dymæ.

PIST. Germen ovatum, staminibus duplo brevius; defens in Stylum crassulum, superne inflexum, longitudine staminum. Stigma capitatum, depresso.

PER. ovatum, carnosum, obsolete trigonum, interne auctum membrana cartilaginea, uniloculare.

SEM. plurima, ab invicem compressa, hinc angulata, carnosæ, distincta involutaque pellicula pulposa.

Arbor hæc erecta & vigintipedalis vel ex ipso propulsum trunko ramos emittit patulos: quoram ex tuberculis vel ex ultimorum extremitatibus prodeunt folia ovalia vel obverse ovata, obtusa, interdum emarginata, ferrulata ferrugineis & vix conspicuis, nitida, petiolata, alterna, sesquipollucaria. Pedunculi communes triflori, axillares, sustinent flores albos, facie magnitudine & odore Cratægum Oxyacantham referentes. Fructus capsulane an bacca sit, certo determinare nequeo: semper enim ego illos semicomestos erososque inveni ab aviculis aut insectis, nec unquam, quantumvis maturi mihi videbantur, in valvulas sejunctos. Cæterum tam similes sunt præcedentibus, ut distingui ab invicem, præterquam in tomento & glabritie, neque interne nec externe possint.

Crescit Carthagena in sylvaticis. Floret Aprili & Majo. Fructum dat Augusto.

1. LECYTHIS (*minor*) foliis lanceolato-oblongis, petiolatis, ferratis. *Linn. syst. 410.*

(Pl. americ. pi&t. Tab. I6o. Ramus florens. Dein nectarium expansum, basi staminorum perforatumque pro transeunte germino, superne villis flavis munitum, quibus inclinatum tegit molliter genitalia. Tum fructus operculum utrinque conspectum; semen; & fructus ipse, operculo seminibusque demptis).

CAL. Perianthium hexaphyllum: foliolis subrotundis, parvis, concavis, obtusis, patentibus, æqualibus, nec imbricatis.

COR. Petala sex, oblonga, obtusa, plana, maxima, infra nectarii basin unguibus receptaculo germinis inserta; quorum quatuor superiora patentissima, duo inferiora plus minus patent-i-inflexa.

Nectarium monophyllum, petaliforme, basi plana pro germine transeunte perforatum, ibidemque proprium staminibus receptaculum præbens, hinc adsurgens & inflexum, ad apicem interne ornatum corporibus filamentosis numerosis & densis, quibus genitalibus incubbit.

STAM. Filamenta numerosa, subulata, brevissima, erecta, disco nectarii insidentia Antheræ oblongæ.

PIST. Germen conicum, depresso; desinens in Stylum erectum, brevissimum. Stigma simplex.

PER. Capsula subrotunda, convexo-depressa, lignosa, maxima, crassissima, circa medietatem circumferentia cinctum semitruncatis sex calycis foliolis nunc lignosis factis, subquadrilocularis, bivalvis: valvula superiore orbiculari, horizontaliter abeunte, decidua; inferiore subrotunda, persistente. Dissepimentum carneum.

SEM. pauca, oblonga, ab invicem compressa, hinc angulata, nitida, margine scabro, quo dissepimento adhæserunt; pulpaque carnosa ab eodem procedente subdistincta.

Arbor elegans, ramosa, erecta, sexaginta pedes alta, trunco insistit æuali & rimulis in cortice notato. Ramos porrigit lento&s & longos. Folia habet lanceolato-oblonga, acuminata, ferrata, glabra, alterna, petiolata, subdisticha, semipedalia, plurima. Racemi sunt terminales, adjuncto sœpe ad suprema folia axillari aliquo, crassi, simplices vel inferne racemo alio uno alterove aucti; pedunculis propriis unifloris, crassis, brevissimis. Flores magni,

leviter odori, corolla nectarioque candidis, staminibus & nectarii corpusculis flavis. Fructus durissimi, fusti, dia-metro bipolicari, nati ex germine & incremente receptaculo, ollulam cum operculo suo haud male repræsentant. Operculum maturo jam fructu decidit; sensimque hoc se-quuntur post pulpam exsiccatam semina: at vero ollula vacua inversaque sæpe per biennium in arbore perstat. Loculamentorum distinctio plerumque est incompleta; in quibus singulis continentur semina duo tria vel unicum, ita quidem, ut sint omnino circiter octo. Vestiuntur hec pellicula fusca nitida & satis forti, quum sint intus candida. Feruntur etiam simiis esse in deliciis, unde apud incolas nomen arbor traxit *Ollira de mono*, id est, Ollula simiæ. Pluribus ego his, experiundi gratia, comedenda obtuli, repulsam constanter passus. Alii mihi afferuerunt edulia, venenata alii dixere. Unicum ego semen integrum assumpsi, quod sapore præditum gratissimo deprehendi; sed post medium horam nausea, axietate magna, capitisque titubatione præter consuetudinem fui vexatus; an ab hoc nucleo? Flores hujus arboris semper occupan-tur a vespârum nigricantium specie, quæ tangere vel decerpere hos cupientem infestare admodum solent, capillis præ cæteris partibus involant pileoque, unde eximi nisi trucidatæ nequeunt, & fugientem denso agmine ad passus plurimos insequuntur; Hispanis ob id dictæ *Moscas bravas* sive *Muscæ indomitæ*. Arbor hæc folium tenuis putata, ramos novos e stipite emittit, primo jam anno flores fructusque producturos. Ex collatis descriptionibus patet, esse hanc distinctissimam speciem a Lecythide Læflingii. Differt forte etiam a Marcgravii Jacapucaya. Vidi Vin-dobonam allatos ex Brasilia fructus, qui omnino ad hoc genus pertinebant; sed, seminibus multo majoribus fæti, superabant ipsi caput infantis.

Crescit Carthagenaæ passim in sylvis; præcipue circa La Quinta. Floret Junio & Julio. Decembri fructus ma-turescunt.

I. SEGUIERIA (*americana*). Linn. syst. 417.

CAL. Perianthium pentaphyllum, persistens: foliolis ob-verso ovatis, concavis, obtusis, reflexis, coloratis; quorum duo exteriora duplo minora.

COR. nulla.

STAM. Filamenta circiter triginta quinque, capillaria, patentia, longitudine calycis. Antheræ oblongæ, compressæ, utrinque obtusæ, incumbentes.

PIST. Germen oblongum, compressum, superne membranaceum, obtusum, latere marginali altero crassiore, fere longitudine staminum. Stylus nullus. Stigma villosum, ab apice germinis ad usque medietatem ejusdem per marginem crassiores decurrentes.

PER. Capsula oblonga, aucta ala maxima perpendiculari obtusa, unilocularis.

SEM. unicum,

Frutex duodecimpedalis, cuius e trunco oriuntur rami teretes, longissimi, virides, nitidi, quibus se sustentat vicinis. Aculei recurvi, acuminati, brevissimi, ad latus petioli unumquodque solitarii, interdum absentes. Folia lanceolata ovata vel ovalia, emarginata cum acumine, integra, nitida, petiolata, alterna, duos tresve pollices longa. Racemi terminales, ramosi, foliosi. Flores numerosi, albicantes, fastidi. Calyx cum incremente germine viorem induit. Fructum immaturum dumtaxat vidi, Securidacæ fructui similem.

Crescit Carthagena in sylvaticis & fruticetis, præcipue ad vias. Floret Septembri.

TRIGYNIA.

I. HOMALIUM (*racemosum*).

(Pl. americ. pict. Tab. 261, fig. 43. *Flos*).

CAL. Perianthium monophyllum, sexfidum: laciis ova-to-lanceolatis, acutis, patentissimis.

COR. Petala sex, ovata, plana, calyce paulo longiora, patentissima.

Glandulæ nectaræ sex, planæ, cum petalis alternæ.

STAM. Filamenta viginti quatuor, subulata, erecta, longitudine corollæ, orta quatuor simul inter glandulas ante basin petalorum. Antheræ subrotundæ, simplices.

PIST. Germen subrotundum, villosum. Styli tres, erecti, filiformes, longitudine staminum. Stigmata simplicia.

PER. & SEM.

Arb or comosa, procera, habitu & foliis Ulmi. Flo-

res racemosi, plani. Stamina interdum sunt octodecim, ut tria tunc sint ante quodlibet petalum. Fructum non vidi. A proportione observata in staminibus nomen huic arbori indidi.

Crescit in Martinica in prætensibus ad ostium fluminis dicti Capot.

POLYGYNIA.

I. ATRAGENE (*polygamia*) foliis caulinis omnibus terminatis, ramuscularum simplicibus; floribus dicæcis. (Pl. A. P. Tab. 261, fig. 44. *Folium. Pedunculus floriferus*).

Planta hæc fruticeta obvolvit & deprimit more ac habitu Clematidis Flammulæ. Foliola sunt cordato-ovata, subtus villosa, superne glabriuscua, integerima vel dentato-incisa. Rami teretes scandunt. Pedunculi ultimi sunt triflori. Flores albidi, inodori, hermaphroditi & masculi in diversis plantis.

Crescit Havanæ in sepibus & fruticetis. Floret Januarij.

I. ANONA (*muricata*) foliis ovali-lanceolatis, glabris, nitidis, planis; pomis muricatis. Linn. syst. 423.

(Pl. americ. pift. Tab. 161. *Ramulus cum flore, cumque pistillo post delapsa petala staminaque. Dein fructus*).

Anona maxima, foliis latis splendentibus, fructu maximo viridi conoide, tuberculis seu pinnulis innocentibus aspero. Sloan. hist. jam. 2, p. 196, t. 225.

Anona foliis oblongo-ovatis, nitidis; fructibus spinis molibus tumentibus obsitis. Brown. jam. I, p. 255.

Anona indica latifolia, fructu squamoso aspero. Pluk. alm. 31, t. 134, f. 2.

Anona indica, fructu conoide viridi squamis veluti aculeato. Pluk. alm. 32. t. 135, f. 2.

Anona. Comm. hort. I, p. 132, t. 69.

Guanabanus fructu e viridi lutescente, molliter aculeato. Plum. gen. 43, ic. 143, f. 1.

Araticu Ponhe. Marcgr. bras. l. 3, c. 2. Pis. bras. l. 4, c. 18. Zuursack. Merian. sur. 14.

CAL. Perianthium tripartitum, minimum, persistens: foliolis cordatis, concavis, acutis.

COR. Petala sex, maxima, cordata, concava, coriacea, crassissima, patula, sessilia; quorum tria alterna interiora, minora, obtusa; exterioribus apicibus acutis & patentioribus.

STAM. Filamenta vix ulla. Antheræ numerosissimæ, eretæ, receptaculo germinis dense insidentes.

PIST. Germen subrotundum, receptaculo subrotundo elevatum. Stylus nullus. Stigmata numerosissima, obtusa, totum germen obsidentia.

PER. Bacca maxima, subrotundo-ovata, sèpius incurva, cortice glabro obsolete reticulato aculeisque innocuis mollibus & virentibus muricato vestita.

SEM. plurima, oblonga, nitida, in orbem posita, nidulanta.

Tota quanta arbor odorem spirat gravem & nauseosum, quo foli fructus maturi minus inficiuntur. Videtur autem ille odor generi magis minusve proprius, qui tam in hac quam in reliquis speciebus multo est fætidior. Statura pyri mediocris. Sepes etiam inde exstructas vidi; quæ validiores ventorum impetus sustinere valuerunt. Matrices albida, nec admodum solida, cortice obducitur pallide fusco. Ramulorum apices subulati seu rudimenta foliorum sunt coloris aurantiaci. Folia sunt ovali-lanceolata, acuta, integerrima, lucida, plana, firma, alterna, breviter petiolata, facie saturate virentia, dorso pallidiora, tres quatuorve pollices longa. Pedunculi uniflori, solitarii, crassi, tandem lignosi, in ramis plerumque senioribus, interdum etiam ex ipso truncо, sparsim oriuntur; neque enim ferendo ponderoso fructui rami juniores forrent. Fructus figuram semper plus minus cordiformem habet, volumine varians, longus a quinque ad novem pollices, diametro transverso tres vel sex æquans. Cortex maturi ex flavo virescit, crassus quidem, at fragilis. Inscriptitur lineis cancellatis sive reticulatis, quarum areolarum quarumlibet centrum elevatur in mucronem mollem innocuumque. Caro est succulenta, albida, odora, consistentiæ butyraceæ, edulis, sapore singulari grato & dulci cum levi acore. Videtur autem composita ex pyramidibus numerosis transversis, quarum apices ex circumferentia in centrum fructus longitudinale concurrunt; sed quæ ob carnis mollitiem in fructu maturo ferme disparent.

Receptaculum sive appendix pedunculi ad notabilem longitudinem substantiam fructus penetrat; quod quidem si leví negotio e fructu extrahi non ruptum possit, hujus maturitatem indicat. Raro tamen hæc exspectatur in ipsa arbore; sed carpuntur fructus immaturi, asservanturque per paucos dies, donec ultiro mollescant; pondere enim, molitie, corticisque fragilitate fit, ut, quando maturi sponte a pedunculis solvantur in ipsa arbore, in fragmenta & pultem rupti in terram dilabantur. In mensis appetuntur, habenturque in quodam pretio. Quoniam vero decorticari cultro nequeunt; confringuntur manu, & vel cochleari vel ore ipso extrahitur ex fructis comedenda caro. Abjicitur cortex, qui ingrati quiddam ac terebinthacei habet. Aegris, qui refrigerio egent, valdopere commandantur ab incolis. Non solent arridere palato noviter advenientis Europæi. Maturos ilico edi oportet, cum diu tunc conservari ultra non possint. Ex immaturis aliqui vinum parant limpidum & excolor, quod contra aphthas aliasque pustulas in ore infantum laudatur. Alii hos ipsos cum saccharo coquunt in cibum non temnendum. Ex semine enata triennis dare fructum dicitur. Duodecim arbustulas, jam fructigeras, brachii crassitie, decempedales, cumque ipsa eruras terra adhaerente & debite per involucrum (ex virginis extimis aridis trunci Musæ & cortice Hibisci tiliacei factum) firmata, anno hujus sæculi quinquagesimo sexto ex Martinica Vindobonam transmisæ, quæ omnes longum hoc atque difficile iter vivæ superarunt. Harum plerique per plures annos lète viguerunt in caldariis Cæsareis, dederant raro flores, sed nunquam fructus; ultimæ anno demum quinto & septuagesimo periere. Ab Anglis vocatur Sour-sop-tree sive Arbor offam acidam ferens; a Gallis Corossolier ab insula Curaçao ipsis Corossol dicta, ex qua primum translata creditur: a Batavis Zuurfackboom sive Arbor fuccos acidos producens; ab Hispanis vocabulo caribæo Guanaban.

Crescit in Caribæis in celtis; & ad viciniam pagorum nunc vere sylvestris. Tum in Continente.

2. ANONA (*squamosa*) foliis oblongis, subundulatis; fructibus obtuse subsquamatis. Linn. syst. 423.

(Pl. americ. pict. Tab. 162. Ramus florens. Flos vi ductus patensque. Fructus. Semen).

Anona foliis oblongo-ovatis, undulatis, venosis; florit

bus tripetalis; fructibus mammillatis. *Brown. jam. 2,*
p. 256.

Anona foliis odoratis minoribus, fructu conoide squamoso
parvo dulci. *Sloan. hist. jam. 2, p. 168, t. 227.*

Anona indica, fructu ex viridi & luteo, cortice squama-
to aspero, nucleis nigris cantibus parvis. *Pluk. alm. 31,*
t. 134, f. 3.

Anona tuberosa. *Rumph. amb. I, p. 138, t. 46.*

Guanabanus foliis odoratis, fructu subrotundo squamoso.
Plum. gen. 43.

Atamarum. *Rheed. mal. 3, p. 21, t. 29.*

Altitudine hanc arborem raro tredecim superasse pedes vidi. Materiem albidae cortex ambit subfuscus. Coma concinna est, nec valde densa. Folia sunt oblonga, acuta, integerrima, glabra, per venulas numerosas subundulata, sordide & ex flavo virentia, odorata, quatuor vel quinque pollices longa, subdisticha, breviter petiolata. Pedunculi uniflori & solitarii indeterminate ex ramulis præcipue senioribus oriuntur, imo etiam ex ipso trunco, ubi hic in ramos dividitur. Flores coriacei, ex viridi flavescentes, subgraveolentes, & hexapetali, nec tripetalii, quales credidit Brownius, charactere & volumine cum mox describendis Anonæ reticulatæ floribus perfectissime congruunt, ut nihil, quod hic moneam, noverim. His succedunt fructus, qui in summa apud incolas nec non Europæos plurimos stant æstimatione, ut sint, qui omnibus fructibus præferant, vel ipsis Europæis. Figura sunt ex ovato subrotunda, magnitudine autem varia, vulgari pugnum æquantes virilem. Cortex e glauco virens & rore tectus, ut subcærulescens dici posset, valde fragilis est; & in papillas magnas, crassas, obtusas, inæquales, & veluti imbricatas, ubique protuberat. Hæ in maturis facilime ab invicem solvuntur seceduntque, & non raro cum ipsa pyramidum carnearum parte, quarum basin exceptiunt, extrahuntur de reliquo fructu; comedì vero corticosæ papillæ ipsæ nequeunt ob ingratissimum terebinthinae saporem. Areolæ igitur illæ, sive simpliciter lineatæ, sive protuberantes, indicant numerum situmque pyramidum carnearum. Caro ipsa albescit, est mollissima, & odore suo saporeque singulari vinoso aromatico & suavissimo quam maxime se commendat. Carpuntur fructus,

& comeduntur eodem modo ac præcedentes. Semina nigra sunt, & circiter quadraginta in quolibet fructu numerantur; nam quælibet pyramis suum ad maturitatem non producit. Transplantata arbor folia dimittere solet, & sicut tunc fructus ante porrigeret maturos, quam nova illa prodeant. Misi etiam plures ex Martinica jam fructigerae, quæ in caldariis Cæsareis eadem sese ratione habuerunt uti præcedentes muricatae; fructum quoque perduxerunt ad ovi columbi volumen, sed nunquam perfecerunt maturum. Folia minutim contusa & cum addito sale in cataplasmatis formam redacta, tumoribusque malignis imposita, insignes eos maturare, asserunt horti Malabarici autores. In hoc autem opere plantæ delineatio medicæris est. Fructus quidem exactissime apud Sloaneum exprimitur, minus recte cætera. Rumphius spinosum exhibet ramum, cuiusmodi ego nunquam observavi; huic tamen Anonæ prorsum convenit ipsius descriptio. Veneratur ab Anglis Sweet-sop-tree sive Arbor offam dulcem ferens; a Gailis Pommier de canelle seu Malus cinnamomea; a Batavis Steenappelboom, id est, Malus lapidea; ab Hispanis Chirimoya.

In Caribæarum hortis passim cultam vidi, & circa loca culta sylvestrem, forte olim istuc ex Continente allatam.

3. ANONA (reticulata) folijs lanceolatis; fructibus subrotundo-ovatis, reticulato-areolatis. Linn. syst. 423. (Pl. americ. pict. Tab 264, fig. 93. Fructus). Anona foliis oblongis, undulatis, venosis, fructibus areolatis. Brown. jam. 3, p. 256.

Anona-maram. Rheed. mal. 3, p. 23, t. 30, 31.

Guanabanus fructu purpureo. Plum. ic. 43, f. 2.

CAL. Perianthium tripartitum, minimum; lacinias cordatis, concavas, acutis.

COR. Petala sex, coriacea, sessilia; quorum tria alterna exteriora, oblonga, obtusa, crassissima, longissima, dorso convexa, intus angulata, basi concava, patentiæscula; tria interiora ovata, ipsiusque perianthii lacinias multo minora.

STAM. Filamenta vix ulla. Antheræ numerosissimæ, erectæ, germinis receptaculo insidentes.

PIST. Germen subrotundum, receptaculo subrotundo ele-

vatum. Styli nulli. Stigmata numerosissima, obtusa, totum germen tegentia, decidua.

PER. Bacca maxima, cordato-subrotunda, cortice glabro in areolas angulares per solas lineas distincto.

SEM. plurima, oblonga, compressa, glabra, nidalantia. Arbor est comosa, multo præcedentibus vastior proceriorque, cæterum Anonæ squamosæ similis. Cortex paulo inæqualior. Oder magis nauseosus. Folia colore & figura convenient; sed sunt acutiora, longiora, nec tamen latiora Pedunculi & flores iidem. In fructu maximum discrimen est; qui volumine pugnum fere semper superat, & bovini cordis figuram aliquatenus habet. Glaber est, nec in squamas ulla vel gibbos elevatur, sed lineis reticulatis, nec eminentibus nec impressis, in areolas inæqualiter plerumque pentagonas inscribit; quare Rumphii *Anona libr. I, tab. 45.* fructibus in cortice cancellatis huc non pertinet. Maturus sordide flavescit, aut est interdum subrubellus; qui diu vel rudijs tactus fuscescit & foedet. Caro albida, mollis, dulcis, fatua, & vix odorata, a paucis comeditur. Fructus immaturi in frustula dissecti, atque in futurum usum exsiccati, optimo cum eventu assumuntur in quibusdam pertinacibus diarrhoeis. Gallis dicitur *Cachiman coeur de boeuf*; sive Cachiman (quæ vox Caribæa est,) cor bovis. Angli *Custard Apple-tree* seu *Malum placentarium* vocant.

Crescit in Caribæis.

4. ANONA (*mucosa*) foliis oblongis; fructuum areolis elevatis; petalis extimis basi connatis.

Hæc arbor toto suo habitu adeo similis est priori, ut sola discrimina adferre sufficerit. Floris petala exteriora basi sua in unum corpus subrotundum nec ulla tenus divisum concrescunt; laciniæ autem oblongæ & prioribus similes horizontaliter & stricte patent; qua certe nota ab omnibus mihi cognitis congenieribus discrepat. Fructus areolæ gibbæ sunt, nec tamen papilloſæ vel muricatae aut cancellatae. Carnis magis mucosæ sapor nihil grati possidet. A Gallis appellatur *Cachiman morsœum* sive Cachiman mucosus. Raro solet comedi.

Crescit in Martinica.

DIDYNAMIA.

GYMNOSPERMIA.

I. TEUCRIUM (*cubense*) foliis cuneatis, serrato-incisis, glabris, in petiolum attenuatis; floribus pedunculatis, solitariis. *Linn. syst. 439.*

(*Pl. americ. pict. Tab. 164. Tota planta*).

Caulis quadrangularis, erectus, sesquipedalis, glaber, parum ramosus, annuus, vel biennis forte. Folia obtusa, inodora, opposita. Pedunculi uniflori, axillares, solitarii, oppositi. Flores parvi, inodori. Petalum album: labii inferioris lacinia media subovata, acuta, maxime; lateralibus ovato-acuminatis. Semina nigrescentia in caldariis nostris perennat.

Crescit copiose in Cubæ sepibus humidulis & pratis. Floret Decembri & sequentibus.

I. BALLOTA (*suaveolens*) foliis cordatis; spicis foliosis; calycibus truncatis; aristis linearibus. *Linn. syst. 448.*

(*Pl. americ. pict. Tab. 163. Caulis florens. Tum autem corolla ante, eademque ex latere visa. Autus calyx. Mentastrum maximum, flore cæruleo, nardi odore. Sloane hist. jam. I, p. 171, t. 102, f. 2.*

Mesosphærum hirtum, foliis cordatis, ferrato-subsinuatis, floribus verticillariter spicatis. Brown. jam. I, p. 257, t. 18, f. 3.

Planta odoratissima est, qua utuntur passim Domingenses in balneis tepidis. Et si semina interdum bina dum taxat in uno calyce continetur, quod quidem esse perpetuum videtur credidisse clarissimus Browneus, plerumque tamen ego quatuor observavi: ita ut a generali classis charactere nullatenus recedat.

Crescit in plerisque Caribæis.

I. SCUTELLARIA (*havanensis*) foliis cordato-ovatis, crenatis; floribus solitariis, axillaribus; labio corollæ utroque trifido. *Linn. syst. 457.*

(*Pl. americ. Pict. Tab. 165. Ramus florens*.)

Plantula tenella, ramosa, procumbenti-erecta, herbacea. Folia cordato-ovata, obtusa, crenata, glabriuscila, petiolata, opposita, vix semipollicaria. Pedunculi

uniflori, solitarii, axillares. Flores inodori, fere pollicares, cærulei, charactere congenerum: sed calycis bilabiati laciniis subrotundis, integerrimis, & fere æqualibus; corollæque labio inferiori semitrifido & paulo longiori superiori, laciniis subrotundis, media emarginata ac latiore, lateralibus integrerimis.

Crescit Havanæ in rupestribus maritimis. Inveni florarentem Decembri.

I. CLINOPODIUM (*marrinicense*) foliis ovato obtongis, basi attenuatis; verticillis globosis; bracteis setaceis.
(Pl. americ. piæt. Tab. 261, fig. 45. *Calyx.*)

CAL. Involucrum multifidum, longitudine perianthii, verticillo subiectum.

Perianthium monophyllum, tubulosum, superne leviter incurvum, decemstriatum, decemdentatum: dentibus novem subæqualibus, erectiusculis, triplo brevioribus dente supremo patente.

COR. monopetala, ringens. Tubus brevis, sensim ampliatus in faucem longitudine tubi calycis. Limbus brevis. Labium superius subrotundum, fornicatum, integrerimum, utrinque hirsutum. Labium inferius tripartitum: lacinia media obverse evata, erecta, longiore; laterilibus reflexis, subovatis; omnibus emarginatis.

STAM. Filamenta quatuor, subulata, quorum duo reliquis longiora, nec superantia fauces. Antheræ subrotundæ.

PIST. Germen oblongum, quadripartitum. Stylus filiformis, longitudine staminum. Stigma bifidum, reflexum; lacinia superiore obsoleta.

PER. nullum. Calyx incretus, incurvus, ore declinato, semina in fundo continet.

SEM. quatuor, ovata, hinc convexa, inde angulata, nitida.

Planta annua, bipedalis, & erecta; caule tetragonon & parum diviso. Folia sunt ovato-oblonga, basi in petiolum attenuata, inciso-crenata, obtusa, opposita. Verticilli globosi, plures, in canlis superna parte nuda ad distantias positi. Flores parvi, numerosi, corollis albis. Ob involucrum ad hoc genus reduxi, etiamsi floris stratura discrepet.

Crescit passim in Martinicæ arvis & pratis siccis.

ANGIOSPERMIA.

I. CRANIOBLARIA (*annua*) foliis cordatis, angulatis; calyce exteriore diphyllo. Linn. syst. 467.

(Pl. americ. pict. Tab. 166. Ramus florens & fructescens.
Dein capsula, eademque transversim discissa).

CAL. Spatha monophylla, oblongo ovata, inflata, erecta, magna, antice longitudinaliter tota dissecta, dorso ad basin aucta bracteis duabus oblongis brevibusque, apice trifido, decidua: laciniis ovatis, brevissimis, obtusis, media duplo latoiore auctaque exiguo acumine.

Perianthium aliud nullum.

COR. monopetala, inaequalis. Tubus cylindricus, eretus, omnium longissimus. Faux campanulata, amplissima, patens, brevis. Limbus bilabiatus, planus, longitudinaliter faucis. Labium superius semibifidum: laciniis subrotundis, integris. Labium inferius tripartitum: laciniis lateralibus figura & magnitudine lacinarum labii superioris; media duplo reliquis latiore, hinc undulata.

STAM. Filamenta quatuor, filiformia, inserta ad basin faucis, ad eius dorsum inflexa, eandemque non superantia, quorum duo exteriora reliquis longiora. Antheræ oblongæ, obtuse, didymæ, utrinque dependentes.

PIST. Germen ovato-oblongum, parvum. Stylus filiformis, eretus, superne latecens & planus, staminibus pauxillo longior. Stigma bifidum: laciniis oblongis, acutis, planis, patentibus.

PER. coriaceum, ovatum, utrinque acutum, compressum, crassum, verrucosum, sulco utrinque longitudinali notatum, apice acuminato & antrorsum inflexo, bivalve, deciduum: valvulis navicularibus.

SEM. Nux lignosa, dura, glabra, figura pericarpii, quadrifurcata, sulci antici utroque margine denticulata, apicis bipartiti acuminibus subulatis, quinquelocularis, structura quadrivalvis, at non dehiscens. Nuclei ovati, compressi, in loculamento intermedio quaterni, in lateralibus solitarii.

Planta annua, bipedalis, tota villosa & viscosissima, ex trunko unico brevissimo in ramos dividitur dichotomos, teretes, crassos, basi procumbentes, supra medietatem erectos, diffusos. Folia habet magna, petiolata, oppo-

sita, basi cordata, semiquinqueloba: lobis subovatis, repando-dentatis, acutis; petiolo subrubello, piloso, apice bifariam diviso marginem folii utrinque ad basin obeunte. Racemi simplices, laxi, erecti, circiter decemflori, fere pedales, in omnibus locantur caulum dichotomiis, atque eodem ad basin ortu augentur pedunculo unifloro ac solitario. Racemi alii breviores & irregulares terminant ramos omnes, insidentque foliorum alis quorundam. Flores sunt inodori, speciosi, hirsuti, septemplicares; in quibus spatha viret. Corolla candida in fundo faucis pingitur tribus maculis magnis atropurpureis. Rudimentum filamenti quinti adest brevissimum sub divisura labii superioris in infima fauce. Pericarpium initio viride, matrum flavescit. Nux nigra, figura singulari donata, aliquot adhuc dies post pericarpii casum in planta persistit; quæ, licet superne pateat, videaturque natura sua quadrivalvis, non tamen dehiscit, imo nec separari magna adhibita vi potest. Pedunculi proprii bractea suffulciuntur, appendiculis calycinis simili. Inveni semper corollæ faucem, quæ plantæ totius pars est viscosissima, refertam muscis exiguis & numerosis, quæ candore fortasse floris eminus attractæ, pellectæque nectare hoc inviscante, incutæ capiuntur, & mortem in epulis inveniunt. Radix est alba, teres, carnosa, crassa, in paucos ramos divisa, sapore dulci, cortice fusco. Hanc incolæ decorticatam & cum bovina elixam in mensis apponunt; vel saccharo conditam inter bellaria numerant. Medici Scorzoneræ Europæ in vicem præscribunt ægris, eodemque sub nomine venalem offerunt pharmacopæi: unde incolis etiam audit Escorzonera.

Crescit Carthaginæ in arvis sylvisque cæduis. Flores Junio & Julio. Fructus maturescunt Octobri.

1. CRESCENTIA (*Cujete*) foliis cuneato-lanceolatis. Linn. syst. 472.

(Pl. americ piæ. Tab. 167. *Ramulus florens cum fructu increcente*).

Crescentia arborescens, foliis confertis, ovato-oblongis, basi angustioribus. Brown. jam. 1, 2 & 3, p. 265.

Arbor cucurbitifera americana, folio subrotundo. Sloan. hist. jam. 2, p. 172.

Cucurbitifera arbor, subrotundis foliis confertis, fructo ovali. *Pluk. alm.* 124, *t.* 171, *f.* 2.

Cujete. *Plum. gen.* 23, *ic.* 109.

CAL Perianthium monophyllum, bipartitum, deciduum: laciniis ovato-subrotundis, concavis, obtusis, patulis. **COR.** monopetala, inæqualis. Tubus oblongus, amplius, gibbus, incurvus, ad altitudinem calycis magna plica introrsum depresso, calyce duplo longior. Limbus quinquefidus: laciniis inæqualibus, acuminatis, undulatis, dentato-incisis, tubo duplo brevioribus.

STAM. Filamenta quatuor, filiformia, crassa, incurva, longitudine tubi corollæ; quorum duo reliquis paulo longiora. Antheræ oblongæ, didymæ, incumbentes, obtusæ.

PIST. Germen ovatum, compressulum, glandulæ circulari persistenti insidens. Stylus filiformis, longitudine corollæ, superne compressus. Stigma orbiculare, magnum, compresso-planum, in binas lamellas divisum.

PER. Bacca maxima, magis minusve subrotunda, cortice duro, unilocularis.

SEM. numerosa, cordata vel subovata, acuta, compressa, bilocularia, nidulantia in pulpa spongiosa & succosa.

Arbor hæc vigintipedalis habitu suo eminus ab omnibus aliis facile distinguitur; in ramos enim abit vix subdivisos, longissimos, crassos, fere horizontaliter porrectos, foliisque confertis ad varias distantias & sparsim totos ornatos. Materies alba lentaque cortice vestitur inæquali & cinereo. Folia numero inconstanti plura ex eodem tuberculo prodeunt oblonga, basi attenuata, brevime petiolata, acuta, integra, nitida, venosa, late virentia, quatuor aut quinque pollices longa. Pedunculi uniflori, solitarii, in ramis senioribus sparsi, saepe vel ex ipso trunco ad trium supra terram pollicum altitudinem enascuntur. Flos magnus, interdum omnino viridis, saepe purpureo rubro flavoque diversimode variegatus, non marcescit, sed putrescit, odoremque tunc spirat cadaverosum, tetterimum, nec tolerabilem. Stamina antherifera non raro adsunt quinque, quorum tria tunc sunt longiora. Figura fructus in diversis arboribus varia est, aut sphærica, aut ovalis, aut subrotunda magnitudo etiam varia a diametro bipollicari ad pedalem. Varietates hæc, siquidem

dem tales sint, valde sibi constant. E pulpa fructuum syrupum conficiunt incolæ, summi medicaminis celebritate notissimum in variis pectoris morbis inque contusionibus ac læsionibus internis. E cortice, pulpa exempta, vasa sua conficiunt barbari; puta corbes, ollas, lances, cochlearia, ligulas despumatorias, similemque supelectilem. In hujusmodi olla, supposito igne, aliquoties fervere aqua potest, antequam comburatur. Externam horum superficiem cælaturis picturisque atris & rufis mire norunt decorare Caribæi, quæ Coui appellant. Europæi corbium loco uti solent. Gallis dicitur hæc arbor *Calebassier* sive *Cucurbitifera*.

Crescit in Caribæis & in Continente vicina.

LIPPIA (*hemisphærica*) capitulis hemisphæricis. *Linn.*
syft. 480.

(*Pl. americ. piæt. Tab. 168. Ramus cum flore & fructu.
Receptaculum. Capsula.*)

CAL. Perianthium diphylum, germini insidens, persis-
tens: foliolis lanceolatis, acuminatis, carinatis, villo-
sis, erectis.

COR. monopetala. Tubus infundibuliformis, erectus, ca-
lyce paulo longior. Limbus subbilabiatus, tubo fere
duplo brevior, quadrifidus: lacinias subrotundis, pla-
nis, obtusis; superiore latiore erectaque; lateralibus
patentibus; infima fere duplo longiore reliquis paten-
tissimaque.

STAM. Filamenta quatuor, subulata, erecta, orta in media
parte tubi corollæ; quorum duo superiora reliquis bre-
viora. Antheræ subrotundæ.

PIST. Germen ovale, compresso-planum, ad margines.
laterales ciliis densis auctum, infra receptaculum floris.
Stylus filiformis, erectus, fere longitudine tubi. Stig-
ma oblongum, capitatum, obliquum.

PER. Capsulæ duæ, oblongæ, interne planæ, externe an-
gulatæ, angulo ciliis longis ornato, coronatæ singulæ
calycis foliolo, levissime connatæ, uniloculares.

SEM. solitaria, oblonga.

Frutex decempedalis, totus odoriferus & aromaticus,
in ramos dividitur lignosos, teretes, infirmos, ni vicinis
se sustentent, reclinatos; quorum juniores quadrangulares
sunt & floriferi. Folia habet lanceolata, acuta, integra

vel interdum incisura aliqua superne inæqualia, subtus glabra, facie glabriuscula, petiolata, opposita, duos træs pollices longa. Pedunculi axillares, solitarii, oppositi, petiolorum fere longitudine, apice terminantur in capitulum imbricatum & hemisphæricum; cujus squamæ sunt rhomboideo-cordatæ, acutæ, acuminatæ, integræ, sub quovis flore unica. Flores exigui pedunculis propriis insident brevissimis. Corolla est alba. Capsulæ connotatæ, quando sunt maturæ, vi levissima separantur; & mentiuntur capsulam simplicem bilocularem & bivalvem. Posset forte quælibet capsula sumi pro semine ipso, ita ut tunc pericarpium foret nullum. Miro certe modo hæc planta Stellatas cum Verticillatis conjungit, neutra ex utrisque ipsa.

Crescit Carthaginæ in sylvaticis.

AVICENNIA.

CAL. Perianthium quinquepartitum, persistens: foliolis subovatis, concavis, obtusis, erectis: auctum ad basin squamis tribus imbricatis consimilibus, at acutis paucisque brevioribus.

COR. monopetala. Tubus campanulatus, erectus, calyx brevior. Limbus quadrifidus, bilabiatus, tubo duplo longior. Labii superioris lacinia subquadrata, emarginata, plana, patens. Labii inferioris laciniae tres, obversæ ovatæ, integræ, planæ, æquales, patenti reflexæ, longitudine superioris, eademque duplo angustiores.

STAM. Filamenta quatuor, subulata, erecta, tubo corollæ inserta; quorum duo anteriora pauxillo reliquis breviora & ad latera laciniæ superioris reflexa. Antheræ subrotundæ, erectæ, didymæ.

PIST. Germen ovatum. Stylus subulatus, erectus, longitudine staminum. Stigma bifidum; acutum; lacinia inferiore reflexa.

PER. Capsula coriacea, rhomboideo-ovata, compressa, obtusa, unilocularis, bivalvis.

SEM. unicum, magnum, figura capsulæ; compositum ex quatuor lamellis carnosis, altera lateralí & superiora parte connatis, & ex intermedia radicula oblonga villosaque; germinans intra pericarpium.

1. AVICENNIA (*nitida*) foliis lanceolatis, utrinque nitidis. *Linn. syst. 484.*

(Pl. A. P. Tab. 169. *Ramulus fructifer. Tum pedunculus florescens*).

Arbor ramosa, quadragintapedalis. Folia lanceolata, acuta, integra, nitida, breviter petiolata, opposita, tripollicaria. Pedunculi racemosi, subramosi, terminales. Flores sessiles, corollis albidis, quarum lacinia media labii inferioris impressam plerumque gerit staminis fuscum effigiem. Lamellæ seminum cotyledones sunt. Capsula dehiscit, quum jam cedicerit in terram, nunquam vero in ipsa arbore. Radices late sese quaquavorum sub terram diffundentes, sylvam emittunt amplam turionum semipedalium, asparagorum adinstar noviter erumpentium. Hi foliis orbi, utrum in novam excrescant stirpem, asserere nequeo. Incolis dicitur *Paleruvier gris*.

Crescit in Martinicæ littoribus maritimis.

2. AVICENNIA (*tomentosa*) foliis cordato-ovatis, subtus tomentosis. *Linn. syst. 484.*

(Pl. americ. piæt. Tab. 261, fig. 46. *Folium*.)

Bontia? foliis integris oblongis oppositis, petiolis crassis brevissimis subamplexantibus, floribus racemosis. Brown. jam. I, p. 263.

Donatia. Laefl. hisp. 193.

Mangle laurocerasi foliis, flore albo teträpetalo. Sloane. hisp. jam. I, p. 66.

Oepata. Rheed. mal. 4, p. 95, t. 45.

Arbor vigintipedalis vel altior, habitu prorsum praecedentis. Folia ovato-oblonga, obtusa, facie glabra & virentia, dorso vestita tomento denso tenuissimo ac incano, petiolis crassis. Neutquam fructus hujus arboris sunt Anacardii in officinis dictæ nuces; quod quidem, ex Commelini conjectura huic stirpi in horto malabarico subjuncta, asserit in sua materia medica Linnæus, aliquae hunc secuti. Quænam vero hæc Anacardia arbor proferat, adhucdum latet.

Crescit in plerisque Caribæis & in Continente vicina.

1. BONTIA (*daphnoides*). *Linn. syst. 484.*

(Pl. A. P. Tab. 261, fig. 57. *Flos. Fructus*).

Bontia arborescens, thymelææ facie. *Plum. gen. 32.*

Bontia laureolæ facie. *Dill. elth. 57, t. 49, f. 57.*

Olea sylvestris barbadensis, folio angusto pingui leviter crenato. *Pluk. alm.* 169, t. 209, f. 3.

CAL. Perianthium parvum, pentaphyllum; foliolis semi-ovatis, acutis, erectis, persistentibus.

COR. monopetala, ringens. Tubus longus, cylindricus, erectus. Labium superius oblongum, concavum, erectum, apice leviter bifido, acuto, revoluto. Labium inferius revolutum, convexum, in medio per totam longitudinem pilosum, magnitudine superioris, ad apicem trifidum, laciniis acutis cum intermedia latiore.

STAM. Filamenta quatuor, subulata, erectiuscula, longitudine corollæ, quorum duo reliquis longiora. Antherae incumbentes.

PIST. Germen ovatum. Stylus filiformis, situ & longidine staminum. Stigma obtusum.

PER. Drupa ovata, carnosa, instructa stylo emarcido.

SEM. Nux ovato-oblonga, obtusa, ossea, teres, unilocularis. Nucleus oblongus.

Arbor triginta pedes alta, ramosa, elegans, & erecta. Folia longe lanceolata, acuta, breviter petiolata, glabra, firma, alternatim sparsa, numerosa. Pedunculi uniflori, axillares. Corolla sordide flavescens cum linea pilosa labii inferioris purpurascente. Stamina semper numeravi quatuor. Drupa flavescit.

Crescit frequens in Martinica.

I. COLUMNEA (*Scandens*) corollis hirsutissimis. *Linn.*
syft. 484.

(*Pl. americ. piſt.* Tab. 170. *Caulis florescens. Fructus*). *Columnea scandens*, phœnicio flore, fructu albo. *Plum. gen.* 28, *ic.* 89, *f. I.*

Caules fruticosi, inordinate ramosi, teretes, a foliis delapsis tuberculati, glabri, arbores vicinas scandunt, & radiculis emissis sese iisdem affigunt. Rami juniores sunt hirsuti, & feliis ornantur oppositis, breviter petiolatis, solitariis, axillaribus. Flores speciosi, coccinei, & inodori. Capsula globosa, albida, calyci insidens, puncto umbilicata, bilocularis, coriacea, mollis. Semina numerosissima minutaque locantur in receptaculo molli. A mella in fundo petali abundantiter collecto nomen apud incolas fortitur *Lianne de syrop* sive *Hederæ syruperæ*.

Crescit in sylvis montosis & umbrosis Martinicæ. Florentem vidi Novembri.

I. RUSSELIA (*sarmentosa*).

(Pl. americ. pict. Tab. 171. *Ramus florens.*)

CAL. Perianthium pentaphyllum, persistens: foliolis ovatis, concavis, in acumen setaceum desinentibus, parvis, erectis.

COR. monopetala. Tubus cylindricus, compressulus, superne leviter ampliatus, semiclausus pilis plurimis perpendiculariter ortis e tubo infra labium inferius, erectus, longissimus. Limbus bilabiatus. Labium superius subrotundum, planum, emarginatum, patens, apice reflexo. Labium inferius trifidum: laciis oblongis, obtusis, planis, patentissimis, labio superiori paulo longioribus.

STAM. Filamenta quatuor, filiformia, erecta, orta in fundo tubi, eodemque paulo breviora, quorum duo longiora reliquis. Antheræ ovatae, geminæ, dependentes.

PIST. Germen ovatum. Stylus filiformis, erectus, longitudine staminum breviorum. Stigma globosum.

PER. Capsula subrotunda, acuminata parte styli, longitudine calycis, unilocularis, bivalvis.

SEM. numerosa, minima.

Planta hæc componitur ex caulis fruticosis, tetragonis, virgatis, lignosis, glabris, longissimis, infirmis, numerosis, ad trium quatuorve pedum altitudinem vicinis fruticibus se sustentantibus, dein reclinati. Folia habet ovata, ferrata, acuta, margine & facie subhirsuta, dorso glabra, brevissime petiolata, opposita, pollicaria, ad duorum plerumque pollicum distantias ab invicem remota. Axillis utrinque egrediuntur pedunculi triflori vel biflori, foliis duplo breviores, directione caulis; propriis post corollarum lapsum reflexis. Ad basin cujuslibet pedunculi proprii adest bractea lanceolata. Flores pulchelli, inodori, belle rubentes, ferme pollicares. Plantam dixi in honorem viri clarissimi Alexandri Russel, medici Halepen-sis, Historiam ejusdem urbis naturalem qui edidit.

Crescit circa Havanam in sylvaticis & fruticosis densis.

I. GESNERIA (*tomentosa*) foliis ovato-lanceolatis, crenatis, hirsutis; pedunculis lateralibus, longissimis, corymbiferis. Linn. syst. 463.

(*Pl. americ. piæ. Tab. 261, fig. 47. Flos. Capsula sedio transversa. Folium.*)

Gesneria erecta foliis lanceolatis rugosis hirsutis, pedunculis longissimis ramosis ex aliis superioribus. *Brown. jam. I, p. 261.*

Gesneria amplio digitalis folio tomentoso. *Plum. ic. 134.* *Digitalis* folio oblongo serrato, ad foliorum alas florida. *Sloan. hist. jam. I, p. 162, t. 104, f. 2.*

CAL. Perianthium monophyllum, subcampanulatum, germini accretum, semiquinquefidum, persistens.

COR. monopetala. Tubus subrotundo-ovatus, ex collo coarctato abiens in faucem infundibuliformem, calyce duplo longior. Limbus leviter prominulus, quinquefidus: laciniis semiovatis, obtusis: quarum binæ superiores concavæ, erectæ, minus profunde incisæ; triæ inferiores planæ, patentes.

STAM. Filamenta quatuor, subulata, orta in fundo tubi, ad labium corollæ superius accumbentia, eandemque non superantia, quorum duo reliquis paulo breviora. Antheræ subrotundæ.

PIST. Germen subrotundum, depresso, tubo calycis adnatum, infra corellam. Stylus filiformis, situ & longitudine staminum. Stigma capitato-depressum.

PER. Capsula subrotunda, depressa, circumdata calyce accreto, ejusdemque coronata laciniis patulis, subbilocularis. Dissepimentum in medio longitudinaliter interruptum.

SEM numerosissima, scobiformia. Receptacula quatuor, oblonga, hinc convexa, inde angulata, magna, disseparienti divisi parietibus utriusque adnata.

Planta fruticosa, duos tres quatuorve pedes alta, erecta. Caules teretes, incurvi, plerumque simplices, rarius ramosi, fragiles, a foliorum ipsu cicatriculis referti, centro medulloso, ex eadem radice plures. Folia frondosa, ovato-lanceolata, acuta, crenata, rugosa, dorso tomentosa, facie scabra, venosa, viscosa, factida, brevissime petiolata, opposita, quinquepollicaria. Pedunculi communes axillares, solitarii, teretes, villosi, erecti, ad apicem corymbosi, semipedales, circiter decemflori. Flores factidi, viscosi, inelegantes, externe sordide virentes, interne sordide atropurpurei. Ipsarum saepe rupium fissuras

radicibus suis penetrat. In iconē Plumieri folia nimis magna varietatem forte exhibent.

Crescit in rupestribus maritimis Cubæ.

I. BARLERIA (*hirsuta*) inermis; foliis ovatis, acuminate, integerrimis, subtus hirsutis.

(Pl. americ. piæt. Tab. 172. *Caulis superior florens*).

CAL. Perianthium quinquepartitum, persistens: foliolis lanceolatis, acutis, erectis, corollæ tubo multo brevioribus.

COR. monopetala. Tubus cylindricus, erectus. Limbi bilabiati & tubo duplo brevioris labium superius semibifidum; inferius trifidum cum lacinia intermedia paucō latiore; omnibus lacinias utriusque labii oblongis & obtusis.

STAM. Filamenta quatuor, subulata, quorum duo sterilia. Antheræ in aliis duobus filamentis geminæ, altera paulo altiore.

PIST. Germen oblongum. Stylus filiformis, erectus, staminibus brevior. Stigma bifidum, acutum.

PER. Capsula oblonga, basi attenuata, obtusa cum acuminæ, compressula, calyce longior, superne bilocularis & crassior, bivalvis: valvulis navicularibus, ungue elastico.

SEM. pauca, compresso plana.

Planta fruticosa, erecta, quadripedalis, ramosa. Folia sunt lanceolato-ovata, acuminata, integerrima, facie glabra, breviter petiolata, opposita, semipedalia. Et hæc in dorso, & juniores rami, calyces, corollæque extus villosa sunt. Racemi spicati, terminales, semipedales, recti; floribus subpedunculatis, aggregatis, & inodoris. Corolla candida cum labio inferiori punctis rubris variegata. Fructus abortare solent plerique.

Crescit in Martinicæ fruticetis humidulis.

2. BARLERIA (*nitida*) inermis; foliis ovatis, acuminate, integerrimis, utrinque nitidis.

Frutex totus nitidissimus, foliis crassioribus; cæterum priori simillimus: ut varietas ejus glabra dici posset.

Crescit in Martinica ad ripas torrentum.

I. PETRAEA (*volubilis*), Linn. syst. 473.

(Pl. A. P. Tab. 173. *Ramus florens*).

CAL. Perianthium monophyllum. Tubus campanulatus, brevis. Limbus quinquefidus: laciniis oblongis, obtusis, planis, coloratis, magnis, patentissimis, persistentibus; basi introrsum abeuntibus in squamas quinque, truncatas, planiusculas, erecto-conniventes, singulas e duabus diversis laciniis ortas.

COR. monopetala, rotata. Tubus infundibuliformis, erectus, tubo calycis paulo longior. Limbus quinquefidus bilabiatus: laciniis subrotundis, planis, patentissimis, fere æqualibus, calyce paulo brevioribus.

STAM. Filamenta quatuor, subulata, brevia, in superiore parte tubi corollæ, quorum duo exteriora longiora. Antheræ ovales, erectæ.

PIST Germen ovatum, obtusum, parvum. Stylus filiformis, erectus, longitudine tubi calycis. Stigma simplicem, obtusum.

PER. Capsula obverse ovata, depressa, bilocularis; recondita in tubo calycis maximi, clauso conniventibus squamis.

SEM. solitaria,

Planta fruticosa ramis scabris, teretibus, brachiatis, arbores ad viginti pedum altitudinem scandentibus. Folia ovata, acuta, integerrima, utrinque scaberrima, petiolata, opposita, tres quatuorve pollices longa. Racemi simplices, laxi, secundi, speciosi, terminales, penduli, novemplicares, floribus plus minus triginta onusti. Flores inodori, pulchri, successive se se explicantes, longe pedunculati, calyce cæruleo aut e purpureo cærulescente, corolla saturate violacea & caduca. Semina rarissime ad maturitatem perveniunt, decidentibus præmature calycibus. Perfecte maturam capsulam invenire ego nunquam potui; unde valvularum conditio mihi mansit ignota.

Crescit in Martinicæ arbustis & fruticetis. Flaret Novembri & sequentibus.

I. STEMODIA (*maritima*) Linn. *Syst. 497.*
(*Pl. americ. piæ. Tab. 261, fig 48. Folium.*).
Stemodiaca maritima odorata; foliis minoribus sessilibus

denticulatis hastatis; floribus solitariis, alaribus. *Brown. jam I, p. 261, t. 22, f. 2.*

Scordium maritimum fruticosum procumbens, flore cæruleo. *Sloan. hist. jam. I, p. 175, t. 110, f. 2.*

CAL. Perianthium monophyllum, profunde quinquefidum, persistens: laciniis linear-lanceolatis, acutis, æqualibus, erectis.

COR. monopetala. Tubus cylindricus, erectus, longitudine calycis. Limbus subbilabiatus, quadrifidus: laciniis subovatis, obtusis, planis, patentibus, longitudine tubi, superiore constitente labium superius latiore reliquis.

STAM. Filamenta quatuor, subulata, erecta, superne bifida, tubum non superantia, quorum duo reliquis paulo longiora. Antheræ globosæ, parvæ, in singulis filamenti laciniis una, hinc omnino octo.

PIST. Germen subrotundum. Stylus filiformis, erectus, longitudine fere staminum. Stigma obtusum, simplex.

PER. Capsula ovato-oblonga, in lateribus compressulis sulco longitudinali notata, bilocularis, bivalvis.

SEM. numerosa, globosa, minima,

Planta forte biennis, duos tresve pedes alta. Caules hirsuti, plerumque hexagoni, interdum pentagoni, foliis & ramulis axillaribus referti. Folia acuta, serrata, sessilia, hirsuta, viscosa, odorata, opposita vel alterna, plus minus semipollicaria. Stipulæ ovatæ, integræ, longitudine calycis, geminæ sub quovis flore. Flores sessiles, axillares, solitarii, parvi; corolla cærulea caducae.

Crescit in arenosis maritimis Jamaicæ, & copiose in ipsius oppidi Kingston viis extimis.

1. CAPRARIA (*biflora*) foliis alternis; floribus geminis. Linn. syst. 475.

(Pl. americ. pist. Tab. 174. Ramus cum floribus & fructibus. Folium ex planta in umbrosis nata).

Capraria foliis alternis; corollis quinquefidis Brown. jam. I, p. 268.

Capraria curassavica. Herm. par. 110, t. 110.

Gratiolæ affinis frutescens americana foliis agerati seu veronicæ erectæ majoris. Comm. hort. I, p. 79, t. 40.

Planta fruticosa, altitudine rarius quatuor pedes excedit. In ramos dividitur longos, sublignosos, erectos, subteretes, interdum leviter hirsutos. Folia habet oblonga, utrinque acuminata, superne ferrata, glabra, sessilia, alterna, sesquipollicaria; in locis pinguibus & um-

broſis fere quinquepollicaria, præſertim ſubaxillaria ramulorum, quale unum in iconē adjunxi; in arenosis maritimis ſucculenta, crassa, & fragilia, cujuſmodi tum etiam calyces. Pedunculi uniflori, tenues, axillares, ut plurimum bini, interdum ſolitarii, rariſſime terni, foliis multo breviores. Flores inodori; calyce glabro, profundissime quinquepartito; corollæ candidæ laciniis ad basin hirsutis; antheris didymis; germe ovato, utrinque ſulcato; ſtigmate capitato, acuto. Capsula eſt utrinque ſulcata & longitudine calycis; valvulis bivalvibus. Semini minima. Opinio apud qnoscām invaluit, eſſe hanc herbam veram Chinensium Theam, a qua revocare illos viꝝ potui, etiamsi tantopere & ſapore & reliquo habitu ab eadem differat. Gallis dicitur *Theé du pays* ſive *Theē* indigena.

Crescit in Caribæis omnibus & in vicina Continenti, in arvis, ruderatis, ad pagos, &c. Floret anni majorem partem.

I. BIGNONIA (*longiflora*) foliis ſimplicibus, ovatis; caule eretto; floribus diandris.

(Pl. americ. piæt. Tab 261, fig. 50. *Semen*).

Bignonia arborea, foliis ovatis verticillato-ternatis, filiis gracili longissima *Brown. jam. 2, p. 264.*

Bignonia arbor, folio singulari undulato, filiis longissimis & anguſtissimis. *Plum. ic. 57, amer. 5.*

Arbor elegans, erecta, comofa, quadraginta vel plures ſæpe pedes alta; habet folia ſimplicia, ovata, acuta, integrerrima, uadulata, nitida, oppofita vel terna, petiole tenui pollicari, bipollicaria ipsa, orta præprimis versus extremitates ramulorum. Racemi terminales, paniculati, & infirmi, ſuſtinent flores plus minus quadraginta, ſuaveolentes, albicantes, ſtaminibus præter fertilia duo præditos ſterilibus tribus. Siliquæ gracilissimæ, ſubteretes, bipedales, ſpectaculo ſæpe singulari arborem a vertice ad truncum usque integrum numero ſuo obieguunt. Semina linearia, utrinque acuminata, pilis vediuntur longis densis & fericeis, a congeneribus hinc diversa. Galis dicitur *Chene noir* ſeu *Quercus nigra*, propter optimam ſuam materiem; Anglis *French Oak* ſive *Quercus Gallica*.

Crescit in Domingo paſſim.

1. BIGNONIA (*echinata*) scandens; fructibus echinatis.
Aubl. guian. 2, p. 648, t. 264.

(Pl. americ. pict. Tab. 261, fig. 51. *Fructus Semen*).

Caules teretes, brachiati, lignosi, arbores ad usque cacumina scandunt. Folia sunt opposita, inferiora ternata, superiora bijugata & cirrhosa: foliolis ovatis, acuminatis, glabris, integerrimis, quatuor aut sex pollices longis. Flores haud contigit videre. Fructus ex ovali oblongus, compressus, maximus, fuscus, undique aculeis brevibus subulatis densisque tegitur.

Crescit frequens Carthagenaæ in sylvis densis.

3. BIGNONIA (*dichotoma*) foliis conjugatis, cirrhosis: foliolis ovatis, in acumen obtusum desinentibus; foliis imis ternatis; floribus racemosis; pedunculis communibus dichotomis.

Caules fruticosi scandunt. Foliola sunt glabra, integra, tripollicaria. Racemi paniculati; pedunculis communibus dichotomis, ultimis trifloris. Flores inodori, purpurei, mediocres. Siliquæ membranaceæ, compressæ, longissimæ, angustæ.

Crescit Carthagenæ in sylvaticis.

4. BIGNONIA (*paniculata*) foliis conjugatis, cirrhosis; foliolis ovato-cordatis; foliis imis ternatis; floribus racemosis; pedunculis trifloris. Linn. syst. 471.

(Pl. americ. pict. Tab. 175. *Pars caulis cum ramo florente. Semen & capsula*).

Bignonia bifolia scandens, flore violaceo odoro, fructu ovato duro. Plum. ic. 56.

CAL. Perianthium monophyllum. Tubus oblongo-campanulatus, crassus, erectus, superne coloratus, abiens in limbos binos coloratos: quorum interior est tubulosus, erectus, brevis, ab erumpente corolla varie laceratus, antea conico-convexus cum acumine & integer. Exterior amplissimus, margine quinquefido, patentissimus, planiusculus; laciniis subrotundis, obtusis, brevibus, emarginatis, æqualibus.

COR. monopetala, subcoriacea, ringens. Tubus figura & longitudine tubi calycis. Faux oblonga, ventricosa, ascendens, antice fulcato-compressa, longitudine calycis. Limbus bilabiatus. Labium superius oblongum, erectum, concavum, apice leviter reflexo bifidoque:

laciniis semiovatis, acuminatis, erectis, minimis. Labium inferius trifidum, longitudine superioris, profunde divisum, patulum: laciniis oblongis, acutis, planis, æqualibus; quarum media ad apicem augetur appendicula crassa introrsum deorsumque inflexa & hamata.

STAM. Filamenta quatuor, subulata, orta in parte superiore tubi corollæ, qua breviora, ad dorsum labii superioris inclinata, quorum duo paulo longiora reliquis. Antheræ geminæ, oblongæ, ab apice utrinque dependentes

PIST. Germen subrotundum, parvum, corpori orbiculari plano glanduloso insidens. Stylus subulatus, superne compressus, situ & longitudine staminum. Stigma bifidum: laciniis subrotundis, magnis, planis, patulis.

PER. Siliqua ovalis, utrinque attenuata, bilocularis, bivalvis; valvulis subligneis, concavis, caducis.

SEM. plurima, subrotundo-cordata, compresso-plana, circumdata membrana ad latera in alas excurrente, imbricata.

Planta fruticosa, scandens caulis hexagonis & subteretibus, glabris, ad radicem vix pollicem crassis, duo decimpedalibus. Foliola sunt obtuse acuminata, integræ, glaberrima, variæ magnitudinis, suprema conjugata ternataque omnia cirrhis distituta, quibus conjugata intermedia instruuntur; qui sunt longi, teretes, apiceque trifidi. Petioli sunt teretes & sulcati. Racemi terminales & speciosi fiunt ex pedunculis partialibus oppositis triflorisque. Flores inodori calycis limbum habent candidum, at corollam purpuream. Horum medii diu ante laterales se explicant, qui sæpe abortant. Corollæ labia rarissime patent. Filamenti, sicut in plerisque hujuscæ generis, quinti adest rudimentum breve. Caules & folia amarissima sunt. Floris singularis structura impulit me, ut integrum characterem sisterem.

Crescit frequens circa Carthaginem in fruticetis & arbustis. Floret Julio & Augusto.

5. **BIGNONIA** (*orbiculata*) foliis digitatis; caule scandente; siliquis orbiculatis.

(*Pl. americ. pict. Tab. 263, fig. 77. Folium. Capsula. Dissepimentum.*)

Caules teretes, fruticosi, lignosi, scandentes. Folia

opposita, digitata; petiolis teretibus, nitidis, quinque aut sex pollices longis; foliolis quinque, ovatis, in acumen attenuatis, glabris, integris, petiolatis; medio majori reliquis, cujus loco in supremis adest cirrus longus, teres, apice bifidus vel trifidus. Racemi simplices, axillares, oppositi, plus minus decemflori, foliis breviores. Flores inodori, oppositi, mediocres, structura congenerum, flavescens, limbo magis pallente. Siliquæ maximæ, orbiculatæ, compresso-planæ, nitidæ, accedentes ad siliquas Bignonie cæruleæ.

Crescit Carthaginæ in sylvaticis. Floret Septembri & Octobri.

6. **BIGNONIA** (*flans*) foliis pinnatis; foliolis serratis; caule eretto, firmo; floribus racemosis. Linn. syst. 471. (Pl. americ. piſt. Tab. 176. Pars summa caulis florentis). Bignonia fruticosa; foliis pinnatis, ovatis; floribus luteis. Brown. jam. 3, p. 264.

Bignonia arbor, flore luteo, fraxini folio. Plum. ic. 54.

Apocyno affine Gelseminum indicum hederaceum fruticosum minus. Sloan. hist. jam. 2, p. 63.

Arbuseula eretta, a quatuor ad octo pedes alta, parum ramosa, trunco gracili, tamen firmo & lignoso. Folia sunt pinnata, opposita, petiolata, cum terminante impari. Foliola subsessilia, elongato-lanceolata, acuminate, serrulata, & venosa. Racemi terminales, eretti. Flores lutei cum tubo interne rubris lineis tincto. Siliquæ semipedales. Semina alata.

Crescit in rupibus imminentibus oppido Divi Petri ad Mouillage in Martinica copiose.

1. **VOLKAMERIA** (*aculeata*) spinis petiolorum rudimentis. Linn. syst. 481.

(Pl. americ. piſt. Tab. 177. Ramus florens cum fructibus fere muturis. Semen transverse diffusum).

Clerodendrum fruticosum, spinosum; foliis inferioribus confertis, superioribus oppositis; pedunculis tripartitis trifloris alaribus. Brown. jam. 1, p. 262, t. 30, f. 2.

Ligustrum aculeatum, fructu testiculato. Plum. ic. 164.

Paliuro affinis ligustrifolia spinosa, flore monopetalō difformi. Sloan. hist. jam. 2, p. 137, t. 166, f. 2 & 3.

CAL. Perianthium monophyllum, campanulatum, semi-

quinquefidum, persistens: laciñis ovatis, acuminatis, patentissimis, planis.

COR. monopetala. *Tubus cylindricus, erectus, longimus. Limbus quinquefidus: laciñis oblongis, obtusis, planis, æqualibus, patentissimis, tubo fere triplo brevioribus, quarum superiores duæ magis ab invicem divergunt.*

STAM. Filamenta quatuor, filiformia, ercta, corolla multo longiora, accreta tubo per totam fere longitudinem, limbo accumbentia ad divisuram superiorem, quorum duo reliquis paulo breviora. Autherae oblongæ, incumbentes.

PIST. Germen oblongum, quadrifidum. *Stylus filiformis, errectus, longitudine staminum. Stigma bifidum: laciñia altera acuta, obsoleta altera.*

PER. *Bacca subrotunda, exsucca, quadrifalcata, nitida, unilocularis, bifariam discedens.*

SEM. duo, subhemisphærica, dorso sulcata, bilocularia; pulpa nulla distincta. Nuclei solitarii, oblongi.

Frutex quinque aut sex pedes altus, ramosus, eretus, totus floribus onustus inodoris, albis; in quibus flamina sæpiissime quinque & interdum sex reperiuntur purea. Baccæ fuscæ.

Crescit passim in Caribæis.

I. **CITHAREXYLUM** (*cineratum*) ramis teretibus; calybus dentatis. *Linn. syst. 472.*

(*Pl. americ. piæ Tab. 178. Ramulus fructifer. Flos. Semen utrinque visum.*)

Citharexylum fruticosum, cortice cinereo, foliis oblongo-ovatis oppositis, petiolis marginatis pedatis, floribus spicatis, fructu majori. *Brown. jam. I, p. 264.*

Citharexylum arbor laurifolia, americana, foliorum venis latae canticibus. *Pluk. alm. 108, t. 162, f. I.*

Jasminum arborescens racemosum foliis lauri. *Plum. i. 157.*

CAL. Perianthium monophyllum, campanulatum, erectum, quinquedentatum, acutum, persistens.

COR. monopetala. *Tubus subinfundibuliformis, levissime incurvus, ad faucem hirsutus, calyce duplo longior. Limbus bilabiatus, quinquefidus: laciñis oblongis, apice latescentibus, truncatis, planis, paten-*

tissimis, tubo brevioribus, duabus superioribus angustioribus.

STAM. Filamenta quatuor, subulata, erecta, orta in media parte tubi corollæ, quorum duo reliquis pauxillo longiora. Antheræ oblongæ, didymæ, erectæ.

PIST. Germen globosum. Stylus filiformis, vix calyce longior. Stigma capitato-obtusum.

PER. Bacca subrotunda, leviter compressa, absolute acuminata styli parte, unilocularis.

SEM. duo, ovata, hinc convexa, illic concava, apice emarginato, pulpa distincta, bilocularia. Nuclei foliarii, oblongi.

Arbor erecta, comosa, ramosa, vigintipedalis, in cultis elegans; trunco tereti, diametro ad summum pedali. Folia lanceolato-oblonga, acuminata, integra, nitida, pagina altera saepe ad petiolum obliterata, plerumque opposita, interdum alterna, non raro etiam terna, magnitudo varia, ut plurimum plus quam semipedalia. Petioli ad latus utrumque superne saepe foveas habent paucas oblongas & glandulosas, ex quibus guttulae mellis exsudant in junioribus. Racemi terminales, densi, simplicissimi, penduli, novem decemye pollices longi. Flores parvi, numerosi, corollis candidis, odoriferi, breviter pedunculati. Baccæ succulentæ, nitidæ, molles, subrotundæ, primo virides, dein rubentes, tandem nigræ. In oppido Divi Petri viæ aliquot ambulacra præbent ex satis hisce arboribus confecta gratissima. Incolis audit *Bois cotelet* sive *Arbor costalis*. Viennæ etiam quotannis nunc floret.

Crescit in Martinicæ sylvaticis.

2. CITHAREXYLUM (quadrangulare) ramis tetragonis.

Linn. syst. 472.

Toto habitu ita cum præcedente hæc congruit, ut negare certo non audeam, alterutram arborem ex altera originem ducere. Truncus tamen ramique principiores sunt obtuse tetragoni & quadrifulcati. Baccæ rubent. Vocatur *Bois cotelet carré* sive *Arbor costalis quadrata*.

Crescit cum præcedente.

1. DURANTA (Plumieri) calycibus fructescientibus contortis. Linn. syst. 482.

(*Pl. americ. piæt. Tab. 261, fig. 53. Fructus*).

Castorea repens spinosa. *Plum. gen. 30.*

Castorea racemosa, flore cæruleo, fructu amaro. *Plum. gen. 30, ic. 79.*

CAL. Perianthium monophyllum, tubulosum, quinquestriatum, quinquedentatum, acuminatum, persistens.

COR. monopetala. Tubus cylindricus, calyce paulo longior, supra eundem leviter incurvatus. Limbus tubo triplo brevior, bilabiatus, quinquefidus: laciniis subrotundis, obtusis, planis, patentissimis, quarum superiores duæ paulo angustiores.

STAM. Filamenta quatuor, subulata, erecta, brevia, tumrum corollæ non superantia, quorum duo reliquis longiora. Antheræ erectæ, simplices.

PIST. Germen subrotundum. Stylus filiformis, erectus, longitudine staminum. Stigma capitatum, obtusum.

PER. Bacca ovato-subrotunda, obsolete tetragona, unilocularis; stricte inclusa calyci aucto, colorato, ore connivente & oblique contorto.

SEM. quatuor, ovata, hinc convexa, inde angulata, bilocularia. Nuclei oblongi.

Arbuscula quindecimpedalis, ramis alternis, erectis vel reclinatis. Spinae subulatae, axillares, oppositæ, saepissime absentes. Folia lanceolata, breviter petiolata, acuta, supra medium obtuse & inæqualiter serrata, glabra, opposita, bipinnicaria. Racemi laxi, ampli, reclinati, axillares & terminales. Flores leviter suaveolentes, plurimi, corollis cæruleis, brevissime pedunculati. Fructus flavi; in quibus ipse flavescit calyx, & evadit baccae similis, totus mutatus atque a priore forma diversus.

Crescit in fruticetis & sepibus arboreis Domingo.

2. DURANTA (*Ellisia*) calycibus frutescentibus rectis
Linn. syst. 482.

(*Pl. americ. piæt. Tab. 179. Ramus florens. Fructus.*)
Ellisia frutescens, quandoque spinosa; foliis ovatis utrinque acutis, ad apicem serratis, spicis alaribus. *Brown. jam. I, p. 262, t. 29, f. 1.*

Frutex præcedenti simillimus, præterquam in calyce, cuius summa pars in fructu non contorquetur, sed connivet, & erecta perstat.

Crescit in Jamaica passim in sepibus ad margines vias, quæ ab oppido Kingston ducit ad San Jago de la Vega.

I. BES.

1. BESLERIA (*lutea*) pedunculis simplicibus, confertis; foliis lanceolatis. *Linn. syst. 468.*

Besleria *virgæ aureæ* foliis, flore luteo, minor. *Plum. gen. 29, ic. 49.*

CAL. Perianthium quinquepartitum, persistens: foliolis ovato-lanceolatis, acuminatis, planis, laxis, erectis, externe hirsutis, apicibus reflexis.

COR. monopetala. Tubus subcylindricus, basi antice de-trusus in gibbum propendentem calyceque inferiorem, externe hirsutus, longitudine calycis. Limbus quinquefidus: laciniis subrotundis, planis, patentissimis; quarum infima maxima, duæ superiores minus profunde divisæ.

STAM. Filamenta quatuor, subulata, orta in fundo tubi, eodemque breviora, quorum duo reliquis longiora. Antheræ oblongæ, didymæ, utrinque dependentes.

PIST. Germen subovatum, hirsutum; insidens corpori glanduloso, amplexanti, persistenti, ad corollæ gibbum in figuram cordatam producto. Stylus subulatus, erectus, staminibus brevior. Stigma bifidum, obtusum.

PER. Bacca globosa, unilocularis.

SEM. subrotunda, minima, numerosa, nidulantia.

Crescit frequens in Martinicæ sylvis vastis umbrosis humidisque.

2. BESLERIA (*cristata*) pedunculis simplicibus, solitariis; calycibus ferrato-cristatis. *Linn. syst. 468.*

(Pl. americ. piæt. Tab. 180. *Ramus florens*)

Besleria scandens cristata, fructu nigro. *Plum. ic. 50.*

CAL. Perianthium pentaphyllum, coloratum, persistens; foliolis cordatis, acuminatis, inæqualiter inciso-ferratis, maximis, omnium laxissimis, erectis, lateribus reflexis & proximorum duorum mutuo applicatis

COR. monopetala, externe hirsuta. Tubus cylindricus, antice ad basin detrusus in gibbum magnum propenden-tem calyceque inferiorem, calycem superans. Limbus quinquefidus: laciniis subrotundis, planis, parvis, sub-equalibus, patentissimis.

STAM. Filamenta quatuor, subulata, erecta, orta e basi tubi, eiusdemque longitudine, quorum duo reliquis bre-viora. Antheræ globosæ, didymæ, incumbentes

PIST. Germen ovatum, obsolete quadrangulare; impos-

tum corpori glanduloso, amplexanti, persistenti, ad corollæ gibbum in figuram cordatam producto. Stylus filiformis, erectus, longitudine staminum. Stigma capitato-obtusum.

PER. Capsula coriacea, globosa, unilocularis, bivalvis: valvulis interne auctis lamella longitudinali lanceolata accretaque

SEM. numerosa, oblonga, minima, nidulantia in pulpa molli.

Planta hæc fruticosa, a præcedente habitu diversissima, arbores scandit, quibus radices e geniculis emissas affigit. Ramusculi sunt teretes, hirsuti, & longi. Folia habet ovata, acuta, ferrata, hirsuta, rugosa, venosa, petiolata, opposita, bipinnicaria, subdisticha. Pedunculi uniflori, axillares, solitarii, deflexi, fere longitudine sunt foliorum. Florum calyx venuste coccineus est; corolla flavescit. Stamina oriuntur e membrana communis, quæ adnascitur corollæ tubo, & ad hujuscem gibbum finditur longitudinaliter: qua in fissura rudimentum spectatur filamenti quinti, a prædicta membrana liberrimi. Illa autem post pollinis ejaculationem intra invicem mire inflestantur, Martiniæ more, ante eandem erecta. Potest corpus germen amplectens flavumque dici haud inepte glandula; quale in plurimis Didynamis angiospermis obtinere observavi, quod in Besleriis, Cœlumnea, Crescentia, Bignoniis, paucisque aliis multo est evidentius majusque.

Crescit in sylvis humidis & montosis Martinicæ. Flere, opinor, majorem partem anni.

TETRADYNA MIA.

SILIQUOSA.

I. **CLEOME** (*procumbens*) floribus hexandris; foliis lanceolatis, simplicibus; caulinibus procumbentibus.
Linn. syst. 506.

(*Pl. americ. pict. Tab. 181. Tota planta cum flore & fructu.*)
CAL. Perianthium tetraphyllum, deciduum: foliolis lanceolatis, concavis, acutis, patentibus, æqualibus.

COR. Petala quatuor, ovalia, plana, utrinque acuta, patentia, calyce duplo longiora.

Glandulæ nectariferæ nullæ.

STAM. Filamenta sex, subulata, erecta, æqualia, petalia paulo breviora. Antheræ oblongæ, erectæ.

PIST. Germen oblongum, erectum. Stylus brevis, persistens. Stigma crassulum, obtusum.

PER. Siliqua longa, teres, acuminata stylo, unilocularis, bivalvis.

SEM. plurima, reniformi-subrotunda.

Radix forte plusquam annua. Caules e radice fusiformi plures, herbacei, ramosi, glabri, toti procumbentes in orbem. Folia lanceolata, acuta, integrerima, glabra, petiolata, alterna, septem octo lineas longa. Pedunculi uniflori, alares, solitarii. Flores parvi, corollis flavis, a congeneribus in multis diversi.

Crescit in pratensibus insulæ Domingo.

2. CLEOME (*serrata*) floribus hexandris; foliis ternatis; foliolis linear-lanceolatis, serratis. Linn. syst. 506.

(Pl. americ. pist. Tab 262, fig. 73. *Folium*)

Planta annua, erecta, bipedalis. Racemi laxi, simplices, terminales. Florum corolla alba, stamina tetrodynamica. Siliqua teres, triplicaris

Crescit Carthaginæ in sylvaticis humidis.

3. CLEOME (*spinosa*) floribus hexandris; foliis septentatis, quinatisque; caule spinoso. Linn. syst. 506.

Cleome assurgens ramosum & spinosum heptaphyllum; spica multiplice foliata. Brown. jam. I, p. 273.

Sinapistrum ægyptium heptaphyllum flore carneo, majus, spinosum. Sloan. cat. jam. 80

Sinapistrum indicum spinosum, foliis quinque, sex, septemve, numero incertis. Burm. zeyl. 215.

Tareriyaya. Marogr. bras. l. I, c. 16.

Planta fruticosa, erecta, ramosa, quatuor vel quinque pedes alta, tota viscosa & fœtida; trunco pollicem diametro æquante. Rami juniores sunt hirsuti. Spinæ subulatæ, breves, acutissimæ, ad petioli latus quodlibet una, & caulinæ sparsæ aliquot, non ubique præsentes. Folia sèpius septena, integra. Racemi simplices, laxi, magni, terminales. Flores magni, petalis albidis, staminibus pistilloque atropurpureis. Siliquæ teretes, longæ.

Crescit passim in Jamaica; in ruderatis & simetis ap-
pidi Kingston frequens.

MONA DELPHIA.

PENTANDRIA.

I. BOMBAX (*pentandrum*) floribus pentandris; foliis
septenatis. Linn. *syft.* 516.

(Pl. americ. pict. Tab. 182. *Ramulus foliosus. Flos*
hujus calyx; & pistillum. Aculei duo, figura varii)
Bombax foliis digitatis, brachiis erecto-patentibus. Brown.
jam. I, p. 277.

Bombax foliis digitatis, brachiis horizontaliter porrectis.
Brown. jam. 2, p. 277.

Gossypium arboreum maximum spinosum & non spinosum.
Sloan. hist. jam. 2, p. 72.

Ceiba viticis folio, caudice aculeato. Plum. gen. 42.

Ceiba viticis folio, caudice glabro. Plum. gen. 42.

Eriophorus javana. Rumph. I, p. 194, t. 80.

Ponja. Rheed. mal. 3, p. 59, t. 49, 50 & 51.

CAL. Perianthium monophyllum, campanulatum, parvum,
persistens; ore erecto, quinquefido, inæquali.

COR. Petala quinque, oblongo-ovata, concava, acumine
ad latus præmorso, patentissima, basi concreta in tubum
campanulatum longitudine calycis.

STAM. Filamenta quinque, subulata, crassula, incurva,
longitudine corollæ; basi concreta in unum corpus tu-
bulosum, breve, supra germen coarctatum, adnatum
que petalorum basi. Antheræ maximæ, oblongæ, va-
rie inflexæ, versatiles.

PIST. Germen subovatum, reconditum intra filamentorum
tubum. Stylus infra connata filimenta tenuis, & capil-
laris; supra eademque subulatus, crassus, basi gibbus,
declinatus, staminibus longior. Stigma capitatum.

PER. Capsula magna, ovali-oblonga, teres, obtusa, quin-
quelocularis, quinquevalvis: valvulis sublignis, caducis.

SEM. plurima, subrotunda, lanugine copiosa evoluta.
Receptaculum columnare, pentagonum, dissepimenta
emittens.

Arbor hæc triginta & plures altitudine pedes æquat, quos etiam non raro centum excedit. Materies est albicans, levis, atque fibrosa. Cortex viridis primo, tandem leucophæus, crassitie sex linearum est, atque ultra. Truncus est erectus, figura valde inæquali, rarissime regularis, sèpius circa medium ventricosus, aut crassior superne quam in ipsa basi, altus quandoque triginta pedes, antequam in ramos abeat. In arbore proiectæ ætatis, miro sane spectaculo, a trunci superiore parte longitudinaliter costæ decurrent lignosæ ex ipsaque trunci substantia enatæ, sensim latescentes ita, ut circa radicem ad quinque & amplius pedum distantiam ab ipso trunci corpore progrediantur. Aculei difformes, lignosi, acuminati, fortes, & maximi, totam trunci ramorumque principalium superficiem obsident; interdum vero omnino absentes, cortice tunc plerumque suberofo existente. Sunt hi aut conici subulatique, vel compressi & oblongo-quadrati, apice tunc dentato, &c. qui a cortice si avellantur, absque laßione maculam in eodem dumtaxat albidam relinquent. Rami comam formant amplam, umbrosam, elegantem, regularemque in locis istis, quæ ventis Eurum inter Septentrionemque plantibus haud exponuntur. Arborum vero, quæ simili situ nascuntur, rami versus Africum propelluntur, a parte venti fronde tunc sèpe nulla, ramorumque brachiis non raro ipsam trunci superiorē partem crassitie superantibus. Folia sunt digitata, septenata, glabra, integerrima vel ferrata, longe lanceolata, acuta, quotannis decidua. Racemi compositi, breves, subcymosi, densi, flores gerunt numerosos, pulchros, pallide roseos, odorem mihi visos spirare caseosum, mox post lapsum foliorum prodeentes, omnes æqualiter ramos exornantes; unde, calculo instituto, in comosa atque adulta arbore numeravi florū ultra vices centena millia. Fructus succedunt magni, glabri, fusi, lanuginem continentis fuscam sericamque, quæ levissima aura in aërem elevata os naresque tractantis infestat, cæterum usus rari apud incolas. Citissime hæc arbor increscit, atque ex tales facillime propagatur: putata vero sibique relista in cariem atque putredinem ocyus abit. Gallis vocatur *Fronmager* sive *Casearia*, Anglis *Silk Cotton-tree* seu *Arbor Gossypium sericum* ferens.

Crescit passim in Caribæis.

2. BOMBAX (*Ceiba*) floribus polyandris; foliis quinatis.
Linn. syst. 516. Laefl. it. num. 180, p. 278.

(Pl. A. P. Tab. 261, fig. 54. *Capsula Semen*).

CAL Perianthium monophyllum, campanulatum, parvum, erectum, persistens: ore integro, levissime quinque-dentato.

COR. monopetala. Tubus infundibuliformis, erectus, calyce duplo longior. Limbus quinquefidus: laciniis oblongis, concavis, obtusis, omnium longissimis.

STAM. Filamenta numerosa, filiformia, longitudine corollæ, inferne connata in quinque corpora confluentia basi in tubum conicum adnatum infimæ parti tubi corollæ, ejusdemque tubi longitudine. Antheræ oblongæ, versatiles.

PIST. Germen obovatum, quinquangularis, calyce duplo brevius. Stylus filiformis, ad basin paulo crassior, erectus, longitudine staminum. Stigma obtusifuscum, subquinquefidum.

PER. Capsula magna, obverse ovata, quinquangularis, nitida, apicis depresso centro concavo stylique basi crassante persistente acuminato, quinquelocularis, quinquevalvis: valvulis lignosis, ad angulos dehiscentibus, planiusculis, tum radiatim patentibus.

SEM. plurima, subrotunda, lanagine obvoluta. Receptaculum columnare, pentagonum, dissepimenta emittens.

Habitu hæc arbor refert præcedentem; sed in qua aculeos semper observavi præsentes. Folia sunt digitata, quinata semper, atque integerima. Flores vivos videre non contigit, sed characterem ex exsiccatis desumpsi: hos enim a mense Aprili ad Novembrim usque siccos, e fusco rubentes, & adhuc pristinam retinentes formam, numero ingenti ramis atque arbori suppositis fruticetis inhærere vidi, solumque interdum obtegere. Unde conjicio, circa Januarium novos flores prodire. Fructus subfuscus sunt duplo præcedentibus minores, sed multo elegantiores. Hispanis *Ceiba* dicitur.

Crescit passim Carthaginæ.

3. BOMBAX (*heptaphyllum*) floribus polyandris; foliis septenis. Linn. syst. 516.

(Pl. americ. pict. Tab. 261, fig. 55. *Calyx cum pistillo. Stamina*).

Gossypium seu Xylon arbor orientale digitatis foliis lăvibus, fructu quinquecapsulari, alba & nitente lanagine farcto. Pluk. alm. 172, t. 188, f. 4.

Moul-elavou. Rheed. mal. 3, p. 61, t. 52.

Habitus huic etiam est præcedentium. Aculeos in illa observavi nūnquam, at corticem semper difformem & monstrose suberosum. Folia sunt digitata, ad minus septenata, & integerrima. Flores siccis tantum vidi, eodemque, quo in priore, casu. Sunt autem prioribus paulo majores & crassiores; tubo corollæ instruuntur brevissimo; staminibus gaudent circiter quadringentis, quoad cætera similes. Fructus omnino convenientiunt cum fructibus Bombacis pentandri. Hispanis itidem *Ceiba* audit.

Crescit passim Carthaginæ.

I. MELOCHIA (*frutescens*) floribus umbellatis, axillari- bus; capsulis pyramidatis, pentagonis, angulis mucronatis; foliis tomentosis; caule fruticoso, erecto.

(Pl. americ. pict. Tab. 264, fig. 98. *Ramulus florens*).

CAL. Perianthium monophyllum, basi campanulatum, pro- funde quinquefidum, persistens: laciniis lanceolatis, acuminatis, erectis, apicibus reflexis.

COR. Petala quinque, obverse ovata, obtusa, calyce pau- lo longiora, plana, erecta, limbo patente, unguibus cum filamentorum corpore concretis, marcescentia.

STAM. Filamenta quinque, subulata, erecta, longitudine corollæ, inferne concreta in tubum pentagonum ger- menque involventem. Antheræ ovales, simplices.

PIST. Germen obverse ovatum. Styli quinque, subulati, erecti, pubescentes, staminibus breviores. Stigmata simplicia.

PER. Capsula utrinque acuminata, &c.

SEM. bina vel solitaria, angulata.

Frutex erectus, parum ramosus, in apricis saxosis & montosis tripedalis, in sylvestribus umbrosis septempe- dalis. Folia habet oblongo-ovata, dentato-serrata, acuta, utrinque tomentosa, alterna, petiolata, sesquipolli- caria, utrinque stipula suffulta. Pedunculi communes solitarii, axillares, apice sustinent umbellatim flores circi- ter quinque corollis roseis.

Crescit in Martinica, Jamaica, & copiosissime in insula sancti Martini circa vicum Simsonsbay.

2. MELOCHIA (*domingensis*) umbellis lateralibus petiolisque oppositis; capsulis pyramidatis, pentagonis, angulis mucronatis; foliis utrinque glabris; caule fruticoso

Planta hæc tota glaberrima, &, præterquam quod pedunculi petiolis opponantur, nec insideant axillis, precedentis est simillima in cæteris.

Crescit in pratensibus glareosis insulæ Domingo frequens.

Inveni in Curaçao insula fruticem passim in ruderatis & lapidosis asperis crescentem, quadripedalem, foliis glandentem bipollicaribus floribusque duplo quam in Melochia frutescente majoribus, habitu reliquo, si bene memini, huic simillimum. At erant in hoc stamina in corpus coalita infundibuliforme, longitudinaliter totum fissum, & inflexa versus partem fissuræ oppositam, calyce etiam duplo breviora. Stigmata oblonga & crassiuscula inclinabantur quoque antheras versus. Congruerant in charactere cætra. Fueritne ejusdem speciei, excidit annotare.

DECANDRIA.

I. BROWNAEA (*coccinea*).

(Pl. americ. pift. Tab. 183. *Ramulus florens*).

CAL. Perianthium monophyllum, obverse conicum, coloratum, laxum, superne inæqualiter bifidum, acutum.

COR. duplex. Exterior monopetala: tubo infundibuliformi, erecto, calyce paulo longiori: limbo quinquefido: laciniis oblongis, concavis, obtusis, erectis, longitudine tubi. Interior pentapetala: petalis obverse ovatis, planis, obtusis, integrerrimis, patulis; unguibus laxis, longitudine ferme petali exterioris, cuius tubo insident.

STAM. Filamenta decem, subulata, erecta, alterna brevia, tubo petali exterioris per totam longitudinem adnata, coalita in cylindrum. Superne divisum, fere æquantia corollam interiorem. Antheræ oblongæ, incumbentes.

PIST. Germen oblongum, acutum, insidens pedicello ad-

nato parieti corollæ exterioris. Stylus subulatus, eretus, corollam superans. Stigma obtusum.

PER. & SEM.

Arbuscula hæc inelegans, ramosa, tota inodora atque insipida, & octodecim circiter pedes alta, floribus speciosissimis spectabilem se reddit. Lignum satis durum & flavescens vestitur cortice cinereo. Folia sunt lanceolata, acuta, integrerrima, glabra, opposita, breviter petiolata, triplicaria, tribus plerumque paribus vel duabus eidem ramusculo affixa. Pedunculi communes sunt laterales, ramei, breves & gemmas referunt oblongas, e quibus flores circiter decem pedunculati egrediuntur, triplicares, & penduli. Hi calyce gaudent ferrugineo, corollis coccineis, & staminibus flavescensibus. Fructum, quem haud contigit videre, ex germine diadelphis simillico legumen conjicio evadere polyspermum. Corollam exteriorem dixi, nec calycem interiorem, eo quod cum hac coalescant stamina, ut sit in affinibus. Hermesias forte Laeflingii est eadem cum mea stirps; sed stamina ego undecim certo non inveni: adeoque nihil assero. Nominavi hanc plantam in honorem viri in hoc opere toties laudati, meritisque in Botanicam suis clarissimi, Patricii Browne, medici Jamaicensis.

Crescit in rupestribus sylvaticis maritimis Zaucæ, sinus maritimi Venezuelæ, ubi florentem Julio inveni.

POLYANDRIA.

I. MORISONIA (*americana*). Linn. *Syst. 525.*

(*Pl. americ. piæ. Tab. 144. Ramus cum flore & fructu.*)

Dein fructus transverse sectus. Et semen).

Marisonia arbor nucis juglandis folio. *Plum. gen. 36,*
ic. 263.

CAL. Perianthium monophyllum, obverse ovatum, obtusum, ad corollæ eruptionem disrumpens, marcescens. Hinc tubus campanulatus. Limbus bifidus: laciniis subrotundis, concavis, laceris, reflexis, altera multo majore.

COR. Petala quatuor, ovato-oblonga, obtusa, calyce duplo longiora, patentissima, lateribus revolutis.

STAM. Filamenta plurima, subulata, erecta, corolla duplo breviora, inferne ad medietatem usque connata in unum corpus infundibuliforme. Antheræ oblongæ, erectæ.

PIST. Germen ovatum, longitudine staminum, insidens pedicello cylindrico crasso erecto que. Stylus nullus. Stigma capitatum, plano-convexum, puncto umbilicatum

PER. Bacca globosa, magna, pedicellata, unilocularis, vestita cortice duriusculo scabro que.

SEM. plurima, reniformi-subrotunda, compressula, nivalantia in carne molli.

Arbor inelegans, erecta, quindecim raro altitudini pedes superat. Folia habet oblonga, obtusa vel acuminata, integrerima, nitida, coriacea, alterna, pauca, pendalia vel breviora; petiolo tereti, ad basin apicemque incrassato, sesquipolllicari. In ramis senioribus æque ac junioribus sparsim egrediuntur pedunculi breves, crassi, ut plurimum quadriflori vel quinqueflori. Flores levi odore sunt prædicti, sordide albescunt, & diametro sunt vix pollicari: laciniis calycis raro æqualibus; staminibus circiter viginti. Fructus fusci punctis notantur ferrugineis; carnem habent albidam, nec, quod sciam, edulam. Semi-albescunt. Martinicensibus vocabulo Gallico-Caribæo appellatur *Bois Mabouia* sive Arbor diaboli.

Crescit in sylvis montosis densisque Carthaginæ & in Martinica. Floret Julio, & dat Novembri fructum.

I. *SIDA (triquetra) foliis cordatis, ferratis, subtomentosis; ramis triquetris.* Linn. syst. 517.

(Pl. americ. piæt. Tab. 184. *Caulis summus florens cum fructu).*

Planta fruticosa, erecta, quadripedalis, paniculata, ramis omnibus trisulcatis. Caulis primo fationis anno obtuse trigonus est & trisulcatus, altero futurus teres. Folia sunt cordata, acuminata, dentato-crenata, utrinque tomento vix conspicuo & holosericeo mollissima, subtus venosa, nervis novem e basi ortis notata, e glauco virentia, caulina tripollucaria cum petiolo bipollucari, ramæ paulatim minora. Stipulæ setaceæ, breves. Pedunculi axillares, solitarii, uniflori, filiformes, patuli, longitudine circiter petiolorum. Flores parvi, corolla lu-

tea. Capsulæ oblongæ, apice depresso-acute, quinque-acuminate, inflatæ, quinquangulares, quinqueloculares, quinquevalves: valvulis bidentatis, bivalvibus. Semina in quolibet loculamento continentur tria subrotunda. Venera e seminibus Augusto terræ mandatis enata, jam Novembri fuit floribus onusta, Januario seminibus maturis; & per plures annos perennat, duodecimpedalis.

Crescit in fruticosis insulæ Domingo.

2. SIDA (*filiformis*) foliis cordatis; capsulis multilocularibus, inflatis; ramis filiformibus, procumbentibus.

Caules & rami graciles, debiles, herbacei, & procumbentes. Pedunculi sunt solitarii, uniflori, axillares & filiformes. Fœtala flava. Capsulæ inflatissimæ, omnino structa & magnitudine Sidæ crispæ, a qua distinctissimam speciem constituit.

Crescit juxta viam, quæ in Martinica ab oppido Divi Petri dicit ad Carbet, in locis rupestribus gramineis & apricis.

1. HIBISCUS (*spinifex*) foliis cordatis, crenatis, indivisis; capsulis spinosis. Linn. syst. 523.
(Pl. americ. p. 185. Ramus florens & fructifer. Tum capsula solitaria).

Abutilon americanum, fruticosum, folio subrotundo, flore luteo, fructu aculeato majore. Plum. ic. I.

Frutex quindecimpedalis. Rami erecti, virgati, tenues, juniores scabri & pilosissimi. Folia cordata, acuta, inæqualiter crenato-dentata, utrinque scabra, alterna, petiolata, omnia indivisa. Pedunculi uniflori, solitarii, axillares, fere longitudine petiolorum. Flores pulchelli, inodori, calyce exteriore semper quinquefido, corolla lutea & patente, germine piloso. Capsulæ quinque, auctæ spinis tribus tenuibus & longis, unica in apice erecta, & duabus lateralibus: hæ omnino quindecim, in quibusvis capsulis vicinis adeo contiguæ sunt, ut in fructus integri circumferentia solummodo quinque esse videantur. Semina solitaria.

Crescit in fruticosis & sylvaticis maritimis, præcipue inundatis, Caribæarum.

DIADELPHIA.

OCTANDRIA.

I. **POLYGALA** (*domingensis*) floribus imberbibus; r̄emis axillaribus; caule arboreo; foliis obverſis ovatis, emarginatis.

CAL. Perianthium pentaphyllum; foliolis ovatis, concavis, obtusis, erectis; quorum duo lateralia interiora majora; exteriorum duo ad dorsum carinæ majora; tertium minimum.

COR. monopetala, irregularis.

Vexillum nullum.

Alæ duæ, longitudine carinæ, eidem oppositæ, erectæ, oblongæ, obtusæ, parum concavæ, basi accretæ corpori filamentorum.

Carina calyce duplo longior, erecta, ungue concava superne fornicata, clausa, compressa admodum, obtusa.

STAM. Filamenta octo, in unum corpus coalita, superne incurvata, longitudine carinæ, eidemque inclusa. Antheræ oblongæ, erectæ.

PIST. Germen subrotundum, compressum. Stylus filiformis, compressulus, situ & longitudine staminum. Stigma simplex, obtusum.

PER. Capsula obverse cordato-subrotunda, compressissima bilocularis, bivalvis.

SEM. solitaria.

Arbuscula humanæ altitudinis, & ramosa. Folia sunt alterna, petiolata, obverse ovata, emarginata, integravix pollicaria, ſæpe exiguo mucrone in apice donata, dorſo glabra, facie valde aspera, omnino numerosissima. Flores etiam copiosi & minutti egrediuntur ex foliorum axillis in pedunculis communibus brevissimis, ipſi propriis pedicellis instructi, coloremque habent ex viridi flaventem. Fructus omnino uti in Polygala diversifolia; a qua differt foliis uniformibus, dum a Penæa discrepat pedunculis multifloris.

Vidi crescentem in fylvis montosis circa Cap françois in Domingo, & florentem Decembri.

SECURIDACA.

CAL. Perianthium triphyllum, parvum, deciduum: foliolis ovatis, obtusis, concavis, coloratis; quorum summum vexillum, binæ carinam respiciunt.

COR. papilionacea, pentapetala.

Vexillum diphylum, oblongum, rectum, carina paulo brevius, quacum basi connatum, apicibus reflexis.

Alæ duæ, planæ, obtusæ, magnæ, patentissimæ, a reliquis corollæ paribus utrinque ad latera secedentes.

Carina monopetala, erecta, longitudine alarum, ex ungue tubulo longo abiens in bracteam latiorem auctamque appendice plicata & obtusa.

STAM. Filamenta octo, connata in unum corpus fissum longitudinaliter, adnata ungui carinæ, eidemque inclusa. Antheræ oblongæ, erectæ.

PIST. Germen subrotundum, compressum. Stylus subulatus, adscendens, staminibus longior. Stigma planum, latescens, apice dentato.

PER. Capsula subrotunda, abiens in alam membranaceam oblongam obtusam maximam & superne latescentem, a dorso membranæ aucta gibbo, unilocularis, non dehisrens.

SEM. unicum, oblongum.

1. SECURIDACA (*erecta*) caule erecto. Linn. syst. 533.
(Pl. americ. piæt Tab. 261, fig. 56. Flos totus jam explicatus. Idem adhucdum clausus. Semen. Capsula).

Securidaca fruticosa, foliis subrotundis; ramulis tenuissimis; spicis laxis, terminalibus. Brown jam. 1, p. 287.

Arborem hanc erectam & duodecimpedalem, ramis gracilibus longis debilibus rarisque ornatam, floribus ramosis purpureisque onustam, semel in itinere constituto videre contigit. Fructificationis tunc temporis solummodo adnotato charactere delineatoque, defuit mihi postea habitus describendi occasio. In hac specie Vexilla sunt obtusa, Alæ subrotundæ, Carinæ appendix compressa & reflexa.

Crescit in Martinica circa vicum Case pilote in montibus saxosis sy vaticis. Floret Aprili

2. SECURIDACA (*scandens*) caule scandente. Linn. syst. 533.

(Pl. americ. Piæt. Tab. 186. Ramulus florens.) Securidaca foliis oblongis, spicis ramosis. Brown. jam. 2, p. 288.

Planta fruticosa, scandens. Ramuli foliosi juniores in cirrhos mutantur validissimos. Folia sunt oblongo-ovata, obtusa, integerrima, glabra, alterna, petiolata. Racemi laxi, laterales, foliis oppositi. Flores inoderi, rubri; vexillis acutis, alis oblongis basique attenuatis, carinæ appendice ampla.

Crescit Carthagena in fruticetis densis & in sylvaticis.

DECANDRIA.

I. NISSOLIA (*fruticosa*) caule fruticoso, volubili. *Linn.*
synt. 533.

(*Pl. americ. piæt. Tab. 187. Ramus florens. Dein flos, ala, carina, vexillum, genitalia, pistillum, calyx, fructus, semen.*).

CAL. Perianthium monophyllum, campanulatum, parvum quinquedentatum, incisura inter denticulos superiores paulo profundiore.

COR. papilionacea.

Vexillum subrotundum, leviter emarginatum, superne concavum, reflexum, lateribus reflexis.

Alæ duæ, oblongæ, planæ, obtusæ, erectæ, superne latiores, antice patentes, longitudine vexilli, unguibus tenuissimis.

Carina clausa, figura situ & magnitudine alarum.

STAM. Filamenta decem, coalita in unum corpus fissum longitudinaliter & superne decemfidum, apice adscendentia, inclusa carinæ, cuius fere longitudine. Anthæra subrotundæ.

PIST. Germen oblongum, compressulum. Stylus subulatus, ad angulum rectum adscendens, longitudine staminum. Stigma capitato-obtusum.

PER. Capsula oblonga, teres, excurrens in alam membranaceam oblongam obtusam magnam & superne latescentem, unilocularis, nec dehiscens.

SEM. unicum, (abortantibus paucis reliquis,) oblongum, teres, obtusum..

Frutex inermis caulis ramisque volubilibus & numerosis vicinas arbusculas scandit ad altitudinem quindecim pedum. Folia habet numerosa, alterna, pinnata; costa tereti, subvillosa, tres quatuorve pollices longa; foliolis

utrinque duobus cum impari, subovatis, integerrimis, obtusiusculis cum exiguo acumine setaceo, glabris, petiolatis, sesquipollicularibus. Pedunculi communes breves, multiflori, numerosi, in ramulis junioribus axillares, & in horum simul extremitatibus nudis e tuberculis prodeunt; unde simul efficiunt paniculam foliosam, pedalem s^ep^e, & speciosam. Flores pedunculati, parvi, lutei, inodori. Quandoquidem in generibus Linnaeanis perierit Nissolia nomen, huic plantæ novæ denuo illud adsignavi.

Crescit Carthagena in fruticetis & sylvaticis. Floret Septembri.

2. *NISSOLIA (arborea)* caule arboreo, erecto. Linn.
syst. 533.

(Pl. americ. pi^t. Tab. 261, fig. 60. Legumen. Semen.
Flos. Folium).

CAL. Perianthium monophyllum, campanulatum, erectum, limbo quinquefido; laciniis subrotundis, parvis, concavis, obtusis, erectis, æqualibus, incisura superiore paulo latiore & profundiore.

COR. papilionacea.

Vexillum subrotundum, emarginatum, planum, patulum, lateribus reflexis, alis paulo longius, ungue longitudine calycis.

Alæ duæ, ovatæ, obtusæ, concavæ, patulæ, calyce duplo longiores, unguibus tenuibus & longis.

Carina subovata, obtusa, antice plana, postice convexa, concava, erecta, longitudine alarum, unguibus longis & tenuibus.

STAM. Filamenta decem, diadelpha, (simplex & novemfidum) erecta, apicibus leviter adscendentia, longitudine carinæ, in qua recondita. Antheræ subovatæ, incumbentes.

PIST. Germen ovato-oblongum, compresso-planum, erectum, insidens pedicello tereti & longitudine fere calycis. Stylus subulatus, levissime adscendens, longitudine staminum. Stigma simplex, acutum.

PER. Capsula subleguminosa, compresso-plana, magna, abiens in alam membranaceam oblongam & maximam, unilocularis, nec dehiscens.

SEM. unicum, subrotundo-reniforme, planum.

Arbor inelegans, duodecimpedalis; cuius rami s^ep^e

lenti, debiles, & reclinati aliorum indigent sustentaculo. Folia quotannis decidua sunt pinnata vel ternata: foliolis utrinque cum impari duobus vel unico, ovatis obtuse acuminatis, integerrimis, nitidis, tenuibus; terminali maximo; interioribus minoribus, nunc oppositis, nunc alternis. Spicæ compositæ & densæ, quadripollicares, terminales & axillares ante foliorum ortum e quibusvis gemmis exeunt, saepe etiam in ipsis ramis senioribus. Flores parvi, sessiles, inodori, fere decolores, numerosi. Semen in ipso germine adest unicum. Si quis velit ex duabus hisce stirpibus duo distincta genera condere; quæ opponam, multa momenta non reperio.

Crescit Carthagena passim in sylvis. Floret Julio & Augusto.

I. PTEROCARPUS (*Draco*) foliis pinnatis. *Linn. syst.*

533. mat. med. 522.

(*Pl. americ. pict. Tab. 264, fig. 91. Folium*). *Lingoum.* *Rumph. 2, p. 205, t. 70?*

Arbor triginta pedes alta, ad habitum Robiniae sepium accedit; cujus nec flores videre nec fructus ibi contigit. Materies candida, solida, nullam prorsus resinanam fundit. Cortex crassus, externe ex ferrugineo leucophæus, interne subferrugineus, & glabriusculus, recens si transversim scindatur, nullum ipso momento rubedinis indicium habet; sed brevi punctis plurimis sanguineis variegatur, in lacrymulas abituris. Arbor ipsa, variis in locis incisa, brevi tota, spectaculo sane non injucundo, repletur guttis sanguineis rutilis & liquidissimis, eodem perfecte modo, quo per genas infantum cadunt lacrymæ, super trunco defluentibus; quæ post minutorum spatium aliquot, præcipue æstuante solis ardore, indurescunt, & colliguntur sanguinis draconis sub nomine. Cortex, lignum, & folia sapore prædicta sunt adstringente. Rami longi per totam longitudinem foliis ornantur pinnatis, alternis, nitidisque; costa septempollicari, superne sulcata; foliolis utrinque cum impari quinque, lanceolato-oblongis, obtusifusculis, integerrimis, venosis, facie latae virentibus, dorso e viridi pallentibus, alternis, exterioribus sesquipollicaribus, intermediis bipollicaribus; petiolis teretibus, brevibus, subvillosis. Cortex trunci & crurum radicis in bacilos palmates scissus adhibetur passim ab incolis ad emun-

emundandos dentes. Solebat olim hæc resina frequens mitti Carthagena in Hispaniam; nunc vero, obsolescente ejusdem in Medicina Europæa usu, ob cognitam in hæmoptoe similibusque curandis morbis virtutem ipsius nullam, rarissime a mercatoribus Europæis illius transmissio injungitur incolis; unde negligitur collectio. Appellatur ab his consimili nomine *Sangre de Dragon*.

Crescit in sylvaticis insulæ Tierra Bomba.

I. AMERIMNON (*Brownæi*) foliis simplicibus cordato-acuminatis.

(Pl. americ. pict. Tab. 263, fig. 86. Flos. Duo legumina. Semen).

Amerimnon fruticosum; foliis nitidis simplicibus cordato-acuminatis. Brown. jam. I, p. 288, t. 31, f. 3.

CAL. Perianthium monophyllum, tubulosum, parvum, ore bilabiato. Labium superius bifidum; laciniis subrotundis, concavis, obtusis, erectis. Labium inferius trifidum: laciniis lanceolatis, acutis, concavis, laterilibus erectis, media patula & reliquis longiore.

COR. papilionacea.

Vexillum obverse cordato-oblongum, patentissimum, planum, ungue concavo & longitudine tubi calycis.

Alæ duæ, oblongæ, obtusæ, erectæ, antice patulæ, longitudine vexilli.

Carina oblonga, obtusa, compressa, erecta, apice adscendente obtusoque, vexillo duplo brevior.

STAM. Filamenta decem, connata in cylindrum fissum superne divisa, erecta, apicibus adscendentibus, longitudine carinæ. Antheræ subrotundæ, didymæ.

PIST. Germen oblongum, compresso-planum, erectum, insidens pedicello longitudine calycis. Stylus subulatus, leviter adscendens, longitudine staminum. Stigma capitato-obtusum.

PER. Legumen oblongum, utrinque acuminatum, compressum, uniloculare, bivalve.

SEM. pauca, reniformia, compressa.

Arbuscula hæc ut plurimum ad decempedalem altitudinem adscendit, ceterum reclinata habituque neglecto sustentat se vicinis fruticibus. In ramos dividitur teretes, longos, corticem indutos nigricantem, & ramusculis alternatim ornatos numerosissimis. Foliis gaudet simplici-

bus, ovatis, acutis, integerrimis, nitidis, alternis, petiolatis, duos tresve pollices longis. Pedunculi communes circiter decemflori oriuntur ex axillis atque lateribus ramulorum virentium, ex tuberculis vero seniorum. Flores parvi, albi, & grate suaveolentes prodeunt numerosissimi post copiosos quavis anni tempestate imbres. Vexillum post fœcundationem se erigit, ante hanc patentissimum.

Crescit Carthagena, in Jamaica, Domingo; in fructicetis densis.

2. AMERIMNON (*pinnatum*) foliis pinnatis.

(Pl. americ. piæt. Tab. 263, fig 85. *Folium. Flos*).

CAL. Perianthium monophyllum, tubulosum, erectum, quinquedentatum: denticulis semiovatis, acutis, parvis, erectis, superioribus duobus minus profunde incisi.

COR. papilionacea.

Vexillum subrotundum, emarginatum, planum, reflexum, calyce duplo longius.

Alæ duæ, oblongæ, obtuse, planiusculæ, erectæ, supra unguem appendicula auctæ, vexillo paulo longiores.

Carina monopetala, figura situ & magnitudine alarum. STAM. Filamenta decem, connata in unum corpus fissum

& superne decemfidum, erecta, fere longitudine carinæ, cui inclusa. Antheræ oblongæ, incumbentes.

PIST. Germen ovale, minimum, compressulum, pedicello longo insidens. Stylus subulatus adscendens. Stigma simplex.

PER. & SEM. ut in priore.

Arbuscula erecta, duodecimpedalis; ramis teretibus, lentijs, debilibus,ubreclinatis. Folia sunt pinnata, nitida, opposita, patentia ad angulum rectum, semipedalia, in ramis junioribus & virentibus: foliolis utrinque tribus cum impari, ovato-acuminatis, integerrimis, petiolatis, oppositis, tripollicaribus, ferme æqualibus. Racemi laxi, simplices, axillares, solitarii, oppositi, quadripollicares. Flores flavi odore suo perfecte referunt fœnum recens collectum. Locis umbrosis foliola evadunt fere sexpollicaria, sed tunc in qualibet costa foliola sunt tantum tria; & flores ibi prodeunt paucissimi.

Crescit in sylvis Carthagenenibus.

I. PHASEOLUS (*sclareodes*) caule volubili; floribus laxè subspicatis; pedunculis unifloris, aggregatis.

Folia habet hæc planta Phaseoli vulgaris. Spicæ sunt erectæ, novempollicares, eminus spicas Salviæ cujusdam mentientes; pedunculis propriis brevissimis. Flores parvi. Calyces ferruginei. Corollæ cæruleæ, erectæ, tenues, & longæ.

Crescit Havanæ in sepibus & fruticosis. Floret Januarij.

I. DOLICHOS (*pruriens*) caule volubili. leguminibus racemosis; valvulis subcarinatis, hirtis; pedunculis ternis. Linn. syst. 547.

(Pl. americ. pict. Tab. 188. *Pars caulis florentis. Dein legumen, & semen*).

Stizolobium spicis multifloris pendulis alaribus, floribus ternatis. Brown. jam. I, p. 290.

Phaseolus virgatus hirsutus prurigineus. Plum. spec. 8.

Phaseolus utriusque Indiæ, lobis villosis pungentibus, minor. Sloan. hist. jam. I, p. 37.

Cacara pruritus Rumph. 5, p. 393, t. 142.

Nai-corana. Rheed mal. 8, p. 61, t. 35.

CAL. Perianthium monophyllum, campanulatum, laxum, tomentosum, bilabiatum. Labium superius semiovatum, basi gibbum, patulum, apice emarginatum. Labium inferius trifidum: laciniis lanceolatis, acutis, lateralibus inflexis brevibusque, media erecta & longitudine labii superioris.

COR. papilionacea.

Vexillum ovatum, integrum, concavum, obtusum, patens, lateribus conuivens, calyce duplo longius.

Alæ duæ, oblongæ, obtusæ, concavæ, erectæ, vexillo duplo longiores.

Carina subulata, erecta, compressa, utrinque supra unguis aucta appendicula, basi callosa, apice falcato, longitudine alarum.

STAM. Filamenta decem, diadelpha, (simplex & novemfidum) alterna longiora & quadruplo latiora. Antheræ oblongæ, in filamentis brevioribus erectæ magnæque, in longioribus incumbentes.

PIST. Germen oblongum, villosum. Stylus subulatus,

villosum, longitudine & situ staminum. Stigma obtusum, orbiculatum.

PER. Legumen oblongum, teretiusculum, basi & apice in opposita latera incurvatum, pilis hispidis densissime obtusum, uniloculare, bivalve.

SEM plura, oblonga, leviter compressa.

Caules teretes, subpilosí, volubiles. Folia ternata; foliolis integerrimis, acuminatis, facie glabris, dorso hirsutis, lateralibus ovatis latere interiori oblitterato, medio subrhomboideo. Racemi simplices, laxi, penduli, teretes, pilosi, axillares, solitarii, pedem sesquipedem ev longi; pedunculis propriis unifloris, brevibus, ternis. Flores inodori, sesquipollares, circiter triginta sex in quovis racemo, locis tamen apricis multo pauciores, calyce subrubente, vexillo carneo, alis purpureis vel violaceis, carina e viridi albente. Legumen tripollares, ferruginea crassitie digitii, densissime vestitur pilis hispidis e ferrugineo subfuscis nitidisque, qui dum applicantur cuti, titillationem inducunt urentem atque intolerabilem, ipsi etiam barbaris æthiopibusqne, cutim qui habent durissimam, formidabiles. Semina e fusco nigroque variegantur, & nitent; hilo albo. Gallis vocatur Pois à gramine Phaseolus scalptor.

Crescit in Caribæarum sylvis & fruticosis passim. Floret imprimis Septembri & Octobri.

2. DOLICHOS (*urens*) caule volubili; leguminibus racemosis, hirtis, transversim lamellatis; seminibus hilo cinctis; foliis subtus tomentoso-nitidis. Linn. syst. 547.

(Pl. americ. piæt. Tab. 189 Ramus florens. Leguminæ). Zoophthalmum siliquis majoribus hirtis transverse sulcatis, pedunculis communibus tenuissimis longissimis flexilibusque appensis. Brown. jam I, p. 295.

Phaseolus siliquis latis hispidis & rugosis, fructu nigro. Plum. amer. 92, t. 107.

Phaseolus brasilianus frutescens, lobis villosis pungentibus maximis. Sloan. hist. jam. I, p. 178.

Mucuna. Marcg. bras. l. I, c. 10.

CAL. Perianthium monophyllum, campanulatum, tomentosum, bilabiatum. Labium superius fere subrotundum, integrum, patens. Labium inferius erectum,

arifidum: laciñis lanceolatis, acuminatis, media longiore lateralibus.

COR. papilionacea.

Vexillum subrotundum, reflexo-patens, lateribus coninventibus, calyce duplo longius.

Alæ duæ, oblongæ, erectæ, acuminatæ, apice falcato, vexillo paulo longiores.

Carina oblongo-subulata, acuminata, apice falcato, erecta, longitudine alarum.

STAM. & PIST. ut in priore.

PER. Legumen oblongum, compressum, acutum, rectum, undique pilis hispidis obsitum, suturarum oris divaricatis, auctum lamellis membranaceis transversis inæqualibus & circa medium interruptis, uniloculare, bivalve.

SEM. pauca, orbicularia, compressa, hilo circumdata.

Caules teretes, volubiles. Folia ternata: foliolis subovatis, integerrimis, in acumen abeuntibus, facie glabris, subtus tomento argenteo vix conspicuo nitidoque vestitis. Racemi simplices, penduli, a me vix unquam visi foliis longiores; unde forte hanc speciem cum subsecente confudit clarissimus Browneus; pedunculis propriis unifloris, ternis, in racemi extremitate dense positis, hinc coronam florum circiter octodecim pendulam formantibus eleganssimam. Flores inodori, bipolligares, calyce ferrugineo, corolla flava, alarum margine inferiore rubente. Legumen septempolligare fetis urentibus rigidisque tegitur. Semina Gallis ob similitudinem vocantur Yeux Bourrique sive Oculi asinini. Sunt hæc satis Europæis nota, quorum in gazophylaciis passim reperiuntur. His secum portandis inepta varia adscribit superstiosum in America vulgus.

Crescit in Caribæorum sylvis & fruticetis.

3. DOLICHOS (*altissimus*) caule volubili; leguminibus rachemosis, hirtis, æqualibus; feminibus hilo cinctis; foliis utrinque glabris. Linn. syst. 547.

(Pl. americ. pict. Tab. 190. *Ramus florens cum petiolo interrumpo ob nimiam longitudinem*).

Kaku - valli. Rheed mal. 8. p. 63, t. 36?

CAL. Perianthium monophyllum, campanulatum, villosum, inæquale, bilabiatum. Labium superius integrum,

parvum, obtusum, patens. Labium inferius tridentatum, minimum, acutum, erectum.

COR. papilionacea.

Vexillum subrotundum, obtusum, concavum, in tumum connivens, reflexum, calyce ad minus triplo longius.

Alæ duæ, oblongæ, obtusæ, concavæ, integræ, vexillo paulo longiores, basi externe villosæ, in oppositum vexillo latus cum carina reflexæ.

Carina apice falcato, postice patens, situ figura & magnitudine alarum.

STAM. reflexa & vexillo inclusa.

PIST. reflexum & vexillo inclusum.

Stigma bifidum, acutum. } cæterum ut in præcedentibus.

PER. lamellis, destitutum.

SEM.

Planta hæc arbores scandit altissimas; e quarum frondibus, spectaculo sene pulcherrimo, viatorum capitibus impendent coronæ flororum elegantes, qui in extremitatibus pedunculorum communium sæpe plus quam duodecimpedalium racematis & dense locantur. Pedunculi proprii breves sunt & terni. Flores inodori, sesquipollicares, calyce ferrugineo, vexillo aliquæ e cœruleo violaceis, carina subflavescente, staminibus pistilloque mire adscendentibus totis, & vexillo convoluto inclusis. Legumina & semina fere præcedentis.

Crescit in Martinicæ sylvis vastis montosis, & in sylvaticis ad ripas præruptas altasque torrentum.

DOLICHOS (*ruber*) caule volubili; leguminibus racemosis, compressis; calycibus quadrifidis.

(*Pl. americ. piæt. Tab. 191. Ramus florens cum leguminibus.*)

CAL. Perianthium monophyllum, semiqdrididum: lacinias lanceolatis, acutis, suprema semireflexa, reliquis erectis, lateralibus paulo angustioribus & brevioribus.

COR. papilionacea.

Vexillum obverse ovato-oblongum, obtusum, planiusculum, reflexum, ungue brevi.

Alæ duæ, oblongæ, obtusæ, erectæ, carina paulo breviores.

Carina figura & situ alarum, longitudine fere vexilli.

STAM. Filamenta decem, diadelpha, (simplex & novem-

fidum) superne leviter adscendentia, longitudine carinæ. Antheræ oblongæ, incumbentes.

PIST. Germen oblongum. Stylus filiformis, longitudine staminum. Stigma simplex.

PER. Legumen oblongum, compressum, acuminatum stylo, uniloculare, bivalve.

SEM. plura, oblongo-reniformia, compressula.

Caules volubiles, teretes, intorti, glabri, vicina ad duodecim pedum altitudinem scandunt. Folia sunt ternata: foliolis ovatis, integerrimis, acutis, glabris, erucarum erosioni quam maxime obnoxii. Racemi simplices, laxissimi, patuli, stricti, axillares, foliis duplo longiores, plus minus decemflori. Flores inodori, pollicares, petalis rubris: in quovis fere semper racemo steriles aliquot, quibus stylus est brevissimus & stigma reflexum. Legumen fuscum. Semina nigricantia. Planta perennat, & fructuosa evadit.

Crescit frequens in Martinicæ sylvis & fruticetis.

5. DOLICHOS (*lignosus*) volubilis; caule perenni; pedunculis capitatis; leguminibus strictis, linearibus, pilosis. *Linn. syst. 548?*

Dolichos caule perenni lignoso. *Linn. hort. Cliff. 360, t. 20?*

Planta perennis, volubilis, tota pilosa; præcipue vero rami inferiores lignosi, & legumina, pilis hispida sunt. Foliola sunt ovata, acuta, scabriuscula, duos pollices longa, lateralibus interne oblitteratis. Stipulae ex lanceolato ovatae, acuminatae, basi emarginatae. Pedunculi umbellati, foliis breviores, pauciflori. Flores albidæ. Legumina tres quatuorve pollices longa, acuminata, stricta, ad apicem leviter incurva, teretia, nec torosa, pilosissima, fusca, interne nivea. Semina circiter octo-decim, nitida, atra cum hilo albido, parva, compressula, ex oblongo reniformia.

Crescit in Caribæarum sylvaticis.

6. DOLICHUS (*subracemosus*) caule perenni; pedunculis subracemosis; leguminibus strictis, linearibus, glabris. CAL. Perianthium campanulatum, breve, bilabiatum, ultra medium quinquefidum: laciniis subulatis, acuminatis, concavis, duabus superioribus magis vicinis & reliquis brevioribus.

COR. papilionacea, e purpureo cærulea.

Vexillum amplissimum, patentissimum, emarginatum, in dorso inter callos oblongos notatum appendice altera callosa, qua ungui proprio incumbit.

Alæ ad basin appendicula austæ, vexillo breviores.

STAM. Filamentum simplex curvatur ad basin.

PIST. Stylus nitidus superne valde latescit in figuram spathulatam obtusamque, & terminatur stigmate simplici ciliis barbato.

PER. Legumen lineare, strictum, rectum, acuminatum, valde compressum, ad semina torosum, glabrum, fere semipedale.

Omissa reliqua, ut in charactere Linnæano.

Planta perennis, volubilis, tota nitida. Foliola ovato-lanceolata, acuta, bipollucaria, lateralium pagina interior valde oblitterata. Stipulae lanceolatae, acuminatae, integerrimæ. Pedunculi foliorum circiter longitudine, tres quatuorve flores racematin sustinent. Calyci ad latera adfident bractæ duæ ovato-acuminatas.

Crescit in fruticosis Caribæarum.

I. GALEGA (*littoralis*) leguminibus racemosis; tota villosa-tomentosa. *Linn. syst. 565.*

(*Pl. americ. pict. Tab. 192. Ramus florens. Legumen & semen.*)

Planta hæc forte biennis caulis teretibus, ramosis, villosisque procumbit, vel vicinis se fruticetis sustentat. Cirrhi nulli. Stipulae lanceolato-acuminatae, villosæ, integerrimæ. Folia pinnata: costa villosa, sulcata, duo tresve pollices longa: foliolis utrinque circiter sex eum impari, oblongis, basi attenuatis, obtusis, integerrimis, externe villosis & cinereis, interne tomento vix conspicuo viridiisque mollibus. Racemi simplices, stricti, subterminales, ad ortum in folii axilla aucti sæpe flore uno altero-ve pedunculato. Flores inodori, carnei, charactere congenerum; at vexillo plano & patentissimo; carina lunulata & acuta; nectarii glandula nulla. Legumen villosum, acuum, fuscum, sesquipollucare. Semina oblonga, teretiuscula, utrinque obtusa, e fusco & nigro variegata. Vindobonæ diu perennavit, totumque annum viruit, floruit, fructumque dedit maturum.

Crescit proxime Carthagena in littoribus arenosis maritimis.

2. GALEGA (*caribaea*) leguminibus strictis, glabris, pendulis, racemosis; foliolis glabris, mucronatis; caule fruticoso. *Linn. syst. 565.*

(*Pl. americ. piſt. Tab. 193. Caulis summus florens cum legumine. Semen.*)

Frutex erectus, ramosus, tenuis, bipedalis. Stipulae setaceæ, integræ. Folia pinnata, tripollaria, sæpe disticha: foliolis utrinque cum impari plus minus decem, ovali-oblongis, obtusis cum acumine setaceo, integerimis, utrinque glabris. Racemi axillares, laxi, simplices, stricte patentés, solitarii, plus minus sexflori, foliis longiores. Flores inodori, e rubro albidoque variegati. Calyx laciniæ duæ superiores minus profunde inciduntur & sunt reliquis breviores; lacinia vero infima superat longitudine omnes. Vexillum obtusum, emarginatum, & patentissimum ungui brevi insistit. Carina subrotundofalcata est, atque acuminata. Stamina diadelpha situm sequuntur carinæ. Hinc etiam stylus, totus leviter hirsutus, ad angulum fere rectum adscendit, stigmate terminatus simplici & obtusiusculo. Legumen lineare, compresso-planum, longum, obtusum cum acumine, inter semina angula transverse sulcatum, fuscum, glabrum, uniloculare, bivalve, terram versus pendet, vel etiam ad racemum usque per pedunculum incurvatum retroflectitur. Semina nitida nigricant.

Crescit in Caribæis; præcipue in fruticosis prætensisibus.

I. PSORALEA (*enneaphylla* foliis pinnatis; spicis axillaribus. *Linn. syst. 571.*

CAL. Perianthium monophyllum, bilabiatum, persistens.

Tubus campanulatus, compressus, erectus. Limbus divisus in setas quinque, acuminatas, patulas, quarum duæ superiores longitudine tubi reliqnis sunt paulo breviores.

COR. papilionacea.

Vexillum cordato-subrotundum, obtusum cum acumine, concavum, patens, calyce paulo longius, ungue longitudine bractææ.

Alæ duæ, oblongæ, obtusæ, erectæ, vexillo paulo longiores.

Carina subrotunda, concava, indivisa, patentireflexa, vexillo duplo longior, ungue angusto.

STAM. Filamenta decem, basi coalita in unum corpus filsum, superne divisa, alterna longiora, situ carinæ. Antheræ subovales, incumbentes.

PIST. Germen parvum, ovatum, compressum, superne villosum. Stylus subulatus, inferne villosus, situ & longitudine carinæ. Stigma simplex, obtusum.

PER Legumen subrotundum, compressum, superne ad latus acuminatum, vix longitudine calycis, uniloculare, bivalve.

SEM. unicum, figura legumininis.

Frutex erectus, gracilis, quinquepedalis, ramis paucis lentisque. Folia pinnata, alterna, unum alterumvo pollicem longa: foliolis cum impari ut plurimum quinque, obverse ovatis vel ovalibus, emarginatis, glabris, petiolatis, oppositis, quatuor sexve lineas longis, dorso notatis folliculis, qui punctorum adinstar apparent, haud secus atque in Hyperico perforato, qui succo scatent gummoso & ingrate odorato. Hæc, trita levissime, manum tingunt colore flavo lotioni vix cedente; frigidæ autem injecta, illico hanc imbuunt flavedine gratissima, limpida, gradatimque saturatiore. Spicæ densæ, axillares, solitariæ, breviter pedunculatæ, fere longitudine foliorum. Flores parvi, rubelli, sessiles, calyce non punctato. Hæc planta Psoraleas Ebenumque Linnæi ferme conjugit.

Crescit Carthagena in fruticetis. Floret Majo & sequentibus.

I. GEOFFROEA (*spinosa*). Linn. syst. 556.

(Pl. A. P. Tab. 261, fig. 58. Fruetus. Flos).

Umari. Marcgr. bras. l 3, c. 13.

CAL. Perianthium monophyllum, campanulatum, dorso compresso-angulatum, semiquinquefidum: laciis planis, longitudine fere æqualibus; quarum duæ superiores subrotundæ, acutæ, divergentes, minus profunde incise, patentissimæ; tres inferiores lanceolato-ovatae, acuminatae, patulae.

COR. papilionacea.

Vexillum subrotundum, emarginatum, planum, reflexum, ungue plano & tubo calycis breviori.

Alæduæ, oblongæ, concavæ, obtusæ, erectæ, longitudine vexilli, basi austæ appendicula, unguibus tenuibus & longitudine tubi calycis.

Carina compressa, figura situ & fere longitudine alarum.

STAM. Filamenta decem, diadelpha (simplex & novemfidum) erecta, apicibus leviter adscendentibus, longitudine carinæ. Antheræ subrotundæ, parvæ.

PIST. Germen subrotundum, parvum. Stylus subulatus situ & longitudine staminum. Stigma obtusum, simplex.

PER. Drupa subovata, magna, mollis, notata utrinque sulco longitudinali, in latero autem compressulo minus conspicuo.

SEM. Nux subovata, magna, acuta, compressula, fulco utrinque longitudinali, subligneæ, unilocularis, bivalvis. Nucleus ejusdem figuræ.

Arbor inelegans, ramosa, erecta, duodecimpedalis.

Spinzæ raræ, subulatæ, sæpe pollicares, in trunco ramisque crassis. Folia pinnata: costa glabra, superne sulcata, quadripollisci: foliolis utrinque sæpius septem cum impari, oblongis, obtusis, glabris, integerrimis. Racemi simplices, densi, axillares, tres quatuorve pollices longi. Flores brevissime pedunculati, corollis sordide fulvis, odorem late spirant fætidissimum. Drupa haud male refert Amygdali fructum recentem, cortice vestitur levissime tomentoso, colorumqne habet e flavo virentem. Pulpæ est mollis, dulcis, odoris nauseosi, subflava; manumque inquinat macula subferruginea & difficulter delebili. Nux albicans pulpæ firmiter adhæret, continentque nucleus candidum saporis farinacei & adstringentis. In stirpe papi-lionacea drupam quis prædicere fuisset aussus? Nisi forte objiciatur mihi, drupam hic enatam esse ex legumine, cuius cortex interior induratus mutatusque mentiatur nucem; adeoque legumen molle dici oportere. Ego vero naturæ præscribere leges, ejusdemque liberrimum agendi modum torquere ad præconceptam hypothesis nolui: adeoque drupam vocavi fructum pulposum nucem nucleumque continentem. Plantam nominavi in memoriam viri celeberrimi Claudi Josephi Geoffroy, edito super materia medica opere laudatissimi.

Crescit Carthagena in sylvaticis arenosis maritimis; præsertim ad viam publicam EI spasseo dictam.

I. DIPHYSA (*carthagenenensis*).

(*Pl. americ. pict. Tab. 261, fig. 59.* *Ramulus florens.*
Vexillum. Ala. Carina. Legumen. Hujus sedis transversa. Semen.)

CAL. Perianthium monophyllum, campanulatum, compressulum, semiquinquefidum: laciniis duabus superioribus subrotundis, obtusis, planis, patentissimis; duabus lateralibus ovatis, acutis, erectis, planiusculis; infima lanceolato-acuminata, concava, erecta, reliquis paulo longiore.

COR. papilionacea.

Vexillum obverse ovato-oblongum, emarginatum, amplum, planum, ungue concavo & longitudine tubi calycis; ita totum retrorsum arcuatum, ut cum ungue suo evadat lamina parallela.

Alæ duas, oblongæ, obtuse, planæ, vexillo breviores, antice divergentes, postice conniventes, hinc alterum mentitæ vexillum, basi auctæ appendicula, inferne attenuatae in unguem tenuem, retrorsum in semi-circulum arcuatæ.

Carina falciformis, acuminata, compressa; alis brevior, basi utrinque appendicula aucta, postice & inferne divisa, hinc attenuata in duos ungues tenues eratosque, ad alas ita recurvata, ut ad ungues apex evadat parallelus..

STAM. Filamenta decem, diadelpha, (simplex & novemfidum,) situ & longitudine carinæ, cui inclusa. Antheræ ovatae, parvae.

PIST. Germen lineare, teretiusculum, pedicellatum, situ & fere longitudine carinæ. Stylus capillaris, descendens, carinam superans Stigma simplex, acutum.

PER. Legumen lineare, compresso planum, obtusum, uniloculare; utrinque longitudinaliter auctum vesica membranacea, maxima, inflata, undique clausa, orta qualibet e futuris oppositis.

SEM. plura, oblonga, obtusa, compressa, hamulo exiguo instructa.

Arbuscula inermis, inelegans, erecta, ramosa, decempedalis, habitu ad Mimosas arborescentes accedit.

Folia sunt pinnata, glabra, bipinnicaria, in ramulis junioribus: foliolis cum impari utrinque s̄p̄ius quinque, quamvis etiam non raro sunt plura vel pauciora, oblongis, emarginatis, parvis, alternis vel oppositis. Pedunculi communes biflori vel triflori, axillares, filiformes, longitudine foliorum. Flores flavi, vix odori. Leguminum vesicæ sunt tenues, siccæ, & albicantes; propter quas novi generis huic plantæ nomen ἀπὸ τῷ δίῃ ναὶ τῷ Κύσταιν derivatum indidi. Legumina autem diu in arbore persistunt, nec in valvulas dehiscunt; sed tandem, vel destruetis vel integris adhuc vesicis, inter singula semina transversim in frusta discedunt. Semina numero sunt quinque vel sex, & flavescunt. Incolis vocatur *Vivaceca*.

Crescit passim proxime Carthagena in fruticosis; præcipue ad pedem collis, qui est e regione nosocomii leprosorum. Floret Augusto & Septembri.

I. PISCIDIA (*Erythrina*) foliolis ovatis. *Linn. syst. 534.* Ichthyomethia foliis pinnatis ovatis, racemis terminalibus, siliquis quadrialatis. *Brown. jam. I, p. 296.*

Coral arbor polyphylla non spinosa, fraxini folio, siliqua alis foliaceis extantibus rotæ molendinariæ fluviatilis aucta. *Sloan. hist. jam. 2, p. 39, t. 176, f. 4 & 5.*

CAL. Perianthium monophyllum, campanulatum, bilabiatum: laciniis subrotundis, tubo duplo brevioribus; labii superioris unica, obtusa, emarginata, erecta, reliquis duplo latiore; labii inferioris lateralibus duabus obtusis & patulis, media acuta & erecta.

COR. papilionacea.

Vexillum subrotundum, emarginatum, convexum, reflexum, calyce duplo longius, ungue brevi.

Alæ duæ, obverse ovatae, obtuse, erectæ, longitudine vexilli, unguibus tenuissimis calycemque leviter superantibus.

Carina lunulata, retusa, erecta, alis paulo brevior, unguibus tenuibus.

STAM. Filamenta decem, diadelpha, (*simplex & novemfidum,*) inferne erecta, superne ad angulum fere rectum adscendentia, longitudine carinæ. Antheræ subrotundæ.

PIST. Germen oblongum, compressulum, pedicellatum, erectum. Stylus subulatus, adscendens ad angulum

fere rectum, staminibus longior. Stigma simplex, acutum.

PER. Legumen lineare, compresso-planum, auctum quatuor alis membranaceis longitudinalibus & latissimis, uniloculare, inter semina transversim fere connatum.

SEM. plura, oblongo-reniformia, compressa.

Arbor erecta, inelegans, viginti quinque pedes alta, facileque habitu suo neglecto & singulari eminus distinguenda. Folia sunt pinnata, quotannis decidua: foliolis ovatis, acutiusculis, integerrimis, interioribus saepe rotundioribus. Flores inodori, racemosi, prodeentes ante folia, vel interdum una cum iisdem. Folia ramulique contusa, & aquis injecta, disces inebriant, ut aquis supernarent, manuque capi possint: quam virtutem cum multis aliis plantis Americanis communem haec arbor posset.

Crescit in Jamaica passim ad vias publicas.

2. PISCIDIA (*carthagrenensis*) foliolis obverse ovatis. Linn. syst. 534.

Pseudoacacia siliquis alatis. *Plum. spec. 19, ic. 233, f. 2*

Habitum habet arbor haec praecedentis; at omni duplo majora. Foliola sunt obverse ovata & obtusissima cum acumine vel absque illo. Flores non contigit videre. In horto Vindobonensi per plures annos perstitit, sed tandem sine flore producto periit.

Crescit Carthagena in sylvis maritimis.

I. ROBINIA (*violacea*) inermis; pedunculis racemosis, partialibus bifloris; foliis impari-pinnatis. Linn. syst. 546.

(*Pl. americ. pict. Tab. 261, fig. 61. Pedunculus florifer*). Pseudoacacia fraxini foliis, floribus violaceis. *Plum sp. 19.*

CAL. Perianthium monophyllum, campanulatum, parvum, ore integro.

COR. papilionacea.

Vexillum subrotundum, emarginatum, amplum, planum, reflexum, ungue brevi.

Alæ duæ, obverse ovatæ, obtusæ, erectæ, longitudo vexilli, unguibus longis.

Carina figura situ & magnitudine alarum.

STAM. Filamenta decem, diadelpha (simplex & novem-

fidum,) erecta, apice adscendentia. Antheræ oblongæ, incumbentes.

PIST. Germen oblongum, compressum, erectum. Stylus subulatus, adscendens. Stigma simplex.

PER. Legumen oblongum, compressum, acutum, uniloculare, bivalve.

SEM. plura, reniformia, compressa.

Arbor inermis, erecta, duodecimpedalis. Folia pinnata, alterna, numerosa, nitida; foliolis utrinque tribus (raro duobus, rarius quinque,) cum impari, ovatis, obtusis, emarginatis, integris, petiolatis, oppositis, bipinnicaribus. Racemi axillares, semipedales: pedunculis partialibus brevibus, bifloris, numerosis. Flores & habent colore & odorem Violæ odoratæ.

Crescit Carthaginæ in fruticosis. Floret Julio & Augusto.

2. **ROBINIA** (*sepium*) inermis; pedunculis racemosis, partialibus unifloris; foliis impari-pinnatis.

(Pl. americ. piſt. Tab. 260, fig. 40. *Flos.*)

CAL. Perianthium monophyllum, campanulatum, parvum, ore levissime quinquedentato; denticulis superioribus magis ad invicem approximatis.

COR. papilionacea.

Vexillum subrotundum, emarginatum, planum, ampulum, reflexum.

Alæ duæ, oblongæ, obtusæ, erectæ, liberæ, longitudine vexilli.

Carina oblonga, obtusa, erecta, superne sublunulata, alis paulo brevior.

STAM. Filamenta decem, diadelpha (simplex & novemfidum,) superne adscendentia. Antheræ subrotundæ, planæ, erectæ.

PIST. Germen lineare, compressum. Stylus subulatus, adscendens. Stigma pubescens.

PER. Legumen longum, magnum, compresso-planum, obtusum, uniloculare, bivalve.

SEM. plura, ovata, compresso-plana.

Arbor erecta, inermis, ad triginta altitudinem pendum ex crescere, habitu valde affinis Robiniae Pseudoacaciae. In ramos dividitur teretes, suberectos, & longissimos. Folia habet pinnata, decempinnicaria, sparsa alternatim

per integros s^epe ramos, quotannis decidua: foliolis untrinque ut plurimum quinque cum impari, ovatis, obtusis, apice attenuatis, nitidis, integerrimis, oppositis, petiolatis, bipinnicaribus. Racemi axillares. Flores indori, rosei. Legumina glabra, subfuscata. Ex putatis satisque ramis facilis negotio propagatur. Hinc passim ab incolis adhibetur ad sepes construendas hortenses, cito certoque comprehensuras, nec vel aridissima anni tempestate interituras; sed quae incommode cultis simul terris inferunt non leve, nisi anniversaria ramorum ante seminum maturitatem putatione illud avertatur. Flores enim quotannis quum proferunt numerosissimos, ex his orta semina, valvularum elasticitate quaquavorsum projecta, totidem novas arbusculas celerrime produnt, in magnum domini detrimentum aut laborem. Vidi sic putatam arborem anni spatio reproduxisse ramos novos, vix divisos, totosque floribus onustos, qui duodecim altitudine pedes excedeant. Incolis dicitur Raton vel Mata-raton, id est, Glis vel Gliricida; eo quod haec arbor prompre cui libet offerat pro fuste ramum, conspecto gliri quo caput ocyus illidat.

Crescit passim Carthagena.

POLYADELPHIA.

PENTANDRIA.

I. THEOBROMA (*Cacao*) foliis integerrimis. Linn.
syft. 580.

Theobroma fructu ovato-acuminato, subverrucoso, decem sulcis longitudinalibus subarato. Brown. jam. 2, p. 306.

Theobroma fructu subrotundo, subverrucoso, decem sulcis subarato. Brown. jam. 3, p. 306.

Cacao. Sloan. hist. jam. 2, p. 15, t. 160. Catesb. car. 3, p. 6, t. 6. Merian. sur. 26, t. 26 & 63.

Arbor cacavifera americana. Pluk. alm. 40, t. 268, f. 3. Proficue & elegantissimae hujus arboris varietates vel forte verae species in Martinica binæ occurruunt, sola fructuum forma externa diversæ. Altera, quæ istic *Cacao du pays* sive indigena audit, illos gerit ex ovali oblongo, apice

apice obtuse attenuatos, decem sulcatos, & gibbulis inæquales sive subverrucosos; cuiusmodi apud Catesbæum exhibentur. Alterius, dictæ *Cacao de Cayenne*, quod ex Cayenna credatur fuisse adlata, fructus sunt ovati, nullatenus verrucosi, multo minus iteo vix sulcati, præcedentium crassitie, sed breviores. Utraque arbor forma concinna gaudet, evadit comosa, & ad altitudinem duodecim vel sedecim pedum attollitur. Truncus erectus statutam humanam attingit. Materies alba & levis cortice subfuscō & æquali obducitur. Folia lanceolato-oblonga, lète virentia, integerrima, alterna, a novem ad sedecim pollices longa, ad sumnum tres quatuorve latæ, petiolo insident pollicari & utrinque incrassato. Pedunculi tenues, circiter octo vel decem aggregati exeunt ex præteriorum præcipue foliorum cicatriculis in ipso solo tenuis trunco inque ramis crassioribus; quos inter plerumque unicus fructifer evadit, abortantibus reliquis. In his flores locantur parvi, rubelli & inodori. Fructus sunt glabri, & vel flavi, vel rūbri, vel ex hoc utroque pro solis varia irradiatione misti. Diametro tres circiter pollices æquant. Longitudo Cayennensium sex pollicum est, quos ad duos superare solent verrucosi. Cortex carnosus & interne coloris carnei ferme dimidii pollicis crassitatem habet. Pulpæ albicat, consistentiæ est butyraceæ, a cortice in maturitate libera secedensque, eidem per sola quædam filamenta adhærens, quæ, ipsam penetrando, ad semina usque porrigitur. Hinc sonitu quodam maturitatem fructus concussi indicant. Pulpæ saporis est dulcis nec ingratia, habetque subaciduli quid conjunctum, & solet ab incolis cruda exfugi & comedи. In totidem vero portiones facile disjungitur, quot sunt semina, quibus adhæret fortiter, & quæ involvit, ut sic quodlibet semen propriam suam habere pulpam videri possit. Hæc numero continentur in quovis fructu circiter viginti quinque. Recentia carnei sunt coloris. Collecta ante maturitatem condiuntur faccharo, palatoque summopere placent. Fructu exempta evadunt brevi effœta, inclusa vero intactaque germinationi diu idonea persistunt. Foliis, floribus, fructibusque totum annum arbor gravatur; copiosior autem & vera fructuum collectio Junio & Decembri contingit. Biennialis arbuscula altitudine tres pedes excedit; tuncque ramos

expandit, quos ex trunci summitate admittere quinos incolæ solent, putatis; si adfuerint, reliquis. Jam ante tertium ætatis annum primos fructus promittit. Est autem culturæ difficillimæ, & transplantationem ægre patitur. Tempestate vehementius concussa languet, peritque. Radix princeps, & si fibrillas excipis, fere unica, nec tamen crassissima, recta deorsum tendit; in decursu autem si cui obſtaculo impingit, ut retroflecti cogatur, ipsa periclitatur arbor, ac languore lento ut plurimum consumitur. Hinc seri illam oportet in solo pingui fertili & tres pedes profundo, locoque a ventis immuni. Quælibet arbor quotannis duas tresve libras seminum vulgo largitur. Cayennensia semina longe indigenis postponuntur ab incolis; at horum nunc parvus est proventus. Anno enim hujus sæculi circiter quinto & vigesimo omnes in Martinica vicinisque insulis arbores Cacaoferæ indigenæ tempestate horrenda atque inundatione subsecuta interierunt. Ab illo tempore in illarum vicem introductæ Cayennense fuerunt. Adeo interea exolevit hujus arboris cultura in hisce insulis, ut consumptioni domesticae tantummodo parredi soleat; nec multum de hac merce exhinc in Europam transvehatur. Ad istum neglectum non parum Coffea facit, fructuum certitudine incolis amata. Hujus primam tenellam arbusculam egregius De Clieux, in Gallico perditatu centurio, anno hujus sæculi vigesimo ex horto regio Parisino in Martinicam transtulit; quæ prolis tam numerosæ mater extitit, ut solo anno quinquagesimo sexto, quo istic morabar, ex sola hac insula in Europam transportata horum seminum fuerint centies & octogies centum millia librarum.

Crescit in Caribæis.

POLYANDRIA.

- I. HYPERICUM (*cayennense*) floribus pentagynis; corollis hirsutis; caule arboreo; foliis ovatis. Linn. syl. 582. Aubl. guian. 2, p. 784, t. 311.
 Caopia. Pis. bras. l. 4, c 9. Marcgr. bras. l. 3, c. 3.
 CAL. Perianthium pentaphyllum; foliolis ovatis, concavis, acutis, erectiſculis.

COR. Petala quinque, obovata, obtusissima, concava, interne hirsutissima, erecta, calyce duplo longiora.

Glandulæ nectareæ quinque, ovatæ, erectæ, longitudine germinis, cum corporibus filamentosis alternantes.

STAM. Filamenta numerosa, calyce paulo longiora; conata in corpora quinque, subulata, hirsuta, apice penicilli instar divisa. Antheræ globosæ, minimæ.

PIST. Germen ovatum, calyce triplo brevius. Styli quinque, subulati, patentes, staminibus breviores. Stigmata capitata, obtusa.

PER. & SEM.

Arbor ramosa, erecta, octodecim pedes alta. Folia ovata, acuta, integerrima, nitida, punctis nigris notata, petiolata, opposita, duos tresve pollices longa. Racemi compositi, terminalis. Flores subvirentes, corollæ hirsutie alba. Amygdali cayennensis titulo ex Cayenna in Martinicam translata, ibidem in horto P. P. Societatis Jesu floruit saepius, fructum vero, quum istic degebam, tulerat nedum.

Crescit Cayennæ.

SYNGENESIA.

POLYGAMIA AEQUALIS.

I. **S**PILANTHES (*urens*) foliis lanceolatis, integerrimis; caule prostrato. *Linn. syst. 610.*

(*Pl. americ. piæ. Tab. 194. Ramus florens*).

Santolina pyrethri sapore, humifusa. *Plum. spec. 10.*

CAL. Communis subhemisphæricus, imbricatus: squamis ovatis, compactis, exterioribus duabus acuminatis, reliquo obtusis.

COR. Composita tubulosa, conico - convexa. Corollulae hermaphroditæ numerosæ, uniformes.

Propria monopetala, infundibuliformis; limbo quinqüefido, acuto, reflexo, tubo duplo breviori.

STAM. Filamenta quinque, capillaria, brevissima. Anthera cylindrica, tubulosa, corollæ tubo pauxillo longior.

PIST. Germen oblongum, plano-compressum, longitudi-

ne corollæ. Stylus filiformis, longitudine staminum.
Stigma bifidum, reflexum.

PER. nullum. Calyx immutatus.

SEM. solitaria, oblonga, compresso-plana, aucta lateribus membranula ad marginem villosa, quæ superne abit utrinque in setam unicam, alteram altera duplo longiorem.

REC. paleaceum, conicum, obtusum.

Radix perennis. Caules herbacei, teretes, glabri, ramosi, procumbunt, terræque e geniculis radiculos immissi, teretes & albantes; opinor, plusquam annua. Folia sunt ex angusto lanceolata, acuta, integrerrima, utrinque glabra, facie virentia, dorso leucophæa, sessilia, semper opposita, trinervia, nervis supra basin unitis, sesquipolligaria, plurima. Hæc morsa, & linguæ impensa, etiamsi in principio videantur insipida, brevi urens calor sensum ori imprimunt, radici Pyrethri nequam cedentem, cujus etiam in locum istis utuntur incolæ in Odontalgiis similibusque morbis, ubi convenit humorum fluxum provocare ad internas oris partes. Pedunculi uniflori, solitarii, suberecti cum ramulo suo, longi, subterminales, florem gerunt albantem, inodorum, punctisque nigris variegatum; quæ proveniunt ab antheris, nigredine sua flores veluti maculis punctatis adspersos redentibus: unde hisce plantis nomen imposui ἀπὸ τῆς σπιλαῖας οὐρῶν derivatum. Post floris perfectam explicacionem, e latere pedunculi ad basin caulinulus novus enascitur foliosus, suum & ipse tempore suo florem producturus.

Crescit Carthaginæ in campis arenosis, præsertim maritimis. Florentem vidi a Majo ad Octobrim.

2. SPILANTHES (*insipida*) foliis obverse ovatis, subdentatis, sessilibus. Linn. syst. 610.

(Pl. americ. piæt. Tab. 261, fig. 63. *Folium*).

Caules fruticosi, teretes, ramosi, procumbentes. Folia obverse ovata, basi attenuata, glaberrima, crenatodentata, acuminata, subsessilia, opposita, sesquipolligaria, sapore falso, at nullatenus urente. Pedunculi & flores omnino præcedentibus simillimi.

Crescit Havanæ in rupestribus maritimis. Vidi florentem Decembri & Januarie.

I. KLEINIA (*ruderalis*).(Pl. americ. pict. Tab. 195. *Caulis florens*).

CAL. Communis simplicissimus, oblongus, cylindricus, glaber, collo connivente, ore patulo, pentaphyllus: foliolis linear-lanceolatis, acuminatis, æqualibus.

COR. Composita tubulosa, uniformis. Corollulæ hermaphroditæ plurimæ, æquales, calyce pauxillo longiores.

Propria monopetala; tubo linearis, tenui, longissimo; limbo subcampanulato, quinquefido.

STAM. Filamenta quinque, capillaria, brevissima. Anthera cylindrica, tubulosa, quinquedentata.

PIST. Germen lineare, calyce duplo brevius. Stylus filiformis, longitudine staminum. Stigma bifidum, revolutum, apicibus villosis.

PER. nullum. Calyx totus retroflexus.

SEM. solitaria, linearia, coronata pappo capillari.

REC. nudum, planiusculum, punctatum.

Planta annua, erecta, tripedalis vel minus alta, glaberrima, paniculata. Folia ad lanceolatam figuram magis minusve accedunt, magnitudine valde varia, pleraque alterna, nunc integra, nunc inæqualiter repanda vel incisa, acuta, petiolata, e glauco virentia. Pedunculi uniflori, terminales, solitarii, erecti. Flores inodori, calyce viridi, corollis e viridi luteoque mixtis. Quum plantæ, quæ dictæ fuerant in celeberrimi Kleinii memoriam, cum Cacaliis nunc sint conjunctæ, haec novi generis stirpem laudati viri nomine appellavi.

Crescit in Domingo & Martinica; in ruderatis, glaureosis, muris, similibusque locis.

POLYGAMIA SUPERFLUA.

I. PECTIS (*punctata*) foliis linearibus, integerrimis, dorso punctatis. Linn. syst. 641.(Pl. americ. pict. Tab. 196. *Caulis florens*).

Chondrilla foliis angustis & ad oras punctatis. Plum. ic. 86, f. I.

CAL. Communis simplex, oblongus, quinquesulcatus, pentaphyllus: laciniis linearibus, canaliculatis, obtusis, erectis, æqualibus.

COR. Composita, radiata. Corollulæ hermaphroditæ tu-

bulosæ duæ tresve in disco. Fœminæ ligulatæ quinque in radio. Propria hermaphroditæ infundibuliformis: limbo quinquefido, acuto, eretto, brevi.

Fœminæ ligulata; tubo cylindrico; limbo ovali, plano, reflexo, ad apicem tridentato, hermaphroditæ paulo longiori.

STAM. Hermaphroditæ Filamenta quinque, capillaria, brevissima. Anthera cylindrica, longitudine corollæ.

PIST. Hermaphroditæ Germen lineare, longitudine calycis, Stylus filiformis, erectus, corolla longior. Stigma bifidum, patens.

Fœminæ Germen lineare, longitudine calycis, singulum singulo calycis foliolo inclusum. Stylus filiformis, longitudine tubi corollæ. Stigma bifidum, patens.

PER. nullum. Calyx immutatus, patens.

SEM. Hermaphroditæ solitaria, linearia, instructa setis duabus.

Æceminis simillima Hermaphroditæ.

REC. nudum.

Planta annua, tenella, ercta, bipedalis vel tripedalis. Rami glabri, striati, dichotomi. Folia linearia, utrinque attenuata, acuminata, integerrima, superne glabra, dorso punctata, basi utrinque ciliata, opposita, sessilia, sesquipollicaria. Pedunculi uniflori, solitarii, fere longitudine foliorum, in dichotomis caulinum, interdum etiam axillares. Flores parvi, sordide flavescentes, inodori.

Crescit passim Carthaginæ ad margines sylvarum. Floret Septembri & Octobri.

ECCLIPTA (punctata) caule eretto, punctato; foliis planis. Linn. mant. 286.

(Pl. americ. piæt. Tab. 197. *Ramus florens.*)

Planta annua, erectaque, caule adsurgit tereti, ramoso, folioso, scabro, sesquipedali, rubescente cum adspersis punctis albidis. Folia habet lanceolato-oblonga, acuta, serrata, scabra, opposita, sessilia, duos tresve pollices longa. Pedunculi uniflori, subterminales. Flores albidi, inodori. Scatet planta tota succo viridi & aquoso, qui ad aëris attactum nigricat. Hæc una cum foliis & radicibus ad manipulum unum pressa contusaque sine addito liquore ullo dedit fere uncias duas succi valde dilu-

ti, atri, cum eleganti cærulescentia mixti, quo ceu atramento uti potui. Color iste, si figi posset, pulcherrimam fane tinturam constitueret. Servus æthiops ex Guinea Africæ in Martinicam adactus afferuit mihi, loco natali suo a popularibus ipsissimam adhiberi plantam, quo cutima intensius denigrent, iisdemque Intoum nuncupari.

Crescit in Domingo & Martinica, in pratenisibus humidis, & inundatis, æque maritimis atque aliis.

POLYGAMIA NECESSARIA.

I. POLYMNIA (*Wedelia*) foliis lanceolatis; caule fruticoso. Linn. *syst. 658.*

(Pl. A. P. Tab. 198. *Pars caulis florentis*).

CAL. Communis tetraphyllus; foliolis subovatis, planis, laxis, magnis.

COR. Composita radiata. Corollæ hermaphroditæ plurimæ in disco. Fœminæ ut plurimum octo in radio.

Propria Hermaphroditis monopetala; tubo infundibuliformi, longo; limbo quinquesido, acuta, erecta.

Fœminis monopetala; tubo cylindrico, brevi; limbo obcordato, plano, magno, semilibero: laciniis semiovatis, integerrimis, obtusis, divaricatis.

STAM. Filamenta Hermaphroditis quinque, capillaria, brevia. Anthera cylindrica, tubulata, longitudine corollæ.

PIST. Hermaphroditis German oblongum. Stylus filiformis, longitudine corollæ. Sigma bifidum; laciniis filiformibus, revolutis.

PER. nullum. Calyx immutatus.

SEM. Hermaphroditis solitaria, obverse ovata, coronata calyculo campanulato circiter decemdentato.

Fœminis simillima Hermaphroditis.

REC. planiuseulum, instructum paleis totidem, quot sunt flosculi, concavis, obtusis, longitudine flosculorum, interiorum apicibus corollæ concoloribus.

Planta fruticosa, scandens; caulis teretibus, glabris, lignosis, gracilibus, ramosis, brachiatis. Folia ovata, acuta, leviter serrata, utrinque scabra, brachiole donata, opposita, in ramulis junioribus. Pedunculi uniflori, solitarii, subterminales, ad quorum nampe

basis novi ramuli exsurgunt. Flores flavi, diametro pollicari minores. Paleæ extimæ majores imponunt, ac si calycis imbricati essent foliola interiora; sed attenta flosculorum inspectio docet, ad flosculos radii ceu paleas pertinere, suamque cuilibet flosculo esse paleam.

Crescit passim Carthaginæ in fruticetis & sylvaticis. Floret præcipue Julio & Augusto.

MONOGAMIA.

I. STRUMPFIA (*maritima*). Linn. syst. 665.

Thymelæa frutescens, rosmarini folio, flore albo. Plum. spec. 17, ic. 251, f. 1.

Thymelæa humilior, foliis acutis atrovirentibus. Sloan. hist. jam 2, p. 93, t. 189, f. 2.

CAL. Perianthium monophyllum, minimum, erectum, quinquedentatum, acuminatum, germini insidens, persistens.

COR. Petala quinque, ovato-oblonga, obtusa, patentia.

STAM. Filamenta omnino nulla. Antheræ quinque, oblongæ, erectæ, corolla paulo breviores, coalitæ in unum corpus ovatum quinquesulcatum apice & basi levissime quinquedentatum.

PIST. Germen subrotundum, inferum. Stylus subulatus, erectus, staminibus paulo longior. Stigma simplex, obtusum.

PER. Bacca subrotunda, umbilicata, coronata calyce, unicocularis.

SEM. unicum, subrotundum.

Frutex erectus, tripedalis. Rami teretes, subcinerrei, a casu foliorum articulis constare brevibus vīsi, eo quod folia cum stipulis ortum ducant e vagina communis, quæ ramum ambit, ac persistit. Folia sunt terna, Rosmarini foliis simillima. Stipulæ parvæ, acutæ, & nigrigentes, cum foliis alternant. Pedunculi communes axillares & foliis duplo breviores sustinent flores circiter quinque, parvos, petalis albis, & breviter pedunculatos. Baccæ molles & albi magnitudinem habent piselli. Tota planta odorem spirat levem & ingratum. Nominavi hanc in memoriam Christophori Caroli Strumpff, Haleæ Mag-

deburgicæ, dum viveret, Chemicæ & Botanices Professoris, præmatura morte erepti.

Crescit in Curaçao in rupibus maritimis: præcipue in suburbio dicto de Klip.

I. LOBELIA (*longiflora*) foliis lanceolatis, dentatis; pedunculis brevissimis, lateralibus; tubo corollæ filiformi, longissimo. Linn. syst. 666.

(Pl. americ. pict. Tab. 200. *Caulis cum flore & fructu.*) Rapunculus aquaticus; foliis cichorei, flore albo, tubo longissimo. Sloan. hist. jam. I, p. 158, t. 101, f. 2.

CAL. Perianthium monophyllum, semiquinquefidum, quinquare, germini circumnatum, persistens: laciniis linear-lanceolatis, acutis, dentatis, erectis, fere æquibus.

COR. monopetala. Tubus cylindricus, omnium longissimus, superne leviter latescens, externe villosus, erectus. Limbus quinquefidus, planus: laciniis lanceolatis, acutis, æqualibus.

STAM. Filamenta quinque, subulata, erecta, orta in parte superiore tubi. Antheræ quinque, didymæ, connatæ in cylindrum oblongum, gibbum, basi quinquefariam dehiscensem.

PIST. Germen calycis tubo adnatum, cuius figura. Stylus filiformis, longitudine staminum. Stigma obtusum, bifidum.

PER. Capsula subovata, cincta calyce, ejusdemque laciniis coronata, inflata, bilocularis, apice dehiscens.

SEM. numerosa, minima. Receptacula duo, oblonga, medio dissepimento adnata.

Planta herbacea, suberecta, elegans, caulis magis minusve villosis. Folia oblonga, subpinnatifido-dentata, acutiuscula, glabra, marginibus denticulatis, sessilia, alterna, semipedalia. Pedunculi uniflori, axillares, foliarii, villosi, breves. Flos speciosus, niveus, erectus, quadripollicaris. Capsula viret, quando seminibus jam maturis disrumpitur. Tota planta est veneficissima. Interne sumpta hypercatharsin creat nullis remedii cedentem, tandemque lethalem. Succo ejus infecta manus si oculos fricat labiave, inflammationem inducit urentem, cuius inscius feci experimentum. Equus hanc si comedit, rumpi medius fertur; unde nomen apud Hispanos fortita est

Rebenta - cavallos, id est, Equorum disruptor. Apud Dr. mingenses famosa est sub nomine Quedec.

Crescit in Domingo, Cuba, Jamaica, & Martinica, ad rivulos, inque humidis.

I. VIOLA (*Hybanthus*) arborescens, aculeata; foliis oblongis, obtusis, glabris. Linn. *syst. 669.*
(*Pl. americ. pict. Tab 260, fig. 21.* *Folium. Flos auctu. Capsula. Semen*).

CAL. Perianthium pentaphyllum, persistens: foliolis ovatis, concavis, acutis, parvis; quorum duo anteriora erecta; his opposita tria reliqua basi in gibbum protrusa.

COR. Petala quinque: quorum quatuor anteriora ovata, erecta, concava, obtusa; quintum oblongum, in medio attenuatum, erectum, marginibus conniventibus subcanaliculatum, reliquis paulo longius, apice bifidum, laciniis subrotundis & obtusis.

Glandula nectarea suborbiculata, depresso-plana, maxima, locata in gibbo calycis inter stamina petalumque quintum.

STAM. Filamenta quinque, ovata, concava, compressa, conniventia, ad apicem aucta appendice membranacea, petalis anterioribus breviora. Antheræ in singulis filamentis infra appendicem geminæ, oblongæ, longitudinaliter adnatae parieti interno filamentorum.

PIST. Germen ovatum. Stylus subulatus, erexit, longitudine corollæ. Stigma simplex.

PER. Capsula subrotunda, trisulcata, styli parte exigua acuminata, inflata, unilocularis, trivalvis.

SEM. pauca, globosa.

Arbuscula inelegans, erecta, ramosa, septempedalis. Aculei subulati, sparsi, rari. Folia oblonga, utrinque attenuata, emarginata, leviter serrata, glabra, petiolata, plura simul ex eodem tuberculo prodeuntia. Pedunculi communes breves, superne bifidi, pauciflori, ex eodem cum foliis tuberculo unus alterve. Flores exiguæ, inodori, corollis albidis, vix oculo nudo examinandi; unde ad quadruplum auctum florem exhibui. Fructus pisi magnitudine majoris.

Crescit in montibus sylvaticis circa Havanam.

GYNANDRIA.

DIANDRIA.

I. ORCHIS (*seracea*) bulbis fasciculatis; nectarii cornu setaceo, germine longiori; labio quinquepartito, setaceo.

Planta bipedalis, erecta; foliis lanceolatis, acutis, integerrimis, alternis. Flores spicati, candidi.

Crescit in pratis humidis Martinicæ. Floret Novembri.

I. SATYRIUM (*plantagineum*) bulbis subfibrosis; foliis caulinis ovatis, petiolatis, vaginantibus; nectarii labio integro. Linn. syst. 676.

Orchis elatior latifolia, asphodeli radice, spica strigosa.

Sloan. hist. jam. I, p. 250, t. 147, f. 2.

Planta bipedalis. Caulis procumbenti-erectus, e geniculis radicans. Folia falcato-ovata, acuminata, quinquenervia, alterna, petiolata. Flores albi, circiter quinquaginta in eadem spica. Nectarii labium inferius refert vesiculam oblongam, pauloque est germine brevius. Antherae in unum cuspidem sunt connatae. Petala connascuntur in galeam quinquedentatam. Spathæ ovato-lanceolatae, longitudine germinis.

Crescit in Martinicæ sylvis humidis & umbrosis.

I. EPIDENDRUM (*lineare*) foliis caulinis linearibus, emarginatis, obtusis; caulis simplicissimis. Linn. syst. 681.

(Pl. americ. pict. Tab. 201. Tota planta florens).

Helleborine tenuifolia, repens. Plum. sp. 9, ic. 182, f. I.

CAL. Spathæ vagæ. Spadix simplex.

Perianthium nullum. Germen florem sustinens.

COR. Petala quinque, ovato-oblonga, subæqualia, acuta, erecta, quorum tria exteriora paulo latiora.

Nectarium monophyllum, eratum, tubulosum, bilabiatum. Labium superius oblongum, apice cucullatum, petalis brevius. Labium inferius tertii petali interioris figura, ejusdemque locum occupans.

STAM. Filamenta duo, brevissima, pistillo insidentia. An-

theræ obverse ovatæ, didymæ, reconditæ sub cucullo biloculari nectarii.

PIST. Germen cylindricum, rectum, longitudine corollæ inferum. Stylus adnatus margini interiori tubi nectarii. Stigma infundibuliforme.

PER. Capsula ovato-oblonga, unilocularis, trivalvis.
SEM. numerosa, scobiformia.

Planta bipedalis, arborum parasitica. Radix repens, fibrofa, teres, cinerea, emittit caules plurimos foliosos simplices teretesque. Spica laxa, plerumque quadriflora. Folia linearia, integra, emarginata, obtusa, nitida, plana, coriacea, rigidula, vaginantia, disticha, alterna, totum caulem ornantia. Flores purpurei, parvi.

Crescit in sylvis densis Martinicæ.

2. EPIDENDRUM (*ramosum*) foliis caulinis oblongis, emarginatis, obtusis; caule ramoso.

(*Pl. americ. piæt. Tab. 202. Caulis florens*).

Planta sesquipedalis, ramosa, foliosa, arboribus innascens parasitica. Radices fibrosæ. Rami compressi, glabri, cinerei. Folia oblonga, obtusa, emarginata, coriacea, rigida, avenia, integra, nitida, basi vaginantis, cordide virentia, alterna, sesquipollicaria. Spathæ cordonato-ovatæ, acutæ, conniventes. Spicæ laxæ, distichæ terminales, sesquipollicares, plus minus quadrifloræ. Flores parvi, inelegantes, virentes; in quibus petala sunt rigidula, longitudine æqualia, tria exteriora lanceolata, duo interiora linearia. Nectarii labium inferius est oblongo-cordatum, acuminatum, concavum, rigidum, longitudine petalorum, cuius tertii interioris locum occupat. Antheræ sunt subrotundæ. Germen corollam leviter superat. Reliqua omnia plane sunt, qualia in præcedente.

Crescit in Martinicæ sylvis.

3. EPIDENDRUM (*globosum*) foliis caulinis subulatis, sulcatis; floribus terminalibus, subsolitariis.

(*Pl. americ. piæt. Tab. 203. Plantulae totæ florentes & fructigerae in ramo Theobromatis Guazumæ*).

Radices fibrosæ, teretes, cinereæ, numerosæ, ramis arborum parasiticæ adnascuntur; ac cespitosæ produnt caules simplicissimos, duos tresve pollices altos, teretes, glabros, foliosos, apice in spadicem abeuntes uniflorum, rarius biflorum, rarissime triflorum; unde spathæ adsunt

paucissimæ. Folia sunt subulata, acuta, glabra, interno sulco exarata, nitida, rigidula, sessilia, alterna, pollicaria. Flos exiguis, vix coloratus, erectus, structura est Epidendri linearis; præterquam quod germen sit petalis duplo longius; capsulaque globosa, sexfalcata, & piselli magnitudine.

Crescit in sylvis Martinicæ.

4. EPIDENDRUM (*rigidum*) foliis caulinis oblongis, obtusis; spathis longitudine flores æquantibus
(Pl. americ. pict. Tab. 204. *Tota planta florens*).

Planta pedalis, tota viridis, arboribus parasitica inhabitat. Radices sunt fibrosæ, cinereæ, teretes, numerosæ; e quibus exsurgunt caules simplices, teretes, foliosi, terminati spica disticha, laxissima, circiter quadriflora. Spathæ maximæ, coriaceæ, rigidæ, fere longitudine æquantes flores inelegantes, parvos, totos rigidos & crassos; quorum sunt petala patentissima, tria exteriora ovata, duo interiora lanceolata, pauloque breviora. Nectarii labium inferius cordato-subrotundum, obtusum cum exiguo acumine, planum, erectum, longitudine petalorum, denticulo utrinque ad basin instruitur. Antheræ sunt simplices. Germen est oblongum, incurvum, & trigonum. Capsula ovata, obtusa, & trigona. Cætera sunt in charactere simillima Epidendro linearis. Folia sunt coriacea, rigida, & nitida.

Crescit in sylvis Martinicæ.

5. EPIDENDRUM (*coccineum*) foliis caulinis subensiformibus, obtusis; pedunculis unifloris, axillaribus, confertis. Linn. syst. 681.

(Pl. americ. pict. Tab. 205. *Tota planta florens*).
Helleborina coccinea, multiflora. Plum. spec. 9, ic. 180,
f. I.

Planta elegans, parasitica arborum. Radices teretes, numerosæ, fibrosæ, cinereæ. Caules ex eadem radice plures, vix tandem pedales, ante quorum evidentem extortum jam flores prodeunt in axillis foliorum radicalium; quos dein ipsi caules in axillis foliorum suorum successive altioribus emittere porro pergunt. Ad caulum vero latera adstant nodi seu bulbili subrotundi, compressi, glabri, rugosi, spongiosi, virides, folioque terminati. Folia radicalia & caulinæ sunt subensiformia, amarginata, obtusa,

integra, avenia, nitida, crassula, flaccidula, basi conniventia, superne plana, a quatuor ad octo pollices longa. Pedunculi filiformes, albicantes, tenelli, bipolligares, uniflori, axillares, bini plerumque vel terni, spathis paucis & vaginantibus vestiti. Flores inodori, pollicares, toti cum germine miniati, charactere cum Epidendro linessi convenient; nisi quod sint petala ovato-acuminata & concava. Nectarii labium inferius lanceolato-cordatum rigidulum, suberectum. Antheræ in singulis filamentis geminæ, compressæ. Germen lineare, gracile, petalis concolor, iisdemque multo longius.

Crescit in sylvis Martinicæ humidis, præcipue ad torrentes.

6. EPIDENDRUM (*difforme*) foliis caulinis oblongis; floribus terminalibus, aggregatis; nectarii tubo longitudine corollæ.

(*Pl. americ. pict. Tab. 206. Tota planta florens. Diam fructus.*).

CAL. Spathæ vagæ. Spadix simplex.

Perianthium nullum. Germen florem proferens.
COR. Petala quinque, oblonga, subæqualia, patentissima, quorum duo interiora paulo angustiora.

Nectarium monophyllum, petalis concolor. Tubus cylindricus, erectus, fere longitudine corollæ. Limbus bilabiatus. Labium superius erectum, parvum, cucullatum. Labium inferius amplum, obverse cordatum, emarginatum, patentissimum, longitudine tubi. **STAM.** Filamenta duo, brevissima, pistillo insidentia. Antheræ bilamellatæ, obverse ovatae, planæ, reconditæ intra cucullum bilocularem nectarii.

PIST. Germen obverse subulatum, incurvum, tenui, pretali duplo longius, iisdemque concolor, inferum stylus adnatus tubo nectarii. Stigma infundibuliforme.

PER. Capsula ovalis, obtuse hexagona, unilocularis, trivalvis.

SEM. numerosa, scobiformia.

Planta arborum parasitica, glabra, pedem rarius æquæ altitudine. Radices teretes, fibrosæ, cinereæ, numerosæ. Caules teretes, foliosi, plures, simplices, plerumque situ horizontali vel pendulo. Folia sunt oblonga, coriacea, emarginata, avenia, dilute virentia, vaginan-

ta, totum caulem vestientia, alterna, pollicem vel sesquipollicem longa, ut plurimum difformia. Spadix brevissimus, reconditus in sinu folii terminalis, circiter quinqueflorus. Spathæ paucissimæ. Flores subfætidi, e vindi albentes, rigiduli, sesquipollicares.

Crescit in Martinicæ arboribus vastis passim.

7. EPIDENDRUM (*secundum*) foliis caulinis oblongis: spicis secundis; nectarii tubo longitudine corollæ; caule tereti. *Linn. syst. 681.*

(Pl. A. P. Tab. 207. *Tora planta florens*).

Helleborine purpurea, umbellata. *Plum. spec. 9, ic. 148,*
f. I.

Planta bipedalis, arborum parasitica. Radices fibrosæ, teretes, albicantes. Caulis teres, rubicundus, glaber, foliosus. Folia ex ovali oblonga, emarginata, integra, nitida, coriacea, avenia, rigida, amplexicaulia, alterna, disticha, fere tripollicaria, atro-virentia levique rubore suffusa. Spathæ inferiores in parte spadicis nudæ vaginantes, superiores sessiles minimæque. Spica laxa, secunda. Flores purpurei toti, non rigidæ, pollicares; quibus est nectarii labium inferius trifidum: lacinia media subrotunda, concava, emarginata, adscendente, tubo duplo breviore; lateralibus emarginatis, conniventibus, pauxillo minoribus. Reliqua sunt, ut in Epidendro difformi.

Crescit in sylvis Martinicæ montosis.

8. EPIDENDRUM (*anceps*) foliis caulinis oblongis; spicis laxis; nectarii labio inferiori semitrilobo; caule an-

cipiti.

(Pl. americ. pict. Tab. 208. *Tora planta florens*).

Planta parasitica arborum, semipedalis vel paulo altior. Radices fibrosæ, teretes. Caulis compressus, superne anceps, foliis paucis ornatus. Folia oblonga, obtusa, coriacea, alterna, vaginantia. Spadix lateralis, pauciflorus. Flores charactere Epidendri difformis; sed nectarii tubo petalis fere duplo breviori; ejusdemque labio inferiori semitrilobo; lobis rotundatis, subæqualibus, intermedio levissime bidentato. Germine petalis æquali. Fructum non vidi.

Crescit in sylvis Martinicæ.

9. EPIDENDRUM (*ciliare*) caule bifolio; nectarii labio

tripartito, ciliato; lacinia intermedia linearis. Linn.
syst. 681.

(Pl. americ. Pict. Tab. 209. *Planta rotunda florens. Fructus*).
Helleborine graminea, foliis rigidis carinatis. Plum spec.
9, ic. 179, f. 2.

CAL. Spathæ vagæ. Spadix simplex.

Perianthium nullum. Germen florem sustinens.

COR. Petala quinque, lanceolato-linearia, acuminata, sub-
æqualia, patentissima; quorum duo interiora pauxillo
angustiora.

Nectarium monophyllum. Tubus infundibuliformis,
compressus, incurvus, petalis duplo brevior. Labium
superius brevissimum, cucullatum. Labium inferius
patentissimum, trifidum: laciniis lateralibus alæformi-
bus, in cilia numerosa longaque abeuntibus, longitudi-
ne petalorum: intermedia subulato-lineari, acuminata,
dorso canaliculata, ad basin utrinque aucta gibbo sub-
ovato, longitudine lateralium

STAM. Filamenta quatuor, capillaria, brevia, pistillo in-
sidentia. Antheræ obverse ovatæ, compresso-planæ,
erectæ, reconditæ in cucullo quadriloculari nectarii.

PIST. Germen oblongum, teres, leviter contortum, lon-
gitudine petalorum, inferum. Stylus adnatus parieti
interno tubi nectarii. Stigma infundibuliforme.

PER. Capsula ovali-oblonga, trigona, unilocularis, tri-
valvis.

SEM. plurima, scobiformia.

Planta elegans, sesquipedalis, parasitica truncis ar-
borum vastarum innascitur, unde propendet terram versus.
Radices crassæ, fibrosæ, numerosæ. Caulis simplex, gla-
ber. Folia duo, oblonga, obtusa, integerrima, nitida,
avenia, coriacea, plana, distiche alterna, semipedalia,
auricularum instar leporis erecta; singula orta ex corpore
oblongo, crasso, striato, spongioso, caulis basin consti-
tuente. Spathæ glabrae, ferrugineaæ, numerosæ, infra
flores compressæ, imbricatae, alternæ, distichæ, spadicem
tegentes; florales laxæ & patulæ. Spica laxa, secunda,
circiter decemflora. Flores speciosi, maximi, albescen-
tes, quadriplicares.

Crescit in Martinica.

IO. EPIDENDRUM (*Nocturnum*) caule multifolio, foliis
oblon-

oblongis, aveniis; nectarii labio tripartito, integro; lacinia intermedia linearis. Linn. syst. 681.

(Pl. americ. pict. Tab. 210. Tota planta cum flore & fructu).

Planta vix pedalis, parasitica arborum. Radices teretes, fibrosae. Caulis teres, simplex, glaber, circiter quinquefolius. Folia oblonga, obtusa, integrerrima, coriacea, nitida, avenia, vaginantia, alterna, subdisticha, fere triplicaria. Flores triplicares, sessiles in spadice brevissimo spathisque pauciflisis vestito, bini plerumque, rarissime tres, interdiu inodori, noctu odorem exhalantes suavissimum, qui aliquid cum liliis albis commune habet; petalis e viridi luteis; nectarii albi laciniis lateralibus nulla cilia emissentibus, hinc petalis duplo brevioribus. Reliqua, ut in charactere Epedendri ciliaris; sed de staminibus nihil dico, quum illa in floribus, quos ego examinavi, omnibus deciderant cam nectarii cucullis.

Crescit in sylvis montosis Martinicæ.

II. EPIDENDRUM (*ophioglossoides*) caule unifolio; floribus racemosis, secundis. Linn. syst. 682.

(Pl. americ. pict. Tab. 211. Tota planta cum flore & fructu).

Helleborine ophioglosso similis. Plum. spec. 9, ic. 176, f. 3.

CAL. Spathæ vagæ. Spadices simplices.

Perianthium nullum. Germen florem sustinens.

COR. duplex. Exterior monophylla, basi plana & triangulari, trifida: laciniis triangularibus, acutis, planis, patulis, rigidis. Interior dipetala: petalis cordatis, acutis, patulis, minimis.

Nectarium monophyllum, corollæ interioris longitudine, tubo brevissimo, bilabiatum. Labium superius cucullatum, minimum. Labium inferius simile petalo interiori, ejusdemque tertii locum occupans.

STAM. Filamenta duo, brevissima, pistillo insidentia.

Antheræ subrotundæ, reconditæ in cucullo biloculari nectarii.

PIST. Germen oblongum, minimum, inferum. Stylus adnatus tubo nectarii. Stigma patulum.

PER. Capsula ovalis, trigona, trisulcata, sulco superiori carinato, unilocularis, trivalvis.

SEM. numerosa, scobiformia.

Plantula quadripollicaris, parasitica arborum. Radice: fibrosæ, albicantes, numerosæ. Folium caulinum. lanceolatum, acutum, integerrimum, coriaceum, rigidum, avenium, planum, nitidum, duos tresve pollices longum. E sinu hujus successive prodeunt spadices tres quatuorve, racemosi, simplices, tenues, erecti, folio paulo longiores, circiter decemfiori, vestiti ad basin spathis paucis, & floralibus exiguis. Flores exigui, secundi, inodori, breviter pedunculati, sordide lutei.

Crescit in sylvis montosis Martinicæ.

12. EPIDENDRUM (*ruscifolium*) caule unifolio; pedunculis e sinu folii aggregatis. Linn. syst. 682.

(Pl. americ. pict. Tab. 212. Tota plantulae fructiferat). Helleborine rufi majoris folio. Plum. spec. 9, ic. 176, f. 2.

Plantulæ hujus parasiticæ flores videre haud contigit; quare ex habitu fructuque huc retuli. Caulis est simplex, terminatus folio unico, ovali, acuminato, integerrimo, coriaceo, rigido, nitido, quadripollicari, leviter conniventi, avenio; in cujus sinu stat tuberculum, e quo oriuntur ceu spadice pedunculi plurimi brevesque.

Crescit in sylvis densis Martinicæ.

13. EPIDENDRUM (*nodosum*) folio unico, subradicato, subulato, interne sulcato; spadice subquadrifloro. Linn. syst. 681.

(Pl. americ. Pict. Tab. 213. Tota planta florens.)

Epidendron curassavicum orchidi affinis, folio crasso, sulcato. Herm. parad. 207, t. 207.

Satyrium parasiticum, folio singulari longo sinuato; spica assurgentí, ab infimo sinu orta. Brown. jam. 6, p. 325.

Viscum arboreum seu Epidendron, flore albo specioso, americanum, folio forma siliquarum nerii. Pluk. alm. 390, t. 117, f. 6.

CAL. Spathæ vagæ. Spadix simplex.

Perianthium nullum. Germen florem sustinens.

COR. Petala quinque, lanceolato-linearia, acuminata, plana, patentia, æqualia; quorum duo interiora duplo angustiora reliquis.

Nectarium monophyllum, erectum, tubo crasso & brevissimo, bilabiatum. Labium superius profunde tri-

fidum, minimum, reconditum cum tubo in basi labii superioris, tubunque coronans: laciis erectis, acutis, linearibus; superiore duplo latiore apiceque bifida; duabus reliquis huic oppositis. Quibus omnibus locatur intermedius cucullus quadrilocularis. Labium inferius oritur e basi tubi, quam amplectitur, estque corollæ longitudine, abiens ex ungue incurvo, in tubum compressum connivente, in bracteam cordato-acuminatam, amplam, basi infundibuliformem, integrum, suberectam, longitudine unguis.

STAM. Filamenta duo, oblonga, utrinque sulco longitudinali exarata, decumbentia in pistillo, eidemque in medietate affixa, apicibus utrinque bifidis. Antheræ obverse ovatae, compresso-planæ, erectæ, in filamentorum qualibet lacinia unica, hinc omnino octo, reconditæ in cucullo nectarii.

PIST. Germen lineare, contortum, petalis paulo brevius, infra receptaculum floris. Stylus adnatus tubo nectarii. Stigma infundibuliforme.

PER. Capsula ovalis, ventricosa, obtuse trigona, sexfalcata, unilocularis, trivalvis.

SEM. numerosa, scobiformia.

Planta pedalis, speciosa, arborum parasitica. Foliū unicum, linearis-subulatum, acutum, semicylindricum, interne sulco acuto exaratum, glabrum, crassum, plus minus semipedale, basi spatha longa cinerea vaginatum, in petiolum teretusculum & cauliformem abiens ex tuberculo seu nodulo; e quo ortum ducunt radices crassæ, teretes, longæ, cinereæ, & vix divisæ. Spadix simplex, brevis, teres, glaber, erectus, triflorus vel quadriflorus, & sinu folii prodit. Flores sessiles, magni, elegantes de die fere inodori, noctu autem odore prædicti fragrantissimo, vix ulli cedente, quiddam habente Lilii albi, nectarium gerunt niveum, & germen petalaque subflavescentia. Dicitur Hispanis *Abraca-palo* sive *Amplexicaulis*, quia radibus suis arborum ramos circumdat.

Crescit passim in sylvis insulæ Baru.

I4. EPIDENDRUM (*concretum*) foliis radicalibus, lanceolatis, acutis; nectario cum petalis concreto.

CAL. Spathæ vagæ. Spadix simplex.

Perianthium nullum. Germen florem sustinens.

COR. Petala quinque, longitudine æqualia. Exteriorum superius ovatum, concavum, acutum, patens; duo lateralia triangularia, duplo latiora, angulo germini insidentia, angulo petalum superius spectante acuto, reliquis obtusis, latere, quod angulo acuto opponitur, concreto cum nectario. Interiora duo oblonga, obtusa, patentia.

Nectarium monophyllum, tubo brevi, bilabiatum. Labium superius cucullarum, breve. Labium inferius oblongum, inter petala triangularia descendens, iisdemque utrinque accretum; dein versus superiora adscendens, latescens, liberum, apice trifido, lacinia media subrotunda.

STAM. Filamenta duo, brevissima, pistillo insidentia. Antheræ, obverse ovatae, erectæ, intra cucullum nectarii.

PIST. Germen oblongum, rectum, inferum. Stylus adnatus tubo nectarii. Stigma obsoletum.

PER. Capsula ovato-oblonga, obtuse trigona, unilocularis, trivalvis.

SEM. numerosa, scobiformia.

Planta pedalis, parasitica arborum. Radices fibrosæ, albicantes, crassæ, teretes, longæ. Folia radicalia omnia, duo tria quatuorve, lanceolata, acuta, coriacea, plana, rigidula, integerrima. Scapus simplex, compressus, eretus, circiter decemflorus. Pedunculi communes pauci, laterales, pauciflori. Flores exigui, sessiles.

Crescit in sylvis Martinicæ.

15. EPIDENDRUM (*carthagrenense*) foliis radicalibus, lanceolato-oblongis, acutis, planis; racemo composito.

(*Pl. americ. pict. Tab. 214. Tora planta florens*).

CAL. Spathæ vagæ. Spadicis racemo composito.

Perianthium nullum. Germen florem sustentans.

COR. Petala quinque, acuta, repanda, patentissima, quorum tria exteriora ovata, ungue longo donata, duabus inferioribus ad basin coalitis; interiora duo subrotunda, ungue brevi.

Nectarium monophyllum, tubo brevi & antice sulcato, bilabiatum. Labium superius petalis duplo brevius, trifidum: lacinia media cucullata, parva; duabus lateribus alæformibus, planis, parvis, patentibus. La-

biuum inferius ortum ad basin tubi, e disco oblongo excurrens in lacinias tres; quarum media est reniformis, emarginata, plana, patentissima, longitudine petalorum; lateralibus alæformibus, planis, patentissimis, brevioribus: disco superne ornato duobus gibbis oblongis.

STAM. Filamenta duo, brevissima, pistillo insidentia. Antheræ obverse ovatæ, hinc planæ, illinc convexæ, erætæ, reconditæ in cucullo nectarii.

PIST. Germen lineare, striatum, rectum, breve. Style brevis, tubo nectarii innatus. Stigma infundibuliforme.

PER. Capsula oblonga, superne crassior, sexfulcata, unicocularis, trivalvis.

SEM. numerosa, scobiformia.

Planta parasitica arborum truncis increscens, habitu haud male refert Aletrin guineensem. Radices teretes, albicantes. Folia radicalia omnia, lanceolato-oblonga, utrinque acuta, integerrima, glabra, coriacea, virentia utrinque ac punctis nigris variegata, pedalia, duos pollices lata, pauca. Scapus teres, tenuis, e rubenti fuscus, sesquipedalis, apice racemosus. Pedunculi pollicares, alterni, sesquipollicem ab invicem distantes, summi uniflori, infimi quinquefiori, intermedii inter utrosque. Spathæ lanceolatæ, membranaceæ, tenuissimæ, breves, vagæ ad nodos, & subaxillares ad pedunculos & flores. Flores speciosi petala habent albida maculisque e purpureo ferrugineis variegata; nectarii labium superius pallide purpureum, inferius petalis concolor, disco violaceo. Antheræ sunt aurantiæ. Fructus sesquipollicares.

Crescit Carthagena in sylvis densis.

16. EPIDENDRUM (*altissimum*) foliis radicalibus, ensiformi-oblongis, basi carinatis, superne planis; racemo composito.

(*Pl. americ. pict. Tab. 215. Tota planta florens*).

Viscum radice majus & elatius, delphini flore ferrugineo guttato. *Slean. hist. jam. I*, p. 250, t. 148, f. I.

Planta elegans, parasitica arborum. Radices teretes, fibrosæ, cinereæ, numerosæ. Folia acuta, ensiformi-oblonga, avenia, nitida, integerrima, crassula, pollicem lata, sesquipedem longa, basi carinata, cæterum plana:

orta singula e nodo vel tubere ovato, compresso, glabre, ovi interdum anserini magnitudine; qui ipse insidet basi folii alius radicalis, unius alteriusve, & similis. Inter hoc nodumque exsurgit scapus solitarius, teres, glaber, colore ferrugineo, tenuis, inclinatus, quadripedalis, superne racemosus; qui ad pedunculos & nodos vestitur spathis membranaceis, lanceolatis, cinereisque. Pedunculi biflori vel triflori plerumque, distiche alterni. Flores inodori, flavi cum maculis fuscis, numerosi. His sunt petala oblonga, distincta, utrinque acuta, undulata, sub-equalia. Nectarii labii inferioris lacinia media est subquadrata, flavaque tota sine maculis. Reliqua in charactere obtinent, sicuti in Epidendro carthagensem.

Crescit in sylvis Martinicæ.

17. EPIDENDRUM (*violaceum*) floribus violaceis.

Parasiticam hanc plantam inveni crescentem in Cereo quodam arboreo altissimo, unde avellere ob aditus difficultatem temporumque angustias haud licuit. Videbatur mihi prorsus ejusdem habitus atque præcedentis; sed floribus coloris pulchre violacei conspicua.

Crescit ad littora Zaucæ in Venezuela.

18. EPIDENDRUM (*terrapetalum*) foliis radicalibus, subulatis, carinatis; racemo simplici; corolla subterrapetala.

(Pl. americ. pict. Tab. 216. *Teta planta florens*).

Planta elegans, arboribus parasitica innascens. Radices teretes, cinereæ, fibrosæ. Folia radicalia, subulata, acuminata, carinata, rigidula, coriacea, dorso obtuse angulata, marginibus acutangulis, pallide virentia, punctis ferrugineis nunc scabra, nunc iisdem destituta glabraque, a sesquipollice ad semipedem longa in plantis etate fortasse variis. Scapus teres, tenuis, pedem unum alterumve longus. Spathæ lanceolataæ, parvæ, ad nodos & pedunculos. Pedunculi circiter decem, uniflori, racemum specimen secundumque formantes. Flores sunt suaveolentes, eleganter varieque colorati ex purpureo, violaceo, flavo, pallido, rubroque. Petala sunt quatuor, obverse ovato-acuminata, inæqualia, patentissima, quorum infimum apice bifidum: reliqua tria repanda: superiori paulo reliquis breviori. Nectarii discus oblongus ornatur gibbo cruciformi; labii autem inferioris lacinia-

laterales sunt obverse ovatae atque obtuse. Cætera omnia sunt, ut in Epidendro carthagensem.

Crescit in sylvis Jamaicæ, frequens in Ferry.

19. EPIDENDRUM (*Cebolleta*) folio radicali unico, subulato, nodo radicato; racemo composito.

(*Pl. americ. piæ. Tab. 217. Tota planta frutescens*).

Planta arborum truncis parasitica innascens. Radices teretes, fibrosæ, numerosæ. Folium unicum, radicale, subulatum, teres, acutum, interne leviter sulcatum, glabrum, carnosum, inferne digitum crassum, longum pedem unum alterumve, interdum vel quadripedale, basi abiens in nodum sive tuberculum subrotundum, post folii interitum persistens. Scapus teres, bipedalis aut longior. Spathæ lanceolatae. Pedunculi multiflori. E floribus emarcidis conjeci, charactere illos gaudere eodem, quo Epidendrum gaudet carthagensem. Incolæ appellant *Cebolletas* sive *Bulbillos*; dictisque nodis vel bulbillis cum sale trituratis externe utuntur magno cum nomine in confusionibus validis, fracturis ossium, aliisque morbis chirurgicis. Tota planta est saporis expers.

Crescit Carthaginæ in sylvis, præsertim maritimis.

Omnia hæc Epidendra ætate magis minusve cespitosæ evadunt, imprimis vero species minores, radicibusque numerosis super corticibus arborum decurrent, affigunturque iisdem sat firmiter. Discrepant quoad floris structuram vehementer ab invicem, & profecto magis, quam quidem inter se Satyria Orchides Ophresque. Unde qui multiplicationi generum favet, facile poterit hasce plantas in plura dispescere, ac per me dispescat licet. Certe quinque primæ ad idem pertinent genus: sic esto de quinque ultimis; de sexta, septima, & octava; deque nona ac decima. Ad has minus commode reducuntur aliæ.

PENTANDRIA.

1. AVENIA (*magna*) foliis cordatis, pubescentibus; florum germine sessili. *Linn. syst. 683. Laefl. it. 199.*

CAL. Perianthium pentaphyllum; foliolis ovatis, acuminate, pilosis, subcoloratis, reflexis.

COR. nulla.

Nectarium monophyllum, campanulatum, patens, germen cingens, calyce paulo brevius, superne ornatum glandulis quinque subrotundis & antheræformibus.

STAM. Filamenta quinque, filiformia, calycis longitudine, orta ex receptaculo communi extra nectarium, versus ejusdem limbum arcuata, apice expansa in bracteam subrotundam concavam & incumbentem nectario inter ejus glandulas. Antheræ subrotundæ, trilobæ, sexfalcatae, affixæ parieti interno bractæ.

PIST. Germen subrotundum, semiquinquelobum, hirsutum, parvum, sessile, in fundo nectarii. Stylus filiformis, erectus, nectario paulo longior. Stigma capitatum, convexum, in ambitu obtuse quinquesulcatum.

PER. & SEM. . . .

Frutex erectus, quinquepedalis. Folia cordata, acuminata, ferrata, alterna, utrinque tomentosa, ipsa tres quatuorve pollices longa, cum petiolo tomentosa fereque bipollicari. Pedunculi communes axillares, ut plurimum quaterni, triflori, breves. Flores exigui, e viridi pallentes, nullatenus gynandri. Fructum non vidi.

Crescit passim Carthagena in fruticosis. Floret Julio, Augusto, & Septembri.

I. PASSIFLORA (*quadrangularis*) foliis indivisis, subcordatis, integerrimis: petiolis sexglandulosis; caule membranaceo-tetragono. *Linn. syst. 684.*

(*Pl. americ. pict. Tab. 218. Ramus florens. Dein fructus & semen.*)

Passiflora foliis amplioribus cordatis, petiolis glandulis sex notatis, caule quadrigono alato. *Brown. jam. 2, p. 327.*

Plantæ hujus elegantissimæ caules sunt perennes, fruticosi, numerosi, subdivisi, inferne lignosi, superne in alas quatuor membranaceas abeuntes, scandentes. Folia sunt cordato-subrotunda, acuminata, integerrima, nitida, rugosa, quinquepollicaria: petiolo tribus glandularum paribus notato. Flores odoratissimi, pulcherrimi, colore & structura similes Passifloræ laurifoliæ, at paulo majores. Fructus ovati, nitidi, e luteo virentes, ovo anserino maiores, suaveolentes; corticem habent spongiosum, mollem, digitæ crassitie, fragilem, albido, insulsum, a porcis similibusque animalibus expeditum. Pulpæ eorum

est succulenta, subaquei coloris, leviter odorifera, saporis dulcis & aciduli gratissimique, seminibus fœta: continetur autem membrana propria, ceu sacco, satis firma, facili negotio a cortice secedente. Fructus integri in mensis apponi solent, magnique fiunt. Pulpa sacco suo liberata, aut sola, aut una cum contentis seminibus comeditur; vino præprimis injecta; & vim possidere videtur valde refrigerantem. Sylvestrem nullibi, cultam in hortis inveni ubique; ad quorum ornamentum etiamsi faciat non parum, formando paucorum mensium spatio pergulas amplas atque densissimas, suo tempore floribus fructibusque futuras spectabiles; id tamen incommodi adfert in regionibus, quas incolunt serpentes venenati, ut his infestari horti soleant. Invisa enim & damnosa hæc animalia Passifloras (præ cæteris autem hanc atque laurifoliam) vel earum viciniam pro habitaculo seligunt, quo commodius certiusque sibi escam captent; bene gnara, nullibi plures quam hic glires reperiri, qui Passiflorarum fructus in delectis habent. Ex taleis optime propagatur. Gallis vocatur *Granadille*. Viennæ e seminibus nata flores quotannis producit, fructus nedum.

Crescit in Caribæis.

3. PASSIFLORA (*sulcata*) fructu maximo, transversim sulcato.

Planta hæc præcedenti simillima est, solius figuram & magnitudinem fructus si exceperis; unde ceu varietatem recenso. Est vero ille subrotundus, capite saepe major infantis, & sulco circulari transverso digitumque profundo exaratus.

Crescit in Terra Firma.

2. PASSIFLORA (*laurifolia*) foliis indivisis, ovatis, integrimis, petiolis biglandulosis; involucris dentatis.

Linn. *sys. 684.*

(Pl. americ. pift. Tab. 219. *Ramus florens. Fructus*).

Passiflora arborea, laurinis foliis, americana. Pluk. alm. 282, t. 211, f. 3.

Clematis indica, fructu citriformi, foliis oblongis. Plum. amer. 64, t. 80.

Marquiaas. Merian. sur. t. 21.

Fruticosa & lignosa est, totaque glabra. Rami juniores teretes virent. Folia habet ovata, acuta vel obtusa,

integerrima, nitida, plana; petiolo brevi & utrinque superne uniglanduloso. Cirrhi axillares & longissimi. Penduculi solitarii, uniflori & axillares. Flores speciosissimi & suaveolentissimi. Involucri triphylli foliola calyci proxime adstant, & sunt ovata, acuta, virentia, rarer que dentata vel integerrima. Foliola calycis sunt lanceolata, acuta, integra, foris pallide virentia, intus ex carneo pallidoque varia. Petala acuta rosei intus coloris sunt, foris pallent. Fibræ nectarii ex albo, purpureo violaceo-que transversim eleganter variegantur. Fructus ovatus & triplicaris corticem habet coriaceum, luteum, mollem, & tenacem; ex quo per foramen cultro vel morsu factum, compressionis ope, exsugitur una cum seminibus contentis puipa ex aquo alba, dulcis, sapidissima, propriumque spirans aroma. Gallis vocantur *Pommes de Liane*, Anglis *Honey - Suckles*.

Crescit in Caribæis.

3. PASSIFLORA (*serrulata*) foliis trilobis, serrulatis; petiolis in medio biglandulosis.

Tota planta glabra est, & cirrhis axillaribus vicinas arbores scandit. Florum calyx & corolla ex purpureo albescunt. Involucrum triphyllum & integrum viret. Nectaria variegantur ex albo, purpureo, & atropurpureo. Floris diameter duorum cum dimidio pollicum est; odor autem suaveolens & gratissimus. A Passiflora incarnata est distinctissima species; folia enim sunt dense & minutissime serrulata, minora, obtusiora; tum etiam paginis lateribus ad petiolum usque productis, nec, uti in incarnata, basi ad nervos usque laterales deficientibus. Glandulæ duæ concavæ alternatim medietatem petioli occupant, nec, sicut in illa, in suprema petioli parte nervos laterales suffulciunt.

Crescit Carthagena in sylvis.

4. PASSIFLORA (*nigra*) foliis trilobis, glabris, ad oras aculeato-villosis; petiolis biglandulosis.

Planta cirrhis scandens. Folia utrinque glabra, triloba, integra, basi non cordata; ad oras villis brevissimis albidis oculumque fere fugientibus ornata, qui microscopio spectati e minimis denticulis orti deprehenduntur, unde ad motum retrorsum digitum margo asper est. Lobi sunt subovati & acuti, intermedius duplo major la-

teralibus. Petiolus villosus infra folii basin ad utrumque latus glandulam emittit oblongam porrectamque. Baccæ sunt globosæ, parvæ, nigrae & succulentæ.

Crescit in territorio Carthaginensi ad Boca chica.

HEXANDRIA.

I. ARISTOLOCHIA (*anguicida*) foliis cordato-acuminate; caule volubili, fruticoso; pedunculis solitariis; stipulis cordatis. Linn. syst. 686.

(Pl. americ. pft. Tab. 220. *Ramulus fiorens. Dein capsula, semen & caulium infima pars*).

Odor totius plantæ nauseofus est ac ingratus. Radices teretes & ramosæ medullam habent albicantem, plenam succo aurantio amaro nauseoso & fetido, vestitamque cortice suberoso & fusco. Caules teretes; inferiores farmentosi, lignosi, perennes, suberosi; superiores glabriusculi, striati, volubiles; scandunt arbores ad pedum decem altitudinem. Stipulæ cordatae, magnæ, conniventes, solitariae adstant axillis. Folia sunt cordato-acuminata, integerrima, plana, utrinque glabra, subtus reticulato-venosa; petiolo tereti, pubescente, brevi. Pedunculi uniflori, axillares, solitarii, petiolo nunc sunt breviores, nunc longiores. Flos ex viridi flavescit; striis & venis notatur purpureis; corollæ labello lanceolato-acuminato, postice in canalem conniventi. Capsulæ sunt hexagonæ & subfuscæ. Succus radicis, masticatione salivæ immixtus, ori serpentis mediocris ad guttam unam alteramve instillatus, adeo hoc animal inebriat hebetatque, ut tuto ac impune tractari, laceSSI, sinuque imponi possit, post horas aliquot tandem ad se redditum. Si guttas deglutire plures cogatur, illico correptus motu convulsivo tremulo valdeque per totum corpus conspicuo, brevi emoritur. Americani circumforanei, hujus arcani participes, serpentem aliquem veneno lethali celebrem manu capiunt, caute scilicet unoque impetu prehenso prope maxillas collo; qua in re ipse, his animalibus jam magis consuetus, nec difficultatem magnam nec periculum inveni, si prudentia adhibeat. Tunc diducto ori salivam, hujus similive facultate pollutis plantæ succo imprægnatam, infundunt dosi, qua leviter hebetent ani-

mal; atque ita quæstus gratia spectatoribus exponunt; falso jastantes, posse se corpus suum cuicunque obvio serpenti, arte sibi cognita, absque periculo noxæ offerre mordendum. Fateor, vel ab odore hujus radicis abhorrescere hæc animalia, longeque fugere oblatam: at vero infelix, opinor, obtineret audaciæ præmium, qui utcumque inunctam hoc succo mauum serpenti obtruderet lacesito. Impune homini deglutiuntur succi guttulæ aliquot; credo tamen propter nauseam, quam ipse sensi, majore assumptum copia emesin producere posse, vel alias noceare. Fertur etiam vulneri a serpente recens inflito, impositus externe; vel & interne pariter assumptus, medeti, omneque adeo tollere venenum. Ter ita se curatum asseruit is, qui secretum detexit mihi Indus; sed quum ipse ego experimenti nullius testis fuerim, fidem penes auctorem relinquo. Ab incolis, quibus cognita nomine tenus dumtaxat planta est, vocatur *Contracapitan*.

Crescit passim Carthaginæ in fruticetis. Floret Augusto & Septembri.

2. ARISTOLOCHIA (*caudata*) foliis cordatis, obtusissimis, paginis in basi ad petiolum incurvatis; caule volubili. *Linn. syst. 686.*

(*Pl. americ. piæt. Tab. 221. Ramus florens. Fructus, & semen*).

Planta inferne fruticosa, tota odore leviter nauseoso atque ingrato prædita, caulis volubilibus, teretibus, glabrisque arbusta scandit ad decem altitudinem pedum. Folia habet cordata, obtusissima, emarginata, glabra, petiolata, alterna, paginis ad basin utrinque productis in lobos mutuo incumbentes. Pedunculi sunt uniflori, axillares, solitarii. Flores ex albo virescunt, lineis subfuscis externe striati; tubo interne fusco: labello abeunte ex apice fere plano in mucronem longissimum, tenuem, obtusum, fuscum, apiceque crassiusculum; limbo maculis fuscis variegato. Capsula hexagona figura & magnitudine convenit cum fructibus Aristolochiarum bilobatae, peltatae, & anguicidæ.

Crescit in Domingo passim in collibus fruticosis circa Cap François. Florentem inveni Decembri.

3. ARISTOLOCHIA (*peltata*) foliis reniformibus, subpeltatis; caule volubili. *Linn. syst. 686.*

(Pl. americ. pict. Tab. 222. *Ramus florens*).

Aristolochia asari folio umbilicato, flore longissimo, radice repente. *Plum. ic. 32, f. 2.*

Odorem tota spirat nauseosum. Radix lignosa suberosaque perennat. Caules sunt teretes, volubiles, juniores virentes & herbacei. Folia reniformia, vix peltata, venosa, saturate virentia, breviter petiolata, alterna. Ex alis prodeunt pedunculi solitarii, uniflori, petiolorumque plus minus longitudine. Flores tripollicares & hexandri ex basi globosa & fulcata in tubum abeunt cylindricum coloris flavi cum adspersis punctis rufis, qui deinde in limbum expanditur longissimum, interne fuscum, foris cinereum punctisque rufis variegatum, apice autem dilatatum obtusum flavum & pilis ferrugineis longisque hirsutum. Capsula succedit oblonga, fuscescens, vix pollicaris, seminibus cordiformibus planisque foeta.

Crescit passim in Domingo circa Cap François in montosis fruticosis. Vidi florentem Decembri.

4. **ARISTOLOCHIA (*maxima*)** foliis oblongis, acuminatis; caule volubili; pedunculis multifloris. *Linn. syst. 686.*

(Pl. americ. pict. Tab. 223. *Ramus florens. Capsula, & semen*).

Tota planta leviter est odorata. Radix teres, ramosa, primaria diametro sesquipolllicari, vestitur cortice fusco rimosoque, succo autem scatet aurantio. Caules versus radicem suberosi & fruticosi, cæterum teretes, & volubiles, arbores scandunt ad triginta pedum altitudinem, hinc sœpe iterum penduli. Folia sunt oblonga, acuminata, nitida, integerrima, subtus reticulato-venosa, alterna, petiolata, sœpe vel pedalia. Pedunculi axillares, solitarii, plerumque biflori vel triflori, rarius uniflori vel quadriflori. Ad basin cujusque floris bractea stat lanceolata. Flores sunt atropurpurei, maximi, labello simplici ovato. Capsulæ omnium maximæ patent, dependentque, jucundo spectaculo corbulas mentitæ e viminiibus contextas. Vocatur *Capitan*.

Crescit in sylvis Carthageneribus, in cacumine montis de la Popa, in insula Tierra bomba. Floret præcipue Octobri.

5. **ARISTOLOCHIA (*pentandra*)** foliis cordatis, hastatae

subtrilobis; caule volubili; bractea cordata, amplexante. Linn. syst. 686.

(Pl. americ. pict. Tab. 224. *Ramus florens.*)

Planta volubilis, glabra, frutices vicinos ad octo pedes scandit. Folia habet subtrilobo-cordata, obtusiuscula, glabra, integra, petiolata, alterna. Pedunculi uniflori, axillares, solitarii, petioloque breviores, ornantur in apice bractea cordata; in qua sessilis flos locatur externe virescens, interne fuscus. Omnes hi sunt pentandri, stigmate quinquepartito. Capsula est quinquangularis & quinquelocularis.

Crescit in sylvis circa Havanam. Vidi Januario florentem.

I. PISTIA (*Stratiotes*). Linn. syst. 687.

(Pl. A. P. Tab. 225. *Tota planta florens. Fructus; & flor austus ad lentem.*)

Pistia aquatica villosa, foliis obovatis ab imo venosis, floribus sparsis, foliis insidentibus. Brown. jam. I, p. 329.

Lenticula palustris sexta seu ægyptia, sive *Stratiotes aquatica*, foliis sedo majore latioribus. Sloan. hist. jam. I, p. 15, t. 2, f. 2.

Plantago aquatica. Rumph. 6, p. 177, t. 74, f. 2.

Kodda-pail. Rheed. mal. II, t. 63, t. 32.

Kodda-pail palustris, folio oblongo specioso. Plum. gen. 30.

CAL. nullus.

COR. monopetala, inæqualis, ereta, externe villosa, persistens. Tubus oblongus, brevis, germen arcte amplietans; abiens in labium unicum, cordato-subrotundum, ampliatum, acutum, integrum, patens, in medio utrinque plica laterali introrsum procedente coarctatum.

STAM. Filamentum teres, crassum, obtusum, fere perpendiculariter ortum e centro labii corollæ, pistillo altius & transversim imminens; ornatum in insertionis loco bractea circulari & integra, quæ inferne utrinque augetur fimbria dependente & latitudine antherarum. Antheræ sex septem octove, globosæ, in orbem insidentes margini filamenti ad apicem.

PIST. Germen subovatum, tubo corollæ duplo longius, adnatum dorso petali per lineam longitudinalem incrassatam pergentemque ad originem usque filamenti. Sty-

Ius crassus, erectus, stamine brevior. Stigma subpetatum, obtusum.

PER. Capsula ovata, compressa, instructa stylo, unilocularis.

SEM. plurima, oblonga, apice depressa, punctoque umbilicato notata, situ horizontali affixa dorso capsulæ in linea longitudinali concretionis ejusdem cum corolla.

Planta acaulis, natans, elegans. Radices plurime & sesquipedales in ambitu emittunt radiculas simplices, sesquipollicares, numerosas, & Ranunculi aquatici haud male referentes folia. Radiculæ aliæ capillares, breviores, & refertæ, ad basin foliorum, radicumque principium originem, egrediuntur. Folia pro ætate plantæ magnitudine numeroque varia, in jam adolescente circiter vicena, in circulum diametri pedalis expanduntur. Sunt vero illa obverse ovata, basi attenuata, ut plurimum integrerima, quandoque emarginata, sessilia, patula, basi lanuginosa, inter nervos facieque villosa, crassa, spongiosa, parum succulenta, adeoque natationi aptissima: in dorso autem ex area crassiore maxima subovataque nervos protendunt adscendentes, crassissimos, valdeque prominulos. Flores albantes, inodori, axillares, solitarii, & erecti, brevi pedunculo instruuntur. Corolla plus minus marcescit, ac increscente germine disrumpitur. Capsulas vere maturas forte non inveni; nec igitur determinare, nec ex inspectione sèpius repetita capsulæ conjicerem valui, dehiscatne tandem, nec ne? Videtur Browneus pericarpii descriptionem suam esse a Linnæo mutuatus; vix enim in simili ludere varietate natura deprehenditur. Moveri dubium haud immerito potest, ad quemnam oporteat classem in Systemate sexuali referri hanc plantam? Certe, nisi linea crassa illa, quæ a basi germinis ad filamentum usque per dorsum corollæ percurrendo ambas hasce partes connectat, stylus dicatur, ita ut hujus propagatio habeatur filamentum a me dictum, neutiquam gynandra erit vocanda. Illud vero negat veri styli, recta e germine orti, apiceque aperi, præsentia evidens; tum apex filamenti imperforatus, & situs partium. Nusquam etiam, quoad observando didici, pollini antherarum vel potius ejusdem auræ fœcundanti per stylos via patet ad seminum basin, qua affiguntur receptaculis, quæ quidem posito

gynandriæ casu hic fieri deberet; sed in ipsa ubique ducit penetratque loculamenta. Esset igitur Monadelphas inter forte collocanda. Porro planta hæc ex alis foliorum gignit stolones paucos teretes, novempollicares, & digitum auricularem crassos; e quorum extremitate nova planta progerminat: unde fit, ut sensim ex una parente sibolis numerosæ sylva aquis supernatet. Animadvertisse se, dicit celeberrimus Adansonius in sua Senegaliæ descriptione, radicem primariam ripis fortiter infigi. Ego vero in hanc rem neglexi inquirere: optime tamen memini, aliquoties ex aquis Pistiam tollentem, nullum adeo me sensisse renixum. An forte vera quidem, at non perpetua est hæc radicis cum ripa communicatio? Anne potius tenella adhuc plantula, a ripis casu avulsa, dein libera in aquis crescere pergit? Hæ plantæ numero ingenti post primos copiosos imbres per flumina vicina in mare abreptæ, post unum alterumve diem, maris secutæ fluxum, ad littora oppidi Cap Français denuo appellunt.

Crescit in aquis stagnantibus, & in amfractuosis quiescere fluminum locis: in Cuba, Domingo, & vicina Continente.

DECANDRIA.

I. HELICTERES (*jamaicensis*) foliis cordatis, serratis; floribus decandris; fructu integre contorto.

(*Pl. americ. pict. Tab. 226. Ramus florens. Dein capsula solitaria, semen, fructus integer, petala duo, calyx dissectus, tum aucta genitalium tota compages, & auctum stamen.*)

Helicteres villosa & *fruticosa*; foliis cordato-acuminatis serratis. *Brown. jam. I, p. 330.*

Helicteres arbor Indiæ occidentalis, fructu majore. *Plsk. alm. 182, t. 245, f. 3.*

Abutilo affinis arbor, altheæ folio, cuius fructus est stylis apex acutus, quatuor seu quinque siliquis hirsutis, funis adinstar in spiram convolutis. *Sloan hist. jam. I, p. 22.*

Arbuscula erecta, parum ramosa, duodecim pedes alta. Kami juniores, pedunculi, calyces, & folia sunt clementosa. Folia sunt petiolata, alterna, cordata, acuta, ser-

serrata. Stipulæ geminæ, setaceæ. Pedunculi multiflori, terminales, glandulosi. Calyx subcampanulatus, inæqualiter quinquedentatus. Petala quinque, albida, oblonga, obtusa, reflexa. Germen quinquesulcatum longissimo pedicello extra florem insidens, foliolis quinque propriis calyculatus. Stylus subulatus. Filamenta decem erectaque oriuntur extra calycem germinis, quod antheris transversis luteis & oblongis totum tegitur. Capsulæ quinque uniloculares & in fructum ovatum spiraliter intortæ, quarum ipsi apices gyrum sequuntur integrum, absolvuntque, venti intuntur tomento denso, quod tollere venti pluviaeque tandem solent, quum diu in arbore persistunt. Semina angulata sunt & ovata.

Crescit copiose in sylvaticis Jamaicæ.

2. HELICTERES (*baruensis*) foliis cordatis, serratis; floribus decandris; fructu contorto, apicibus erectis. Linn. syst. 688.

(Pl. americ. pict. Tab. 227. *Ramus florens. Tum fructus*).

CAI. Perianthium monophyllum, oblongum, tubulosum, leviter compressum, quinquesulcatum, tomentosum, coriaceum, in fundo notatum fovea impressa campanulata & quinquedentata, limbo bilabiato, marcescens. Labium superius lanceolatum, acuminatum, erectum, semibifidum. Labium inferius semiovatum, concavum, acuminatum, patens, semitrifidum.

COR. Petala quinque, calycem superantia; unguibus tenuibus, erectis, longitudine calycis; bracteis linearibus, obtusis, basi utrinque appendicula auctis, intortis, utrinque inter labia calycis omnimode reflexis, longitudine fere unguis.

Nectarii foliola quinque, calyciformia, linearia, apice latiuscula, acuta, erecta, longitudine germinis, ad cuius basin orta, ejusdemque fulcis incumbentia, decidua.

STAM. Filamenta decem, capillaria, erecta, germine breviora, posita extra nectarium. Antheræ lineares, spirali-erectæ, media sui parte fulco transverso notatæ, ibidemque filamentis affixæ, maximæ, germen totum obtegentes.

PIST. Germen ovatum, quinquesulcatum, insidens receptaculo filiformi recurvo omniumque longissimo. Stylus

subulatus, erectus, germine duplo longior. Stigma quinquefido-obtusum.

PER. Capsulae quinque, oblongae, acuminatae, spiraliter contortae, apicibus erectis, uniloculares, univalves, interne dehiscentes.

SEM. plurima, ovata, angulata.

Arbuscula erecta, duodecimpedalis, parum ramosa; ramis junioribus, pedunculis, & petiolis tomentosis. Folia sunt subrotundo-cordata, vel cordata simpliciter, acuta, serrata, rugosa, subtus tomentosa & albicantia, facie subpilosa, petiolata, alterna, quotannis decidua. Stipulae subulatae. Pedunculi multiflori, terminales, crassi. Propriis circumstant glandulae virides, depresso-magnae, numero inconstanti; quum exsiccantur, atrae. Flores in odori calycem habent e flavo virentem, fovea albicante, labiis quandoque integris aut vix divisis; petala albida; antheras quasi e binis conflatas, luteas, nectarium germe filamentaque prorsum occultantes. Capsularum apices in hac specie semper eriguntur. Cortex trunci ramorumque principalium, utpote lentissimus facilisque detractu, ab incolis adhibetur ad vinciendum funium loco. Arbuscula nomen est *Majagua de playa* seu *Majagua littoralis*.

Crescit in littoribus sylvaticis maritimis insulae Baru. Floret Junio.

3. HELICTERES (*carthagrenensis*) foliis cordatis, serratis; floribus polyandris; fructu oblongo, recto. *Linn. syst. 688.*

(*Pl. americ. pict. Tab. 228. Ramus aphyllus florens. Fructus.*)

CAL. Perianthium monophyllum, oblongo-campanulatum, inflatum, coriaceum, globulis tomentosis densis extre- ne adspersum, in fundo notatum fovea impressa cam- panulata, & quinquedentata, apice quinquefidum, mar- cescens: laciniis parvis, semiovatis, acutis, patulis, unica incisura reliquis duplo profundiore.

COR. Petala quinque, oblonga, obtusa, concava, erecta, inferne sensim attenuata in unguem augustum conca- vum & longissimum, ad cujus initium lateribus fimbria- tis ornantur, paulo longiora calyce, ejusdemque funda inferta.

Nectarium monophyllum, calyciforme, oblongum,

semiquinquefidum, acuminatum, erectum, longitudine fere germinis, ad cuius basin ortum, deciduum.

STAM. Filamenta numerosissima, capillaria, longitudine germinis, orta in superiore parte tubi nectarii, unde foras quaquavorsum egressa germen cum nectario obtengunt. Antheræ reniformes, magnæ.

PIST. Germen ovatum, quinquesulcatum, insidens receptaculo filiformi longissimo incumbenti incisuræ calycis profundiori, longitudine nectarii, intra quod positum. Stylus subulatus, erectus, germine longior. Stigma bifidum, acutum, parvum, patens.

PER. Capsulæ quinque, oblongæ, acuminatæ, subquadragulares, basi leviter connatæ, superne liberæ, erectæ, uniloculares, univalves, interne dehiscentes.

SEM. plurima, oblonga, angulata.

Arbuscula duodecimpedalis, erecta. Folia utrinque tomentosa. Flores fœtidissimi, interdum prodeuntes ante folia, saepius una cum iisdem; calyce e fusco luteo; petalis purpureis. Habitu reliquo ita similis est præcedenti, ut, præterquam in flore & fructu, ægre distingui queant.

Crescit passim Carthaginæ in sylvaticis. Floret Junio & Julio.

4. HELICTERES (apetala) foliis quinquelobis: floribus dodecandris, apetalis. *Linn. syst. 688.*

(*Pl. americ. pict. Tab. 263, fig. 74. Flos.*)

an Macpalgchochi Quahuitl. *Hern. mex. p. 383 & 459?*

CAL. Perianthium monophyllum, campanulatum, amplissimum, patens, coloratum, externe villosum, semiquinquefidum: laciniis semiovatis, acutis, planis, semireflexis.

COR. nulla.

STAM. Filamenta circiter quatuordecim, subulata, brevissima, ad basin germinis receptaculo inserta Antheræ subrotundæ, didymæ, incumbentes.

PIST. Germen subrotundum, quinquesulcatum, insidens receptaculo filiformi recurvo calyce fere duplo breviori: Stylus subulatus, reflexus, longitudine germinis. Stigma capitatum, obsolete quinquefidum.

PER. & SEM.

Arbor elegans, quadraginta pedes alta, coma am-

plissima concinnaque spectabilis. Folia habet frondosa, plicata, semiquinqueloba, facie glabra, dorso subvillosa, diametri plus quam pedalis, numerosa; lobis ovato-subrotundis, acutis, integerimis: petiolis teretibus, novempollicaribus. Paniculae laxae, magnae, plurimae circa extremitates ramuscotorum prodeunt. Flores fætidissimi & numerosi sordide flavescunt cum maculis purpureis; in quibus petala & nectarium absunt perpetuo. In his ad oculum patet, filamenta esse dumtaxat continuationem divisam corticis seu partis exterioris receptaculi; germen vero enasci ex prolongata mutataque ejusdem medulla. Fructum examinare haud contigit. Majo & Junio has arbores floribus inveni onustas; quos diu permanentes, omnes tandem ante Octobrim decidisse vidi, doluque; nullo fructus rudimento relicto vel minimo, ex quo de hujus natura judicare licuisset. Siccitatem, opinor, fuisse in causa, quæ Carthagenaæ isto anno more solito diutius protrahebatur. Aderant semper flores plurimi, in quibus omnino deficiebat stylus, stigmate quinquefido majorique immediate germen coronante; at hi abortabant ilico. Incolis appellatur *Camajonduro*.

Crescit Carthagenaæ in sylvis, atque in ipso passum suburbio Xiximani.

POLYANDRIA.

I. ARUM (*Seguine*) caulescens, suberectum; foliis lanceolato-ovatis. Linn. syst. 690.

(Pl. A. P. Tab. 229. *Pars caulis florentis*).

Arum caule erecto, geniculato, inferne nudo; foliis majoribus oblongo-ovatis. Brown. jam. I, p. 331.

Arum caulescens; Cannæ indicæ foliis. Plum. amer. 45, t. 51, f. h. & t. 59.

CAL. Spatha monophylla, maxima, lanceolato-oblonga, acuta, basi leviter convoluta, patens, apice reflexa. Spadix longitudine spathæ, superne teres, ad basin compressus, incurvus, fere ad dimidiam sui partem dorso spathæ accretus, marcescens supra germina.

COR. nulla.

STAM. Filamenta nulla. Antheræ circiter decem, acetæ circa unumquodque nectarium.

Nectaria numerosa, quadrato-subrotunda, depressa,
fere totum spadicis a spatha liberi ambitum stipantia
PIST. Germina plura, totum latus anticum spadicis infe-
rioris laxe tegentia, subglobosa, didyma. Styli nulli.
Stigmata villosa.

Glandulae nectaræ circa unumquodque germen plexum-
que quatuor, sæpe sex, rarius quinque, oblongæ, te-
retes, obtusæ, patentissimæ, fere longitudine germinis.
PER. Spatha tota stricte convoluta,
SEM.

Planta perennis, sexpedalis. Folia sunt ovato-lan-
ceolata, acuta, integerrima, nitida, subtus nervis paral-
lelis & adscendentibus notata, interdum vel sesquipedala-
lia; petiolo amplexicauli, canaliculato, inferiora versus
paulatim latescente, superne marginato. Hæc in extre-
mitate tantum habentur, decidentibus successive seniori-
bus: unde caulis enascitur pollicem diametro æquans, ci-
catricibus semicircularibus albentibus variegatus, basi pro-
cumbens, cæterum erectus. Spadix est axillaris & foliis
brevior. Fructum maturum non vidi. Tota planta suc-
co scatet venenato, acerrimo, ipsamque cutim teneriorem
inflammante; unde, si vera narrat Piso, credere nequeo,
esse hanc eandem cum sua Aninga. Viciniam quoque
odore inficit teterrimo. Gallis Seguine dicitur; adhibe-
turque caulis in frustula transversim sectus ad confectionem
lixivii illius acerrimi, quo in succi saccharini depuratione
utuntur.

Crescit in Caribæarum humidis prætensibus,
2. ARUM (*hederaceum*) caulescens, radicans; foliis ob-
longo-cordatis, acuminatis; petiolis teretibus. Linn.
synt. 690.

(*Pl. americ. pist. Tab. 230. Ramulus foliosus. Fructus.*)
Colocasia hederacea sterilis minor, folio cordato. Plnm.
amer. 39, t. 51, f. d. & tab. 55.

CAL. Spatha monophylla, maxima, ovata, acuta, crassa,
basi interne colorata,

Spadix simplicissimus, teres, erectus, longitudine
fere spathæ, cujus dorso ad basin leviter adcrevit, supra
germina marcescens.

COR. nulla.

STAM. Filamenta nulla. Antheræ . . .

Nectaria numerosa, depressa, totam dimidiā superiorem spadicis partem occupantia.

PIST. Germina plurima, basin spadicis dense vestientia, collocata infra stamina. Styli angulati, crassi, erecti, solitarii. Sigmata capitata, depressa, maxima, bifida trifida vel quadrifida.

PER. Baccæ totidem, oblongæ, obtusæ, apice paulo craf- fiores, a vicinis comprimentibus inæqualiter tetragonæ, vel pentagonæ, quadriloculares. Spatha tota stricte convoluta.

SEM in quolibet loculamento bina, ovalia, utrinque obtusa.

Planta hæc fruticosa & late sese diffundens arboribus parasitica innascitur, quas ad cacumina usque scandit. Dispescitur in caules teretes, pollicem circiter crassos, glabros, & cinereos, qui radiculis teretibus emissis ramos ampliantur, ac transversim dissesti succum per punctula exstillant aurantium & odoris ingrati. Folia sunt cordato-acuminata, nitida, subcoriacea, integerrima, alterna, quotannis decidua, in ramulis junioribus: petiolo tereti, fere longitudine foliorum. Floris descriptionem ex emarcido desumpsi, in quo propter aquæ commorantis in spatha inclusæque præsentiam putruerant stamina: unde character evasit incompletus. Odor autem spadicis superne putrescentis est singularis, vinosus, ingratissimus, manuque inficiens tenacissime. Fructus omnes simul ovum galinaceum figura atque magnitudine æquant.

Crescit Carthagena in sylvis montosis. Floret, opinor, Augusto

I. POTHOS (*acaulis*) foliis lanceolatis, integerrimis, ener- viis. Linn. syst. 691.

(Pl. americ. pict. Tab. 231. *Tota planta florens*).

Arum foliis rigidis angustis & acuminatis. Plum. amer. 47, t. 62? & t. 51, f. *innominata supra f. i.*

CAL. Spatha monophylla, linear-lanceolata, acuta, pla- na, subcoriacea, tota retrorsum flexa.

Spadix simplicissimus, subulatus, teres, obtusus, erectus, spatha paulo longior, totus tectus fructifica- tionibus hermaphroditicis.

Perianthium nullum, nisi corollam velis.

COR. Petala quatuor, oblonga, fornicata, dorso acute angulata, apice depressa, simul corollam quadratam formantia.

STAM. Filamenta quatuor, subovata, concava, erecta, petalorum longitudine, ad quorum basin orta. Antherae in quolibet filamento geminæ, ovatae, erectæ, ad latus altera alterius positæ.

PIST. Germen oblongum, quadrangulare, fere longitudine corollæ. Stylus nullus. Stigma simplex, in centro apicis depressi germinis.

PER. Baccæ totidem, oblongæ, apice attenuatae, quadrangulares,

SEM.

Planta acaulis, perennis, parasitica arborum, habitu Aloën refert. Folia habet cuneiformi-lanceolata, acuminate, integerrima, glabra, brevi petiolo donata, coriacea, subrigida, numerosa, radicalia, sesquipedalia & longiora. Scapi sunt axillares, teretes, & pedales. Fructum maturum non vidi. Incolis a spadicis florigeri similitudine audit *Queuë de rat* sive *Cauda gliris*.

Crescit in sylvis vastis montosis Martinicæ.

M O N O E C I A.

MONANDRIA.

i. **E LATERIUM** (*carthaginense*) foliis cordatis, angustatis. *Linn. syst. 701.*

(*Pl. americ. piſt. Tab. 232. Ramus cum floribus, fructu integro, eodemque jam disploso*).

* *Mas.*

CAL. nullus.

COR. monopetala, hypocrateriformis. Tubus cylindricus, basi retusus, erectus. Limbus quinquefidus, lacinias lanceolatis, acutis, patentissimis, longitudine tubi, lateribus retrorsum conniventibus, hinc dorso canaliculatis; incisuris denticulo instructis.

STAM. Filamentum unicum, columnare, erectum: tubo corollæ paulo brevius. Anthera est linea continua,

quinquies longitudinaliter adscendens, totiesque descendens, in parte superiore filamenti, farinifera.

* Fæmina.

CAL. nullus.

COR. ut in mare, germini imposita, decidua.

PIST. Germen subrotundum, leviter incurvum, undique setis molibus obvallatum, inferum. Stylus columnaris, superne crassescens, erectus, tubo corollæ brevior. Stigma teres, basi retusum, apice convexum, capitatum, magnum.

PER. Capsula coriacea, reniformis, compressula, dorso plana, setis molibus undique armata, unilocularis, bivalvis, elastice dissiliens.

SEM. plura, angulato-ovata, plana, imbricatim receptaculo affixa, in carne aquosa.

Planta forte annua; caulis teretibus, glabris, herbaceis, diffusis, scandentibus; cirrhis bifidis & lateribus. Folia habet cordata, angulata, tenuissime ferrata, subitus glabra, facie scabriuscula, petiolata, alterna, numerosa. Pedunculi masculorum communes sunt multiflori, axillares, solitarii, patentes, fere longitudine foliorum, racemosi, vel subumbellati. Pedunculus fæmineus oritur ex eadem axilla solitarius, uniflorus, & brevis. Flores candidi, interdiu inodori, noctu sunt suaveolentes. Fructus viridis sesquipollicem longitudine æquat; carnem continet paucam aqueam & cucumerini odoris; maturus ad tactum levissimum summa vi dissilit, seminaque dispergit; maturitati tantummodo propior, manu clausa aliquamdiu si contineatur, impetu dehiscit simili. Valvula altera componitur ex lateribus totis atque anteriore fructus parte; estque hinc subrotundo-biloba, sive numeri arabici octavi notam figura sua exprimit. Dorsum capsulae constituit alteram, quæ itaque est oblonga. Hæc interne ad apicem augetur appendice lanceolata, summe elastica, instructaque denticulis circiter octodecim, quibus totidem semina adhaerunt subfuscæ. Boerhavii Elaterium quum sit Momordicæ species, posse hoc nomen ad plantam hanc distinctissimam apte transferri, judicavi In Caldariis Vienensisibus lætæ vegetavit, fructumque tulit; sed capsularum non animadversa displosio hortulanum incautum seorsim frestravit.

Crescit Carthaginæ in cacumine montis de la Popa,
ubi caulis suis fruticeta sœpe tota obtegit. Floret Octo-
bri & Novembri; brevique maturescunt fructus.

DIANDRIA.

I. ANGURIA (*pedata*) foliis ternatis, pedatis, ferratis.
Linn. syst. 701.

(Pl. americ. piæ Tab. 233. *Ramulus faemina florens. Tum idem mas. Fructus*).

Anguria polyphyllos, parvo fructu. *Plum. sp. 3, ic. 23.*
Cucumis triphyllos, fructu variegato. *Plum. amer. 85,*
t. 99.

* Mas.

CAL. Perianthium monophyllum, oblongum, basi ventri-
cosum, quinquefidum: laciniis lanceolatis, acuminatis,
patentibus, brevibus.

COR. Petala quinque, obverse ovata, obtusa, plana, pa-
tentissima, calycis limbo adnata.

STAM. Filamenta duo, brevissima, opposita, affixa supe-
riori parti ventris perianthii. Anthera in singulis lan-
ceolata, acuminata, ex linea semel sursum deorsumque
repente & farinifera.

* Fœmina.

CAL. ut in mare, germini insidens, deciduus.

COR. ut in mare.

STAM. Filamenta duo, acuminata, opposita, brevissima,
adnata parti superiori calycis. Antheræ nulla.

PIST. Germen oblongum, teres, fere longitudine corollæ,
inferum. Stylus crassus, teres, erexitus, semibifidus.
Stigmata bifida, acuta, longitudine calycis.

PER. Pomum oblongum, leviter compressum, obtuse acu-
minatum, quadriloculare. Dissepimentum membrana-
ceum, tenue.

SEM. plurima, ovalia, compressa, nidulantia.

Planta perennis, cirrhis longis ad viginti sœpe alti-
tudinem pedum arbores scandit: caulis senioribus li-
gnosis, fruticosis, aphyllis, longisque; junioribus tere-
tibus, lenti, glabris, & foliosis. Folia sunt ternata,
dentato-ferrata, acuminata, nitida, petiolata, alterna;
foliolis lanceolatis petiolatis; lateralibus paulo breviori-

bus & s^epe difformibus. Pedunculi masculorum racemosi, foliis longiores; f^eminarum uniflori, teretes, glabri, axillares, plerumque bini. Flores inodori, petalis aurantiis. Poma pollicaria, digitⁱ medii crassitie, virentia cum striis longitudinalibus albidis, nitida. Semina albescunt. Plumierus in descriptione plantarum Americanarum iconem exhibuit, in qua jungit ex eadem axilla cum f^eminis mares. Hoc utrum eveniat interdum, ignoro. Ego semper in alia planta hos, in distincta alia solas illas offendit; etiamsi non perfunditorie quæsiverim. Commotus tamen magna, quam habet cum Cucumerinis, analogia: inde etiam suspicatus, utut ego observaverim, posse tam monœcos flores dari, in Monœcia collocavi; nomenque a Plumiero impositum servavi. Videtur clarissimus Burmannus in iconē Plumieri radicem inversam pro fructu habuisse.

Crescit in Domingo in fruticosis & sylvaticis. Floret Septembri. Maturos fructus collegi Decembri.

2. ANGURIA (*trilobata*) foliis trilobis. *Linn. syst. 701.*
(*Pl. americ. pⁱst. Tab. 234. Ramulus mas florens. Calyx*

dissectus cum antheris & unico petalo).

Anguria fructu parvo, folio tricuspidato. *Plum. amer. 3,*
ic. 22.

Marem hujus dumtaxat examinare contigit, qui cum præcedentis mare perfecte congruit, petalis tamen magis rotundis. In paucis plantis, quas vidi, f^eminæ vestigium erat nullum. Planta est nitidissima, habitu prioris. Folia gerit alterna, magna, triloba: lobis oblongis, acuminatis, planis, integris quidem, at simul denticulis rariis in margine instructis; quorum exteriores plerique augentur lobulo obtuso cum denticulo terminali. Cirrhi longitudine folia æquant. Pedunculi masculorum ex axillis solitarii exeunt, longi, & apice gerunt flores subaggregatos sessiles, inodoros, pulchros, corollis miniatis, circiter viginti, in explicatione sensim mutuo succedentes.

Crescit Carthaginæ in sylvis montis de la Popa. Vidi florentem Junio.

TRIANDRIA.

i. AXYRIS (*pentandra*) foliis ferrato-dentatis; floribus masculis pentandris.

(Pl. americ. pict. Tab. 235. *Ramulus florens. Dein fructus, hujus valvula una ab interna parte visa, semen; dein aucta fructus & semen).*

* Mas.

CAL. Perianthium monophyllum, profunde quinquedentatum: laciñiis subrotundis, concavis, patentibus.

COR. nulla.

STAM. Filamenta quinque, subulata, patula, longitudine calycis. Antheræ subrotundæ, didymæ.

* Fœmina.

CAL. Perianthium monophyllum, persistens. Tubus subrotundus, externe apophysibus inæqualis. Limbus bifidus: laciñiis ovatis, planis, acutis, suberectis, longitudine tubi.

COR. nulla.

PIST. Germen subrotundum, compressum, minimum. Stylus profunde bifidus, capillaris, patulus, longitudine tubi. Stigmata simplicia, acuta.

PER. nullum. Calyx induratus, hinc multicornis, semen in sinu fovet.

SEM. unicum, subrotundum, compressum, emarginatum, nitidum.

Planta sesquipedalis, forte annua vel biennis. Caules subteretes, ramosi, ad radicem sublignosi, procumbenti-erecti. Folia ovalia, utrinque acuta, ferrato-dentata, lateribus reflexis, facie subpinguis, dorso testa tomento pruinæ simili, glauca, petiolata, alterna, numerosa, pollicem raro excedentia. Flores masculi exigui, glauci, sessiles, colliguntur in capitulum parvum subrotundum & terminale. Antheræ sunt flavæ. Fœminæ sunt glaucæ, exiguae, sessiles, axillares, plures. Masculis ab extremitate ramusculi delapsis, ultra pergit hic elongari, & novos promere utriusque sexus flores; unde tota planta referta conspicitur seminibus per gradus maturitati vicinis. Tota planta inodora est, at sapore prædicta valde falso. Reduxeram antea hanc plantam ad Spinaciam; quacum & cum Atriplice plura habet communia. Axy-

vis tamen melius sibi illam vindicat propter habitum consimilem.

Crescit in littoribus maritimis Cubæ.

I. TRAGIA (*hexandra*) floribus hexandris.

(Pl. americ. pict. Tab. 263, fig. 75. *Folium*).

* Mas.

CAL. Perianthium tetraphyllum: foliolis oblongis, acutis, planis, reflexis.

COR. nulla.

STAM. Filamenta sex, subulata, erecta, apicibus extorsum recurvis, longitudine calycis; quorum exteriora quatuor paulo breviora duobus interioribus. Antheræ in quolibet filamento binæ, parvæ.

* Fæmina.

PIST. Stylus vix ullus. Reliqua omnia, ut in charactere Linnæano.

Planta fruticosa, sexpedalis. Caules teretes, lenti, lignosi, volubiles, ad ortum cujusque petiolæ armantur aculeis subulatis & geminis. Folia sunt oblonga, obtusa cum acumine, dentata, glabra, margine facieque adspersa pilis rigidis urentibus, petiolata, alterna. Pedunculi racemosi, breves, terminales, masculorum & fæminarum in ejusdem plantæ ramulis distinctis. Fructus setis urentibus teguntur. Ad Tragiam hanc stirpem retuli; neque enim mihi videtur partium in maribus diversus a charactere Linnæano numerus, ubi reliqua ipseque adeo habitus tantopere convenient, diversum posse genus constitueret.

Crescit Havanæ in sylvis.

I. HERNANDIA (*sonora*) foliis peltatis. Linn. syst. 707.
Hort. cliff. t. 23.

Hernandia amplio hederæ folio umbilicato. Plum. gen. 6.
Hernandia arborea, foliis cordato-peltatis, capsula tenui aperta. Brown. jam. I, p. 373.

Nux vesicaria oleosa, foliis umbilicatis. Pluk. alm. 266, t. 208, f. I.

* Masculi flores pedunculati in eadem umbellula bini.

CAL. Involucrum umbellulæ tetraphyllum, petalis exterioribus concolor, deciduum: foliolis subovatis, obtusis, patentissimis.

Perianthium proprium nullum.

COR. Petala sex, subovata, obtusa, concava, patentia; quorum tria interiora & angustiora.

Glandulæ nectareæ sex, teretes, capitatae, obtuse, erectæ, staminibus duplo breviores, eademque ambientes.

STAM. Filamenta tria, erecta, superne divaricantia, petalis breviora. Antheræ oblongæ, magnæ.

* Fœmineus flos in eadem umbellula binos inter masculos sessilis unicus.

CAL. Involucrum commune cum masculis.

Perianthium proprium monophyllum, subrotundum, parvum, ore indiviso, persistens, inferum.

COR. Petala octo, germini insidentia, quorum quatuor interiora & angustiora. Cæterum ut in maribus.

Glandulæ nectareæ quatuor, obverse ovatæ, obtuse, germini impositæ, stylum ambientes, eodemque duplo breviores, cum petalis interioribus alternantes.

PIST. Germen oblongum, truncatum, perianthio fere duplo longius. Stylus crassulus, incurvus, corolla brevior. Stigma obliquum, subinfundibuliforme, magnum, margine convexe.

PER. Drupa sicca, ovata, obtusa, octo sulcis exarata, notata puncto umbilicato, sita in medio calyce. Perianthium maximum, inflatum, subrotundum, depresso-lum, succulentum, crassum, nitidum, flavescens; ore parvo, subrotundo, integroque.

SEM. Nux globosa, leviter depressa, unilocularis. Nucleus ejusdem figuræ.

Arbor procera, erecta, comosa, elegans. Racemi paniculati. Flores e flavo pallent. Calyces in fructu flavescunt. Incelis vocatur *Myrobolan*.

Crescit in Martinica ad rivulos & torrentes.

I. BOEHMERIA (*ramiflora*).

(Pl. americ. pist. Tab. 236. Ramus cum floribus fœmineis maribusque).

Caturus ramiflorus. Linn. Syst 739.

* Masculi flores aggregati infra fœmineos.

CAL. nullus.

COR. Petalum tubulosum, semitrifidum: laciniis ovatis, concavis, acutis, patulis.

STAM. Filamenta tria, capillaria, erecta, corollam superantia. Antheræ subrotundæ.

* Fœminei flores aggregati supra masculos.

CAL. nullus; cuius obeunt munus paleæ ovatæ, concavæ, acutæ, erectæ, germinibus intermixtæ.

COR. nulla.

PIST. Germen ovatum. Stylus subulatus, erectus, longissimus. Stigma simplex, acutum.

PER. & SEM. . . .

Arbuscula octopetalis; ramis longis, superne ut plurimum reclinatis. Folia sunt lanceolato-acuminata, falcata, ferrato-dentata, rugosa, venosa, scabra, brevissime petiolata, alterna, propendentia, in extremitatibus ramulorum, magnitudine valde varia. in eodem scilicet ramulo sœpe bipollicaria & pedalia. Flores masculi exigui, flavescentes, numerosi, aggregatim ad distantias ramos obsident aphyllos seniores. Fœminei albantes eodem disponuntur modo in ramulis junioribus ad summates usque. Fructum haud contigit observare. Novam hanc plantam nominavi in honorem viri clarissimi Georgii Rudolphi Boehmeri in Academia Wittenbergensi Anatomiæ & Botanices professoris.

Crescit in Martinica ad ripas fruticosas fluvii Divi Petri. Floret Aprili.

TETRANDRIA.

I. **MORUS (*tinctoria*)** foliis oblongis, hinc productionibus; spinis axillaribus. Linn. syst. 710.

(Pl. americ. piæt. Tab. 263, fig. 76. *Folium*).

Morus, quæ Tata-iba aculeata, fructu villoso. Pl. ic. 204.

Zanthoxylum aculeatum, carpini foliis, americanum, cortice cinereo. Pluk. alm. 396, t. 239, f. 3.

* Masculi flores in amento cylindrico denso longissimo.

CAL. Perianthium quadripartitum: foliolis ovatis, patentissimis, planis, apicibus reflexis.

COR. nulla.

STAM. Filamenta quatuor, subulata, erecta, calyce duplo longiora, unumquodque e quolibet calycis foliolo elastice erigens se in floris explicatione. Antheræ ovales,

didymæ, incumbentes, in filamentorum erectione pollen omne elastice explodentes.

PIST. Germen obverse ovatum, compresso-planum, obtusum, calyce triplo brevius. Stylus nullus. Stigma nullum.

* Fœminei flores in globum collecti in diversa planta.

CAL. Perianthium tetraphyllum, persistens: foliolis obverse ovatis, fornicatis, apice crassulo depressoque, erectis, sibi mutuo incumbentibus.

COR. nulla.

PIST. Germen subrotundum, compresso - planum, longitudine calycis. Stylus unicus, subulatus, erectus longissimus, diu persistens. Stigma simplex, acutum.

PER. nullum. Calyx major, carnosus, succulentus, & connivens semen involvit.

SEM. unicum, ovatum.

Arbor procera, ramosa, & comosa, tota lacte abundat leviter glutinoso & coloris sulphurei. Materies flavescit, & tingendo inservit. Spinæ subulatæ, solitariæ, raræ, axillis incident; at saepè vel in integris ramis desiderantur. Folia sunt ex ovato oblonga, acuminata, serrata, utrinque glabra, venosa, disticha, basi altera breviore, breviter petiolata, magnitudine varia. Masculorum amenta solitaria, pendula, axillaria petiolum inter spinamque, duos tresve pollices æquant. Fœminarum receptacula axillaria, e glauco virentia, & solitaria, brevibus petiolis donantur. Inter flores fœmineos quædam corpuscula observavi paleacea, quæ forte erant flores a vicinis suffocati exsiccatique. Fruetus e viridi flavescunt, dulces sunt, atque avibus amantur. Arbor hæc perpetuo dioica est. Materies in Europam mittitur pro tinturis. Hispanis audit Morita, Bataviis Stokvishoudt.

Crescit Carthaginæ in sylvis vastis, & in insulis Caribbeanis pluribus.

POLYANDRIA.

I. SAGITTARIA (*lancifolia*) foliis lanceolato - ovatis.

Linn. syst. 715.

Sagittaria foliis maximis simplicibus oblongis utrinque

productis; ramulis verticillatis; caule glabro. *Brown. jam. I, p. 345.*

Ranunculus aquaticus, plantaginis folio, flore albo, calyce purpureo. *Plum. amer. 7, ic. 116.*

Folia utrinque acuminata, integrerrima, nitida, cotiacea; petiolis teretibus & longissimis. Spicae foliis pedem unum alterumve sunt longiores. Harum partiales quatuor, intermedia tribus exterioribus longiore. Pedunculi uniflori, terni. Flores petalis albis, calyce subruberante, antheris flavis, floribus Europæ sagittifoliæ duplo maiores. Fructus depresso.

Crescit in aquis stagnantibus Cubæ & Jamaicæ.

MONA DELPHIA.

I. SAPIUM (*aucuparium*).

(*Pl. A. P. Tab. 237. Ramulus florens. Calyx faeminae, tum totus flos faemineus, stamen, flos masculus, fructus semen.*)

Sapium arboreum, foliis ellipticis glabris, petiolis biglandulosis, floribus spicatis. *Brown. jam. I, p. 338.*

Hippomane glandulosa. *Linn. syst. 724.*

Mançanilla lauri foliis oblongis. *Plum. ic. 171, f. 2.*

Tithymalus arbor americana, mali medicæ foliis amplioribus tenuissime crenatis, succo maxime venenofo. *Pluk. alm. 369, t. 229, f. 8.*

* *Mas.*

CAL. *Perianthium monophyllum*, campanulatum, coloratum, semibifidum: laciniis subrotundis, concavis, obtusis, conniventibus.

COR. nulla.

STAM. Filamenta duo, filiformia, basi coalita in unum corpus, patentia, duplo longiora calyce, cujus incisuris incumbunt. Antheræ in singulis filamentis geminæ, oblongæ, apicibus contiguis, utrinque dependentes.

* Fœminæ in eadem spica infra mares.

CAL. *Perianthium monophyllum*, campanulatum, parvum, coloratum, germen arte complectens, margini tridentato.

COR. nulla.

PIST. Germen ovatum, calyce longius. Stylus erectus, brevissimus. Stigma trifidum, acutum, reflexum, maximum.

PER. Capsula subrotunda, obsolete trisulcata, obtusa, trilocularis, trivalvis; valvulis apice bifariam dehiscens-tibus.

SEM. solitaria, orbiculata, compressa, rugosa, margins inæqualiter dentato.

Arbor hæc elegans, nitida, comosa, trigintapedalis, in ramos abit longos, plurimos, parum subdivisos, plerosque horizontaliter porrectos. Fulcitur trunko erecto & a septem ad duodecim pedes alto; cujus cortex est subfuscus & striatus. Materies est alba. Tota scatet succo niveo, glutinoso, & abundanti; qui ex qualibet læsa parte guttatum exstillat, ferturque venenatus. Folia sunt lanceolato-oblonga, acuta, serrata cum intermixtis denticulis aliquot majoribus & rotundatis, coriacea, nitida, venis parallelis transversis tenuibus ac numerosis notata, apice crasso subcartilagineo rostratoque introrsum flexo, patentia, alternatim sparsa, semipedalia, sita præcipue versus extremitates ramorum: petiolo brevi, rubente, ad ortum folii instructo utrinque glandula oblonga, tereti, obtusa, & patente. Spicæ terminales, laxæ, crassæ, virides, plus minus semipedales, incurvatae sursumque versæ, superne gerunt mares, infra hos fœminas: quas tam in arboreculis junioribus vidi solis maribus refertas. Flores masculi circiter quatuordecim aggregatim sessiles ad basin suffulciuntur duabus glandulis oblongis, obtusis, magnis, planiusculis, & viridi flavescensibus. Fœminæ solitariæ, numero vario sessiles in eadem infra masculos spica, basi singulæ glandulis duabus similibus muniuntur. Calyx utrisque atropurpureus est. Antheræ rubent. Semina nigrescunt. Americani truncum hujus arboris amputare solent, effusumque sequenti die inspissatumque succum colligunt, quo ad psittacos aliasve capiendas aves utuntur: hinc illis vocatur *Mangle cautivo* sive *Mangle captiva*. Vindetur Cammetti *Rheed. mal. 5, p. 45* esse sapii species.

Crescit Carthaginæ in sylvis; inque ipso suburbio Xiximani ante macellum.

I. HIPPOMANE (*Manzanilla*) foliis ovatis, ferratis, bafi glandulosis. *Linn. syst. 724.*

(*Pl. americ. pict. Tab. 238. Ramulus florens cum fructu ad unam tertiam partem incrementi deducto. Tum fructus, qualis, delapsus in terram sub arbore, exsiccatione mutari solet.*)

Hippomane arboreum lactescens, ramulis ternatis, petiolis glandula notatis; floribus spicatis mixtis. *Brown. jam. I, p. 351.*

Mançanilla pyri facie. *Plum. gen. 50.*

Malus americana laurocerasi folio, venenata. *Comm. amst. I, p. 131, t. 68.*

Juglandi affinis arbor julifera lactescens venenata pyrifolia. *Sloan. hist. jam. 2, p. 3, t. 159.*

* *Mas.*

CAL. Perianthium monophyllum, subrotundum, ventricosum; ore connivente, emarginato.

COR. nulla.

STAM. Filamenta in unum corpus connata filiforme, eretum, calyce duplo longius. Antheræ quatuor, subrotundæ, lateribus filamenti versus apicem cruciatim affixæ.

* *Fœmina.*

CAL. Perianthium triphyllum, marcescens: foliolis subrotundis, concavis, obtusis, conniventibus.

COR. nulla.

PIST. Germen ovatum, longitudine calycis. Stylus brevissimus erectus. Stigma multifidum, (*septemfidum sèpius;*) laciniis subulatis, acutis, longis, rigidulis, reflexis.

PER. Drupa carnosæ, lactescens, maxima, subrotundo-depressa, levissime umbilicata.

SEM. Nux maxima, lignosa, heptagona, basi obtusa, apice in acumen longum inæquale abruptumque abiens, in toto ambitu armata apophysibus inæqualibus acuminate, septemlocularis, septemvalvis. Nuclei solitarii, subrotundi.

Arbor procera, vasta, coma ramosissima amplaque spectabilis, habitu Pyro æmula. Rami sèpe ternati, at non perpetuo. Folia sunt ovata, ferrata, acuta, nitidissima, alterna, numerosa: petiolo apice instructo glandula subrotunda, depressa, & subfuscæ. Spicæ sunt terminales, laxæ, virides, & erectæ. Flores masculi circiter mi-

ginta simul colliguntur in calyce communi concavo, squamæformi, deciduoque; qui ad basin munitur glandulis duabus lateralibus, orbicularibus, depresso, maximis, spicam fere sic totam laxe vestientibus. Fœminæ solitariæ, sessiles, ad basin suffultæ glandulis similibus, una alterave in eadem infra masculos spica, vel etiam in alio ramulo juniori astachyo. Fructus figura, odore, colore pomum parvulum Europæum adeo refert exacte, ut quisque rei ignarus deciperetur. Ejus cortex e flavo virens nitidusque unguem crassitie æquat. Caro candida lactescit. Nux apophyses suas ad ipsum fere usque corticem protendit, totamque hinc carnem percurrit. Maturi fructus ab arbore sponte decidunt, omnemque tunc temporis solent arbori suppositam aream numero suo tegere. Sic sibi relieti non putrescunt; sed, cortice pereunte, exsiccantur; & caro evadit exsucca, spongiosa, & fusca, rimisque plurimis longitudinalibus notatur. Nulli unquam animalia tactos inveni; et si vulgo ferantur amati cancris, qui eadem loca, sed ob aliam longe opinor rationem, multitudine vix credibili incolere consueverunt. Capta quidem in Martinica hæc animalia in harum arborum sylvis, comedstante, venenata habentur, & nocuisse aliquoties illa, certo constituit. At vero quum in Grenadensi insula similibus desumpta locis sine metu ullo atque impune comeduntur; nunquid igitur ali est causæ adscribenda Martiniçenium noxa? Tota arbor in omnibus suis partibus lactescat candidissimo, copiosissimo, valdeque caustico, hinc venenatissimo. Guttula hujus, cuti manus imposta, (volam excipio,) brevi eandem ignis instar vivi in vesicam lympha plenam attollit: unde ore assumptum quoique nocere possit, destruendo tenella faucium internarumque partium integumenta, patet consideranti. Quandoquidem hoc eodem succo etiam abundet ipse fructus, facile largior, post comedam unam alteramve ejusdem portiunculam aliquos pessime habuisse; imo persuasissimus sum, in primis Americae detectionibus id aliquoties accidisse. Quidquid vero afferant auctores, narrentque non raro incolæ, de devoratis tot totiesque sine noxa aut cum noxa integris fructibus, totidem fabellas autumo, vel a credulitate minusque casuum attenta exploratione, vel a mala fide ortas. Nucis etenim scindentes apophyses impruden-

tem satis superque monent, ne perget edere; pergere autem volenti, artificio esset opus ac patientia, dum fauces interea inflammarentur totæ. Fertur etiam arboris umbra noxam inferre subtus recubanti; sed per trihorium ipsi mihi cum sociis periculum facienti nihil mali evenit. Tum etiam pluviam trans hanc arborem cadentem, corporeque nudo exceptam, innocuam sum expertus: noxia fortasse fuit, ubi rupti ventis vel imbris rami foliave lac simul destillaverint pluviae immistum. Truncus præbet materiem pulcherrimam, e fusco & leucophæo vagiegatam, poliri aptam, & ad intestina opera frequens in America adhibitam. Solet arbor, priusquam cædatur, igne circumposito ad radicem exuri, quo a copiosiori succo inferior trunci pars liberetur: dein operarii, ne in oculos fragmenta insiliant, hos tela linea tenui obligant. Integras olim sylvas littorales harum arborum incendio consumserunt Martinicenses aliique, ut a tam atroci veneno vindicarent regiones cultas. *Mançanilla* apud omnes nationes, magis minusve ad vernacula linguam corrupto vocabulo *Hispanico*, quod parvulum pomum significat, vocatur. Quando floret, interdum foliis fere caret.

Crescit in littoribus maritimis Caribæarum & vicinæ Continentis.

I. DALECHAMPIA (*scandens*). *Linn. syst. 720.*
(*Pl. americ. pict. Tab. 239. Ramus florens. Dein fructificationis totius compages hinc atque inde conspecta. Fructus*).

Dalechampia scandens, lupuli foliis, fructu hispido, tricocco. *Plum. gen. 17.*

Dalechampia folio trifido, fructu tricocco hispido. Plum. amer. 89, t. 101.

* Masculi flores circiter decem intra binas bracteas florales.

CAL. Involucrum commune quadripartitum: foliolis obtusis, erectis, quorum nectario suppositum reliquis duplo latius.

Perianthium proprium hexaphyllum: foliolis ovatis, acutis, integris, reflexis, apice sursum replicatis.

COR. nulla.

Nectarium latum, in involucro communi ante masculorum pedunculos sessile; constans lamellis plurimis, ob-

verse ovatis, obtusis, planis, pedunculis masculorum propriis paulo brevioribus, apice nectar glutinosissimum fundentibus, multiplici densaque serie positis.

STAM. Filamenta plurima, concreta in unum corpus erectum, filiforme, longitudine calycis, superne divisum. Antheræ subrotundæ, quadrisulcatae.

* Fœminæ tres intra easdem cum maribus bracteas.

CAL. Involucrum commune triphyllum, persistens: foliolis subrotundis, obtusis, erectis, margine hirsutis, quorum exterius triplo latius reliquis.

Perianthium proprium circiter decaphyllum, persistens: foliolis lanceolatis, acuminatis, ferratis, setis armatis, conniventibus.

COR. nulla.

PIST. Germen subrotundum, trifoliatum, calyce brevius.

Stylus filiformis, longissimus, versus mares arcuatus.

Stigma capitato-obtusum.

PER. Capsula subrotunda, magna, depressa, tricocca, trilocularis, trivalvis: loculis bivalvibus.

SEM. solitaria, subglobosa.

Planta hæc tota hirsuta, nec lactescens, caulis teretibus, volubilibus, ramosis, foliosisque, ad duodecim pedum altitudinem arbusta scandit. Folia habet basi cordata, palmato-triloba, alterna, longis petiolis donata; lobis ovatis, ferratis, acuminatis, medio paulo longiori. Stipulæ ovatæ utrinque ad axillas adsident. Pedunculi communes axillares, solitarii, & longi, circa medium ornantur folio unico caulinis multo minori suffultoque stipulis similibus, apice autem sustinent fructificationem compositam monœcam, supra in charaktere descriptam, unicam nutantemque; quam includunt bracteæ florales duæ, (nisi foliola dicta malis,) sessiles, subcordatae, semitrilobæ, serratae, acutæ, utrinque venosæ, rugosæ, suffulta stipulis quatuor, cum germinibus in fructum mutandis incrementa, conniventia semper, præterquam in ipso fœcundationis tempore, quo leviter patent. Atque ita hæc bracteæ flores abscondunt, ut hi in tota planta non appareant, nisi quando a fructuum maturèntium aucto volumine diducantur. Mares sunt exigui & virides cum antheris luteis; insidentque pedunculis propriis erectis ac unifloris ante nemarii corpuscula, quibuscum uno eodemque involucro cin-

guntur. Tota hæc compages pedunculo communi erat, soque elevatur; ad cuius basin locantur tres fœminæ, laterales fere sessiles, intermedia pedunculata duploque hinc altior. Harum calyces setis armantur nitidis eoque urentibus magis, quo sint maturitari capsulæ propiores. Hæ autem sunt nudæ, nec, uti in aliis tricoccis obtinet, pellicula vestiuntur ulla. Facile patet ex generis dato charactere, quantum a vero aberrare debuerint illi, qui ex authorum iconibus vel e speciminibus exsiccatis complicata singularibusque structuræ hosce flores definire fuerunt connotati. Caduci cum ipso suo pedunculo communi mares, filamenta coalita cœu unicum habita, hincque flores decem in unum mutati, & a cognitis floribus omnibus compositione fructificationis diversissima, præcipuam errandi ansam præbuerunt.

Crescit in sylvaticis & fruticosis Domingo. Vidi florentem Decembri.

1. ACALYPHA (*carthaginensis*) involucris fœmineis subcordatis, dentatis, dente medio longissimo; spicis fœmineis terminalibus, masculis axillaribus.

(Pl. americ. piæt. Tab. 263, fig. 78. *Folium*).

Frutex, erectus, septempedalis. Folia ovato-acuminata, ferrata, glabra, venosa, alterna, breviter petiolata, tres quatuorve pollices longa. Spicæ fœminarum terminales, solitariæ, erectæ, pollicem vel sesquipollicem longæ. Styli indeterminate ramosi. Masculorum spicæ axillares, solitariæ, similes. Stamina semper octo.

Crescit Carthaginæ in sylvaticis & fruticosis densis.

2. ACALYPHA (*villosa*) involucris fœmineis dentatis, villosissimis; foliis ovatis, acuminatis, petiolo longioribus.

(Pl. americ. piæt. Tab. 240. *Rami florentes masculus & fœmineus*).

Frutex erectus, debilis, vicinis se hinc sustentans, saepe quindecimpedalis; ramis teretibus; senioribus lignosis glabrisque; junioribus virentibus & villosis. Folia sunt ovata, ferrata, subtus pubescentia, alterna, ipsa tres quatuorve pollices longa cum petiolo bipollicari. Masculorum minimorum spicæ densæ, cylindricæ, axillares, solitariæ, erectæ, plus minus sesquipollicares. Fœminarum spicæ axillares, laxissimæ, in diversis semper a ma-

ribus ramulis, at in eadem planta. Harum pentaphyllus est calyx; styli tres, ad basin usque sexpartiti; involucra minima, vix conspicua; quorum etiam longitudine sunt pedunculi plerumque uniflori, verum qui, incremente in capsulam germe, paulatim elongantur, dictisque tunc involucris multoties evadunt longiores; ipsis etiam pariter incrementibus spicis.

Crescit Carthagena in sylvis & sepibus.

3. ACALYPHA (*corensis*) involucris fœmineis triphyllis; foliis lanceolatis.

(Pl. americ. piſt. Tab. 241. *Ramus florens cum fructu*).

Frutex sexpedalis, erectus, glaber, sarmentosus. Folia lanceolata, ferrata, acuta, glabra, alterna, duos treves pollices longa, brevissime petiolata. Spicæ masculorum laxæ, axillares, erectæ, solitariæ, pollicares. Involucrum tubulosum, monophyllum, integrum, plerumque successiue pedunculos unifloros quatuor emitit. Florum calyx triphyllus; filamenta ſæpius octo. Fœminæ tres quatuorve in pedunculo communi terminali, brevissimo, crassoque, racemose disponuntur: quibus ergo involucrum commune est nullum; proprium vero triphyllum & calyciforme. Calyx pentaphyllus. Styli tres, bifidi, & persistentes. Semina angulata.

Crescit in Domingo, Martinica; omnium vero frequentissime ad margines sylvarum in Venezuela ad oppidum Coro.

1. CROTON (*procumbens*) foliis cuneiformibus, acutis, integerrimis.

Planta inodora, fruticosa, glabra, tripedalis; caulinibus partim procumbentibus, partim erectis. Folia cuneiformia, acuta, integerrima, petiolata, alterna, bipinnicaria. Pedunculi alares brevissimique superne masculos plerumque quatuor, fœminas ad basin duas sustinent. Flores parvi virent, characteris prorsum Linnaeani, nisi quod fœminarum petala sint calyce duplo longiora.

Crescit passim Carthagena in fruticosis apricis.

2. CROTON (*niveum*) foliis cordatis, acuminatis, ferrulatis, subtus tomentoso-nitidis; caule fruticoso.

(Pl. americ. piſt. Tab. 263, fig. 79. *Folium*).

Frutex decempedalis, erectus, in omnibus suis partibus odore aromatico gratoque præditus. Folia sunt cor-

data, acuminata, ferrulata, facie viridia, subtus tomento argenteo nitidoque vestita, magnitudine valde varia. Spicæ densæ, pollicares, onustæ masculis plurimis fœminisque infra mares vel interdum iisdem immixtis paucissimis. Calyx tomentosus, colore subferrugineo. Corolla candida. Styli tres, ramosi, longitudine germinis, idemque reflexi toti arcti amplexantes. Ante foliorum ortum solent flores prodire omnium numerosissimi; caducique mares postea subjectum solum niveo candore operiunt.

Crescit Carthaginæ in sylvaticis.

3. CROTON (*balsamiferum*) foliis ovato-lanceolatis, integrermis, scabris, subtus tomentosis. Linn. syst. 722.
(Pl. americ. piæt. Tab. 242. *Ramus florens*).

Frutex ramosus, diffusus, erectus, tres quatuorva pedes altus, odoratissimus, ubique tomento denso subflavescenti obsitus, totus scatet succo balsamico, spissiusculo, odorato, subfuscō, qui e rupta qualibet parte guttam exstillat. Folia habet petiolata, facie virentia, subtus ex ferrugineo lutea, crassa, sparsim alterna, duos trave pollices longa, numerosa. Spicæ subterminales ex ramulorum juniorum dichotomiis. Flores parvi, petalis candidis. Martinicenses, quibus *Petit beaume* sive *Balsamum pumilum* vocatur, ex spiritu vini cum hac planta destillato liquorem conficiunt spirituosum mensisque dictum, cui nomen imposuere *Eau de Mantes*.

Crescit frequens in Martinica & Curaçao, in locis saxosis & rupestribus, maritimis.

4. CROTON (*polygamum*) foliis lanceolatis, ferratis, pilis decumbentibus rarischis.

(Pl. americ. piæt. Tab. 243. *Ramus aphyllus florens. Pars ramuli foliosa*).

Frutex erectus, quadripedalis, parum subdivisus. Rami teretes, glabri, cinerei. Folia acuta, glabriuscula utrinque virentia, pilis obsita argenteis, brevissime petiolata, alterna, fere tripollicaria. Pedunculi multiflori, brevissimi, axillares; unus alterve. Flores albescentes inodori, hermaphroditi steriles fœmineique in eadem aut diversa planta. Flos hermaphroditus germe trifolcato, styloque semitrifido & villoso; petalis oblongis calyce pentaphyllo longioribus. Fœminæ corella longitudine caly-

cis laxi patulique; stylo trifalcato, semitrifido, laciniis bifidis. Plerumque floret, quum foliis caret.

Crescit Carthageneæ in sylvis & fruticetis. Floret Junio & Julio.

5. CROTON (*lineare*) foliis lanceolato-linearibus.

(Pl. A. P. Tab. 263, fig. 80. *Folium*).

Ricino affinis odorifera fruticoso major, rosmarinini folio, fructu tricocco albido. *Sloan. hist. jam.* I, p. 233, t. 86, f. I.

Frutex erectus, quadripedalis; ramis teretibus, subtomentosis, e flavo alblicantibus. Folia linearia, obtusa, integerrima, superne glabra & virentia, subtus tomentoso-nitida & albida; petiolo brevi stipulis duabus rigulis instructo. Flores spicati. Tota planta est aromatica & odorifera.

Crescit in valle arenoso Corensi.

1. IATROPHÀ (*integerrima*) foliis ovatis, acuminatis, integerrimis.

(Pl. americ. pict. Tab. 263, fig. 81. *Folium*).

Frutex erectus, comosus, elegans, totus glaberimus, decempedalis, succo aqueo glutinoso refertus. Folia ovata, acuminata, integerrima, late virentia, petiolo fere bipollicari, tripollicaria ferme ipsa. Racemi subcymosi. Flores inodori, pulchelli; calyce viridi, campanulato, semiquinquefido; corolla coccinea, diametro pollicari.

Havanæ vidi in hortis cultam.

2. IATROPHÀ (*hastata*) foliis hastatis.

(Pl. americ. pict. Tab. 263, fig. 82. *Folium*).

Planta fruticosa. Folia trilobo-hastata, integra, acuminata, nitida, petiolata, vix tripollicaria, ad ortum petioli stipulis duabus instructa. Flores inodori, coccinei.

Cultam vidi in hortis Domingensibus, allatamque ex India Orientali.

3. IATROPHÀ (*Janipha*) foliis palmatis; lobis sinuatis, levibus. *Linn. syst. 723.*

(Pl. americ. pict. Tab. 244. *Ramus florens. Fructus*). Una tertia pars capsulae tricoccae, ab interne parte visa. Una valvula. Nectarium maris cum unico stamine, avulsis reliquis).

Janipha frutescens. *Laeft. hisp. 309.*

* Mas.

CAL. nullus.

COR. Petalum coriaceum, campanulatum, erectum, basi planum, semiquinquefidum: laciniis lanceolato-ovatis, acutis, patulis, longitudinaliter externe bisulcatis, interne trifidatis.

Glandula nectarea peltate-convexa, magna, centro integra, abiens in radios decem obtusos distinctosque.

STAM. Filamenta decem, subulata, distinctissima, e receptaculo inter nectarii radios adscendentia, supra idemque erecta; quorum quinque alterna exteriora, crassiora, reliquis fere duplo longiora, & aequalia corollam. Antheræ oblongæ, obtuse, erectæ, magnæ.

* Fæmina.

CAL. nullus.

COR. Petala quinque, decidua; cæterum simillima laciniis petali masculini.

Glandula nectarea magna, orbiculata, depressa, margine infimo decensulcato.

STAM. Filamenta decem, capillaria, germine breviora, e receptaculo inter sulcos nectarii adscendentia, leviter conniventia. Antheræ nullæ.

PIST. Germen subrotundo-ovatum, obtuse hexagonum, corolla brevius, insidens nectario. Styli tres, basi connati in unum corpus, patent, decidui, semitrifidi: laciniis abeuntibus in Stigmata ampla, plana, cristata, apice profunde multifida, germini coronæ ad instar impendentia.

PER. ut in congeneribus.

Frutex erectus totusque glaberrimus fucco scatet aquo subglutinoso odoremque habente foliorum Juglandis. In sylvis umbrofis virgatus & vix ramosus ad viginti sœpe altitudinem pedum excrescit, debilisque manet; quem etiam habitum in nostris caldariis conservat. In fruticetis apricis vulgo sexpedalis atque inelegans ad Iatrophæ Manihot figuram proxime accedit. In ipsis saxeis mœnibus castelli sancti Philippi in Boca chica, post ultimam Anglorum expugnationem diruti desertique, in arbusculam vidi excreuisse octopedalem, truncu recto pollices diametro

quatuor æquante comaque concinna conspicuam. Radix valde est tuberosa Asphodeli in modum. Folia sunt ampla, elegantia, palmato-digitata; lobis quinque, oblongis, acuminatis, in medio utrinque sinu maximo contractis, exterioribus sœpe integerrimis: petiolo semipedali. Racemi laxi foeminas paucas infra mares plures gerunt. Flores e luteo & fusco virent. Filamenta ante fœcundationem prorsus erecta, post hanc peractam varie inflectuntur. Fructus tegitur pellicula carnosa, viridi, sex striis candidis notata, & nitidissima; estque tunc globosus & diametro dimidium pollicem excedit: hac autem exsiccata dilapsa que, manet capsula lateribus triloba. Quod idem plus minus obtinet in omnibus, quas examinavi, Crotonis, Acalyphæ, Iatrophæque speciebus. Semina sunt nitida, subovata, viridia vel cinerea.

Crescit passim Carthagenaæ. Floret fere per integrum annum.

I. CHAYOTA (*edulis*).

(Pl. americ. pñt. Tab. 245. *Fructus. Folium. Flos female mineus, ♂ masculus*).

* Mas.

CAL. Perianthium monophyllum, semiquinquefidum. Tubus campanulatus, patens. Limbi laciniæ lanceolatae, planæ, acuminatae, patentissimæ.

COR. monopetala. Tubus accretus calyci, cuius magnitudine & figura. Limbus quinquefidus: laciniis ovatis, planis, acutis, calyce fere duplo longioribus, patentissimis.

Nectarium constat e foveis decem, sitis in parte superiori tubi corollæ.

STAM. Filamenta quinque, connata in cylindrum erectum, superne quinquefidum & patentissimum. Anthera in cuiusque filamenti apice linea bis deorsum semelque sursum repens, farinifera.

* Fœmina.

CAL. ut in mare, pedicello germini insidens, deciduus.

COR. ut in mare.

Nectaræ foveæ, ut in mare; sed majores.

PIST. Germen obverse ovatum, tomentosum, quinquesulcatum, inferum. Stylus cylindraceus, erectus lon-

gitudine calycis. Stigma maximum, peltato-reflexum, margine quinquefido.

PER. maximum, ovato-turbinatum, quinquesulcatum, carnosum, apice inæqualiter gibboso, aculeis innocuis obsitum, superne uniloculare.

SEM. unicum, subovatum, plano-compressum, carnosum, bilamellatum, utrinque obtusum.

Planta scandens, cirrhosa, annua, habitu cucumerino. Folia sunt cordato-angulata, facie scabra, angulis dentatis acutisque, alterna, petiolo donata glabro. Flores inodori, parvi, corollis flavis; masculi in pedunculis multifloris axillaribus; fœminei in pedunculo unifloro vel bisecto ex eadem axilla. Fructus externe viret nitetque; interne albescit, & est carnosus; magnitudine varius, stratura singularis. Semen viride, nudum, & in fructibus majoribus pollicare, ad ipsum fructus apicem locatur; quem maturum posteaquam alta rima fudit, foras tantisper egreditur, & in connata extremitate sua radiculas plurimas generat, quas terræ deorsum immittit. Ex adverso autem loco inter lamellas caulinum promit foliosum, erigitque; abeunte sensim dein fructu in putredinem. Videlur hic humiditate sua in vegetationem deducere semen, eandemque promovere; donec radiculæ, primum a solo propter naturalem fructus delapsi situm remotæ, tandem contiguæ, nutrimentum ex illo haurire sufficiens valeant. Quamvis enim incolæ, certiori fortasse successu, integrum sub terra fructum recondant; non minus tamen ille germinat, casu terræ illapsus, atque etiam collectus alibique asservatus. Cubenses in juscuso, in pulmento, aut cum bovina elixum, quotidie in mensis apponere solent. Hiduas distinguunt species, quas varietates judico culture attribuendas. Prima vulgaris, quam simpliciter Chayote nuncupant, aculeis armatur innocuis, nunc plurimis, nunc paucissimis, & quatuor plus minus pollices longitudine æquat Altera, quæ ipsis Chayote fransés sive gallicus audit, minus priore frequens, aculeis ut plurimum penitus defituitur, ovique gallinæ magnitudinem habet. Omnia novum & distinctum genus hæc planta constituit.

Crescit & colitur in Cuba passim. Flores & fructus Decembri collegi.

DIOECIA.

DIANDRIA.

I. CECROPIA (*peltata*). Linn. *syst.* 735. *Laeft.* ix.
272.

(*Pl. americ. pict. Tab. 262, fig. 66. Spatha clausa*).
Coilotapalus ramis excavatis, foliis amplis peltatis lobatis.

Brown. jam. I, p. III.

Ficus surinamensis, multifido folio, superna parte admodum scabro, aversa densa lanugine molli. *Pluk. alm.* 146, t. 243, f. 5.

Yaruma Oviedi. *Sloan. hist. jam. I, p. 137, t. 88, f. 2*
& *t. 89.*

Ambaiba. *Marcgr. bras. l. 3, c. I. Pis. bras. l. 4, c. 22.*

Ambaiba amplissimo folio digitato, caudice & ramis excavatis. *Barr. aequin. 10.*

Habitu suo singulari eminus facile inter alias arbores distinguitur, ad altitudinem triginta vel quadraginta pedes se efferens. Truncus & rami, in quos paucos dispegitur, toti externe annulis ad varia intervalla circumscribuntur, qui totidem septis membranaceis respondent transversis. Inter hæc septa prorsum cavi sunt, medullaque destituntur. Truncus raro pedem diametro æquat, plerumque multo gracilior. Cortex albicat. Folia ad extremitates ramorum, alterna quidem, sed confertim, nascuntur, pauca semper, circiter decem. Prodeuntibus novis, abscedunt seniora. Folium ante explicationem membrana conoidea, acuminata, longitudinaliter dehiscente, caducae, operitur. Sunt autem folia maxima, peltata, subrotunda, facie scabra, subtus tomento incano vestita, (nervo tamen medio venisque majoribus etiam hic squaliusculis,) diametri plus quam pedalis, semiseptemfida; lobis subovatis, obtusiusculis, integris, medio maximo, lateralibus gradatim minoribus; sinibus obtusis. Insident petiois sesquipedalibus, teretibus, striatis, & scabris. Scatent succo aquo, ad aëris attactum nigricante, & linea foedis maculis tingente. Carpta ex arbore mox exsiccantur, crispantur, & fragilia evadunt. Fructificatio hujus arboris omnium est cognitu difficultima. Flosculorum ex-

iguitas & densa compages turbant observantem. Horas perdidi in eorundem examine, lassavique non semel oculos armatos. Tandem pertensus, haud ultra inquisivi. Nihil scripto notavi quam quod erat ex sapientia repetita hac inquisitione mihi visum certissimum. In adversariis meis invenio characterem incompletum sequentem, qui fœminæ est, nam arbor ad Diœciam pertinet. Pedunculus axillaris, solitarius, teres, duos tresve pollices longus, pendulus, amenta plerumque quatuor, rarius quinque, teretia, sesquipollicaria vel bipollicaria, & dense imbricata sustinet. Hæc simul involvuntur in spatha communis oblonga, obtusa cum acumine, monophylla, longitudinaliter dehiscente & decidua. Singulis flosculis perianthium est proprium infundibuliforme, oblongum, erectum, apice bifido: laciniis subrotundis, obtusis, concavis, parvis, erectis. Corolla nulla? sed hic corpuscula duo, subrotunda, minima, utrinque calycis incisuris insidentia, caduca; an antheræ? germen ovatum, didymum, parvum. Styli nulli. Stigmata simplicia. In aliis individuis spathæ includebant amenta viginti & plura; putem fuisse mares. Sic itaque haud omnino convenimus in charactere ego, Læflingius atque Brownus. Hic dixit, characterem se dedisse, *as nearly as he could make them out* quoad illum extricare poterat. Aubletus hunc silentio præterivit. Repetam igitur cum Læflingio: *Lynceis oculis alii lustrent ulterius partes fructificationis*. Gallis vocatur Boix Canon sive Arbor tormentaria, Anglis Trumpet - Tree seu Arbor tubarum.

Crescit passim in Caribæis & in vicina continente.

TETRANDRIA.

I. SCHAEFFERIA (*frutescens*).

* Mas.

CAL. Perianthium tetraphyllum: foliolis subrotundis, concavis, emarginatis, parvis.

COR. Petala quatuor, obverse ovata, concava, obtusa, patentissima.

STAM. Filamenta quatuor, subulata, erecta, petalis paucis breviora, germinis lateri ad basin imposita. Antheræ subrotundæ, compressæ, erectæ.

PIST. Germen subrotundum, parvum, emarginatum, in duos apices exiguos desinens. Stylus nullus. Stigma nullum.

PER. abortans.

* Fœmina in diversa planta.

CAL. ut in mare, persistens.

COR. ut in mare.

PIST. Germen ovatum, corolla paulo brevius. Styli duo, subulati, breves, inflexi. Stigmata simplicia.

PER. Bacca subglobosa, acumine brevi abrupto, unilocularis.

SEM. duo, rugosa, hinc convexa, illinc plana, paucissima pulpa distincta.

Frutex erectus, ramosus, decempedalis; in fruticetis densis abiens sape in ramos vimineos, longissimos, nitidos, virides, substriatos, erectosque. Folia habet lanceolata ovata vel ovato-subrotunda, acuta aut obtusa, integerrima, nitida, ad tactum pinguia, brevius petiolis donata, bipinnicaria, quotannis decidua, post florum eruptiō nem prodeuntia, unicum duo vel tria simul ex iisdem tuberculis alternantibus orta; e quibus etiam oriuntur pedunculi uniflori & aggregati. Flores parvi petalis gaudent albidis. Baccæ piselli magnitudine, cum levi mixta flavidine rubent, & aviculis vel insectis amantur; plerumque enim, devorata nitide pulpa, semina albicantia nuda in pedunculis persistentia inveni. Nominavi hunc fruticem, novi mihi visum generis, in honorem viri eruditissimi operibusque Botanicis clari Jacobi Christiani Schæffer, ecclesiæ Ratisbonensis ministri.

Crescit Carthaginæ frequens in fruticetis. Floret Julio. Septembri maturescit fructus.

I. **BATIS** (*maritima*). Linn. *syst.* 739.

(Pl. *americ.* piſt. Tab. 246. *Ramus faemineus florens. Flos masculus*).

Batis maritima erecta, ramosa; foliolis succulentis subcylindricis. Brown. *jam.* I, p. 356.

Kali fruticosum coniferum, flore albo. Sloan. *cat. jam.* 50. * Mas.

CAL. Amentum commune conico-oblongum, obtusum, compactum; constans squamis unifloris, subrotundis,

obtusis, latiusculis, basi convexis, margine concavis, imbricatis, quadruplici serie longitudinali positis.

Spatha propria monophylla, subrotunda, obtusa, compressa, squama paulo brevior, disrumpens.

COR. nulla.

STAM. Filamenta quatuor, subulata, patula, squama duplo longiora. Antheræ oblongæ, didymæ, incumbentes.

Fœmina in distincta planta.

CAL. Amentum commune ovato-oblongum, obtusum, carnosum; constans squamis unifloris, cordato-subrotundis, planiusculis, acuminatis, ab invicem distantibus, germine multo minoribus, quadruplici serie longitudinali infra germina positis, persistentibus.

COR. nulla.

PIST. Germen subovatum, obtusum, amento accretum. Stylus nullus. Stigma bilobum, capitato-subrotundum, villosum, magnum.

PER. Baccæ succulentæ, uniloculares; omnes simul concretæ in unum corpus oblongum obtusumque.

SEM. quatuor, triangularia, acuminata.

Frutex quadripedalis aut brevior. Caules inferiores lignosi, fragiles, teretes, cinerei, ramosissimi, diffusique, procumbunt. Rami juniores tetragoni, virides, quadrisulcati, oppositique, eriguntur. Folia sunt oblonga, superne crassiora, acuta, sensim versus basin attenuata, carnosa, succulenta, facie plana, dorso convexa, sessilia, opposita, vix pollicaria, numerosa. Amenta axillaria, solitaria, opposita, breviter petiolata, virentia, numerosa. Stigmata albescunt, quæ pro flosculis habuisse videtur Sloaneus. Fructus flavescent ex viridi, vel toti sunt flavi. Sapor totius plantæ est falsissimus. Carthageneribus & Momposinis, qui combustis ejus cineribus utuntur ad conficiendum vitrum, vocatur Barilla.

Crescit in Caribæarum & vicinæ Continentis littoribus arenosis maritimis.

PENTANDRIA.

I. ASTRONIUM (*graveolens*). Linn. *Syst. 741.*

(*Pl. americ. piæ. Tab. 262, fig. 65. Calyx fructifer. Felium.*)

* Mas.

* Mas.

CAL. Perianthium pentaphyllum, coloratum, parvum; foliolis ovatis, concavis, obtusis, patulis.

COR. Petala quinque, ovata, plana, obtusa, patentissima. Glandulæ nectaræ quinque, subrotundæ, minimæ, in disco floris.

STAM. Filamenta quinque, subulata, patentia, longitudo corollæ. Antheræ oblongæ, incumbentes.

* Fœmina in diversa planta.

CAL. Perianthium pentaphyllum, coloratum, persistens: foliolis oblongis, concavis, obtusis, conniventibus.

COR. Petala quinque, subovata, concava, obtusa, erecta, calyce multo minora, persistentia, at non increcentia.

PIST. Germen ovatum, obtusum. Styli tres, breves, reflexi. Stigmata subcapitata, obtusa.

PER. nullum. Calyx incretus, coloratus, foliolis suis conniventibus semen tegens primum, dein maturum illud, foliolis in stellam pendulam expansis, tandem demittens.

SEM. unicum, oblongum, longitudine calycis, lactescens.

Arbor erecta, a duodecim ad triginta pedes alta, tota scatet succo leviter glutinofo, terebinthinaceo, odoris ingrati & narseosi, decolore, in semine autem lacteo. Post casum fructuum in fœmina, florumque in mare, rami novi propelluntur, ornati foliis pinnatis ex tribus paribus cum impari; quorum foliola sunt ex oblongo ovata, acuminate, integerrima vel serrulata, glabra, venosa, triplicaria. Paniculæ laxæ, in maribus semipedales, in fœminis sesquipedales ac nigricantes, sparsæ in ramis ultimis. Flores exigui rubent. A calycibus in stellas novemlinearis diametri expansis, ceu sidera formantibus varia, Ασπούδαις πότε ταῦτα nominavi.

Crescit in sylvaticis Carthaginæ. Floret Majo & Junio. Julio fert fructum.

HEXANDRIA.

I. SMILAX (*havanensis*) caule aculeato, tereti; foliis dentato-spinosis; emarginatis cum acumine.

(Pl. americ. piæt. Tab. 263, fig. 83. *Folium*).

Planta volubilis, perennis, glaberrima: foliis subro-

tundis aut ovato - subrotundis aut ovatis, nitidis, coriaceis, rigidulis, margine spinosis; petiolis aculeatis.

Crescit Havanae in sylvis.

2. SMILAX (*haftata*) caule inermi, tereti; foliis cordato-hastatis.

(Pl. americ. pict. Tab. 263, fig. 84. *Folium*).

Planta volubilis, nitida. Folia acuminata, basi cordata, hinc in folium lanceolatum longum abeuntia, integrata, nitida. Racemi longissimi.

Crescit in Domingo.

POLYGAMIA. MONOECIA.

GOUANIA.

* Hermaphroditus.

CAL. Perianthium monophyllum, semiquinquefidum, germini infidens. Tubus infundibuliformis, persistens. Limbi laciniæ ovatæ, acutæ, planæ, patentissimæ, deciduae.

COR. nulla.

STAM. Filamenta quinque, subulata, patentia, longitudine calycis, cuius ad divisuras orta, hinc cum ejusdem laciniis alternantia. Antheræ subrotundæ, incantes, calyptratæ; caliptra elastice abscedente.

PIST. Germen parvum, inferum. Stylus subulatus, eretus, semitrifidus, calyce brevior. Stigmata simplicia, obtusa.

PER. Capsula triquetra, coronata tubo calycis, excurrentis in alas tres subrotundas, trilocularis, ad angulos trifariam discedens; loculamentis non dehiscentibus, bialatis.

SEM. solitaria, subrotunda, nitida, hinc convexa, illinc plana.

* Mas.

CAL. ut in hermaphroditico.

COR. nulla.

STAM. ut in eodem.

PIST. nullum. Vel Stylus, ut in eodem, absque Germine & Stigmate.

1. GOUANIA (*tomentosa*) foliis tomentosis.

(Pl. americ. pict. Tab. 262, fig. 71. *Folium*).

Planta hæc fruticosa, cirrhis munita axillaribus & tripollicaribus, altissimas arbores scandit, earundemque vestit cacumina. Folia habet oblongo-ovata, acuta, leviter crenata, tomentosa, petiolata, alterna, quadripollicaria. Racemi aphylli, quinquepollicares, axillares & terminales, flores pedunculatos gerunt hic illic congestos. Sunt hi exigui, inodori, & subflavescentes. Antheræ calyptre teguntur cucullata, quæ elastice abscedit in explosione pollinis. Germen in maribus est nullum; etiam si semper conspicatur stylus, sed stigmate orbatus. Semina atra nitide splendent. A Rhamnis hanc plantam cum subsequente, quibus in Enumeratione antea minus quidem apte adjunxeram, separavi; imposuique novo generi nomen a viro clarissimo Antonio Gouan, Monspeliensi medieo, qui nuperrime Horto Regio Monspeliensi, ingeniosis atque scitis referto observationibus, omnibus se carum Botanicis reddidit.

Crescit in sylvis sepibusque arboreis Domingensisibus.

2. GOUANIA (*glabra*) foliis glabris. Linn. syst. 767.

(Pl. americ. pict. Tab. 264, fig. 96. *Ramulus foliosus*.

Fructus integer. Ejusdem tertia pars, prouti sponte secedit, interne visa. Semen.

Planta hæc habitu est præcedentis, at non mihi visa scandere tam alte. Folia habet ovata vel ex oblongo ova-ta, acuminata vel obtusa cum acumine, inæqualiter serrato-dentata vel leviter dumtaxat crenata, glabra, saturate virentia, alterna, petiolata, bipollicaria. Racemi uno alterove foliolo ornantur. Flores masculi destituuntur prorsum pistillo, ita tamen ut tres quatuorve dentur in centum, qui absque germine stylo instruantur. Reliqua præcedenti sunt simillima.

Crescit in sylvaticis Domingensisibus.

1. MIMOSA (*fagifolia*) inermis; foliis bijugis trijugisvs.

Linn. syst. 768.

(Pl. americ. pict. Tab. 247. *Ramulus florens. Fructus*).

Arbor siliquosa, faginis foliis, americana, floribus como-sis. Pluk. alm. 44, t. 141, f. 2.

- CAL. Perianthium monophyllum, campanulatum, ministrum, quinquedentatum.
- COR. monopetala, infundibuliformis. Tubus erectus, longus. Limbus tubo triplo brevior, quinquefidus; lacinias ovatis, acutis, planiusculis.
- STAM. Filamenta numerosa, filiformia, patula, ad medietatem fere usque coalita in unum corpus corolla longitudine. Antheræ parvæ, incumbentes.
- PIST. Germen oblongum, parvum, desinens in stylum filiformem, longitudine staminum. Stigma acutum.
- PER. Legumen longum, coriaceum, leviter compressum, ad semina torosiusculum, pulpa repletum, uniloculare, bivalve.
- SEM. plurima, ovalia, obtusa, carnosæ.

Arbor comosa, elegans, densa, triginta pedes alta. Truncus rectus sæpe decempedalem acquirit altitudinem diametrumque pedalem. Materies albida vestitur cortice leucophæo glabroque. Folia sunt bijuga, interdum trijuga, omnino numerosa; foliolis subovatis, obtusis, saturate virentibus, exterioribus tres quatuorve pollices longis multoque majoribus. De costæ marginibus nihil notatum in adversariis invenio, quibus etiam mea icon ad vivam plantam confecta caret. Specimen vero siccum non possideo. Si ergo adsint illi, non semper adesse oportet: Spica simplex, solitaria, densiuscula, bipollucaris, flores continet circiter quadraginta albidos & fere inodoros; quibus sunt antheræ flavescentes. Legumen coriaceum & ex albido flavescens pulpam includit dulcem & albicantem, quam exfugendo comedere solent incolæ; dicuntque arborem æque ac fructum *Pois doux* sive *Fabam dulcem*.

Crescit in sylvis & sylvaticis Martinicæ.

2. MIMOSA (*tergemina*) inermis; foliis tergeminis. Linn. syst. 768.

(Pl. americ. pict. Tab. 262, fig. 69. *Flos*).

Acacia frutescens non aculeata, flore purpurascente, alia. Plum. ic. 10, f. 2.

CAL. ut in præcedente.

COR. cylindrica, limbo erecto, minimo; cæterum ut in eadem.

STAM. ut in eadem: at coalita in diversa longitudine in diversis, nempe ab æquali corollæ ad duplo majorem;

corolla s^ep^e quadruplo longiora, alias triplo vel duplo: membrana connectente ad apicem quinquesida & corollam interiorem mentiente.

PIST. Stigma truncatum.

PER. Legumen longum, compressum, acuminatum, uniloculare, bivalve; valvulis post divisionem spiraliter involutis.

SEM. Plura, subovata, nitida, atra.

Crescit passim in sylvaticis Martinicæ.

3. MIMOSA (*polystachia*) inermis; foliis bipinnatis; partialibus propriisque sexjugis, oblongis. *Linn. syst. 769.*

(*Pl. A. P. Tab. 262, fig. 67. Flos. Semen. Legumen*). *Acacia* alia scandens, spica multiplici, siliquis latis. *Plum. spec. 7, ic. 12.*

CAL. Perianthium pentaphyllum, deciduum: foliolis lanceolatis, concavis, acutis, suberectis.

COR. nulla.

STAM. Filamenta decem, subulata, erecta, calyce duplo longiora. Antheræ subrotundæ.

PIST. Germen oblongum, calyce brevius. Stylus subulatus: subincurvus, staminibus paulo brevior. Stigma obtusum.

PER. Legumen oblongum, obtusum, planum, repandum, leviter incurvum, omnium maximaum, transversim conatum, hinc multiloculare.

SEM. solitaria, ovata, obtusa, plano-compressa.

Planta hæc, arborea ipsa, arbores qualescumque scandit; quarum per cacumina pergens, centenas tandem supergreditur; frondibusque adnexa firmissime, has demum pondere suo deprimit & pessumdat. Invisa hinc incolis planta est, quæ septa solet arborea, quibus illi faceharios agros procellis magis expositos obvallant, dicto modo destruere. Nec enim amputasse sufficit truncum, ubi ex quavis relictæ radicis parte novæ repente plantulæ exsurgent. Truncus teres, cortice fusco vestitus, diametro æquat s^ep^e novem pollices. Folia sunt bipinnata; partialibus utrinque ut plurimum tribus vel quatuor, quorum terminantia duo, posteaquam foliola dimisere propria, in cirrhos validissimos mutantur, qui vicinarum arborum ramis feso circumvolvunt, tamque adhærent tenaciter, ut ægre queant avelli, imo ut accrevisse non raro videan-

tur: propriis saepius utrinque septem, oblongis, obtusis, emarginatis. Spicæ particulares densæ, bipollicares, sursum versæ erectæque omnes, triginta circiter simul in eodem communi pedunculo pedali & horizontaliter portato locantur. Flores parvi, virentesque in quilibet spica particulari plus minus centum & quinquaginta continentur, adeoque in una spica composita quater mille & quingenti; cui tantæ florum multitudini (ob flores forte steriles vel masculos intermixtos) vix decem succedunt leguminæ, quæ ipsa rarissime ad maturitatem pervenient.

Crescit in sylvis Martinicæ.

4. MIMOSA (*cornigera*) spinis stipularibus geminis con-natis; foliis bipinnatis. Linn. syst. 770.

Acacia cornuta Indiæ Orientalis. Seb. thes. I, p. 113, t. 70, f. 13.

Acacia americana, grandibus aculeis ad ramulorum ex-ortum cornua bovina referentibus, siliqua rostrata. Pluk alm. 3, t. 122, f. 1.

Acaciæ similis, spinis corniformibus, mexicana. Comm. hort. I, p. 209, t. 107.

Hæc arbor duodenos altitudine pedes raro excedit. Ramulis numerosis in pyramidalem figuram excrescit. Folia habet bipinnata atque exigua. Flores parvi, flavi, atque inodori, in spicam aggregantur densam cylindricam sesquipollicarem & calatum crassam. Legumina coriacea pulpam continent buryraceam, qua obvolvuntur semina teretia. Ex his antea mundatis, exsiccatis, lagenæque inclusis, post aliquot menses fere totidem prodire dermetes minimos vidi, qui ipsa volumine semina ferme æquabant. Valde singulares sunt in hac arbuscula spinæ sub-axillares basique connatæ, quæ figura sua bovina cornua concinne exprimunt. Hæ quidem fuscæ, nitidæ, cavæ, longitudine variantes, ita ut longissimæ quinque pollices excedant, totam obsident arbusculam, & post maturitatem leguminum, quando folia deciderunt, spectaculum offerunt prætereundi insolitum. Quæ autem eroso ad introitum foramine conspicuntur pertusæ, harum cavitas formicis innumeris præbet domicilium: quæ ad levissimum arboris concussum catervatim atque cum impetu spinis egressæ, & ultro undique dilapsæ, formicina quadam pluvia mactant proxime adstantem; propterea sane formida-

bili, quod cutim ilico adortæ in orsu valeant prunulae in modum ardente: cuius dolorem, permanentem saepe ultra quartam horæ partem, tumor sequitur intra diem evanidus. Incolis vocatur Cuernezuela sive Corniculum.

Crescit passim in sylvaticis Carthagenaë. Junio & Julio floret. Maturescunt semina Septembri.

5. MIMOSA (*mangensis*) spinis stipularibus distinctis, foliis bipinnatis; partialibus quinquejugatis, propriis sedecimjugatis: glandula supra basin folii.

(Pl. americ. pict. Tab. 262, fig. 70. *Ramusculus cum folio & capitulo florente*).

Arbor erecta, vigintipedalis; ramis horizontaliter porrectis. Spinæ sunt subulatae, acuminatae, fortes, subaxillares, & quinquelineares. Folia axillaria; costa communis bipollicari, instructaque paulo supra basin glandula parva oblonga obtusa & erecta: pennis partialibus pollicaribus; foliolis propriis oblongis, obtusis, vix trilinearibus. Spicæ globose, axillares, solitariae, sursum versæ, insident pedunculo pollicari. Flores albi odore nullo sunt praediti.

Crescit Carthagenaë, frequens in insula Mango.

6. MIMOSA (*retusa*) aculeata; foliis bipinnatis, apice & supra basin instructis glandula retusa.

Arbor erecta. Aculei recurvi, sparsi in ramis pinisque foliorum communibus & partialibus. Folia partialia sexjugata; propria circiter sedecimjugata; foliolis oblongis, acutis, quadrilinearibus. Glandulae costa latiores ipsa, depressæ, retusæ, inferior ovalis, superior orbicularis. Legumina oblonga, obtusa cum acumine, plana, sicca, membranacea, unilocularia. Semina ovata, compresso-plana. Flores non vidi.

Crescit passim Carthagenaë.

7. MIMOSA (*biglobosa*) spicis biglobosis, densissimis.

(Pl. americ. pict. Tab. 262, fig. 68. *Pedunculus florifer: Receptaculum commune, floribus spoliatum. Flos ex globo spicæ majore. Ejusdem perianthium petalumque, dissecta longitudinaliter expansaque. Palea floribus interjecta. Tandem flos ex globo minore*).

CAL. Receptaculum commune turbinatum paleas numerosissimas totidemque flores colligens in duos globos, quorum inferior maximus.

Perianthium monophyllum, tubulosum, coloratum, longum; limbi quinquefidi brevisque laciniis duabus paleam spectantibus subrotundis, incrassatis, concavis, mutuo incumbentibus; reliquis tribus omnium minimis.
COR. monopetala tubulosa, calyce pauxillo longior, limbi quinquefidi laciniis oblongis, concavis, obtusis, patulis, æqualibus, parvis.

STAM Filamenta decem, filiformia, corollam superantia, patula, basi inter se & cum corolla connata. Antheræ oblongæ, incumbentes.

PIST. Germen oblongum. Stylus subulatus, brevis. Stigma acutum.

PER. & SEM.

Arboris hujus fructum, quem edulem mihi dixere incolæ, non vidi; ad cujus examen quum distuleram reliqui habitus descriptionem, postea describendi occasionem nactus non fui. Pedunculo semipedali, viridi, crassoque insidet receptaculum pallide flavescens, turbinatum, punctatumque; quod densissime numerosissimos colligit flores rubros, singulos palea sua rubella fereque calycem longitudine æquanti suffultos, superiores breves, inferiores duplo longiores; idque in modum duplicis globi, inferiores maximi. Flores spiritui vini immersi, eundem tingunt saturata rubedine.

Crescit in Martinica.

I. MAMMEA (americana) staminibus flore brevioribus. Linn. syst. 409.

(Pl. americ. pict. Tab. 248. Ramus frutescens. Semen Flos).

Mammea foliis ovalibus nitidis, fructu subrotundo scabro. Brown. jam. 2, p. 249.

Mamei magno fructu, persicæ sapore. Plum. gen. 44, ic. 170.

Malus persica maxima, foliis rotundis splendentibus glabris, fructu maximo scabro rugoso. Sloan. hist. jam. 2, p. 123, t. 217, f. 3.
 * Hermaphroditus.

CAL. Perianthium monophyllum, bipartitum, deciduum: laciniis subrotundis, concavis, obtusis, coriaceis, coloratis, patentissimis.

COR. Petala quatuor, subrotunda, obtusa, concava, patentissima, subcoriacea, calyce fere duplo longiora.

STAM. Filamenta numerosa, capillaria, erecta, brevissima, desinentia in Antheras oblongas, obtusas, erectas, longitudine germinis.

PIST. Germen subrotundum, depressulum, calyce fere duplo brevius. Stylus crassus, cylindricus, erectus, duplo longior staminibus. Stigma capitatum, convexum.

PER. Bacea maxima, subrotunda, carnosa, styli parte acuminata, cortice coriaceo, unilocularis.

SEM. quatuor, subovata, magna, superficie scabra, carna distincta.

* Mas in eadem vel in distincta planta.

CAL. }

COR. } ut in hermaphrodito.

STAM. }

Arbor erecta, procera, Americanas inter pulcherrimas merito numeranda, spectabilis coma densa ampla atque elegantissima, trunco sustentata octopedali, radici primariae insistit fusiformi longae rectaque deorsum tendenti; unde difficillima evadit ejus transplantatio, rarissimeque succedit. Ramuli juniores sunt quadrangulares. Folia habet ovalia vel obverse ovata, integerrima, obtusa, nitidissima, coriacea, firma, striis parallelis transversis notata, breviter petiolata, opposita, quinque vel octo pollices longa. Pedunculi uniflori brevesque in ramis sparguntur robustioribus. Flores suaveolentes & candidi diametrum habent sesquipolllicarem. Calyx quidem profundissime semper sectus est, basi tamen monophyllus spectatur. Sæpe etiam est trifidus cum corolla pentapetala vel hexapetala; verum hoc evenit ab integra aut profunda laciniae alicujus petalive dilaceratione. Fructus subrotundus, pro seminum numero, quorum unum alterumve saepius abortat, aut talis simpliciter, aut simul obsolete trigonus tetragonusve, magnitudine variat, ita ut a tribus ad septem diametro pollices æquet. Corticem induitur duplum. Exterior coriaceus, lineam crassus, tenax, e fusco flavescens, incisuris longitudinaliter decussatis divisus abstrahitur frustatim a subiecto interiori; qui tenuis, flavescens, carni fortius adhæret, a qua caute separatur: gustantis enim ilico quidem etiam si linguam non afficiat;

meram interea vigore compensans, post breve tempus amarorem inducit ori insignem, biduum saepe triduumque perseverantem; quæ pendere videtur a parte resinosa dentibus inhærente, nec aqua nec saliva abluenda tam facile. Cavendum etiam non minus est, ne quid carnis seminibus proximæ comedatur, quæ quoque resinosa est ac amarissima. Caro est firma, amœne lutea, sapore prædita grato & singulari; odore leni suaveolenti & aromatico. Sunt, qui frustulatim discissam, vinoque saccharato immersam, in mensis apponunt; ut, si quid casu adsit amari, abluatur. Ex eadem cum syrupo elixa fit jus concretum optimum, quod fructus odorem saporemque diu servat. Ex floribus cum spiritu vini destillatis Martinicenses liquorem conficiunt dictum *Eau creole* sive Aquam indigenam, primas liqueores inter spirituosos & potabiles apud ipsos occupantem. Hispanis & Anglis vocatur *Mamei*; Gallis *Abricotier* a Pruno armeniaca, puto, ob coloris similitudinem in utriusque carne.

Crescit in Caribæis & in Continente in vicina.

I. CALOPHYLLUM (*Calaba*) foliis ovatis, obtusis. *Linn.*
Syst. 410.

(*Pl. americ. piæt. Tab. 249. Ramus florens. Fructus. Nux.*)
Calaba. *Plum. gen. 8.*

* *Hermaphroditus.*

CAL. Perianthium diphyllum, deciduum: foliolis subrotundis, obtusis cum acumine, concavis, coloratis. Vel monophyllum ex unico tali foliolo a corolla bractæ ad instar parum remotum. Vel omnino nullum.

COR. Petala quatuor, subrotunda, concava, patentia, quorum duo exteriora minora minusque colorata.

STAM. Filamenta circiter decem, filiformia, brevia. Antheræ oblongæ, obtusæ, erectæ.

PIST. Germen subrotundum, longitudine staminum. Stylus nullus Stigma capitatum, obtusum.

PER. Drupa globosa, carnosa, magna.

SEM. Nux globosa, levissime acuminata, maxima. Nucleus globosus.

* *Mas in eadem vel in diversa planta.*

CAL. ut in hermaphroditio.

COR. ut in eodem.

STAM. Filamenta circiter sexaginta, erecta, longitudine fere corollæ. Antheræ oblongæ, erectæ.

Arbor procera, lenta, ramos jam supra terram emit-
tit: unde, ad sepes construendas, & ad ambulacra perfic-
ienda in hortis umbrosa, est aptissima. Rami juniores
sunt quadrangulares. Folia sunt ovata, obverse ovata,
vel oblonga, obtusa, emarginata, integra, nitida, co-
riacea, firma, striis parallelis transversis notata, breviter
petiolata, opposita, quadripollicaria. Ex axillis egrediun-
tut racemuli pollicares, simplices, laxi, plerumque sep-
temflori, ex pedunculis nimirum unifloris oppositisque
tribus cum terminali uno. Flores candidi & suaveolen-
tes antheris gaudent luteis. Fructus viridis caro pauca &
duriuscula etiam viret, nucemque involvit glabram atque
ex luteo cinereum, fœtam nucleo candido, solido, nec,
quod sciam, eduli. Ex his Caribæi oleum exprimere so-
lebant in usus domesticos. Ex data descriptione patet,
dari hanc inter atque Mammeam (si fructum exceperis fo-
lum) affinitatem in partibus cæteris insignem. Vix in-
duci possum, ut credam, esse hanc arborem cum Tsierou-
ponna horti Malabarici eandem. Habet quidem Plumieri
Calaba hujus fructum & folia paulo angustiora, sed pedun-
culos potius & flores plantæ, quæ in eodem horto Ponna
audit. Caribæis & Gallis vocatur *Calaba*.

Crescit passim in Martinica. Floret in primis Octobri
& Novembri.

1. **CLUSIA (rosea)** foliis aveniis: corollis hexapetalis.

Linn. syst. 765.

Clusia flore roseo major, fructu subviridi. *Plum. gen. 2I.*

Cenchramidea arbor saxis adnascens, obrotundo pingui

folio, fructu pomiformi *Pluk. alm. 92, t. 157, f. 2.*

Catesb. car. 2, p. 99, t. 99.

* Fœmina.

CAL. Perianthium hexaphyllum, coloratum, persistens:
foliolis subrotundis, concavis, obtusis, patentibus, sub-
imbricatis; quorum duo intermedia duplo minora duobus
interioribus, & duplo majora duobus extimis.

COR. Petala sex, subrotunda, maxima, concava, obtusa,
patentissima, ungue brevi crassoque.

Nectarium constat ex corpusculis numerosis, oblon-
gis, erectis, apicibus subulatis versus stigmata incur-

vatis, denso ordine germen stipantibus, ejus longitudo.

STAM. nulla; nisi pro sterilibus his nectarium sumas.

PIST. Germen cylindrico - columnare, a comprimentibus nectarii corpusculis striatum, calyce brevius. Stylus nullus. Stigmata circiter octo, æqualia, maxima, contigua, puncto umbilicata, persistentia; omnia simul componentia Stigma peltatum, orbiculare, convexum, umbilicatum, radiis octo divisum in totidem partes æquales.

PER. Capsula subrotunda, magna, obtusa, circiter octogona, coronata stigmatibus non contiguis, circiter octo locularis & octovalvis: valvulis omnium crassissimis, coraceis, qualibet suo stigmate coronata, tum radiatim patentibus.

SEM. numerosa, ovalia, utrinque obtusa, nidulantia in pulpa molli; affixa Receptaculo ovato-subrotundo, maximo, obtuse acuminato, sulcis circiter octo profunde exarato, angulis Dissepimenta constituentibus.

Arbor hæc viginti vel triginta pedes alta comosaque stupibus aliisque arboribus parasitica innascitur. Habitum est subsequenti simillima; succo scatet eodem, foliis ordinatur iisdem, interdum emarginatis, magisque subrotundis. Pedunculis etiam consimilibus flores insident inodori, magni, petalis roseis, & valde speciosi; quibus stigmata quandoque sunt septem vel novem, quorum tunc numerum sequuntur loculamenta & valvulae. Tota genitalium superficies, præcipue nectarii, ceu integumento communis dense obtegitur glutine quodam gelatinoso & coloris aquei. Florem polliniferum haud contigit videre. Fructus viridis permanet. Catesbaei icon optima corollam nimis planam exhibet.

Crescit in Domingo.

2. **CLUSIA** (*alba*) foliis aveniis; corollis pentapetalis. Linn. syst 765.

(Pl. americ. pict. Tab. 250. *Ramulus cum flore & fructu*). Clusia flore albo, fructu coccineo. Plum. gen. 21, i.e. 87, f. I.

CAL. Perianthium enneaphyllum, persistens: foliolis subrotundis, concavis, obtusis, patentibus, imbricatis, in quolibet ordine tribus, quorum intermedia tria

duplo majora tribus exterioribus & duplo minora interioribus.

COR. Petala quinque, subrotunda, concava, obtusa, duplo latiora calycis foliolis maximis, eorundemque longitudo, patentia, mutuo incumbentia.

STAM. Filamenta a quinque ad octo, situ inconstanti, plana, acuta, ad germen appressa, quo duplo breviora. Antheræ interno filamentorum parieti longitudinaliter adnatæ.

PIST. Germen ovatum, magnum, obsolete pentagonum aut hexagonum, petalis paulo brevius. Stylus nullus. Stigmata quinque vel sex, orbicularia, magna, convexa, apici germinis lateraliter insidentia, lateribus contiguis, persistentia.

PER. Capsula ovata, magna, obtuse pentagona vel hexagona, coronata stigmatibus, quinquelocularis vel sexlocularis, quinquevalvis vel sexvalvis: valvulis crassis, coriaceis, tum radiatim patentibus.

SEM. numerosa, oblonga, utrinque obtusa, nitida, involuta pulpa molli. Receptaculum oblongum, magnum, quinquesulcatum vel sexfulcatum.

Arbor hæc trigintapedalis & adspectu elegans parasitica vastissimis arboribus innascitur; trunco saepe in diametrum pedalem increscente; comaque ampla ex ramis proportionalibus composita; & ipsa hinc arbor satis vasta. Tota scatet succo glutinoso, balsamico, tenacissimo, aquam repudiante, viridi, sed ad aëris attactum rufescente; quo picis loco solebant uti Caribæi ad illiniendos suos linters. Folia habet obverse ovata, integerrima, obtusa, nitida, coriacea, firma, avenia, striis oblique transversis parallelisque notata, breviter petiolata, opposita, sita præcipue versus ramulorum extremitates. Pedunculi sunt breves, crassi, saepius triflori, plerumque terminales. Flores inodori, inelegantes, petalis albidis, hermaphroditi visi a me omnes, antheris tamen plus minusve fariniferis in diversis. Fructus maturi colorem habent coccineum. Semina alba pulpæque involuta coccineæ aviculis amantur, quæ ex apertis stellatim terramque spectantibus capsulis, volatu in aëre sustentantes sese, eadem pulpæ suæ adhaerentia rostro excerpunt. Incolis vocatur *Aralie*.

Crescit passim in sylvis Martinicæ.

3. CLUSIA (*flava*) foliis aeniis, corollis tetrapetalis.
Linn. syst. 765.

(Pl. americ. pict. Tab. 251. *Ramulus florens*).

Clusia arborea; foliis crassis nitidis obovato-subrotundis,
floribus solitariis. Brown. jam. I, p. 236.

Terebinthus folio singulari non alato, rotundo, succu-
lento, flore tetrapetalo pallide luteo. Sloan. hist. jam.
2, p. 97, t. 200, f. I.

* *Hermaphroditus sterilis.*

CAL. Perianthium hexadecaphyllum, quadrangulare, im-
bricatum: foliolis subrotundis, concavis, obtusis, ere-
ctis, interioribus gradatim majoribus, quatuor in quo-
libet ordine.

COR. Petala quatuor, obverse ovata, obtusa, concava,
omnium crassissima; quorum duo opposita erecta, paulo
latiora reliquis conniventibus.

STAM. Filamenta numerosa, oblonga, quadrangularia,
crassa, apice depresso, brevia, denso ordine posita in
receptaculo proprio quadrangulari magno. Antheræ in
quolibet filamento geminæ, ex lineis duabus utrinque
lateri cujusque filamenti affixæ.

PIST. Germen subrotundum, minimum, in medio stami-
num receptaculo. Stylus nullus. Stigma crassum, ca-
pitatum, auctum quatuor appendiculis lateralibus.

PER. abortat.

* *Flos fertilis.*

PER. Capsula subrotunda, magna; coronata stigmatibus
duodecim, non contiguis, simul formantibus quadran-
gulum, area media vacua, circiter duodecimlocula-
ris & duodecimvalvis; valvulis crassis, tum radiatim pa-
tentibus.

SEM. plurima, oblonga, pulpæ involuta, affixa Recepta-
culo oblongo magno duodecimsulcato.

Arbor præcedenti simillima rupibus arboribusque pa-
rasitica innascitur, & succo scatet glutinoso ac albicanti.
Florum nullo præditorum odore petala flavescent. Initi-
nere constitutus flores plurimos fructusque ex eadem carpos
arbore, mecum tuleram examinandos. Inveniebam, fru-
ctus allatos, nullo modo respondere germinibus, qui in
floribus continebantur; adeoque ortos eosdem fuisse ex
floribus fœmineis aut hermaphroditis fertilibus distinctis,

quorum ulterior observandorum occasio postea defuit. Videtur autem hos descripsisse Browneus, apud quem character petatur. Sloaneus pro fructu delineat describitque florem nedum explicatum: unde, germine fortasse in flore exsiccato pro semine habito, fructum ille dixit monopyrenum. Stigmata autem in fructibus virecentibus puncta referebant dumtaxat majuscula extantia & fusca.

Crescit in Jamaica ad pedes montium in Ferry.

4. CLUSIA (*venosa*) foliis venosis. *Linn. syst. 765.*

Clusia alia minor, flore albo, fructu flavescente. *Plum. ic. 87, f. 2.*

CAL. Perianthium tetraphyllum, foliolis subrotundis, obtusis, concavis, patentissimis; quorum exteriora duo paulo angustiora & acutiora.

COR. Petaia quatuor, ovata, obtusa, patentissima, calyce paulo longiora, quorum duo partim coalita.

STAM. Filamenta numerosa, filiformia, planiuscula, erecta Antheræ oblongæ, erectæ.

PIST. Germen ovatum. Stylus nullus. Stigma planum, sessile, quinquefidum.

PER. & SEM.

Arbor erecta, comosa, triginta pedes alta. Folia venosa, quadripollucaria. Flores diametro sesquipollucari, petalis albis. Fructum non vidi; hinc certo non ausim asserere genus. Incolis dicitur *Paletuvier de montagne*.

Crescit in sylvis montosis humidis Martinicæ.

DIOECIA.

I. PISONIA (*aculeata*) spinis axillaribus, patentissimis.

Linn. syst. 773.

Pisonia aculeata, fructu glutinoso & racemoso. *Plum. gen. 7, ic. 227.*

Pisonia assurgens, faremento valido, foliis ovatis utrinque productis, spinis validis recurvis, racemis lateralibus. *Brown. jam. I, p. 358.*

Paliuro affinis arbor spinosa, flore herbaceo pentapetaloidie, fructu sicco nudo cannulato lappaceo. *Sloan. hist. jam. 2, p. 25, t. 167.*

Rhamnus, an potius Lycium, Fringego jamaicensibus dictum. *Pluk. alm. 318, t. 108, f. 2.*

* *Hermaphroditus sterilis.***CAL.** nullus.**COR.** monopetala. *Tubus infundibuliformis. Limbus semi-quinquefidus patenti - reflexus: laciniis subrotundis, acuminatis, ferratis.***STAM.** Filamenta sex, interdum septem, rarius quinque, rariissime octo, capillaria, patula, corollam superantia. Antheræ subrotundæ, didymæ.**PIST.** Germen ovato-oblongum. Stylus filiformis, eretus, brevis. Stigma penicilliforme.**PER.** abortat.* *Flos fœmineus in diversa planta.***CAL.** nullus.**COR.** monopetala, tubulosa; ore quinquedentato, acuto; decidua.**PIST.** Germen ovato-oblongum. Stylus filiformis, eretus, corolla duplo longior. Stigma bifidum, reflexum.**PER.** Capsula ovalis, obtusa, pentagona, angulis instratis serie longitudinali simplici denticulorum obtusorum, unilocularis, non dehiscens.**SEM.** unicum, oblongum, glabrum.

Arbor inelegans, virgata; ramis teretibus, reclinatis, & sustentaculo gentibus. Spinæ subulatæ, acuminatæ, axillares, oppositæ, perpendiculares ad ramum, fortes, apicibus recurvis. Folia ovalia, acuta, integerrima, glabra, petiolata, opposita. Racemi corymbosi, ramosi, axillares & terminales, folia non superantes, in fructibus valde elongati. Flores parvi; numerosi, e luteo virentes; suffulti bracteis subulatis tribus, si flos ramulum racemi terminat, at duabus, si hujus lateri insidet, inseriente tunc ipso racemo loco tertiae. Clarissimi Brownii admonitus descriptione de magna in floribus varietate sexus, arbusculas plurimas, quæ circa oppidum Kingston passim crescunt, haud perfunctorie vicibusque repetitis examinavi; quas semper offendi ratione exposita dioicas. Interdum quidem imponebant mixtis farmentis una in dumetum enatæ hermaphrodita & fœminea; at utriusque ramos radicem usque secutus, distinctissimas esse compreziebam.

Crescit in Jamaica & Domingo.

2. **PISONIA (inermis)** caule inermi. Linn. *Syst. 773.*

* Her.

* *Hermaphroditus sterilis.*

CAL. nullus.

COR. monopetala. Tubus infundibuliformis. Limbus pa-
tens, levissime quinquedentatus.

STAM. Filamenta sex, capillaria, erecta, corolla longiora.
Antheræ subrotundæ, didymæ.

PIST. Germen ovato - oblongum. Stylus filiformis, ere-
ctus, brevis. Stigma penicilliforme.

PER. abortat.

* *Hermaphroditus fertilis in diversa planta.*

CAL. nullus.

COR. monopetala, tubulosa, decidua; ore quinquedentata-
to, acuto.

STAM. Filamenta sex, capillaria, erecta, corolla duplo
breviora. Antheræ didymæ, planæ, polline carentes,
hinc steriles.

PIST. Germen ovato - oblongum. Stylus filiformis, ere-
ctus, corolla paulo longior. Stigma penicilliforme.

PER. Bacca oblonga, teres, obtusa, unilocularis,

SEM. unicum, oblongum.

Arbuscula inermis, erecta, comosa, duodecim vel
interdum viginti pedes alta, trunco diametri quinquepoli-
licaris; si in fruticetis densis crescit, habitum acquirit in-
elegantem nec multum præcedenti absimilem. Folia sunt
ex oblongo lanceolata, acuminata, cæterum qualia in priore.
Racemi etiam sunt similes; at qui non elongentur in fru-
ctibus, sed qui persistant post eorundem casum, & tunc
rubescant. Bractæ eadem. Flores levi odore prædicti,
parvi, e luteo virentes. Bacca nigricat, mollis est, pul-
pamque continet albicantem. Hæc sæpe abest, ab insectis
forte comesta, ita ut solum superfit semen: reperitur enim
semper in fructibus immaturis. Nullatenus hæc arbor con-
venit cum iconè delineata in Horto Malabarico sub no-
mine Katu-kara-walli.

Crescit frequens in sylvaticis & fruticosis territoriis
Carthagensis.

I. DIOSPYROS (*inconstans*) floribus monœciosis.
(Pl. americ. piæ. Tab. 263, fig. 87. Flores duo varii. Fru-
ctus cum calyce. Semen).

* *Hermaphroditus fertilis.*

CAL. Perianthium monophyllum, coriaceum, crassum,

persistens. *Tubus campanulatus.* Limbus longitudine tubi, trifidus vel quadrifidus: laciniis subrotundo-cordatis, planis, acutiusculis, patentibus.

COR. Petalum coriaceum, crassum, calyce duplo longius. *Tubus ovatus,* interne villosus, calyce paulo longior. *Limbus trifidus:* laciniis ovatis, concavis, acuminatis, rigidulis.

STAM. Filamenta a tribus ad decem, subulata, erecta, receptaculo inserta. Antheræ lanceolatæ, acutæ, erectæ, fere longitudine tubi corollæ.

PIST. Germen subrotundum, villosum. Stylus crassus, erectus, longitudine staminum, semitrifidus. Stigmata bifida, obtusa.

PER. Bacca corticosa, globosa, styli parte acuminata, nitida, sexocularis.

SEM. solitaria, oblonga, cartilaginea, hinc convexa, illinc angulata, dissepimento pulpoſo & membranaceo distincta.
* *Hermaphroditus* sterilis in eadem planta.

PIST. Stylus truncatus. Cætera ut in fertili.

Arbuscula decempedalis, erecta, ramosa. Folia sunt oblonga, superne latescentia, integerrima, obtusa vel acuta, nitida, subcoriacea, petiolata, alterna, quinquepollicaria, disticha, in ramulis junioribus distichis. Pedunculi communes triflori, axillares, breves, solitarii, retrorsum flexi; interdum multiflori, ramosi, vel vari, idque in arbusculis minus concinnis. Flores inodori, magnitudine diversa; in quibus calycis laciniæ nunc patentissimæ sunt, nunc suberectæ. Corolla flavescens limbum habet leviter patentem vel erectum, ſemper a me observatum trifidum. Si stamina sunt decem, alterna tunc breviora habentur; numero autem sunt inconstantissima, tribus pauciora nunquam, nec decem plura. Bacca ſordide lutea nitidaque pulpam continent atram & amariuscum, avibus aut insectis amatam; quum erosas laceratasve inveni plerasque & feminibus orbas.

Crescit Carthaginæ paſſim in fruticosis & sylvaticis maritimis. Floret imprimis Auguſto & Septembris.


CRYPTOGAMIA. MUSCI.

I. LYCOPODIUM (*dichotomum*) foliis sparsis, linearibus, acuminatis, integerrimis; caule dichotomum; floribus axillaribus.

(Pl. americ. pict. Tab. 252. *Tota planta junior florens*).

Ex radice perenni caulis exit, tandem in provectione ætate bipedalis, glaber, totus foliosus, in ramos divericatos totus dichotomus, erectus quidem, sed debilis, ut rami undique versus terram recurventur. Folia sparsa, numerosa, linearia, acuminata, integerrima, glabra, patentula vel erecta, inferiora ferme uncialia. Flores globosi, flavi, axillares, solitarii, in ramis superioribus.

Crescit in Martinicæ montibus uidis & umbrosis.



APPENDIX.

1. **COCOS** (*nucifera*) caule inermi; frondibus pinnatis: foliolis replicatis. *Linn. syst. 827.*
(Pl. americ. piat. Tab. 253. Tota arbor fructescens, centies imminuta).
- Palma spadicibus alaribus; fructu maximo: caudice subæquali, cicatriculis circularibus scabro, foliolis ensiformibus replicatis pinnatis. *Brown. jam. I, p. 341.*
- Palma indica coccifera angulosa. *Pluk. alm. 275.*
- Calappa. *Rumph. I, p. 1, t. I, 2.*
- Tenga. *Rheed. mal. I, p. 1, t. 2, 3 & 4.*
- * Hermaphroditi masculi flores.
- CAL.** Spatha universalis, simplex, lanceolato-oblonga, acuminata, concava, magna, univalvis, persistens. Spadix ramosus, spatha longior.
- Perianthium triphyllum, minimum: foliolis subtriquetris, acutis, concavis, coloratis.
- COR.** Petala tria, ovata, acuta, planiuscula, patula.
- STAM.** Filamenta sex, subulata, longitudine corollæ, quorum tria alterna inter petala foras reflexa, reliquis patulis. Antheræ hastatæ, magnæ, incumbentes.
- PIST.** Germen trifidum, parvum. Styli tres, breves. Stigmata obsoleta.
- PER.** abortat.
- * Fœminei flores in eodem infra masculos spadice.
- CAL.** Spatha eadem cum hermaphroditis.
- Perianthium triphyllum, persistens: foliolis subrotundis, concavis, conniventibus, coloratis.
- COR.** Petala tria, persistentia, simillima calyci.
- PIST.** Germen subrotundum, magnum. Stylus brevissimus. Stigma tripartitum, acutum.
- PER.** coriaceum, fibrosum, crassum, maximum, subovatum, obsolete trigonum.
- SEM.** Nux maximæ, subovata, acuminata, obtuse & obsolete trigona, basi tribus foraminibus obsoletis notata, trivalvis. Nucleus cavus, aqua repletus Crescit in Caribæis & Continente vicina.
2. **COCOS** (*amara*) nucleo amaro.

Arbor præcedenti simillima, cujus flores non examinavi. Spatha & spadix hæc differunt. Fructus autem ovi anserini dumtaxat magnitudine edules non sunt, & nucleus liquoremque continent amarissimos. Altitudine passim centum pedes hæc palma excedit. Juniores adhuc & vix duodecimpedalem incisura longitudinali vulnerare solent incolæ, ut in facto foramine ova deponant sua curculiones palmarum; e quibus nascantur erucæ illæ pinguisimæ ex albo flavescentes, quæ assatæ in deliciis habentur. Gallis dicitur *Palmiste amer* sive *Palma amara*.

Crescit copiose in Martinicæ sylvis densis & montosis.

3. COCOS (aculeata) truncо foliisque aculeatis.

(Pl. americ. piſt. Tab. 254. *Tota arbor frutescens, quinquefides imminuta. Dein fructus in naturali magnitudine.*)

Arbor præcedentibus similis; truncо crassiori & aculeis paucis obſito; costis utrinque aculeatis. Flores ut in *Coco nucifera*. Fructus sunt subrotundi, pomi parvi magnitudine, virides; cortice fibroſo, crasso, parum succulento. Nux ejusdem figuræ. Incolis vocabulo *Caribæo* dicitur *Grougrou*.

Crescit in Martinica.

1. ARECA (oleracea) foliolis integerrimis. Linn. ſyſt. 828.

(Pl. americ. piſt. Tab. 255. *Tota arbor frutescens, cincties imminuta. Dein in magnitudine naturali drupa, nux, nucleus, idemque transverse ſectus.*)

Hæc arbor, palmas inter Americanas altissima, cujus calyx ex fructu videtur esse monophyllus & semitrifidus, floris autem character reliquus mihi est ignotus, distinctissima est ab *Areca Cathecu*, ut ex lectione authorum apud Linnæum laudatorum facile perſpexi. Vaginæ foliorum mutuo amplectuntur arctissime, & trunci constituunt supremam partem ſequipedalem viridemque. Infra hanc exeunt spathæ virides nitidæque, quæ ad eruptionem spadicis ramosissimi in terram delabuntur. Fructus sunt baccae oblongæ, obtusæ, leviter incurvæ, e cærulo purpureæ, succulentæ, vix fibroſæ, magnitudine olivæ minoris. Pulpa in fructu exſiccato perit, evaditque tunc cortex fragilis & rugosus. Nux glabriuscula, oblonga, basi subacuta, membranacea, fragilis, tenuis, & e fusco leu-tophæa cum rubidine levi ſæpe mixta, nullis foraminibus

notatur. Nucleus cartilagineus, oblongus, durissimus, in medio fissuræ exiguae cavitatem habet. Solent incola apicem trunci viridem amputare, cujus partem internam duos tresve pollices diametro æquantem, albicanter, constantemque foliis plicatis compactisque, eximunt, & in foro oleraceo exponunt. Vocatur tunc *Choux palmiste* seu *Brassica palmarum*, habetque saporem cynaræ. Comeditur cruda cum pipere & sale; vel etiam frixa cum butyro; vel patinaria. Gallis arbor audit *Palmiste franca* id est, *Palma sativa*.

Crescit vulgaris in Caribæis.

I. BACTRIS (*minor*) fructibus subrotundis.

(*Pl. americ. pict. Tab. 256.* Tota planta fructescens, species imminuta. Dein in magnitudine naturali drupa, nux, nucleus, & foliolum).

Cocos guineensis. *Linn. syst. 818.*

* Masculi flores.

CAL. Spatha universalis, monophylla, ovato-acuminata, concava, magna, patens, dorso aculeata, univalvis, persistens. Spadix ramosus, longitudine spathæ.

Perianthium monophyllum, profunde tripartitum, corollæ concolor; laciniis lanceolatis, acuminatis, concavis, patulis, longitudine fere tubi corollæ.

COR. monopetala, obverse ovata, triquetra, trifida: laciniis semiovatis, planis, acutis, erectis, tubo paulo longioribus.

STAM. Filamenta sex, subulata, erecta, longitudine fere corollæ, cujus in media parte tubi orta. Antheræ oblongæ, incumbentes.

* Fœminei flores pauci in eodem spadice maribus intermixti.

CAL. Spatha eadem cum maribus.

Perianthium monophyllum, campanulatum, minimum, corollæ concolor, margine tridentato, persistens: denticulis acuminatis, minimis, remotis.

COR. monopetala, ovata, erecta, longitudine germinis, idemque stricte amplectens, apice tridentato, persistens.

PIST. Germen ovatum, magnum. Stylus brevissimus. Stigma capitato-obtusum, obsolete trifidum.

PER. Drupa subrotunda, depressula, succulenta, fibrosa, stylo acuminata; cortice coriacea.

SEM. Nux subrotunda, utrinque depressa, notata tribus foraminibus lateralibus obsoletis, quorum duo magis approximata tertio opposita. Nucleus ejusdem figuræ, cartilagineus, solidus, in locis, quæ foraminibus nucis correspondent, excavatus tribus foveis.

Radix nodosa, teres, trunco crassior, brevis, mox sub terra horizontaliter inflebitur, repit, proximeque emittit truncum novum; atque ita pergendo, tandem dumetum veluti palmarum efficit: radicibus insuper aliis fibrosis & tenuibus solo firmiter affixa. Truncus erectus aculeis armatur numerosissimis, instruitur stipitibus aliquot semilaceris & emarcidis, crassitie diametrum æquat circiter pollicarem, altitudine pedem duodecimum raro excedit in apricis, in umbrosis saepe paulo altior, quadripedalis jam flores proferre incipit. Cortex est subfuscus. Folia sunt subfrondosa, pauca, basi amplexicaulia, pinnata: costa aculeata: feliolis ensiformibus, acuminatis, nitidis, planis, basi levissime replicatis, serrato-aculeatis, (aculeis tenuissimis, digitoque ab apice versus basin moto tantummodo animadvertisendis,) inermibus, vel aculeis raris utrinque obsitis, plerumque alternis, interdum oppositis, numero inconstanti. Spathæ axillares, solitariae, patentes, diutissime post fructuum maturitatem persistentes; quo fit, ut infra frondem saepe duo vel tria conspiciantur folia spatham spadicemque emarcida in alis locantia. Flores inodori levissime flavescunt. Fructus atropurpurei & cerasi vulgaris magnitudine succum continent acidulum, e quo vinum conficiunt Americani. Hi edules etiam sunt, at non grati. Exsiccatos plures mecum in Europam portaveram lagenæ inclusos, qui post novem menses Viennam reduci fere totidem mihi vivos excuderunt dermestes. Ex trunco cortice nudato cannæ fiunt atræ, nitidæ, nodis interstinctæ, levissimæque, quas Galli *Cannes de Tabago* sive *Cannas* insulæ Tabago vocant, & quæ in Europam quandoque transportantur. Ratione harum cannarum ἀπὸ τῆς Βάντζης sive a baculo Baetridem arbitrario nomine derivavi. Incolis inservit regularum, ad tecta componenda similiaque facientium, in locum; unde audit, *Higuero de lata*, id est, *Ficus regularum*. *Marcgravii Atitara* videtur ad hoc genus pertinere.

Crescit passim prope Carthaginem.

2. BACTRIS (*major*) fructu ovato.

(Pl. A. P. Tab. 263, fig. 88. *Fructus. Nux. Nucleus*).
Fructus exoticus. Clus. exot. l. 2, c. 23, f. 2.

Palma habitu & crescendi modo præcedenti simillima; sed quæ plerumque ad viginti quinque pedum altitudinem excrescit, & truncum acquirit diametri bipollicaris vel crassiorem. Folia sunt sexpedalia; foliolis fere bipedaliibus, aculeis marginalibus fuscis magisque conspicuis. Spadix compresso-planus ob fructuum pondus reclinatur. Calyx & corolla in fructu sunt multicrenata, quod idem obtinet in priore. Drupa figura & magnitudine ovi, stylo acuminata, fibrosa, succulenta, edulis, acidula, cortice vestitur coriaceo & saturate purpureo, ex qua itidem vim parant incolæ. Nux atra, magna, ovato-oblonga, apice acuminato trifidoque, tribus foraminibus obsoletis notata, quorum duo paulo supra medietatem locantur, tertium altius. Nucleus oblongus, utrinque obtusus, cartilagineus, solidus, nec cavus. Fructus in foro veneunt vocanturque *Cocorotes*.

Crescit Carthagena in sylvis.

1. ELAEIS (*guineensis*). Linn. syst. 828.

(Pl. americ. piæt. Tab. 257. *Tota planta florens, duæ decies imminuta. Dein in magnitudine nativa fructus & nux*).

Palma pinnis & caudice ubique aculeatissimis, fructu magno. *Brown. jam. 7, p. 344?*

* Flores hermaphroditæ steriles.

CAL. Spatha . . . Spadix ramosus, compressus, dense spicatus.

Perianthium hexaphyllum: foliolis subovatis, concavis, obtusis, erectis, conniventibus.

COR. monopetala. Tubus subovatus, erectus. Limbus sexfidus, acutus, erectus, longitudine perianthii.

STAM. Filamenta sex, subulata, subtriquetra, erecta, fere longitudine corollæ. Antheræ oblongæ, acutæ, magnæ, extra corollam reflexæ.

PIST. Germina tria, oblonga, erecta, tubo corollæ breviora. Styli obtusi; truncati. Stigmata nulla.

PER. abortat.

* Fæminei flores in eadem planta.

- CAL.
 COR. Petala sex,
 PIST. Germen ovatum, desinens in Stylum crassulum, brevem. Stigma trifidum, reflexum.
 PER. coriaceum, subovatum, obtusum, inæqualiter compresso-angulatum, fibrosum, oleo scatens, crassum, uniloculare.
 SEM. Nux ovata, acuminata, obsolete trigona, basi tribus foraminibus obsoletis notata, unilocularis, trivalvis, Nucleus cavus.

Arbor, e qua descriptionem concinnavi, erat fortassis decennis, & triginta pedum altitudine. Truncus erectus est, ac inæqualis a foliorum stipitibus diu persistentibus eoque longioribus. quo proprioribus frondi. Folia sunt pinnata: costa rigida, quindecimpedali, infra foliola ad quadripedalem longitudinem armata utrinque in marginibus spinis subulatis; quarum superiores hamatæ & recurvæ sunt, intermediæ rectæ, infimæ patulæ duploque cæteris longiores: foliolis ensiformibus, acutis, inermibus, basi replicatis, sesquipedalibus, pollicem latis. Emarcidis atque abscendentibus foliolorum paginis, remanet aliquamdiu medius nervus rigidus spinamque mentitus. Spadix axillaris, pedalis, valde compressus, erectus, in quinquaginta circiter dividitur ramulos quinquepollicares, erectos, digitum crassos, compacte spicatos, imbricatim & inordinate dispositos, apicibus triangularibus & acuminatis. Hos totos, exceptis apicibus, occupant flores parvi, singuli ad basin suffulti bractea propria subrotunda parvaque, quæ cujuslibet ramusculi infima multo reliquis major est, augeturque acumine lanceolato. Magnam quoque sui partem ramusculis immerguntur; & odorem vespertino præprimis tempore late exhalant singularem & fortissimum, ac si quis anisi olfaceret semina mixta cum foliis scandicis cerefolii. Prævio meo jussu allatus ad me fuit integer hic spadix, quem modo descripsi, desumptus ex eadem arbore, in qua antea flores fœmineos collegeram, exsiccatos hic illic inter pinnas hærentes, qui characterem dederant incompletum. Ab his vero, quotquot erant in spadice, discrepabant, & videbantur steriles omnes. Id casu accideritne, an autem utriusque sexus flores spadicem vindicent sibi proprium? ignoro. Pericarpium ovo colum-

bino majus, & ex luteo nigro ac rubello varium, oleo abundat, quod vel leviter pressum digitis exsudat. Nux atra notatur striis albidis longitudinalibus interruptis. Ex Guinea vulgo fertur in Martinicam translata, omniumque ibidem est in ore, e fructibus contusis & expressis parati oleum sic dictum palmarum. Ego in America sylvestrem hanc arborem nullibi vidi. Gallis nuncupatur *Palmita*. Nomen genericum ab oleo imposui.

Crescit in hortis Martinicæ rarius.

Datur alia Palma spinosissima, habitu præcedenti quodammodo similis, quæ Martinicensibus *Grigri* Caribæo nomine vocatur, & quam examinare neglexi. Hæc fructus fert edules, saporis aciduli, globosæ, leviter depresso, stylo acuminatos, coccineos, nitidosque. Pulpa drupæ pauca est, rubra, mollis, nec fibrosa; & circumdatur pellicula tenuissima. Nux fusca tribus foraminibus obsoletis excavatur, e quibus per reliquam superficiem venarum ad instar stellatim lineolæ excurreunt. Nucleus cartilagineus est cavusque.

(Pl. americ. pict. Tab. 263, fig. 89. Fructus. Nux).

Fructus rotus transversim sectus.

Alia Palma in territorio Carthaginensi occurrit, Corozo incolis dicta: e cuius fructibus oleum butyrumque conficiunt Americani iu usus domesticos. Horum pericarpium externe nitidum luteumque, calyce triphylio corollaque tripetala persistentibus nitidisque suffultum, parum fibrosum, nec crassum, continet oleum gratum & leviter odorum. Est autem figura ovatum & obsolete trigonum. Nux atra & nitida, ejusdem figuræ, basi tribus foraminibus obsoletis pervia est; nucleusque habet subrotundum, cartilagineum, durissimum, solidum, centro leviter fiso.

(Pl. americ. pict. Tab. 263, fig. 90. Fructus. Nux.
Nucleus).

I. *GYROCARPUS (americanus)*.

(Pl. americ. pict. Tab. 258. Folium, fructus, semen, idem que transverse sectum).

Arbor elegans, procera, ramosa. Folia maxima, petiolis longis donata, alternatim sparsa, nitida, basi subcordata, semitriloba; lobis semiovatis, acuminatis, integrerrimis, lateralibus paulo brevioribus: vel interdum

in eadem arbore folia sunt integerrima & ovata. Racemi sunt laxi & terminales. Flores non vidi. Fructus est bacca exsucca, ovata, obtusa, rugosa, unilocularis, apice austa alis duabus, cuneiformibus, obtusis, erectis, omniumque maximis, quæ fortasse calycem in flore superum constituerunt. Semen unicum, subrotundum, obsolete sulcatum, lamellas suas varie involutas discissum transversim ostendit. Pueri, ludendi gratia, hosce solent fructus projicere in altum, qui alis suis sustentati, & hinc in continuos gyros abrepti, lente in terram descendunt. Hinc nomen imposui.

Crescit passim Carthagena in sylvaticis.

I. ANISOPHYLLUM (*pinnatum*).

(Pl. americ. piæt. Tab. 262, fig. 72. *Foliolum*).

Arbor erecta, ramosa, quindecimpedalis, ramis iunioribus, costis foliorum, eorundemque nervis mediis verrucosis. Folia pinnata, alterna, pedalia; costa subvillosa; foliolis utrinque quinque cum impari, ex ovato oblongis, crenatis, glabriusculis, obtusis, leviter emarginatis, venosis, mollibus, quadripollicaribus, subsessilibus. Hæc recentia odorem exhalant Anisi seminibus simillimum; unde incolis dicitur *Arbol de quien las ojas huelen el anis*, sive *Arbor*, cuius folia anisum olent. Nec flores, nec fructus cogniti mihi sunt.

Crescit copiose in sylvaticis insulæ Baru.



Verlags-Catalogus der neuen Hof- und Akademischen Buch- handlung in Mannheim.

Bemerkungen der Kurpfälzischen physikalisch-ökonomischen Gesellschaft, 8. Jahrgänge von 1775-1783.

Mit diesem Jahrgang ist das Werk geschlossen, und enthält dieser letzte Band deswegen ein systematisches und Namen-Register von sämtlichen Bänden.

Beobachtungen (wichtige) über den Gebrauch des Magensastes in der Wundarzneikunde, gesammelt von J. Senebier, aus dem Franz. 8. 1785.

Betrachtungen über das Universum, dritte Auflage, 8. 1787.

Borowski (Georg Heinrich) Abriss einer Naturgeschichte des Elementarreiches, 8. 1779.

von Dalberg (Fritz) Blicke eines Tonkünstlers in die Musik der Geister, 12.

Dass die Pfalzgrafen bei Rhein noch vor der Wittelsbachischen Regierung die ersten weltlichen Churfürsten und Reichsdruckhessen gewesen se. 4. Fft und Leipzig 1786.

Des Billons (F.J.) Ars bene valendi, 8. 1788.

— Fables en François avec le texte latin, 2 vol. 8. Charta scriptoria

Dieterich von Ruben, ein Lustspiel in einem Aufzuge, von D. Beil, 8. 1786.

Faber (J. G.) die Religion eines ehrlichen Mannes, 8. 1787.

Geschichte Florentins von Fahlendorf, von Heinrich Stilling, 3 Theile, 8.

Geschichte der Theodore von der Linden, 2 Theile, 8.

Hemmers (J.) Anleitung, Wetterleiter an allen Gattungen von Gebäuden auf die sicherste Art anzulegen, mit einer Kupferafel, zweite, mit wichtigen Zusätzen, neuen Entdeckungen, und einem Anhange von den Verhal-

- kungsregeln zur Gewitterzeit, vermehrte Auflage, gr.
8. 1788.
- Herzog Otto und Heinrich der Vierte, dramatisirt von
E. G. 8. 1787.
- Jacquin (N. J.) Selectarum Stirpium Americanarum hi-
storia, 8. maj. 1788.
- Jungs (D. H.) Lehrbuch der Forstwirthschaft, 2 Theile,
zweite vermehrte und verbesserte Auflage, 8. 1787.
- — Versuch einer Grundlehre sämtlicher Cameralwiss-
senschaften, 8. 1779.
- Kempis (Thomæ a) de Imitatione Christi, libri quatuor,
a F. J. Des Billons recensiti & auctori suo denuo vindicati,
charta scriptoria, 8vo.
- Lamezan (von) Skizze über die Gesetzgebung, 8. 1780.
- Langsdorf (Karl Christ.) Untersuchung über die Bewe-
gungskräfte auf Salzwerke, 8. 1780.
- Matthiassons (F.) Gedichte, auf Schreibp. und Druckpap.
- May (F.) vermischtte Schriften, 8.
- Medicus (Friedr. Casim.) Beiträge zur schönen Garten-
kunst, zweite Auslage, gr. 8. Schreibpap. und Druck-
papier.
- — Botanische Beobachtungen des Jahres 1782.
Vier Hefte.
- — Botanische Beobachtungen vom Jahre 1783.
gr. 8.
- — Wie kann elender Ackerbau in einen bessern ver-
wandelt werden?
- — Theodora speciosa, ein neues Pflanzen Geschlecht,
nebst einem Entwurfe, die künstliche und natürliche
Methode in Ordnung des Pflanzenreichs zugleich an-
zuwenden, als der sichersten, ein Pflanzenkennner zu
werden, gr. 8.
- Medicus (Friedr. Casim.) über einige künstliche Ge-
schlechter aus der Malven-Familie, dann der Klasse
der Monadelphien, gr. 8.
- Metzger (Joh.) Tabulæ ascensionum & aberrationum
præcipuarum utriusque Hemisphæri, 350 stellarum
fixar. 1779. 8.
- Müller (J. T.) Systema pandectarum ad fora Germanie
adPLICatum & in usum auditorum ad prælectiones ad-
ornatum, Tomi 4, seu 7 partes, 8. maj.
- — Jus Criminale, 8. maj.

- Pfälzbaierische Beiträge, 1782.
Pfälzische Merkwürdigkeiten, 12.
Pfälzischen Geschichte (kurzer Auszug der) von den ältesten Zeiten an, bis auf den Zurückfall des Herzogthums Baiern an das Kurhaus Pfalz, 8. 1777.
Rheinische Beiträge zur Gelehrsamkeit, 1780 - 1781. gr. 8.
Sammlung kleiner Schriften der Kämeral Hohen Schule zu Lautern, die seit 1775 bis 1781 erschienen sind, 8. 1781.
Die Schauspieler-Schule, ein Original-Lustspiel in drei Aufzügen, von D. Beil, gr. 8.
Schmid, (Ludw. Benj. Mart.) Lehre von der Staatswirthschaft, 2 Bände, 8.
Schreiben Pius des VI. an den Bischoff zu Freisingen, 4.
Stein (J. H.) Versuche und Beobachtungen über Anwendung ausländischer Pflanzen an den Westphälischen Himmelstrich mit einer Vorrede von R. R. Medicus, 8.
Suckow's mineralogische Beschreibung des natürlichen Turpeths, 8.
Ueber Fasten und Abstinenz, dem Burger und Bauermann gewidmet von einem katholischen Weltpriester, M. v. B. 8.
Verlobung (Die) oder Kindespflicht über Liebe, ein Lustspiel in einem Aufzuge, 8.
Versuche über die Platina, aus dem Französischen des Herrn Grafen von Sickingen, übersezt von Prof. Suckow. Virgils Georgicon in deutsche Hexameter übersezt von J. H. Jung, gr. 8.
Vorlesungen der kurpfälz. physik. ökonomischen Gesellschaft, erster Band, mit einer Kupfertafel, gr. 8. 1785. 2 Bände.
Vorlesungen (zwei) I. Otto V. Pfalzgrafen von Wittelsbach, von F. P. Wund. II. Von der Nachahmung in der Vaterlandsliebe, von J. H. Jung.
Warwick (der Graf von) ein Trauerspiel in fünf Aufzügen, gr. 8.
Widders Versuch einer vollständigen Beschreibung des Kurfürstl. Pfalz am Rhein, 3 Theile, 8.
Derselben vierter und letzter Band.

Auctores Classici
der Mannheimer Auflage
auf Schreibpapier.

- Cornelius Nepos, nach Philippus und Heusinger, Catalogus editionum nach Philippus 1778.
P. Virgilii Maronis Opera, nach Heyne, 2. tom. 1779.
C. Crisp. Salustii Opera quæ supersunt omnia, nach Cortius 1779.
Q. Horatii Flacci Opera, nach Burmann und der Auflage von Cambridge 1699. 2. Tom.
C. Julii Cæsaris commentarii de bello gallico & civili, nach Oudendorp und Scaliger, 1779, 2. Tom.
M. Annæi Lucani Pharsalia, nach Cortius.
L. Annæi Flori Epitom. rer. Romanar. nach Grævius 1779.
Tit. Livii Patavini historiarum libri qui supersunt omnes, nach Drackenborg, cum supplementis Freinsheimii, 1779. 1780. 12 Tomi.
C. Corn. Taciti Opera, recognovit, emendavit, supplementis explevit Gabriel Brotier, 1780. 5. Tom.
D. Junii Juvenalis Satyræ ex recensione Henr. Christi Henninii, Auli Persii Flacci satyræ, ex recensione Isaaci Casauboni, & Sulpiciæ satyra, 1781.
Scriptores rei rusticæ Veteres latini Edit. Gesneri.
a) Columella 2. Tom.
b) Cato & Varro in einem Bande.
c) Palladius.
d) Vegetius.
Ausonii Opera ex editione in usum Delphini.
Martialis Epigramatum ad optimos codices Parisiis perime recensit. & castigat. 2 Tom.
Papinii Statii Opera, Tom. 2.
Ciceronis Opera, 20 Tomi.
Phædri Augusti liberti fabularum æsopiarum libri 5, cum Notis & Emendationibus Francisci Josephi Des Billons, ex ejus commentario pleniore desumptis, gr. 8. Post papier, Schreibp. und Druckp.
Suetonii (Caj. Tranq.) quæ supersunt omnia, 2 Vol. 8 Ch. script,

xxxii.





